




~~o~~ 173 Gall. sp. 121<sup>h</sup>



BIBLIOTHECA  
REGIA  
MONACENSIS.

Ex donat. Molliana.

A

<36600646590013



<36600646590013

33 Bayer. Staatsbibliothek

8



# HISTOIRE

D V

## DERNIER SIEGE DE LA ROCHELLE

OV SE VOIT PLUSIEURS  
CHOSSES REMARQUABLES  
qui se sont passez en iceluy.

Par PIERRE MERVAVLT

*Rochelois.*

R



A R O V E X ;

Chez { JEAN BERTHELIN, Et  
IACQUES CAILLOVE, dans  
la Court du Palais.

---

M. DC. XXXXVIII.

HISTOIRE  
DE  
L'EMPIRE  
ROMAIN  
PAR  
M. DE LA HARPE  
DE L'ACADEMIE  
FRANCOISE  
DE L'HISTOIRE  
ET DE LITTÉRATURE  
PARIS  
DE LA LIBRAIRIE  
NATIONALE

PAR  
M. DE LA HARPE  
DE L'ACADEMIE  
FRANCOISE  
DE L'HISTOIRE  
ET DE LITTÉRATURE  
PARIS  
DE LA LIBRAIRIE  
NATIONALE

Bayerische  
Staatsbibliothek  
München



# IOVRNAL DES CHOSES

PLVS MEMORABLES,

QVI CE SONT PASSEES

au dernier Siege de la  
Rochelle.

Par PIERRE MERVAVLT,  
*Rochelois.*



---

AVEC PERMISSION.

NOV 17 1791

DEPT. OF THE ARMY

PLANS MEMORIALS

GENERAL ORDER

TO THE ARMY

NOV 17 1791

THE TERRITORY OF THE ARMY

NOV 17 1791

GENERAL ORDER

TO THE ARMY

NOV 17 1791

NOV 17 1791

NOV 17 1791

ARMY PERMISSION





# PREFACE

D E

## L'AVTHEVR.

**L**ORS que le Siege de la Ville de la Rochelle , lequel ie descry , commença d'estre formé , i'estois seulement en l'An Vingtiesme de mon aage : & ayant esté esleué pour le Commerce , n'auois nul aide de lettres. Je ne laissois pourtant dès lors de prendre garde aux choses qui se passoient ; & outre ce que tous sçauoient , ayant mon Pe-


re , qui estoit du Corps de la Maison  
commune , & qui comme Maître de  
l'Artillerie exerçoit la seconde charge de la  
Ville , l'apprenois de luy diuerses parti-  
cularitez , & estois soigneux de cou-  
cher le tout par escrit. Au moyen de ce-  
la ie me suis trouué ce Iournal complet à  
la fin du Siege , & n'ay eü à y adiou-  
ster sinon la closture d'iceluy en la Red-  
dition de la Ville. Pour lors ie n'auois  
rien moins en pensée , que de dresser un  
ouurage pour le public : & me proposois  
seulement de faire des memoires pour mon  
usage particulier , si Dieu me faisoit la  
grace de suruiure. De là est venu que  
ce Recueil est demeuré en mon Cabinee  
tout cet espace , qui à coulé du depuis.  
Neantmoins les diuerses instances que  
plusieurs m'ont faictes de luy laisser voir  
le iour , l'ont enfin emporté sur ma pre-  
miere Resolution : & me suis laissé al-  
ler à le commettre à un Imprimeur.



Ny l'aage auquel i'estois lors , ny ma  
profession , ny le peu de soin que i'ap-  
portoys quant à la maniere de coucher  
les choses , croyant n'escire que pour  
moy , ne permettent pas qu'on attende  
un ouvrage exact , ny qui , quant à la  
forme & au stile , fust digne qu'on y  
jettast les yeux. Tout ce qui le peut re-  
commander , C'est quelque diligence, &  
une bonne foy toute entiere. Je le dy  
à l'esgard de ceux qui sont au loin, Veu  
que quant à ceux d'icy , ie les auray  
tous pour tesmoins de l'exacte verité de  
tout ce que ie dy : & que sans interest  
aucun , soit d'affection ou de Haine, ie  
fay un simple narré des choses , selon  
qu'elles sont aduenuës. Comme ce Sie-  
cle est fertile en bons Esprits , Si  
quelqu'un traualle à l'Histoire de  
nostre temps , ces Memoires luy pour-  
ront seruir. En tout cas plusieurs se-  
ront bien aises de sçavoir diuerses


*particularitez que ie leur ay icy re-  
cueillies.*

## PIERRE MERVAVLT:



L'Autheur n'a pû mettre le pre-  
sent Iournal en lumiere, plustost  
pour quelque raison particuliere,  
combien qu'il en auoit la permission  
il y a plusieurs Années.





I  
IOURNAL DV DERNIER  
*Siege de la Rochelle.*



Armée Naualle du Roy de  
la Grand'Bretaigne cōman-  
dée par le Duc de Bucking-  
ham grand Admiral d'An-  
gleterre, commença à paroi-

1627.  
Iuillet.

stre du costé des Sables d'Olonne le Mardy  
20. de Iuillet mil six cens vingt-sept, sur les  
huiët à neuf heures du matin, au nombre de  
dix huiët à vingt voilles. Du cōmencement  
on creut que ce fussent des Donkerkois, qui  
guettaissent au passage vne flotte de Hollan-  
dois, qui chargée de Sel estoit en rade à la  
Palisse & deuant Saint Martin ( principal  
Bourg de l'Isle de Ré ) & estoit preste à fai-  
re voile pour son retour en Hollande. Mais  
à leur approche on descouurit qu'ils estoient  
enuiroñsoixante ou quatre-vingts voiles,  
& se firent incontinent recognoître pour  
Anglois : Sur tout lors que passans deuant  
le Fort de la Prée, ils le saluèrent de forces  
coups de canons qu'ils continuerent le re-

A

1627. ste du iour, & le lendemain, ayans mouillé  
 l'aillet. l'ancre à la Palisse, & deuant la Pointe de  
 Sablançeau, l'vne des extremittez de ladite  
 Ile de Ré, du costé de la Rochelle.

Le Mercredy 21. les Rochelois celebrent le ieusne, au grand Temple, & à saint Yon, & à l'issuë de la premiere action, arriva à la Chaisne dans vne Chaloupe vn Gentilhomme Anglois nommé Becker, de la part du Duc de Buckinghant, & demanda de parler au Maire & à son Conseil, qui en ayans eu aduis enuoyerent vers luy les Sieurs Iean Prou Eicheuin, & Simon Theuenin Aduocat, afin de luy dire qu'ils estoient en deuotion, a cause du ieusne que l'on celebroit : & que pour ce iour là, il ne pouuoit estre ouy; ce qui l'obligea à s'en retourner assez mal content.

Le 22. iour de la Magdelaine, sur les neuf à dix heures du matin Monsieur de Soubize suiuy du mesme Sieur Becker, Agent du Duc de Buckinghant, se presenta à la Porte de S. Nicolas pour entrer en la ville. La Garde auparauant que de le recevoir aduertit le Maire, qui s'y estant aussi tost rendu, & le trouuant entre les deux Portes, luy remonstrate qu'elle consequence seroit son entrée en la Ville, & le prioit



se retirer vers le Duc de Buckinghant, s'il auoit à cœur & en recommandation le bien & conseruation de la Rochelle & des Eglises de France. Arriue là dessus Madame de Rohan sa mere, retirée en la Ville quelques mois auparauant, qui apres les embrassades & salutations le prit par la main, & luy dit d'une voix assez haute (afin d'estre ouye dudit Sieur Maire, & de force peuple qui estoit accouru là) mon fils venez voir vostre sœur qui est fort malade. Ausquelles paroles sans autrement demander l'adueu du Maire qui se trouua surpris, & n'osa ouuertement & par force s'opposer à luy, il entra dans la ville avec elle, comme fit aussi le sieur Becker, qui ayant demandé d'estre ouy au Conseil, qui se tint à la preldinée, il fit cette Harangue.

1627.  
Iuillet.

MESSIEURS, le suis enuoyé par Monseigneur le Duc de Buckinghant Grand Admiral d'Angleterre, pour vous exposer les raisons pour lesquelles, par le commandement du Roy mon Maistre, il est a present venu au lieu où vos yeux le peuuent voir: accompagné d'une flotte de Navires chargez de soldats, d'artilleries, & munitions, prests à descendre en terre si l'occaliō le requiert. Il est assez notoire au Monde com-

Harangue du  
Sieur  
Becker  
Agent  
du Duc  
de Bucking  
hant aux  
Roches,  
lois.

1627  
Iuillet

me le Roy de la Grand' Bretaigne nostre  
Maistre, depuis son aduenement à la Cou-  
ronne, & deuant, ayant en sa propre person-  
ne par vne aduanture fort rare, & par vne  
prudence beaucoup excédent son aage, des-  
couuert le danger, prest à tomber sur luy, &  
sur le reste de la Chrestienté, par l'ambi-  
tion, fraude, & puissance de la Maison  
d'Autriche: auroit vsé de toute industrie  
pour preuenir ce danger, autant par ses for-  
ces propres, que par celles de ses Alliez.  
A laquelle resolution, comme il a esté pou-  
sé par presque tous les autres Princes &  
Estats de la Chrestienté: Aussi ne là il esté  
par nul autre, avec plus de vehemence &  
efficace que par le Roy de France son beau  
Frere & par les Ministres: non seulement  
par Arguments: mais aussi par promesse  
d'vnion & d'assistance en cette cause com-  
mune. Et cet interest mutuel à se conseruer  
contre vn commun ennemy, où vn amy sus-  
pect, à esté la vraye cause, pourquoy le Roy  
notre Maistre, a le plus desiré l'amitié, &  
alliance de la France, que de tout le reste du  
Monde: Esperant par ce moyen auoir le  
pouuoir de diuertir les pensées de ce grand  
Roy de la ruïne de ses meilleurs Subiets de  
la Religion Reformée à l'abaisement des



vrais ennemis de cet Estat, qui luy detien- 162 7.  
nent tant de belles Prouinces & Royaumes, *Iuillet.*  
possédez par ses Predecesseurs. Et c'est  
pourquoy le Roy nostre Maistre, estoit desi-  
reux de sacrifier tous ses interets au bien  
commun & à l'assurance de la Chrestien-  
té. Mais sa Majesté a trouué par vne expe-  
rience trop chere, que s'estât vne fois enga-  
gé à la guerre d'Espagne, non seulement il  
n'auoit pas receu la faueur & assistance de  
la France, que par raison il s'estoit attendu;  
ains il à receu plus de trauerses & d'empes-  
chemens que de l'Espagne mesme. Et la rai-  
son en est toute apparente : D'autant que  
le grand dessein de cet Estat, se voit estre sur  
l'aduantage de l'embroüillement du Roy no-  
stre Maistre avec l'Espagne, de ruiner & ex-  
tirper ceux de la Religion Reformée en  
France, non pas que sa Majesté veille croire  
que cela procede du Roy de France son beau  
Frere, ou la Royne sa Mere, estans si grands  
Princes, & à luy alliez de si pres. Mais vous,  
Messieurs, bien mieux que nous, entendez  
combien la faction Iesuitique & Espagnole  
agit puissamment aux Conseils de France:  
Laquelle dit-on estre si forte, que souuent  
de haute lutte, elle emporte les affaires sur  
le Roy mesme, De la force de cette faction

1627. est procedé le refus de passage à l'armée  
taillet, fournie au Comte de Mansfeld en Angle-  
terre en l'année 1624, à l'instant même  
qu'ils deuoient partir. Ayant le Roy de  
France auparauant accordé le passage par  
vn Article solennel. Par lequel refus la li-  
berté d'Allemaigne a esté trahie, & douze  
mille Anglois sont presque tous peris. Par  
la force de cette faction, Ayant le Roy no-  
stre Maistre interposé ses Ambassadeurs  
pour appaiser la derniere guerre cõtre ceux  
de la Religion en France, & ayant engagé  
sa parole pour l'assurance du Traitté, par le  
consentement même du Roy de France, &  
que ceux de la Religion s'estoient conten-  
tez de subir des conditions plus dures que  
leur Estat, pour lors ne demandoit, Espe-  
rans que les desseins de cet Estat se change-  
roient contre les ennemis communs en Ita-  
lie: Il est pourtant aduenu, que non seule-  
ment les Confederez du Roy en Italie ont  
esté abandonnez; Mais les armes employées  
là ont esté depuis conuerties pour vous ser-  
uir de Garnisons & de forts, pour vous re-  
duire à l'extremité de paureté & de faim.  
Enquoy ie ne di-pl<sup>s</sup>, que ce que les plâintes  
continuës de ceux de cette Ville, & de tout  
le Corps de la Religion reformée, par l'en-



trémise de Messieurs les Ducs de Rohā 1627:  
& de Soubize ont représenté au Roy nostre Maistre, <sup>la Mer,</sup>  
Finalement quand cette faction  
c'est apperceuë que tout cela n'estoit ba-  
stant, sans interdire cette Ville du commer-  
ce de la Mer : sous le pretexte d'une Socie-  
té de commerce imaginaire, ils ont fait ba-  
stir vn nombre de Navires de guerre. Mais  
se doutans qu'il ne suffiroit pas à leur des-  
sein de se fortifier en mer, sans y affoiblir en  
mesme temps le Roy nostre Maistre : par  
vn exemple d'injustice inouye, au milieu de  
la paix & au temps que le Roy nostre Mai-  
stre estoit embrouillé en vne guerre, par la-  
quelle l'assurance & la richesse de la France  
s'accroissoit: ils ont fait saisir six vingts Na-  
vires de ses Sujets, avec l'artillerie, mar-  
chandises, & Mariniers: & pour quel autre  
dessein auoit ce peu estre, que pour s'as-  
surer de mener cette Ville à ruïne ? Pour ces  
raisons alleguées, & pour plusieurs autres  
de mesme nature, Le Roy nostre Maistre  
mettant à part tous autres respects, que ce-  
luy de sa conscience, par lequel comme le  
Prince du monde le plus Religieux & pieux,  
il a vne sympathie de vos souffrances, &  
celuy de son honneur, par lequel il se sent  
obligé en la promesse, pour l'accomplisse-

1627. ment des articles accordez: s'y trouuant fe-  
uillet. monds par Messeigneurs les Ducs de Rohan  
& de Soubize, au nom de tout le Corps de  
la Religion reformée, à enuoyé icy, Mon-  
seigneur le Duc de BoucKingham, qui m'a  
donné en charge, de vous faire offre en son  
nom d'une assistance puissante, tant par mer  
que par terre, au cas que vous vous resoudiés  
de l'accepter, & de rachetter vostre liberté  
en entrant en action de guerre: & tout cela,  
sur telles conditions, que vous, Messieurs,  
& tout le monde recognoistra, que le Roy  
nostre Maistre ne vise pas à aucun sien ad-  
uantage: ains à vostre bien, & à l'acquit de  
son honneur & conscience: tant esloignée  
est sa Majesté de pourlaine aucune sienne  
demande, ou pretention, ou de faire inua-  
sion aux terres de son bon frere le Roy de  
France; avec lequel il desire venir à une  
parfaite vnion, accompagné de l'assuran-  
ce de ceux, qui font profession de mesme  
Religion que luy en France. Mais si quel-  
qu'un me veut demander, pourquoy c'est,  
que le Roy de la Grand' Bretagne, offre a  
present du secours à ceux de la Religion re-  
formée, & à cette Ville, qu'il n'a pas don-  
né en autre temps, en estant recerché: Je  
responds premierement, que le Roy de ce  
temps.



temps là n'estoit obligé par sa parole pour 1627.

L'accomplissement des Articles accordez Juillet.

pour la dernière paix; & puis de ce temps là, les Traitez entre ces deux Royaumes estoient en leur vigueur & reputation; & le Roy nostre Maistre auoit esperé vous pouuoir faire du bien par son intercession autant que par ses armes, comme celuy qui bien entend, que l'Eglise de Dieu est nostre vraye & commune patrie, & pource sa Majesté a esté fort soigneuse en toutes les saisies par mer & par terre, d'exempter de dommages ceux de la Religion reformée: Principalement de cette Ville. Mais a present les procédures de cet Estat, ont mis sa Majesté hors de doute, & luy ont donné toute liberté pour ce regard, ayant eux foulé dessous les pieds la reuerence deuë aux Traitez publics. C'est pourquoy si vous refusez cette opportunité, en vain la recercherez vous apres. Et en ce cas il m'a esté commandé par Monseigneur le Duc de Buckingham, de faire vne protestation solemnelle deuant Dieu & les hommes, qu'il tient le Roy son maistre pour plainement acquité de tout engagement d'honneur & de conscience: & son Excellence se disposera a executer les autres commandemens qui

1627. luy ont esté enchargez. Dieu donc vous a  
Juillet. fait vne si grande grace, que de vous donner le choix de vostre bien, ou de vôtre mal: Mais quel que vous choisirez il m'a esté enchargé de vous presser a vne claire & prompte response. En quoy vous deuez considerer, qu'auec aussi peu de preiudice vous pourriez prendre vostre resolution clairement & a present, qu'auec doute & remise; mais à Nous, chasque heure de delay, apporte vn prejudice notable.

En suite, il leur presenta le Manifeste dudit Duc de Buckinghant, signé de luy, contenât vne Declaration des intentions du Roy de la Grand' Bretaine de cette teneur.

**Q**Velle part les Rois de la Grand' Bretaine ont tousiours pris es affaires des Eglises Reformées de ce Royaume, & avec combien de zele & de soin ils ont trauaillé à leur bien. Il est notoire à tous, & les exemples en sont aussi ordinaires, qu'en ont esté les occasions. Le Roy d'apresent mon tres-honoré Seigneur & Maistre, ne doit rien en cela à ses Predecesseurs, si ses bons & loüables desseins pour leur bien, n'eussent esté pervertis à leur ruine, par ceux qui auoient

le plus d'intérêt en leur vray accomplissement, 1627.  
Quels aduantages a-il refusez, quels Iullet,  
partis n'a il poursuuius, pour par son Alliance  
auec la France, pouuoit operer plus vtilement,  
& plus puïssamment à la restitution des Eglises  
en leur ancienne liberté & splendeur? Et que pouuoit  
on moins esperer d'un Alliance si estroïtte & de tant  
de promesses reïterées par la Bouche d'un grand  
Prince, que des effets vrayemens Royaux & sortables  
à sa grandeur? Mais tant s'en faut, que sa Majesté  
en tant de promesses, & de si estroïttes obligations  
d'amitié ait donné moyē d'obtenir liberté & seureté  
pour les Eglises; & redonner la paix à la France,  
par la reconciliation de ceux qui ne respirēt autre  
chose, que toute sorte d'obeïssance à leur Roy,  
sous la liberté des Edits: Qu'au contraire, on s'est  
preualu de l'intérêt, qu'il auoit en ceux de la Religion,  
pour les tromper; pour par ce moyen non  
seulement le destacher d'auec eux; mais aussi  
le leur rendre sinon odieux, a tout le moins  
suspect, en peruertissant les moyens qu'il auoit  
ordonnez pour leur bien à vne fin toute contraire.  
Tefmoins les Vaisseaux Anglois designez non pour  
l'extirpation de ceux de la Religion (au contraire promesse



1627. expreſſement donné de ne ſ'en ſeruir con-  
tr'eux ) qui cependant furent menez de-  
uant la Rochelle, & employez au dernier  
combat Naval contr'eux. Que pouuoit on  
alors eſperer d'un ſi puiffant Roy, que le Roy  
mon Maiftre, Eludé ſi ouuertement qu'un  
reſſentiment egal & proportionné aux in-  
jures receuës ? Mais il a patienté au delà de  
la patience ; & tandis, qu'il à creu profiter  
aux Eglifes par autre moyen, il n'a point eu  
recours à celuy des armes ; Iuſques là que  
d'auoir eſté rendu inſtrument & moyennneur  
de la derniere paix, ſur des conditions aſſez  
des-aduantageuſes ; & qui n'euffent iamais  
eſté acceptées, ſans l'interuention de ſa Ma-  
jeſté, qui interpoſa ſon credit & intereſt  
vers les Eglifes, pour les receuoir (meſmes  
avec menaces) afin de mettre l'honneur du  
Roy tresChreſtien à couuert ſous aſſeurâ-  
ce de ſa part, non ſeulement de l'accompliſ-  
ſement, mais auſſi de l'amélioration deſdi-  
tes conditions, dont il demeure caution en-  
uers les Eglifes, mais quelle a eſté l'iſſuë de  
tout cecy, ſinon vn abus de ſa bonté ; Et ce  
que ſa Majeſté auoit creu vn remede ſouue-  
rain à tous leurs maux, n'a-il pas preſque  
apporté le dernier coup à la ruïne des Egl-  
iſes ? Peu ſ'en à ſalu, par la continuation

du fort deuant la Rochelle, dont la Demo- 1627.  
lition estoit promise, par la violence <sup>Iuillet.</sup>  
des soldats & garnisons audit fort & Isles,  
tant sur les habitans de ladite Ville, que sur  
les Estrangers, qui au lieu d'estre entiere-  
ment retirées, ont esté iournellement aug-  
mentées; & d'autres forts construits, & par  
la demeure des Cômmissaires en ladite Vil-  
le au delà du terme accordé, pour y faire  
des Caballes; & par le moyen de la diuision  
qu'ils faisoient gliser parmy les habitans,  
ouurir les Portes aux troupes Voisines; &  
par autre contrauentions & infractions de  
paix: Peu, dis-je, s'en est il falu, que ladite  
Ville, & en Elle toutes les Eglises n'ayent  
tiré leur dernier soupir, & cependant S. M.  
s'est encore contenuë, & n'a opposé a tant  
d'iniures, & tant de violemens de foy, que  
des plaintes & entremises: iusques à ce  
qu'elle ait eu aduis certain (confirmé par  
lettres interceptes) des grands preparatifs  
que le Roy tres-Chrestien faisoit, pour ve-  
nir fondre sur la Rochelle. Et alors qu'est-  
ce que S. M. a peu faire moins, que de ven-  
diquer son honneur par vn prompt arme-  
ment, contre ceux qui l'auoient rendu com-  
plice de leurs tromperies, & rendre tesmoi-  
gnage de son integrité & du zele qu'elle a



1627. toujours en au restablissement des Eglises!  
Juillet. Restablissement, qui luy sera toujours cher  
& précieux par dessus toute autre chose. Et  
que ce soit là le seul but de ses armes, & non  
aucun interest particulier ; Quiconque le  
voudra encore reuocquer en doute, qu'il  
confidere la circonstance du temps, & la  
disposition de ses affaires. Car qui croira,  
que le Roy mon Maistre aye aucun dessein  
sur la France, ou y ait proietté des conque-  
stes en vn temps si des-aduantageux; auquel  
il a en teste & pour ennemy vn des plus puis-  
sant Prince du Monde, & que s'il auoit ce  
dessein, que de tant de troupes qu'il a sur  
pied (qu'il entretient aux mesmes faits qu'il  
feroit icy & qu'il est tout prest de faire passer  
la Mer, si les Eglises en ont besoin) il eust  
seulement enuoyé comme vne poignée de  
gens, au prix de ceux, qu'il faudroit pour  
l'exécution d'une si haute entreprise, & des  
grands secours qu'il enuoye en mesme  
temps en Allemagne? Qui ne jugera plus  
tost, cōme la verité est, que ces troupes icy  
ne sont qu'auxiliaires, & que le but de ses  
armes n'est autre que le seul bien des Egli-  
ses? Lesquelles pour tant de raisons; & des  
cōsiderations si importantes, il se sent obli-  
gé deuant Dieu & deuant les hommes de

protéger & secourir. Que si on veut alleguer <sup>1627</sup> que le Roy mon Maistre aye esté meu à pré- <sup>juillet.</sup> dre les armes pour d'autres considerations, comme la detétion & saisie de tous les Navires, biens & effets de ses Sujets à Bourdeaux, & autres places de ce Royaume, à l'infraction & contrauention manifeste des Traitez entre les Couronnes ( qui sont expres en ce point ) & au preiudice irreparable, voire à la ruine totale du cōmerce ( en la rupture duquel le pauvre peuple de ce Royaume ne pouuant debitter les denrées, gemit non seulement sous le fardeau de tant de taxes & impositions; mais aussi des necessitez de la vie mesme ) que l'apprehension du Roy mon Maistre, de l'agrandissement de la puissance du Roy tres-Chrestien par mer l'a poussé à cet armemēt, pour empêcher l'accroissement : & en fin qu'il à esté contraint de se mettre en armes pour ne pouuoir plus esperer aucun accōmodement des affaires. La responce de tout cela est que quiconque voudra recercher les Arrests, saisies & prises qui ont esté faites de part & d'autre, il trouuera que le Roy mon Maistre, & ses Sujets ont iusques icy le plus profité de cette rupture, & qu'elle leur a esté plustost à vtilité. En second lieu que



1627.  
Juillet

tant s'en faut, qu'il soit ialoux de l'accroissement de cette pretendue puissance par mer, & y vueille apporter de l'empeschement, qu'il ne faudra ( quand le Roy mon Maistre en verra le temps ) que des lettres de marque à ses Suiets pour dissiper tous ces vains & foibles efforts, sans pour cela employer vne puissance Royale. Et finalement qu'on ait esté nécessité à cet armemēt, pour ne pouuoir plus esperer vn accommodement : Le contraire est tout manifeste, à qui voudra cōsiderer les recherches, qui ont esté faites à diuerses fois, tant par leurs propres Ministres, que par les Ministres des Princes Estrangers vers le Roy mon Maistre à leur instigation, pour traicter vn accommodement. Tout ce que dessus rend foy, pour le Roy mon Maistre, qu'il n'a esté cōtraint de prendre les armes pour aucun interest particulier ; mais pour la defence des Eglises tant seulement, de la seureté & liberte desquelles il demeueroit respōsable. Et cependant se trouuera-il des personnes, qui osent insinuer dans les esprits, que S. M. y a vn dessein particulier, & qu'il se sert du pretexte de la Religion, pour former vn party, au moyen & par l'adionction duquel avec ses propres forces, il pretend pousser ses desseins

Teins à la fin qu'il a proietté : Non non , no- 162 7.  
stre Religion nous apprend toute autre Juillet.  
chose ; & la pieté du Roy mon Maistre, en  
laquelle il ne cede à homme viuant , ne luy  
permettra jamais. Son dessein est l'establis-  
sement des Eglises ; son interest c'est leur  
bien ; son but , leur contentement. Cela  
estant , ces tambours battans, & enseignes  
desployées, seront reseruées, & tout ce bruit  
de guerre demeurera enseuely dedans la  
nuiet & dans le silence , pour n'auoir paru  
que pour leur sujet , & n'auoir esté aduancé  
qu'à leur occasion. Donné au bord de no-  
stre vaisseau Admiral ce Mercredy 21. de  
Iuillet mil six cents vingt & sept.

Ainsi signé, BVCKINGHANT,

Le tout ouy , le Maire & son Conseil luy  
respondirent , qu'ils s'assembleroient pour  
y aduiser , & nommer des gens qui confe-  
rassent avec luy, ce qu'aussi ils firent , & fut  
fait choix de huiet du corps de Ville, & huiet  
Bourgeois, & deux des Pasteurs, pour l'ouïr  
plus particulièrement, & ayans communi-  
qué avec Monsieur de Soubize , & digéré  
tout cet affaire, en faire raport au Conseil.

Le mesme iour 22. comme ces choses se  
passoient à la Rochelle, le Duc de Buckin-



1627. Iuillet. gphant fit approcher partie de son armée de la pointe de Sablanceau, & à la faueur de son canon, qui tiroit sans cesse fit descendre ses troupes. Le Sieur de Thoiras qui l'attendoit-là avec deux cents cheuaux, & huiët à neufs cents hommes de pied fit tout deuoir pour empescher la descente, & causa tel trouble en l'armée Angloise qu'un grãd nombre se noyerent. Neantmoins le Duc faisant continuer la descente, de sorte qu'il se trouua à terre pres de trois mille hommes, le Sieur de Thoiras fut contraint de ceder à la force, d'autant plus que les Nauires tiroient sur luy avec aduantage. Ainsi il se retira à la Flotte, & de là au Bourg de Saint Martin, laissant sur la place enuiron trois cents soldats, & de la Cauallerie iusques à quatre vingts, entre lesquels se trouuerent l'un de ses freres le Sieur de Restinglieres, le Baron de Nauailles, Chantail, & le Tablier, lesquels, avec les Officiers de l'Infanterie, il enuoya demander le lendemain matin par un Trompette au Duc de Buckingham, qui les luy accorda. Quant aux Anglois, cette iournée leur cousta pres de cinq cents hommes; mais sur tout le Sieur de Saint Blancard, Gentilhomme de rare merite, qui auoit negocié toute cette

affaire&estoit comme l'ame qui faisoit tout mouuoir, de sorte que les Anglois ne l'ayās plus se trouuerēt desnuez de leur principal Conseil.

1627.  
Iuillet.

Le 23. le Conseil fut assemblé en l'Hostel de Ville pour ouir le raport des Commissaires, & fut arresté qu' auparauant que rien resoudre en affaire si importante&qui regardoit le general des Eglises, on prendroit temps pour les aduertir&sçauoir leur aduis, & que pour le faire entendre au Duc de Buckingham luy seroient enuoyez les Sieurs Isaac Blandin Sieur des Herbiers, pour le Corps de Ville, & Goyer le jeune, pour les Bourgeois. Suiuant ceste resolution des le lendemain matin vingt & quatre, lesdits Sieurs des Herbiers & Goyer, avec Monsieur de Soubize, & ledit Sieur Becker, allerent en Ré trouuer le Duc.

En mesme temps il fut proposé au Conseil, par quelques particuliers de la Rochelle, & aucuns Marchands de Marans qu'à leurs perils & fortunes ils feroient venir nombre de bleds & de vins dans la Rochelle; aux conditions, qu'en cas que la Ville n'en eust affaire pour le public, il leur fust permis de les distribuer aux particuliers à prix raisonnable; & aduenant que les vns



1627. & les autres n'en eussent besoin, & qu'il se  
Juillet. fist vne paix, ils peussent les transporter en  
tels lieux, qu'ils aduiferoient. Cette pro-  
position fut fort goustée par la plus grand  
part du Conseil, & jugée tres vtile pour le  
bien de la Ville & du public: mais quelques  
vns des Principaux, à qui l'interest particu-  
lier touchoit pl<sup>9</sup> que celuy du general, d'au-  
tant qu'ils auoient quelques vins à vendre,  
& esperoient vne bonne vinée, s'y oppose-  
rent fortement, pour ce qui estoit des vins,  
disans que ce seroit enfreindre les Priuile-  
ges, que leurs Peres auoient gardez si reli-  
gieusement de Pere en Fils, & par ce moyen  
rendre les vignes du Gouuernement inuti-  
les, & ainsi concludoient qu'on n'admit leur  
offre, sinon au regard des bleds: les autres  
remonstrerent sur cela que deux raisons  
empeschoient qu'ils fissent ce party pour les  
bleds seuls; l'une qu'ils y perdroyent, & n'au-  
roient esperance de se recompenser que sur  
les vins; l'autre que si ils enleuoient les  
bleds sans acheter des vins, la chose seroit  
sujette à soupçon, veu qu'en Hollande, pour  
laquelle ils feindroyent vouloir charger, on  
à plus besoin de vins que de bleds. Au fond  
que pour des-interesser la ville, ils offroient  
vn escu pour l'entrée de chaque thonneau,

Nonobstant ce qu'ils peurent dire, les inter-<sup>1627.</sup>  
ressez preualurent, representans la puissance de l'Anglois, qui estant proche d'eux,  
à tout heure qu'ils voudroient leur enuoye-  
roit des bleds, vins, & autres provisions &  
commodités, plus qu'ils n'en faudroit. Ce  
mauuais Conseil cousta bien cher en la  
suite.

Après le combat & descente faite par le  
Duc de Buckinghant en l'Isle de Ré, trois  
iours se passerent sans rien entreprendre les  
vns sur les autres : seulement le Sieur de  
Thoiras, pendant que par petites escarmou-  
ches il tenoit ses ennemis en halaine, & op-  
pinion d'un autre combat, se retira au Bourg  
de Saint Martin, & delà en la Citadelle,  
avec tout ce qu'il y peut faire emporter.  
Quant au Duc de Buckinghant il se fortifia  
& retrancha au lieu où il estoit descendu,  
tant pour ce qu'il n'auoit pas là cognoissan-  
ce du païs, que sur la crainte que les forces  
de l'Isle, qu'il croyoit plus grandes, se ras-  
semblans, & venans fondre sur ses gens, qui  
n'estoient pas bien remis du trauail de la  
mer, il luy mes-aduint. Cependant l'opi-  
nion commune est que si il eust poursuivy  
viuement le Sieur de Thoiras, il eust enleué  
d'emblée la Citadelle, à l'une des Portes de



1627. laquelle, qui n'estoit paracheuée, dix à dou-  
Juillet. ze hommes. pouuoient entrer de front.  
D'ailleurs, elle estoit mal fournie de viures  
& autres choses necessaires, lesquelles  
durant ce delay on y porta iour & nuict,  
tandis qu'aussi on trauailloit à remparer les  
lieux foibles.

Le 26. le Duc de Buckinghant mit son  
armée en bataille, composée de sept à huit  
mille hommes de pied & cent cheuaux, &  
tira vers Saint Martin, dont il s'empara, &  
commença à tirer des tranchées à demy  
portée de mousquet du fossé de la Citadel-  
le, & dresser en toute diligéce ses batteries,  
qui en six iours furent en estat. Sur tout il  
en fit vne sur le Havre du Bourg, qui mit en  
apprehension les Assiegez, à caule qu'elle  
donnoit droit sur leurs moulins, lesquels  
neantmoins ils trouuerent moyen de ga-  
rantir.

Aussi tost apres la descente du Duc de  
Buckinghant en l'Isle de Ré, les Particuliers  
du commun peuple de la Rochelle porte-  
rent à son armée toutes sortes de prouisiōs  
& de raffraischissemens, le gain, & la beauté  
des Iacobus, les allechans. Ce qui ayant  
continué durant tout le temps qu'il y fut  
desnua fort la Ville de viures:

Le Ieudy 29. on delibera au Conseil si il <sup>1627.</sup>  
estoit à propos d'enuoyer à Marans vers <sup>laillce.</sup>  
Monsieur le Duc d'Angoulesme pour le sa-  
luër , il s'en trouua plusieurs qui ne le trou-  
uoient à propos;disans , qu'il estoit à crain-  
dre, que s'engageant avec luy, l'Anglois, ne  
se descourageast, & ne les laissast en proye.  
D'autres disoient au contraire que si on a-  
uoit bien deputé vers le Duc de Bucking-  
hant, Lieutenant du Roy d'Angleterre, on  
deuoit à plus forte raison en faire autant  
audit Seigneur Duc d'Angoulesme Lieute-  
nant du Roy nostre Souuerain. N'y eust-il  
autre subiet , qu'on le deuoit remercier de  
ce qu'il n'auoit encore fait nulle hostilité au  
Gouuernement, & le prier de leur laisser  
faire la recolte de leurs fruiçts. De plus  
qu'on pourroit apprendre de luy des choses  
qui pourroient seruir à faire la paix entre les  
deux Roys, ce qu'il falloit souhaitter par  
dessus toutes choses, veu que quel que fust  
l'euuenement de la guerre, la Rochelle auoit  
à craindre, de la part du Roy si il chassoit  
les Anglois, veu qu'il les consideroit com-  
me les ayans attirez, & de la part des An-  
glois si ils demeuroient maistres des Isles,  
veu qu'ils leur en feroient vn mors pour les  
gourmander, & peut estre s'emparer d'eux;



1627.  
Juillet.

qu'en ce commencement donc, il falloit essayer de pacifier ce different ; & que ce devoir rendu à ce Prince en pourroit ouvrir la voye. Enfin apres beaucoup de contestations , il fut arresté qu'on enuoyeroit vers luy, & furent nommez à cét effet, de la part du Corps de Ville le S<sup>r</sup> Isaac Blandin Sieur de Fiefmignon , Escheuin , & le Sieur Jean Journaud Aduocat , pour les Bourgeois : & le Samedi dernier du mois l'allerent trouver à Marans, où il les receut fort amiablement, & les renuoya le Lundy suiuant, avec promesse de leur laisser faire la recolte de leurs fruiçts , si ils demeuroient bons François, & non autrement.

Le 30. le Sieur de Loudriere passa de la Rochelle en Ré avec six à sept cens hommes, pour fortifier le Duc de Buckingham, qui quelques iours apres, fit commandemēt aux Catholiques R. de l'Isle de Ré , de se retirer à la grand terre , & leur donna des vaisseaux pour les y passer , sur l'opinion qu'il eut qu'ils donnoient aduis à ceux de la Citadelle de tout ce qui se faisoit dans l'armée Angloise : cependant il pourueut à la nourriture des Capucins du Conuent de S. Martin & ne les obligea à partir.

Le 6. Aoust, le Maire & son Conseil enuoyerent

uoierent les Sieurs Gauvain , Escheuin , & 1627.  
Raclet , Pair , vers le Duc de Buckingham <sup>Augst</sup>  
pour le prier de n'arrester plus les Vais-  
seaux & commoditez , qui de Ré où autres  
lieux voudroient aller à la Rochelle : ce  
qu'il leur accorda & leur fit bon accueil.

Le Mardy 10. à la pointe du iour , Mon-  
sieur le Duc d'Angoulesme, avec quantité  
de Cauallerie & infanterie , vint iusques  
aux Portes de la Rochelle , donnant l'alar-  
me bien chaude aux Rochelois , qui aussi  
tost enuoyerent vers luy , pour l'asseurer  
qu'ils estoient bons seruiteurs du Roy , &  
n'auoient nulle part au dessein de la venuë  
des Anglois en l'Isle de Ré. Aussi qu'ils ne  
s'estoient point adjoints à eux. Il respon-  
dit amiablement, & fut permis à ceux des  
siens qui le voulurent d'entrer en la ville &  
y acheter leurs commodités.

Le mesme iour à l'apresdinée , le mesme  
Duc d'Angoulesme alla avec le Sieur de  
Marillac & Pompée Targon Ingenieur,  
visiter la pointe de Coureille & toute la  
Coste , sans que de la Rochelle il leur fust  
tiré , n'y ayant encore aucune declaration  
de guerre , ny de part ny d'autre.

Le 13. ledit Duc d'Angoulesme escriuit  
au Maire & Corps de Ville , que s'ils you-



1627. loient continuer d'assister l'Anglois , il  
Aoust s'approcheroit avec son armée,iusques aux  
Portes de leur Ville. Surquoy , comme on  
deliberoit, le lendemain 14. il vint pren-  
dre son logement à Estré , la Moulinette &  
Bongrenne , & aussi à Coureille : son ar-  
mée estant composée des Regimens de  
Navarre , Chappes & la Bergerie , & moitié  
du Regiment des Gardes, avec dix Cornet-  
tes de Cauallerie, & force canons.

En mesme temps , il fit faire defense par  
tout le Gouuernement & Pais d'Aulnis de  
porter dans la Rochelle aucunes denrées  
ny commodités, à peine de confiscation , &  
punition corporelle , & empescha que les  
particuliers de la ville ne fissent leur recol-  
te. Ce qui faisant voir aux Rochelois, qu'ils  
deuoient penser à eux , Ils enuoyerent les  
Sieurs Papin , & de Fos , en Ré , prier le  
Duc de Buckinghant , de leur r'enuoyer le  
Sieur de Loudriere avec les François , ce  
qu'ils obtindrent de luy.

Le 15. sur les deux à trois heures apres  
minuit les Anglois prirent vne Barque qui  
sortoit de la Citadelle. De ceux qui s'y  
trouuerent les vns furent faits prisonniers,  
& d'autres s'estans iettez à l'eau se noye-  
rent, comme entr'autres le Capitaine nom-

me Demoriciere de l'Isle de Ré.

1627.

Août.

La même nuit, le Duc de Buckingham ayant eu aduis qu'il y auoit bien peu d'eau dans la Citadelle, & que ceux de dedans la tiroient d'un puits, qui estoit à quinze ou vingt pas de l'une de leurs demi-lunes, afin de leur en retrancher la commodité, fit donner une attaque à la demie-lune; mais ceux qui la gardoient se porterent avec une telle resolution, que ce fut aux Anglois de se retirer avec perte. Seulement durant cette attaque, ceux qui estoient ordonnez pour cela empoisonnerent le puits, ce qui incommoda fort les Assiegez.

Le 16. fut apportée dans la Rochelle la Declaration du Roy contre ceux qui se joindroient aux Anglois. Surquoy la majeure part des Officiers du Roy voyans que combien que la jonction de la Ville avec eux ne fust encore declarée, elle estoit en effect, ils en sortirent & se retirerent à Marans, où le Roy transféra peu apres le Siege Presidial, & en donna ses Lettres Patentes. Quant à ceux qui demeurerent, qui estoient sept en nombre, ils continuerent à administrer la Justice comme auparavant.

Le même iour à la marée du soir en-

D ij



1627. trerent dans la Rochelle, hui& tant Bar  
Aoult. ques que Chalouppes venans de l'Isle de  
Ré, eiquelles estoit le Sieur de Loudrie-  
re avec les troupes qu'il y auoit conduites.

Le 19. le Sieur de Comminges Capi-  
taine d'une compagnie au Regiment de  
Champaigne, & qui en l'absence du Sieur  
de Thoiras commandoit au fort Louis, fit  
rencontre és enuiron d'iceluy de quelques  
Rochelois, où apres beaucoup d'entre-  
tien sur les affaires du temps, & la descen-  
te des Anglois en l'Isle de Ré, il leur re-  
monstra que s'ils vouloient se porter en  
bons & fideles Subiets du Roy, & recer-  
cher sa bonté ils auroient toute sorte de  
contentement : Ce qu'il pria de faire en-  
tendre au Maire & à son Conseil : En  
ayans fait raport, on deputa vers luy au  
fort Louis, & luy en suite se transporta en  
Ville; où il fut oüy par le Maire & son  
Conseil : mais ne pouuans s'accorder, il  
s'en retourna sans rien faire. Estant en la  
ville, il visita Madame de Rohan, avec la-  
quelle raisonnant sur le secours des An-  
glois, il luy dit, que les Vendanges n'e-  
stoient pas encore venuës, & qu'alors il ne  
leur faudroit point d'autres ennemis pour les  
combattre, que les raisins & les vins nou-

*beaux*, dont pour lors on se moqua.

1627.

Aoult.

Le 20. le Maire & son Conseil voyans, comme le Duc d'Angoulesme faisoit tra-  
uailer à la Moulinette, Bongrenne &  
Coureille, pour y faire des forts, & selon  
l'aduis qu'ils auoient receu, estoit sur le  
point de se saisir de la Barrouere à costé de  
Tadon, & a portée de mousquet de la Por-  
te de saint Nicolas, afin d'y construire  
aussi vn fort, & plus proche si on le laissoit  
faire, Eux de leur costé resolurent, pour  
rompre son dessein, & empescher, qu'il ne  
s'approchast plus pres de ce costé là, d'en  
faire vn horsladite Porte de S. Nicolas,  
entre les deux moulins qui y sont, & la fa-  
laise, à moitié chemin de ladite porte, &  
dudit lieu de la Barroiere. Pour cet effet  
donc, sur les huit à neuf heures du soir,  
ils firent sortir vne grande partie des gens  
de guerre, iusques au nombre de six à sept  
cents hommes & quelques habitans, qui y  
trauailerent toute la nuit, y posans for-  
ce pipes & bariques, de sorte qu'au matin  
ils se virent en estat de defense & conti-  
nuerent leur traual les iours suiuan, sans  
qu'il leur y fut causé de trouble.

Le 21. le Duc de Buckinghant, voyant  
la resolution du Sieur de Thoiras, & le peu

1627. despoir de le pouuoir forcer , autrement  
Août. que par la faim , fit faire recherche par toute l'Isle des Catholiques qui y estoient restez , & les fit mener deuant la Citadelle, où le Sieur de Thoiras en receut parties, mais n'ayant voulu receuoir les autres on les fit conduire à la grand terre , pour se retirer à Marans , & ailleurs , ou ils voudroient.

En mesme temps , quelques Soldats fortans de la Citadelle, rapporterent au Duc de Buckingham , que les bleds & farines commençoient à manquer aux assiegez , & qu'ils estoient reduits au biscuit & à la chair de cheual. D'ailleurs que le soldat estoit grandement incommodé du mauuais temps & des pluyes continuelles, & qu'il se minutoit parmy eux quelque reuolte.

Le 28. le Sieur de Thoiras voyant de iour à autre que la necessité commençoit de le presser , & qu'il n'apprenoit nulles nouuelles de la terre ferme , s'aduisa de faire passer à la nage trois de ses soldats, avec chacun son paquet de lettres , pour faire sçauoir l'estat où il se trouuoit. Des trois il en passa vn , qui s'alla rendre au fort Louis. Quant aux deux autres , l'vn se noya & l'autre n'en pouuant plus, s'alla



rendre aux Anglois , & leur donna aduis 1627.  
Aoult  
de tout ce qui se passoit dans la Citadelle.

Le Duc de Buckinghant l'ayant appris escriuit audit Sieur de Thoiras , afin de tacher , à le porter , veu la necessité , & son plus que deuoir à la defence de ladite Citadelle , à la rendre entre ses mains , & tout ce qu'il tenoit dans l'Isle , avec offres de conditions fort honorables & aduantageuses , lesquelles si il tenoit iusques à l'extremité , il ne pouuoit esperer à l'aduenir. A cette lettre ledit Sieur de Thoiras fit response , avec beaucoup de ciuilité , luy disant pourtant , qu'il n'estoit pas reduit au point qu'il croyoit , & durant quelques iours ce ne furent que compliments & entreueüs amiables , par des Gentilhommes , avec enuois de presens de l'un à l'autre. Ce qui fit que les Rochelois entrerent en soupçon du Duc , & de là en auant desespererent de la prise de la Citadelle.

Cependant le Duc ne laissoit pas de rechercher tous moyens à luy possibles , pour se rendre Maistre de cette place ; & afin d'en venir plustost à bout , fit poser sur l'eau ; vne machine flottante , qui la battoit continuellement de huit canons , & au moyen des pattaches , barques & cha-

1637.  
Septé-  
bre.

loupes, équipées en guerre essayoit d'em-  
peſcher qu'aucun ſecours d'hommes, ny de  
viures n'y entraſt. De plus il fit vne ſtaca-  
de de mats de nauires, & de gros cables  
ſouſtenus ſur l'eau par des vaiſſeaux, &  
entre les vaiſſeaux, par des pipes & bari-  
ques, & enfonça pardeuant nombres de  
nauires plains de pierres. Bref il n'obmit  
rien pour eſſayer de la renfermer entiere-  
ment de ce coſté là : ce qui par le rapport  
d'aucuns ſoldats mit en grand peine le  
Sieur de Thoiras & ſes gens.

Le Mardy ſeptieſme de Septembre dou-  
ze à treize pinasses chargées de toutes  
fortes de prouiſions entrerent dans la Ci-  
tadelle, ayans paſſé à trauers l'armée An-  
gloïſe, pataches, chaloupes & ſtacade.  
Ce fut au moyen de ce qu'elle auoit eſté  
demy rompuë & brisée du mauuais temps  
qui auoit fait le ſoir precedent, & qui  
continua ceſtuy cy, & obligea ceux qui  
eſtoient és nauires de la paliffade de couper  
les cables, qu'ils auoient mis d'un vaiſſeau  
à l'autre. Cela vint bien à point à ceux de  
ladite Citadelle, qui n'en pouuoient plus,  
& eſtoient tellement preſſez, que ſi ce  
ſecours euſt tardé encore trois iours, le  
Sieur de Thoiras ſe voyoit forcé de liurer  
la

la place. Mais autant qu'il en receut de 1627.  
joye, autant en receut de desplaisir & tri-<sup>Septē-</sup>  
steffe le Duc de Buckinghant, qui des la  
pointe du iour deschargea sa colere par la  
bouche de son canon sur la Citadelle & pi-  
nasses.

Le Vêndredy 10. sur les quatre à cinq  
heures du soir, les Rochelois voyans tra-  
uailer à vne piece destachée du fort Louïs,  
vis à vis la porte des deux Moulins, tire-  
rent le Canon dessus, & en mesme temps  
leur fut respondu par celuy du Fort, qui  
donna à trauers la Ville; mais sans faire  
de mal à presonne: ainsi par ce foudroye-  
ment mutuel ils se declarerent la guerre  
les vns aux autres.

Le mesme iour sur les sept à huit heu-  
res du soir, le fort Louis tira sur la Ville  
trois coups de canons chargez de boulets  
à feu, l'un desquels donna dans vne mai-  
son proche du May vert, au Carrefour, qui  
estoit pleine de foin & de paille, & brussa  
entierement.

D'abord cette nouuelle inuention eston-  
na fort, & obligea à y chercher des remedes,

Le 11. au Conseil qui se tint en l'hostel  
de Ville, tout le Corps assemblée, furent  
ordonnez Commissaires pour aduiser aux



1628. conditions de faire battre la Monnoye, &  
Sép<sup>te</sup>. aussi on pria le Conseil pres le Maire de  
bre. dresser vn Manifeste, & de voir aux arti-  
cles de la ionction avec le Duc de Buc-  
Kinghamt.

Le Dimanche 12. arriuerent au Duc  
de Buckinghamt, deux mille cinq cents  
hommes, en sept Navires & quatre flutes.

Le mesme iour les Anglois prirent deux  
barques chargées de prouisions & muni-  
tions de guerre pour la Citadelle, & don-  
nerent la chasse à vn Navire qui suiuoit les  
Barques, & le poursuirent iusques à l'Ai-  
guillon.

Le Lundy 13. sur le soir les Rochelois  
voyans trauailler pres la maison de Cou-  
reille pour y faire vn fort, y firent joier le  
Canon.

Le mesme iour aussi, sur le soir vindrent  
de Re à la Rochelle, les Sieurs Hasburnin  
pour le Duc de Buckinghamt, & de Sainct  
Surin, pour le Sieur de Thoiras, pour aller  
trouuer le Roy à Paris, d'où ledit Hasbur-  
nin apres auoir conferé avec sa Majesté de-  
uoit aller en Angleterre, & partirent des  
le lendemain matin pour leuer voyage. Ce  
fut l'effet des enuois & communications  
cy dessus, où tous crurent que le Duc s'e-

estoit laissé piper au Sieur de Saint Suri, 1627.  
& trouuoient ce voyage fort hors de pro- Sept.  
pos. bre.

Le 15. Monsieur Frere vnique du Roy arriua a Estré, & se fit vne escarmouche de sa Cauallerie avec celle de la Rochelle, qui apres auoir vn peu soustenu fut contrainte de ceder a celle de Monsieur, qui la poursuiuit jusques sur le bord du fossé du fort de Taddon, comme voulut faire quelque Infanterie. Mais s'estans trop aduancés, il y fut tué quelque Caualiers, & entr'autres, le Sieur de Maricour, & des gens de pied vn Sergent, & dix a douze Soldats. De la part des Rochelois, il y demeura vn habitant, & trois a quatre Soldats, outre quelques blessez.

Ledit jour sur les sept a huit heures du soir, on tira du fort Louis cinq coups de Canons de boulets a feu a trauers la Ville, ou le feu ce print au fets d'vn logis pres l'hostel de Ville, où il y auoit des fagots & farments. Mais il fut esteint, & ne brusla que la couuerture & partie du bois.

Le Samedy 16. Le Maire fit proclamer par tous les Cantons de la Ville, qu'on eust a oster dans le iour, des hautes chambres & galetas, le bois, foin, paille, & tout



1627. cequi est sujet au feu & d'y tenir des peaux  
 Seprẽ- de Bœufs, & des poefles, & des seaux pleins  
 bre. d'eau, tant pour esteindre le feu, que pour  
 y mettre les boulets.

Le Dimanche 17. Quelques Caualliers  
 ( sortis de la Rochelle quelques iours au-  
 parauant pour cercher quelque aduanture )  
 amenerent dans la ville vn Courrier, que  
 le Roy enuoyoit au Camp, chargé d'vn pa-  
 quet pour Monsieur le Duc d'Angoulesme  
 & de plusieurs lettres pour des particuliers  
 de l'armée : Par la fut descouuert le des-  
 sein qu'auoit le Roy de faire renfermer les  
 Rochelois par la mer, d'vne Digue & ar-  
 mée Nauale, & les enclorre du costé de la  
 terre de forts & lignes de communications  
 & ainsi de les auoir par la faim, plustost que  
 par la force : voicy la teneur de celle de  
 Monsieur le Duc d'Angoulesme.

Je t're  
 du Roy  
 à Mon-  
 sieur le  
 Duc.  
 d'An-  
 goules.  
 me au  
 Camp  
 d'uant  
 la Ro-  
 chelle.

**M**ON COVSIN, Par vostre despesche  
 du septième de ce mois, vo<sup>2</sup> m'avez  
 rendu conte particulier de l'employ que  
 vous avez donné aux troupes de mon ar-  
 mée, depuis que vous y estes arriué ; des  
 logements que vous avez prisés enuiron  
 de ma ville de Rochelle ; des traux, que  
 vous avez commencé ; de ceux qui se peu-



uent faire ; du nombre d'hommes necessai- 1627.  
res pour les garder & conseruer , & pour <sup>Septē-</sup>  
opposer aux diuersions que les Anglois au <sup>bre.</sup>  
sortir de Ré , pourroient faire dans les co-  
stes de Poictou & Xainctonge. Et me fai-  
tés aussientendre vos aduis & sentimens,  
tant sur le moyen de fermer le Canal du  
port de la Rochelle , que sur le rautaille-  
ment de l'Isle de Ré. Surquoy ayant fait la  
bonne consideration , qui se doit pour le  
bien de mon seruice , apres vous auoir  
tesmoigné le contentement, que i'ay receu  
de voir vne si exacte judicieuse , & fidelle  
information de l'estat des choses de delà,  
& le bon gré que ie vous sçay , de la dili-  
gence & bonne conduite , que vous avez  
apportée pour auancer ce que vous avez  
remarqué estre de mon seruice : Ie vous di-  
ray que i'approuue les quartiers que vous  
avez donné aux troupes de mon armée,  
desire pour les maintenir avec seureté , que  
vous ordonniez aux Chefs, qui y comman-  
dent de se bien retrancher & fortifier, & d'y  
establir bonne garde: Que vous continuyez  
l'ordre , que vous y avez estably , pour em-  
pescher l'entrée de toutes sortes de viures  
dans la Rochelle du costé de terre , & le  
fassiez garder extraordinairement & seue-

1627.  
Sept.  
bre.

rement, sans permettre que pour quelque cause, ou pretexte quelconque, il y soit contreuenue, ny fait aucune grace, à ceux qui seront si hardis, que de l'enfreindre: Car en ce point consiste l'un des principaux effects de mon armée, & celuy par lequel les factieux de la Rochelle peuuent estre chastiez de leurs rebellions, & estre contrainsts de se soubsmettre à l'obeïssance qu'ils me doiuent.

L'approuue aussi les forts & retranchements, que vous auancez à Bongrenne & à la Moulinette: Je veux croire, qu'ils seront bien tost (s'ils ne le sont desja auant l'arriuée de cette cy) en defense: Il faudra conseruer ces deux postes, puis qu'ils ont esté pris & iugez necessaires. Mais sans vous arrester pour le present à faire le fort, que vous proposiez entre la Porte de Coigne, & la Fons, pour couper la source des eaux, qui vont à la Rochelle, ny aussi vous diuertir à autre entreprise: Je juge plus à propos, que vous employez tout vostre traual à la construction du Fort, qui vous à esté cy deuant ordonné vis à vis du Fort Louis: afin qu'il soit mis au plustost en telle de fense, que les Rochelois, ny les Anglois ne puissent vous empescher de le conseruer,



avec le nombre d'hommes necessaires pour  
la defense.

1627.  
Septé-  
bre.

Je sçay, que pour accomplir ses desseins, pour conseruer vos postes, pour empescher l'entrée & sortie de la Rochelle du costé de terre, & pour uoir aux diuersions, il est necessaire d'entretenir vn corps d'armée puissant & bien payé : celuy que vous me proposez és enuirs de la Rochelle, doit estre de dix mille hommes de pied, & de mille cheuaux effectifs; ce qui se trouuera à bon compte, lors que les ordres, que j'ay cy deuant donnez pour l'acheminement & leuée des gens de guerre, auront esté executez : ainsi que vous pourrez voir par le denombrement des Regimens de pied, que ie vous enuoye. Quant aux diuersions aux costes de Poictou & Xaintonge, ie fais estat, que mon armee Navale, qui sera chargee de bon nombre d'infanterie pour. ra suppleer, & seruir de secours & de seurété pour toutes les descentes, qui se pourroient faire és costes de mon Royaume. Je ne puis pas aussi me persuader, que les Anglois avec le peu de gens, qui leur restera du Siege de la Citadelle de Ré, osent mettre le pied bien auant en terre ferme, n'ayant point de Cauallerie : ny entrepren-



1627.  
Septē-  
bre.

dre vne nouuelle fortification en la saison où nous sommes. Ce qui seroit plus à craindre, seroit la surprise de quelque place. A quoy ie trouue bon de pouruoir promptement par augmentation de garnison & de viures, & munitions en toutes celles que vous me ferez scauoir en auoir besoin esdites costes de Poiëtou & de Xaintonge.

Ie ne vous fay point icy de responce aux diuers moyens, qui sont proposez pour fermer & ruiner le port de la Rochelle, par ce que ce n'est pas ce qui nous presse le plus à present. Pour le regard du raitaillement de la Citadelle de Ré, & du Fort de la Prée, comme i'ay occasion de me promettre vne bonne suite du secours des treize Pinasses dans ladite Citadelle, dont l'aduis ma esté confirmé par vostre derniere lettre: l'estime, qu'il suffit d'employer les bons moyens, qui en diuers en droits sont de longue main preparez, pour le rafraichissement desdits Forts: dont ie remets au Sieur Euesque de Mande, de s'expliquer plus particulierement en mon nom, suivant la charge, que ie luy en ay donnée. D'ailleurs, considerant, que tant, que la Citadelle de saint Martin pourra tenir, l'on

l'on ne doit rien craindre pour le Fort de la 1627.  
Prée; ie ne voy pas qu'il soit necessaire d'y <sup>Sept.</sup>  
enuoyer d'hommes; biē, qu'on y face jetter <sup>bre.</sup>  
des viures & munitions, apres que la Cita-  
delle sera suffisamment pourueue.

Vous iugez mieux que personne, com-  
bien les Regimens destinez pour l'armee  
sont necessaires pour vostre garde & pour  
l'aduancement de vos trauaux : le desire  
donc, que vous enuoyez vers eux de tous  
costez, pour les faire aduancer en la plus  
grande diligence qu'il se pourra.

I'ay bien consideré la retenüe, que vous  
me mandez estre gardée par les Rochelois  
sur la declaration de guerre, & comme  
vous recognoissez qu'elle procedde plu-  
stost de crainte, que d'amour & de respect.  
Vous ne laisserez pas d'agir contr'eux, tout  
ainsi que vous feriez si leur declaration  
estoit faicte : ce que i'approuue : puis que  
leurs autres actions & deportements sont  
assez cognoistre leur mauuaise volonté.  
C'est pourquoy vous pouuez bien permet-  
tre à ceux du Fort Louys de trauailler à  
leurs fortifications, puis que vous en faites  
de nouuelles.

I'ay eu à plaisir que vous ayez enuoyé de  
la Cauallerie à mon Frere le Duc d'Or-

1627. leans, & doute, si auant cette responce, Il  
Sept-  
bre. se sera rendu à l'armee. Si cela est, vous  
ne manquerez pas de la luy communiquer,  
afin qu'il soit informé de mes intentions.

Au surplus ie loüe le soin, que vous auez  
pris de dissiper cette assemblée de Nobles-  
se, qui s'estoit faicte en la maison du Parc,  
que vous ayez fait saisir les maisons de la  
Rolandiere & de Moric, & vous foyez as-  
seuré des autres Gentils hommes, par bon-  
nes cautions; continuez à bien faire obser-  
uer de cette sorte mes lettres de Declara-  
tions: Ayant bien agreable, que l'on don-  
ne & accorde les fruiçts, qui se pourront  
recueillir és Villages, qui sont és enuirs  
de mon armee appartenant à ceux seule-  
ment qui auront contreuenü à ma ditte  
Declaration, aux Capitaines & Officiers  
seruans en mes troupes, qui seront iugez  
dignes de telle gratifications. Sur ce ie  
prie Dieu, Mon Cousin, vous auoir en sa  
saincte & digne garde. Escrit à Sainct  
Germain en Laye le treiziesme iour de  
Septembre, mil six cents vingt-sept. Ainsi  
signé, LOVYS, & plus bas,

PHELIPEAUX.

Il y auoit aussi la donation de l'Office



de Seneschal de la ville de la Rochelle audit Duc d'Angoulesme, avec la confiscation des biens meubles & immeubles des Sieurs de Brille-Baudet, & d'Angoulins, en la forme que s'ensuit:

**A**Vjour d'huy onzième iour dumois de Septembre mil six cens vingt & sept. Le Roy estant à Saint Germain en Laye, mettant en consideration les grands & recommandables services, que Monsieur le Duc d'Angoulesme, Pair de France luy rend en son armée d'Aunis, & les grandes despences qu'il est obligé d'y faire; Sa Maiesté luy à accordé & fait don de l'Office de Seneschal de la ville de la Rochelle, vaquant par la forfaiture du Sieur de Loudriere, qui est pourueu d'iceluy, à cause du crime de leze Maiesté, dont il est atteint pour porter les armes, & s'estre joint aux Anglois, contre le service de sa Maiesté & de cet Estat. Comme aussi accorde au Sieur Duc, la confiscation des biens meubles & immeubles des Sieurs de Brille Baudet & d'Angoulains, qui sont à present en la ville de la Rochelle, coupables du mesme crime. En tesmoin de quoy sa Maiesté ma commandé d'expedier audit Sieur Duc toutes

1627.  
Septē  
bre.

Lettres & prouisions necessaires, & cependant en expedier ce present Breuet, qu'elle à voulu signer de sa main ; faißt contre signer par moy Conseiller en son Conseil d'Etat & Secretaire de ses commandemens. Ainsi signé L O V Y S, Et plus bas, P H E L I P E A V X.

Le 19. les Anglois prirent vne Barque chargee de prouisions & munitions pour la Citadelle, où estoit le Fils du Sieur de Saugéon, selon que quelques iours auparauant ils en auoient pris & coulé à fonds plusieurs autres qui vouloient prendre la mesme route.

Le 22. sortirent de la Rochelle sept voiles, pour aller en Ré, sur lesquelles fut tiré du Fort Louis, & ance des Meuilles proche la maison de Coureille, force coups de canons, mais sans les toucher. En l'une estoient les Sieurs Jean Guitton Escheuin, auparauant Admiral de la Rochelle, & Dauid de Fos Aduocat, Deputez par le Maire & son Conseil vers le Duc de Buckingham, pour luy porter les Articles dressez pour la jonction avec luy.

Le 22. sur les deux à trois heures auant iour, arriua à la Citadelle vne Barque d'en-

viron trente thonneaux chargée de toutes  
sortes de provisions, munitions & raffraichissemens ; sur laquelle les Anglois tire-  
rent force coups de canons inutilement.

1627.  
Sept.  
bre.

Le 23. le Sieur de Borrack Lieutenant general du Duc de Buckingham, fut tué dans les tranchées. Ce qui irrita tellement ledit Duc, ioint l'entrée de ladite Barque qu'il fit tirer toute la matinée, tant de la terre, que de dessus les Vaisseaux, sur la Citadelle & aussi sur la Barque. Durant ce tonnerre vn coup fatal emporta de ce monde en l'autre, le Sieur de Montferrier, Frere du Sieur de Thoiras, de sorte que ce iour les deux partis firent vne grande perte. Mais sur tout celuy des Anglois, veu que le Sieur Borrack estoit quasi le seul homme d'experience qu'ils eussent.

Le 27. le Sieur Hasburin, qui estoit allé à Paris avec le Sieur de Saint Surin, arriua à la Rochelle pour passer en Ré, avec ledit Sieur de Saint Surin, lequel aussi tost apres son arriuée le Duc de Buckingham enuoya prisonnier dans l'une de ses Remberges, où estoit desia le fils du Sieur de Saugeon, & ce ( disoit-il ) à cause du mauuais traitement qu'on auoit fait audit Sieur Hasburnin : mais au fond on



1627. creut que c'estoit de desplaisir de ce qu'il  
Sept. l'auoit béflé.  
bre.

Le mesme iour sur les trois heures apres midy, on commença de faire les prieres au Temple de Saint Yon, pour continuer tous les iours, & iusques à ce que la paix fust faite.

Le leudy 30. & au matin les Anglois prirent trois Barques chargees de viures & munitions pour la Citadelle, en mirent trois autres à fonds & en firent eschouer deux à l'Aiguillon, le reste s'estant mis en fuitte, de sorte qu'il n'en entra aucune pour ce coup dans la Citadelle.

Oct. Le premier d'Octobre, le Sieur de Thoï-  
bre, ras se sentant pressé à toute extremité, & voyant que ses gens, tant soldats que volontaires murmuroient contre luy, & faisoient des cabales pour traiter avec le Duc de Buckinghant, & luy liurer la place, afin de les contenter, & tascher de gagner temps & amuser les Anglois, enuoya le Sieur de Montault, au Duc, pour sçauoir qu'elle composition il luy voudroit faire. Ayant esté remis au lendemain matin, apres plusieurs allées & venuës, il fut en fin accordé; que si dans le huictiesme du mois (qui estoit le gros d'eau) la Citadelle

n'estoit secourüe, elle luy seroit mise entre les mains, & aussi le Fort de la Prée.

1627.  
Sept-  
bre.

La nuit du Ieudy venant au Vendredy huiëtiefme d'Octobre, dessigné pour la reddition, il partit quarante que Barques que Pinasses des Sables d'Ollonne, chargees d'hommes & de toutes sortes de prouisions de guerre & de bouche; dont il y en eut vingt & neuf qui passerent heureusement & entrèrent en la Citadelle. Ce fut à la faueur d'un fort grand vent de Nortouest, qui souffloit à tourmente, & maistrifa tellement l'armée Angloise, qu'elle ne les peut empescher de passer; seulement il y en eut quatre qui furent coulées à fonds à coups de canons. Ce secours vint fort à propos au Sieur de Thoiras, d'autant qu'au matin (suiuant la capitulation de l'autre part) il deuoit rendre la Citadelle. Le Duc de Buckingham au contraire en receut tel desplaisir, & entra en vn tel descouragement, qu'apres auoir dechargé sa premiere colere en force coups de canon qui mirent en pieces quinze à vingt de ces Pinasses: (mais desia deschargées.) deux ou trois iours apres il fit oster son canon des batteries, & le fit embarquer avec partie de ses gens ayant pris resolution de leuer

1627.  
Oâo.  
bre.

le Siege, & s'en retourner en Angleterre: Mais Monsieur de Soubize qui estoit pres de luy, comme aussi les Deputez de la Rochelle, & les Habitans de l'Isle le prians tous instamment de ne les vouloir abandonner, & luy offrans tout ce qui estoit de leur pouuoir; cela luy fit sursoir cette deliberation, ioint l'arriuée du Sieur Dolbieres, qu'il auoit enuoyé en Angleterre, qui luy donna esperance d'un secours de six mille hommes, que le Comte de Holland luy deuoit amener dans peu de iours, ce qui luy fit reuenir aucunement le courage & se resoudre à continuer son Siege.

Le Mardy 12. le Roy arriua deuant la Rochelle, & prit son logement à Estré, il ne faut pas demander si il y eut belle musique de coups de canon & de mousqueterie en tous les cartiers de l'armee, pour sa bien venue.

Le Mercredy 13. au Conseil assemblé en l'hostel de Ville, furent leuës les lettres de Monsieur de Rohan, escrites de Nismes à ceux de la Rochelle, du dix & neuf de Septembre. Par lesquelles il leur donnoit aduis de la ionction faite par ceux de Languedoc avec eux & l'Anglois.

Le 17. passerent au Fort de la Prée sept Barques



Barques chargées de viures & munitions, <sup>1627.</sup>  
avec quelques compagnies de Soldats, <sup>Odo-</sup>  
sans aucun empeschement : Mais le mes- <sup>bre.</sup>  
me iour vne Pinasse sortant de la Citadelle fut prise par les Chaloupes Angloises, qui tuèrent le fils de Richardiere qui y commandoit & la plus part de ses gens.

Le 18. entra dans la Rochelle vn Navire chargé de poisson sec, & quelques Barques chargées de vin & autres choses venans de l'Isle de Ré. Il leur fut tiré des Forts Louis, Port-neuf, & Courailletrente & cinq coups de canon, sans les toucher.

Le 19. fut amené dans la Rochelle par Jean Farine soldat de la Rochelle hardy au possible & qui fit fort parler de luy, vn nommé Franc, Huissier du Priué Conseil du Roy, qu'il print pres de Lusignan, comme il couroit la Poste, estant chargé de forces lettres & mesme du Roy, qu'il escriuoit à plusieurs Gouverneurs des Prouinces, & par lesquelles il donnoit aduis du rautaillement de la Citadelle, & commandoit qu'on enuoyast des Navires qu'on peust maçonner & remplir de pierre & caillotis, afin de fermer l'entree du Havre de la Rochelle : là aussi estoient les ordres de tenir son armee Navale preste, pour au premier

1627.  
Oâo-  
bre.

commandement, venir deuant la Rochelle, en datte lefdittes lettres du quatorziesme Octobre.

Le mesme jour & suiuaus vindrent de Ré à la Rochelle quatre à cinq cens Anglois, qui furent logez par les maisons.

Le 24. Monsieur de Soubize escriuit vne lettre aux Rochelois, par laquelle il les exhortoit de faire vne deputation vers le Roy de la Grand'Bretaigne. Surquoy furent nommez le Sieur Iacques Dauid Escheuin de la part du Corps de Ville, & le Sieur Iean de Hinfle de la part des Bourgeois; & de la part de l'Eglise; le Sieur Salbert, Ministre, qui estoit en Ré, pres le Duc de Buckingham.

La nuiët du Dimanche venant au Lundy 25. entra dans la Rochelle venant d'Angleterre, vn Navire chargé de cent cinquante thonnieux de bled, comme aussi quelques Barques chargées de vin & autres commoditez sans aucun dommage, bien qu'ils eussent entré au clair de Lune, & eust esté tiré sur eux, des Forts Louis & Barteries plus de trente coups de canon.

Le 26. les Rochelois firent publier par la Ville leur Manifeste, par lequel ils rendoient compte des causes & raisons qui les



mouuoient à se joindre aux armes du Roy <sup>1627.</sup>  
de la Grand'bre<sup>taigne</sup> : Et mirent au pied d'iceluy la lettre du Roy escrete à Monsieur le Duc d'Angoulesme, comme aussi le serment du Roy Louis onziesme fait à Robert Cadiot Maire de la Rochelle l'an mil quatre cens septante & deux.

En ce Manifeste reprenans les choses à la paix de l'an mil six cents vingt & deux, ils disent que l'une des conditions d'icelle, auoit esté la domolition du Fort basti durant la guerre proche de la Ville ; aussi que le Roy auoit donné lettres à leurs Deputez en dattes du dix huiſiesme Decembre, adressées au Sieur Arnault, par lesquelles il luy enjoignoit d'y faire trauailler sans delay, mais que sous diuers pretextes il eluda d'y obeir, & tant s'en faut continua de le fortifier. Ce que fit apres sa mort le Sieur de Thoiras, encores plus diligemment, sans que toutes leurs plaintes ny leurs Deputations reïterées vers sa Maïesté, pour luy représenter cette infraction, eussent peu produire aucun effect. Que le dessein pour lequel on le conseruoit & munissoit tant, paroissant assez, en diuerses entreprises, qui de là auoient esté faites sur la ville, ce fut l'occasion qui meut



1627.  
Oâo-  
bre.

Monſieur de Rohan, avec lequel la paix de mil ſix cents vingt & deux, auoit eſté traitée, à prendre les armes, & donna ſubiect à Monſieur de Soubize de faire l'entreprife de Blavet, & de ſ'affeurer de l'Iſle de Ré, & à la Ville de ſe ioindre à eux, ayans veu que combien qu'ils ne ſe fuſſent point declarer, & euſſent deputé vers le Roy pour obtenir de ſa Juſtice la demolition de ce Fort, au lieu de la leur accorder, le Mareſchal de Praſlin eſtoit venu contr'eux en armes, & leur auoit fait des hoſtilitez.

Que la paix en ſuitte ayant eſté traittee par l'entremiſe des Ambaſſadeurs du Roy de la Grand'bretagne, & de Meſſieurs les Eſtats, ſous diuers Articles, & ſur tout avec la parole du Roy, depofee aux dits Ambaſſadeurs, dont ils donnerent la leur preſcrit, que dedans ſix mois le Fort ſeroit demoly, rien n'en auoit eſté obſerué. Au lieu de les laiſſer r'entrer en leurs biens, que le Sieur de Thoiras auoit faiſi & fait enleuer tout leur ſel, & du prouenu baſty vne Citadelle en l'Iſle de Ré, Que les garniſons au lieu d'auoir eſté reduites au nombre accordé auoient eſté groſſies, de forte qu'il y auoit touſiours eü pres de huit à dix mille hommes au tour de la

Ville, qu'aux passages de Marans, & ailleurs, on auoit fait construire de nouveaux Forts, qui bloquoient la Ville & empêchoient l'entrée des bleds & provisions; que par mer le Sieur de Thoiras faisoit le mesme par le moyen des Vaisseaux qu'il entretenoit contre le traicté en la Rade de Chef de Baye.

Que le Sieur Briet enuoyé pour Intendant de la Iustice, outre les Cabales en la Ville, auoit fait des Vexations inouyes, iusques à auoir fait mourir en l'Isle de Ré vn Soldat, à qui on supposoit d'auoir brizé vn Crucifix durant la guerre, ce qui peu apres fut auéré estre faux, le Crucifix s'estant retrouvé, Que contre les Priuileges accordés à la Ville par les Rois, qui n'auoient pas esté des graces, mais des conventions sous lesquelles elle s'estoit donnée à la France, on l'auoit chargée de la Domaniale, & estably des Bureaux pour les Traictes des bleds & vins du Gouvernement, fait expedier lettres au Sieur de Thoiras de Gouverneur de la Ville, & bastir lesdits Forts & Citadelles. Qu'outre ces griefs à eux faits en particulier, ceux de la Religion en general estoient tres-mal traitez en tout le Royaume, & que l'E-

1627.  
Octo-  
bre.

dict leur estoit violé en tous ces Chefs. Que là dessus le Roy d'Angleterre, qui de l'adueu du Roy, leur auoit esté garant du Traitté de paix, qu'on leur obseruoit si mal; ayant employé ses intercessions, & apres auoir veu qu'elles estoient inutiles, s'estant resolu aux armes, & ayant enuoyé son armée en ces Costes; Eux auoient Deputé vers Monsieur le Duc d'Angoulesme qui s'estoit approché d'eux en armes, iusques à Marans, pour protester qu'ils desiroient demeurer inuiolables en leur fidelité & obeïssance au Roy, & le supplier qu'il luy pleust interceder vers Sa Maïesté, à ce qu'elle les fist ioüir du Traitté de paix dernier; Qu'au lieu d'y entendre, il leur auroit déclaré la guerre, rauageant leurs maisons, venant bastir des Forts tout proche d'eux, & faisant des hostilités toutes ouuertes. Que comme ils se tenoient encor en suspens; En fin leur estoient tombées en main les lettres du Roy audit Sieur Duc, du treiziesme de Septembre, où estoit le plan de leur ruïne, & tout l'ordre pour les assieger par mer & par terre. Qu'en estans à ce point, ils se voyoient forcez à prendre les armes, & se ioindre à celles du Roy de la Grand' Bretagne, prians tous



bons François , & tous les Rois & Potentats d'approuver leur dessein , & les y aider, sous protestation toutesfois de demeurer toujours aux devoirs de la sujection & fidelité deuë au Roy , & qu'ils seroient prests de se soubmettre à son obeyssance , lors qu'il luy plairoit les recevoir en sa grace , & faire reparer les infractions des Edicts , & les restablir en leurs anciennes libertez & priuileges.

A ce Manifeste il fut fait vne ample responce , qui porte en sommaire , que si le Traitté de Montpellier n'auoit esté executé de tout point, les Rochelois en estoient la cause , l'ayant les premiers enfreint, au regard de l'exercice de la Religion Catholique, qui deuoit estre restablie plainement & paisiblement en leur Ville , ce qu'ils n'auoient voulu souffrir lors que les Commisaires du Roy furent enuoyez, ny permettre que les Ceremonies de l'Eglise Catholique fussent pratiquées en public ; d'ailleurs que le Roy au mesme Traitté ayant ordonné que le nouuel ordre des Quarante & huit Bourgeois seroit cassé, ils n'en voulurent rien faire : joint d'autres des-obeyssances, qui firent croire à Sa Majesté , qu'il falloit sur-seoir cette demolition, qu'ils ne

1627.  
Oao.  
bic.

1627. pressioient tant , que pour auoir leurs coudées plus franches , pour vn nouueau remuement. Que les armes leuees en suite par le Duc de Rohan en Languedoc , & les Vaisseaux du Roy saisis par le Sieur de Soubize à Blavet , auoient esté vn attentat & vne rebellion sans exemple , & que le tout auoit esté concerté avec eux , qui cependant voulans amuser le Roy par des adueux feints , il n'eust pas esté raisonnable qu'il se fust laissé tromper à eux. Qu'au Traitté de paix qui suiuit il estoit faux que les Estrangers eussent agy comme entre-metteurs , & que le Roy leur eust donné aucune parole ny consenty cette injure que leurs Maistres fussent garants de la sienne à ses Sujets : comme l'auoient voulu dire du depuis les Ambassadeurs d'Angleterre. Que si apres ce Traitté le Roy trouua bon de faire construire vne Citadelle en l'Isle de Ré , & des Forts aux passages de l'Isle de Marans , il n'auoit que trop paru par la suite de la necessité qu'il y en auoit , pour tenir en bride vne Ville tousiours rebelle , & qui deslors tramoit avec les Anglois. Mais au reste qu'il estoit contre verité que de là on eust fait aucunes hostilitez , & que toute la France scauoit



au contraire, que les passages pour aller 1627.  
& venir, & pour porter toutes les denrées 080.  
estoyent tres librés à tous. Quant aux Bu- bre.  
reaux establis, contre les pretendus priuileges, & les lettres de Gouverneur données au Sieur de Thoiras, que ces Priuileges estoient des grâces des Rois, & non, ainsi qu'ils le disoient, des conuentions. Ainsi que quand ils s'estoient escartez de leur deuoir, il auoit esté tres-iuste de les reuoyer, comme du temps de François I. qui cassa leur Maison commune, & leur donna vn Gouverneur, & ne les receut à mercy sinon apres qu'a genoux & avec beaucoup de larmes ils luy eurent tous crié misericorde. Que le jugement donné contre celuy qui auoit brisé vn Crucifix auoit esté juridique, sur des charges & informations suffisantes. Que les plaintes pour le General de leur Religion, au reste du Royanme, estoient sans aduen, & refutées par l'exercice que le Roy leur accordoit libre & entier, & sa protection sous laquelle ils viuoient paisibles. Que l'inuasion des Anglois, & leur descente en armes en l'Isle de Ré, faite en pleine paix, & sans nulle prealable denonciation de guerre, estoit contre toute iustice, & le droit des gens,



1627.  
Oao-  
bre.

dont aussi le Roy les feroit repentir en bref. Que si les Rochelois d'abord auoient differé de se declarer pour eux, & député vers le Duc d'Angoulesme, c'auoit esté pour tascher de gagner temps, & pendant ce delay faire leur recolte, ven que le Roy estoit tres bien aduerti, que la venue des Anglois auoit esté concertée avec eux; & qu'encores que de bouche ils ne se fussent pas encor declarez pour eux, il l'estoient par les effects, aians receu le Deputé du Duc de Buckinghant, enuoyé vers luy les leurs, & l'aidans tous les iours de prouisions. Qu'ainsi le Roy auoit tout sujet de les declarer criminels de leze Maiesté & leur faire porter les peines de leurs Rebelions. Ce qu'aussi il esperoit faire en bref.

Ledit iour à la marée du matin les Sieurs David & Dehinse passerent en l'Isle de Ré, pour y ioindre le Sieur Salbert, qui estoit pres le Duc de Buckinghant, & de là aller en Angleterre s'acquitter de leur Deputtation, qui tendoit à remercier ce Prince de son secours, & le supplier de le continuer, luy representant l'estat où ils se trouuoient. Avec eux passerent en la mesme Isle de Ré, pour resider pres la personne du Duc de Buckinghant, les Sieurs Desher-

biers & Bragneau pour le Corps de Ville, 1627.  
& Goyer le Jeune, & le bon homme Che- O&oy  
uallier experimenté Capitaine de Marine, bre,  
pour les Bourgeois, & ne furent offensez  
d'aucuns coups de canon, combien qu'il  
leur en fust tiré bon nombre.

Le mesme iour à la marée du matin, pas-  
ferent au Fort de la Prée treize Barques où  
estoit fix à sept cens hommes, sans au-  
cune rencontre ny empeschement des An-  
glois.

Le Mercredy 27. à la marée du matin,  
fortirent de la Rochelle pour aller en Ré,  
quinze voiles, tant Paraches, que Barques,  
Flins, & Brulots, afin de voir si ils reüssi-  
roient mieux à empescher le passage à ceux  
qui voudroient aller à la Citadelle, & au  
Fort de la Prée; on les canonna à force  
des Batteries; mais sans nul dommage.

Le mesme iour au matin furent amenez  
prisonniers deux Capucins, qu'on renuoya  
à l'apres midy, sans leur mesfaire.

Le susdit iour les Coureurs amenerent  
prisonnier vn Lapidaire. Espagnol, chargé  
de quelques pierreries, & y eut contesta-  
tion au Conseil, si il seroit declaré de bon-  
ne prise, à quoy quelques vns contredi-  
soient, & mesmement le Sieur Vincent,



1627.  
Oâo  
bre.

Ministre, qui ayant entre tenu cét homme, & le trouuant homme de sens, vouloit qu'on le gratifiast, & qu'on mesnageast par luy vn commencement de Traitté avec le Roy d'Espagne, ce qu'il appuyoit de plusieurs raisons & tesmoignoît grande confiance du Duc de Buckingham, & des Anglois; mais son ouuerture ne fut pas goûtée.

Le lendemain matin 28. ceux de la Rochelle enuoyerent de nouveau neuf autres Voiles, tant Pattaches que Barques esquipées en guerre, avec trois compagnies d'Infanterie & quelques Gentils hommes volontaires, on leur tira de mesme quantité de coups de canon, mais sans nul effect.

Le mesme iour 28. le Sieur Salbert s'estant excusé du voyage d'Angleterre, le Sieur Philippe Vincent, l'un des Ministres, luy fut substitué par l'Eglise & Corps de Ville; & partit le mesme iour pour aller en Ré, y ioindre les autres Deputtez.

Le Samedi 30. sur les quatre à cinq heures du soir, Douze à treize cents hommes commandez par le Sieur de Canaples Maître de Camp au Regiment des Gardes, s'embarquerent au Plomp, pour se rendre



au Fort de la Prée. Ayans passé sans em- 1627.  
peschement, & y en ayant vne grande par-  
tie à terre, ils furent attaquées par les An-  
glois & François, qui accoururent pour  
leur empescher la descente, & apres vn  
long combat; & la mort de cinquante à  
soixante des plus aduancez en terre, se vi-  
rent contrains de tourner visage vers leurs  
Barques pour s'y sauuer, & y en eut quan-  
tité qui se noyerent. Neantmoins la nuit  
suruenant leur fut tellement fauorable,  
veu qu'elle se trouua fort obscure, que non  
seulement ils acheuerent de faire leur des-  
cente audit Fort: mais mesme contrain-  
rent les Anglois de se retirer avec perte de  
dix à douze hommes & quelques blesez.

Octo-  
bre.

Le troisieme de Nouembre, entrerent <sup>Noué.</sup>  
dans la Rochelle, venans de l'Isle de Ré, <sup>bre.</sup>  
quinze Barques, quelques vnes chargées  
de vin, & autres commoditez: sur lesquel-  
les fut tiré des Forts & Batteries soixante  
& tant de coups de canon, sans en estre  
touchées.

Le mesme iour le Sieur Vincent, vint  
de l'Isle de Ré en la Rochelle, pour confe-  
rer avec le Maire & Conseil, sur quelques  
particularitez du voyage d'Angleterre, &  
pour demander vn Vaisseau commode, &

1627. leur pour faire voile au plustost.

Nou.  
bre,

Le Duc de Buckinghant considerant le passage des troupes du Roy au Fort de la Prée, & preuoiant que le dessein estoit de l'attaquer, & qu'il se trouueroit foible, se resolut de faire vne derniere tentatiue. Ainsi le Samedi sixiesme de Nouembre, sur les sept à huit heures du matin, il fit donner vn assaut par deux endroits à la Citalle, les François donnans par vn costé & les Anglois par l'autre. D'abord ils enleuent tous les dehors, gaignerent le fossé & planterent les eschelles contre la muraille & terrasse; mais leurs eschelles se trouuans trop courtes, & ayans à faire à des gens qui les receurent avec beaucoup de resolution, ils furent en fin contraints, apres deux heures de combat, de lascher le pied, & se retirer avec perte de beaucoup de gens, & quantité de blesez, qu'on fit porter le lendemain à la Rochelle, pour y estre traitez & pensez.

Le mesme iour & sur les neuf à dix heures du soir, le feu fut mis dans vne maison de la Rochelle, proche le clocher de l'Eglise de Saint Sauueur, ou y ayant diuerses marchandises combustibles, comme sont les Chanures, la Resine, & autres pareil-

les ; elle brussa si soudainement qu'a grand  
peine ceux qui estoient dedans peurent-ils  
en chemise gagner le toict de la maison  
pour se sauuer sur les maisons voisines.

1627.  
Nou<sup>ve</sup>  
bre.

Le Dimanche 7. sortirent de la Rochelle pour Ré , dix-neuf Pattaches & Barques en l'une desquelles estoit le Sieur Vincent , qui alloit rejoindre les autres Deputez pour Angleterre.

Le Lundy 8. le Duc de Buckinghant apres ce dernier effort donné à la Citadelle , desespera de l'auoir , & de pouuoir tenir plus long-temps dans l'Isle , voyant sur tout , qu'il arriuoit de iour à autre vn puissant secours pour l'en mettre dehors , & que quant à son armée , elle estoit diminuée de plus d'un tiers , sur tout par le moyē des dissenteries prouenuës d'auoir par trop mangé de raisins , selon la Prophetie du Sieur de Comminges. Là dessus donc , il se resolut de leuer son Siege : Or pour s'embarquer avec plus de seureté , veu qu'il auoit minuté des auparauant sa retraite en l'Isle de Lois ( qu'un petit Canal de mer separé de celle de Ré ) & y auoit fait faire vn pont pour y passer , en cas qu'il y fust forcé ; Il y fit acheminer ses troupes , & mit en l'arriere garde vn de ses meilleurs



1627.  
Nouë  
bre.

Regiments, & le Colonel Montjoye avec sa Cauallerie, pour soustenir l'Infanterie ; si besoin estoit : cette preuoyance luy vint à propos. Car la nuit auparauint sa retraite, outre les troupes du Roy, qui estoient desia en l'Isle ; Monsieur le Marechal de Schomberg y estoit arriué avec trois à quatre mille hommes de pied, & deux à trois cens cheuaux, & sur l'aduis qu'il se retiroit vint fondre sur luy, de sorte que sans cette arriere-garde, qui soustint le chocq, & defendit long-temps ce pont, il eust selon l'apparence taillé tout en pieces. Mais l'armée s'estant hastée de s'embarquer, tandis que ces autres résistoient, fut garantie de ce peril, seulement cette Arriere-garde & Cauallerie fut entiere-ment desfaite, & la plus grand part des Chefs faits prisonniers, comme entr'autre le Colonel Montjoye, & les Millords Gray & Montagu : En cette maniere s'embarqua & sortit de l'Isle le Duc de Buckingham, trois mois & seize iours apres son entrée en icelle.

Le mesme iour furent trouuez en plusieurs maisons de la Rochelle, de petits paquets de poudre avec des allumettes bien souffrées, au bout desquels estoient des

des mesches qui auoient esté allumées d'un-  
bout & qui neantmoins s'estoient esteintes  
sans auoir fait nul mal. Cela obligea vn  
chacun à fermer toutes veuës de Caues,  
Boutiques, Fenestres & lieux dangereux  
au feu, & de veiller pour tascher de sur-  
prendre quelqu'un de ces boutefeux, com-  
me de vray des la nuit suiuaute on en at-  
trapa trois, dont l'un estoit Sergent d'une  
compagnie venu depuis peu en la Ville, &  
furent aussi tost pendus en la place du  
Chasteau.

1627.  
Nouë,  
bre,

Le Mardy 9<sup>e</sup> sur les six à sept heures du  
soir on fit de grands feux de joye à Estré,  
Coureille, Bonnegrenne, la Moulinette,  
Folie Baudet, Ronlay, Fort Louys, & dans  
tous les quartiers de l'armée, avec salues  
de coups de canon & mousquetterie & cry  
de VIVE LE ROY, au sujet de la reprise de  
l'Isle de Ré, sur les Anglois: Ce qui don-  
na l'alarme bien chaude au Rochelois,  
qui n'en scauoient le sujet; tellement que  
de crainte de surprise & intelligence en la  
Ville, ils demeurèrent toute la nuit sur  
les armes.

Le 12. les Sieurs Daud, Vincent &  
Dehinsle, deputez comme il a esté dit,  
pour aller en Angleterre, retournerent de

1627.  
Nouv.  
bre.

l'armée Angloise à la Rochelle , sur les neuf heures du soir , comme aussi le Sieur Desherbiers ; & apportèrent vne lettre du Duc de Buckingham , qu'ils deliurerent au Maire & à son Conseil , qui pour cet effect fut extraordinairement assemblé en son logis. Le sommaire estoit qu'il leur conseilloit , pendant qu'il estoit la en rade , de rechercher le Roy de paix , qui ( selon qu'il en estoit assuré ) la leur donneroit toute , telle qu'ils la sçauoient demander ; Sinon qu'il leur offroit l'option de deux choses : a sçauoir , ou de venir en leur Ville avec deux mille hommes , ou de s'en retourner en Angleterre , leur procurer vn enuoy de bleds , & de toutes choses necessaires pour se maintenir contre les rigueurs du Siege , & retourner avec vne armée & forces suffisantes pour les liberer.

Le mesme iour on commença sur les dix heures du matin , à trauailler à l'ange des Mueilles du costé de Coureille , & à dresser des bois , comme pour y faire vne Stacade : Ce qui obligea les Rochelois de tirer le canon pour en interrompre la trauail si ils eussent peu.

Le 13. A la marée du matin , vn Terre-



neufuier d'enuiron cinquante à soixante  
thonneaux chargé de poisson vert , vint  
s'eschouer sur les vazes , à demie portée  
du mousquet de la chaisne , n'ayant pas eu  
assez d'eau pour entrer. Et luy fut tiré du  
Fort Louys tout le long du iour quarante  
coups de canon , dont il n'y eut que deux  
qui donnerent dans les Aubans , & encore  
sans tuer ny blesser personne , & entra à la  
marée du soir.

Le Mercredi 17. le Duc de Bucking-  
hant , apres auoir sejourné huit iours à  
l'ancre deuant l'Isle de Loys , trouuant le  
vent à propos , se mit à la voile , sans atten-  
dre la responce de sa lettre , à ceux de la  
Rochelle.

Le leudy 18. Les Sieurs David , Vin-  
cent & Dehinssé s'estans embarquez sur  
l'heure de Midy , dans vn Fluibot , tirerent  
vers l'Isle de Lois , ou ils esperoient le trou-  
uer. Avec les mesmes partirent dix Bar-  
ques , portant du pain & de l'eau à l'armée  
Angloise , & en l'une estoient les Sieurs  
Tessereau Conseiller , Iournault & Sava-  
rit , pour aller prier ledit Duc de Bucking-  
hant de la part des Rochelois , de leur don-  
ner des bleds & autres prouisions qu'il  
auoit en abondance dans ses Vaisseaux.

1627. Mais ne l'ayans point trouué, Ceux cy re-  
Noué. tournerent dans la Rochelle; & quant aux  
bre. Deputez pour Angleterre, ils suiuirent  
l'armée Angloise.

Le Dimanche 21. Sur la minuiet entra dans la Rochelle vne Pattache de guerre, avec vne prise chargée de pains de munition, pour les troupes de l'Isle de Ré, & Citadelle, au nombre de quinze mille, qui furent vendus au peuple, les blancs à deux sols & les communs à vn sol & six deniers la piece; au Passage vn Matelot fut emporté d'vn coup de canon.

Le Ieudy 25. à la marée du soir, entre-  
rent dans la Rochelle cinq prises : a sçauoir, deux charges de bois, deux de bled, & vne de pains de munition : sur lesquelles furent tirez quelques coups de canon sans les toucher.

Le Dimanche 28. Entra dans la Rochelle venant d'Angleterre, le Capitaine Bourguis, qui auoit en son Bord quatre vingts Anglois, dont on fit vne compagnie. Il raportoit que le Comte de Holland estoit en mer, pour venir trouuer le Duc de Buckingham en Ré. Mais on à sçeu du depuis que ce Comte s'estant embarqué trois fois, à chacune le vent l'auoit repoussé à Ple-

mud , où ledit Duc de Buckinghant le trouua , y estant arriué le vingt & deuxiesme dudit mois avec les Deputez , qui des le vingtiesme l'auoient ioint par de la le Ras. Il ne fut point tiré sur ledit Bourguis, combien qu'il fust iour.

1627.  
Nouë.  
bre.

Le mesme iour & des la Diane , il fut veu force Pionniers trauailler à la Haute Fons en la Garaine de la Ramigere , pour y faire vn fort : Les Rochelois y tirerent le canon , & à l'apresdinée firent vne sortie par la Porte de Coigne de sept à huit cents hommes de pied , & de trente à quarante cheuaux , pour tascher de les denicher de là ; Mais ils ne le peurent , veu qu'ils furent escortez de force Cauallerie & Infanterie: Le iour se passa en petites escarmouches, & y fut tué vn Habitant , outre trois blesez , mais de blessures legeres.

En ce mesme temps , il fut aussi veu trauailler à vn Fort , au delà du Pont des Salines , vers Perigny , en vn champ appellé la Folie Baudet , où autrefois il y en auoit eu vn.

Le Vendredy troiesieme Decembre entrerent dans la Rochelle deux Barques, qu'on auoit prises , comme elles sortoient de la riuiera de Marans , & s'y trouua du

Decē-  
bre.



1627. vin d'Espagne, nombre de Barils de Rai-  
Decē. fins, & sept à huit thonneaux de bled,  
bre. avec quelques autres provisions.

Le Mercredy 14. Sur les quatre à cinq heures du soir, on commença de tirer d'une nouvelle Batterie, dressée sur le bord de la Falaise à deux cens pas de la maison de Coureille, qui donnoit entre les deux Tours iustement à l'ouverture de la Chaisne. Le premier coup de canon, couppa le Mats de deuant du Navire du Cappitaine Bragueau, qui estoit au trauers du Hayre, sans toutesfois tuer n'y blesser personne.

Le 16. Les Rochelois demanderent des Passeports pour faire sortir plusieurs femmes & bouches inutiles, mais ils en furent refusez.

Le Samedy 17. Estant tiré de la fussedite Batterie (que nous dirons cy apres Royale) il fut tué vn Homme, vne Femme, & vn Enfant.

Le Dimanche 18. Sur les onze heures du matin, quelques Barques des Assiegans arriuerent à Coureille escortées de la Galere de Broiïage, qui sur les deux à trois heures apres midy vint fort proche de la Chaisne, & tira trois coups de canon à trauers la Ville, sans toutesfois faire de mal à

personne. Mais la nuit du Mercredi venant au Ieudy vingt, quatriesme ( sur l'ad-  
uis que les Rochelois denoient aller audit Coureille pour la prendre où brusler ) elle  
s'en retourna en Broüage.

1627.  
Decē.  
bre.

Le Vendredy 25. Vne partie de l'armée Navale du Roy , au nombre de dix à douze grands Vaisseaux , quelques Pattaches & la Galere de Broüage , vindrent mouiller l'ancre à la rade de Chef de Baye , & à leur arriuée deschargerent tout leur canon , comme aussi le Fort Louys , & la Batterie Royale , à quoy la Rochelle respondit en mesme temps du sien.

Le lendemain 26. Sur les trois à quatre heures du soir , vn coup de canon venant de la Batterie Royale , tua trois gueux & en blessa deux à trois autres , comme ils estoient à iouïr aux cartes dans l'une des Boutiques à planches de la Potterie , qui sont sur les Cais de la Grand'Rive , vis à vis de l'ouuert de la Chaisne. Le lendemain ces Boutiques furent mises par terre , afin qu'elles ne seruissent plus de mire , & ne causassent plus de tels meurtres a l'aduenir.

En ce temps la Digue s'aduançoit fort des deux costez de Chef de Baye & de

1627.  
Decē-  
bre.

Couzeille; afin de trauffer & fermer l'entrée & sortie de la Rochelle par la mer: Dequoy les Rochelois se mocquoient, se faifans croire, que les tourmentes & mauuais temps en deferoient plus en vne marée que l'on n'en pourroit faire en six mois.

Le Mardy 28. Il fut veu trauffer entre Ronfay & Beaulieu, à vne bonne portée de canon de là Ville, pour y faire vn Fort.

Le 30. A la marée du matin, il entra dans la Rochelle, vne Barque chargée de vin de Bourdeaux, sur laquelle fut tiré à force du Fort Louys, & de la Batterie Royale, mais sans luy toucher.

1628.  
Jan-  
uier.

Le troisieme Januier mil six cens vingt & huit, il fut veu trauffer au Petit Festillé, pour y faire vn autre Fort, ce qui obligea ceux de la Ville à tirer dessus, mais sans grand succez.

Le 6. Il se fit vne si forte tourmente de vent de Sur-ouest, que la Digue en fut presque renuersée, & les Vaisseaux du Roy, qui estoient en rade à Chef de Baye tellement incommodez, que trois d'iceux furent iettez és Costes de Chef de Baye & de Couzeille, ou l'vn en moins de rien fut brizé & mis en piece.

Le 8.



Le 8. Quarante Caualliers estans sortis de la Rochelle par la Porte Neufue, pour aller battre l'estrade vers le grand Festillé & les entours, firent rencontre de quelques Caualliers des Assiegeans & les malmenoièrent : mais Monsieur de Bassompierre avec force Cauallerie & Infanterie y accourut, & les fit retirer, sans autre perte toutesfois que de quelques blesez, en eschange dequoy ils amenerent avec eux trois prisonniers dans la Ville.

Le mesme iour fut descouuert par vn Soldat ( qui quelques iours auparauant s'estoit ietté du Camp en la Ville ) vne entreprise sur le Fort de Taddon, tramee par l'Enseigne du Capitaine la Salle, lequel fut aussi tost pris & mis à la question, qu'il eut ordinaire & extraordinaire, & le Lundy dixiesme fut pendu, & sa teste mise au bout des trauaux dudit Fort, à demy portee de mousquet du Fort de Bongrenne. Pour le mesme sujet trois sepmaines ou vn mois auparauant auoient esté pendus deux Soldats, & vn condamné de les assister au pied de la potance, & la corde au col.

Le Mercredy 12. Quelques Soldats aduanturiers amenerent dans la Rochelle

1628. quelque soixante tant Bœufs que Vais-  
siers, ches.

En cemesme temps , il fut veu traual-  
ler à Miroeil , pour y faire vn Fort.

Le Ieudy 13. Les Rochelois ayans veu  
arriuer au matin quelques Barques à Cou-  
reilles , conduittes par des Galiottes , & se  
doutans que ce fust du canon & des muni-  
tions de guerre ( veu qu'ils auoient eu ad-  
uis quelques iours auparauant , qu'il y en  
deuoit arriuer ) entreprirent de faire vne  
sortie par mer, pour tascher de les enleuer,  
& en mesme temps d'en faire vn autre par  
terre , pour diuertir le secours. A cet effect  
ils esquipperent en toute diligence onze  
Chaloupes , qui se trouuans prestes des  
les huit heures du soir, bien munies d'hom-  
mes , pierriers , grenades & feux d'artifi-  
ces, sortis de la Chaisne, ils costoyerent  
le riuage de Port Neuf, de peur d'estre des-  
couverts, & ayans laissé deux de leurs cha-  
loupes au milieu du Canal , tant pour  
empescher le secours , que pour attraper  
ceux qui voudroient se sauuer ; ils allerent  
fondre à l'improuiste sur ces Vaisseaux qui  
estoitent à l'ancre sous le Fort de Marillac,  
& d'abord se rendirent maistres de deux  
Galiottes, contraignirent les autres & aussi

les Barques de s'eschoïer , & tuerent quantité de ceux qui estoient dedans , & pour se sauuer se iettoient à l'eau. Mais veu que le secours leur venoit de toutes parts & craignans aussi que sejourrans plus long temps ils demeurassent à sec , pour ce que la mer perdoit , ils se retirerent avec leurs deux Galiottes , dans la Rochelle, n'ayant perdu que quatre hommes , & huit de blesez, en toute cette execution.

En mesme temps que les choses se desmesloient ainsi sur la mer , ceux de terre donnerent à la Redoute de Beautreil, entre Bongrenne & la maison de Coureille , ou estoit en garde vne Escouade de trente hommes du Regiment de Ionsac, qui apres quelque resistance furent forcez & taillez en pieces , sur tout par les Anglois, au sujet de leur compagnons qu'on auoit tuez en l'Isle de Ré , de sorte qu'il ne s'en sauua que deux ou trois. Quant aux Rochelois, il n'y en eut qu'un de tué , & trois de blesez , & apporterent dans la Ville toutes les armes qui demeurerent à ceux qui les auoient prises.

Le Vendredy 14. De fort bon matin , il fut tiré de la Batterie Royale quinze à vingt coups de canon à trauers la Ville,



1627. sans tuer ny blesser personne, à la reserue  
l'auier. d'un temeraire Soldat, qui ainsi qu'il se  
mocquoit de ceux qu'il voyoit se baïsser, &  
se mettre au couuert du parapet, pour eui-  
ter l'attainte mortelle de ces foudroyans  
tonnerres, & demouroit quant à luy sur la  
muraille, il eut la teste emportée de l'un  
d'iceux.

Le 15. Le Sieur de Fequiere fut amené  
prisonnier dans la Rochelle, & mis dans la  
Tour de Moureille proche l'ancienne Por-  
te de Maubec; ayans esté pris comme il  
trauersoit de Coureille en un autre quar-  
tier: il estoit accompagné du Sieur de là  
Forest Lieutenant des Gardes de Monsieur  
le Cardinal de Richelieu, qui fut tué ne  
s'estant pas voulu rendre.

La nuit du Mardy venant au Mercredi  
19. sur les deux heures du matin, sortirent  
de la Rochelle, pour aller en Angleterre  
tascher à hastier le secours, & achepter des  
bleds & autres prouisions pour la Ville, les  
Sieurs Daniel Bragneau, de la part du  
Corps de Ville, & Iean Gobert, pour les  
Bourgeois, & partirent avec dix voiles;  
c'est asçauoir, trois Nauires de guerre, cinq  
Pataches, & deux Bruslots, & passerent  
sans recenoir aucun dommage des Forts &

Batteries, ny des Vaisseaux de guerre, qui <sup>1628.</sup> estoient à Chef de Baye à l'ancre ; seule-<sup>l'auier.</sup> ment à la sortie de la Chaisne, vn de leurs brullots, par la faute de ceux de dedans s'alla embarasser avec vn desdits Navires de guerre, & en telle sorte qu'il luy falut couper les mats & cordages, & en cet estat le laisser aller à la drive & au courant qui le ietta à Port Neuf, où il donna l'alarme bien chaude, & luy furent tirez force coups de canons & de mousquets; mais voyans que nul ne leur respondoit, comme de vray il n'y auoit personne, ils l'aborderent avec leurs chaloupes & le menerent eschouër à lanse dudit Portneuf; outre ces dix voiles, dix autres eussent sorty sans vn second embarras de deux vaisseaux de guerre, qui venans à se rencontrer à la sortie de la Chaisne ne pûrent estre despris l'un de l'autre, que la marée ne fust presque perduë, & fermerent par ce moyen le passage aux autres : Dequoy on imputa la faute à vn des Capitaines desdits Vaisseaux, qui ne desirant faire le voyage, ainsi qu'on croyoit, fit cet embarras à dessein.

Le leudy 20. Les Rochelois tirerent quantité de coups de canon sur le bout de

1628. la Digue, du costé du Fort Louys, pour  
Januier essayer d'en interrompre le travail, qui  
nonobstant ne laissoit de continuer.

Le Vendredy 21. Sur les deux à trois heures apres midy, estant plaine mer, la Pallissade au nombre de dix à douze grands Vaisseaux murez & pleins de pierre par dedans, fut posée entre Portneuf, & le Fort de Marillac, du costé de Coureille, à vne demie portee de canon de la Ville, on les y conduisit sous la faueur & escorte des Navires de guerre, & de la Galere, & des Galiottes de Broüages, sans que les Rochelois y peussent mettre empeschement, par tout ce qu'il peurent tirer de coups de canon, ny aussi par la sortie de dix Chaloupes de guerre, qui s'estans aduancées furent contraintes de se retirer, voyans qu'elles auoient à essuyer tous les coups des Batteries qui tonnoient furieusement sur elles, & qu'elles ne pourroient rien contre les Nauires de guerre. Tout ce qu'ils peurent faire ce fut de s'en reuenir avec quelques bleffez.

Le Samedy 22. Sur les neuf heures du soir les Rochelois firent vne sortie par la Porte des deux Moulins, de quarante chevaux, deux à trois cents hommes de pied,



& de la plus grand part des Matelots & Charpentiers de Navires , qui avec planches & autres materiaux allerent à la Palissade , pour tascher à boucher les auges où ouuertures des Navires, murez & plains de pierre, afin de les amener dans la Chaïsne, où en lieu , où ils ne peussent leur nuire. Mais comme ils estoient apres & avec eschelles ( la mer estant toute basse & retirée ) montoient sur ces Navires, ils se trouuent inopinément accueillis d'une gresle de mousquetades , de ceux qui y estoient en garde , qui en abbatirent trois où quatre , & firent descendre les autres plus viste qu'ils n'y estoient montez. Cela donna telle espouuante à ceux qui estoient au bas à fermer les auges ; ioint le grand nombre qui leur vint sur les bras de Port-neuf & Coureille , qu'ils abandonnerent tout pour se sauuer à la fuite, & en tel desordre qu'ils couroient risque d'estre tous taillez en piece, sans la Cauallerie qui les voyant de son poste si mal menez, acourut à leurs secours , & donna si viuement sur les poursuiuans qu'elle les fit reculer iusques à la Palissade, & en fit demeurer plusieurs sur la place, & entr'autre vn Capitaine qui estoit venu dudit Coureille à

1628.  
Iânier,

1628. leur secours.

Janier. Le mesme iour sur les quatre à cinq heures du soir, furent tirés du Fort de la Fons, sur la Ville diuers coups de canon de trente & deux, & trente & trois liures de basse, sans tuer ny blesser personne, de sorte que le peuple voyant le peu d'effect du canon s'y accoustuma, & n'en firent plus de compte.

Le 27. Les Rochelois ayant eu aduis que l'armee Navale du Roy, de quelque trente Navires de guerre, conduits par Monsieur le Duc de Guise, estoit depuis peu de iours arriuee à Chef de Baye, comme aussi Dom Federic de Toledé Admiral d'Espagne, avec de trente & cinq, à quarante autres Vaisseaux de guerre; firent sortir à la marée du soir trois Pattaches de guerre, avec chacune leur despesche, pour aller en Angleterre aduertir leurs Deputtez de leur arriuee; & aussi qu'on auoit mis dix à douze grands Vaisseaux murez en Palissade, au trauers du Canal; afin qu'ils se diligentassent de les faire secourir: Ils les chargerent aussi de lettres à Monsieur le Prince d'Orange & à Messieurs les Estats. Nonobstant tout l'embarras des Navires enfonchez sur aucuns desquels il y auoit du canon

&



& tous les autres Vaisseaux de guerre , ces 1628.  
Pattaches passerent sans difficulté. *l'auier.*

Le 28. Arriua au Camp à Estré , le Marquis de Spinola , en qualité d'Ambassadeur extraordinaire d'Espagne : lequel le Roy receut avec toutes sortes de caresses , & luy fit voir toute l'assiette du Camp & les lignes , & aussi la Digue. Il parla du tout ( ainsi qu'on raporta ) avec beaucoup d'estime , & dit sur tout de la Digue , que s'estoit le seul moyen de prendre la Rochelle.

Le 4. de Fevrier , on vit de la Rochelle *Feuri.*  
poser vne chaisne qui trauersoit de Courreille iusqu'à Port neuf , & estoit supportée sur l'eau par des pipes , esloignées les vnes des autres , par vn certain interuale, y ayant en l'entre-deux des trauerfes liées & emmortaisées les vnes dans les autres, & au milieu d'icelle vne Machine flottante entournée de fessines.

Le Mardy 8. Les Rochelois enuoyerent deux Galiottes legeres en Angleterre, pour faire haster le secours , & représenter l'estat , auquel ils estoient reduits.

Le Ieudy 10. Le Roy partit pour Paris, apres auoir esté deuant la Rochelle quatre mois moins deux iours, & laissa à Mon-



1628. feur le Cardinal de Richelieu , tout le  
Fevri- poids des affaires, & la principale autorité  
& commandement sur son armée, avec le  
tiltre de General : Monsieur le Duc d'An-  
goulesme , & les Mareschaux de Schom-  
berg & de Bassompierre y demeurans aussi  
en qualité de Lieutenans Generaux de sa  
Majesté, sous ledit Sieur Cardinal de Ri-  
chelieu.

Le 18. Furent posez diuers autres Navi-  
res murez, pour renforcer la Palissade, &  
s'en contoît de quarante à cinquante, &  
vne Machine au milieu.

Le 19. Quelques Caualliers estans al-  
lez vers Ronlay, agasser la Cauallerie qui y  
estoit en garde, furent repoussez, nonob-  
stant le secours qui leur vint de la Ville, &  
le canon qui se fit de la partie, & ne peu-  
rent si bien faire qu'il n'en demeurast trois  
où quatre de morts sur la place; & entr'au-  
tre vn nommé la Forest, qui fut fort regret-  
té à cause de sa valeur, & des seruices qu'il  
auoit rendus à la Ville, aussi il fut enterre  
le lendemain avec beaucoup d'honneur.

En ce mesme temps Monsieur le Cardi-  
nal de Richelieu enuoya aux Rochelois vn  
Trompette, avec vne lettre, pour les ex-  
horter de venir à quelque Traitté de paix,

disant, en auoir l'ordre du Roy, qui mes- 1628.  
mes pour le faciliter s'estoit retiré à Paris, *14uier.*  
& leur remettoit l'option du lieu pour en  
conferer, fust ce à l'vne de leurs Portes, pro-  
mettant y faire trouuer Monsieur du Ha-  
lier, où autres : La chose mise en delibera-  
tion dans le Conseil de guerre à cet effect  
assemblé, il s'y trouua des contredisans,  
qui de haute lutte l'emportèrent par dessus  
le Maire & la plus grand part du Conseil,  
y employans mesmes les menaces de sous-  
leuer le peuple contr'eux, s'ils venoient à  
entrer en cette Conference, qui tendoit  
(disoient ils) à la ruine de la Ville. Ainsi  
cette proposition alla en fumée.

Le 25. & 26. A la marée de la nuit du  
Jeudy venant au Vendredy, il souffla vn  
impetueux vêt de Surouest qui debriſa par-  
tie de la Chaisne flottante & des Navires  
murez, & enuoya vers la Ville quantité de  
bois & trauerses, & deux piles de fessines,  
qui estoient autour de la Machine. Le me-  
nu peuple estant sorty sur la salaise pour  
emporter ce qu'ils pourroient de ce fracas.

Le canon qui joua dessus tua trois hom-  
mes & vne fille & en bleſſa quelques au-  
tres, & démonta vn Cauallier sans luy fai-  
re autre mal.



1628.  
Fevri.

Le 29. De la nuit du Lundy venant au Mardy, vne Galiotte sortit de la Rochelle, pour aller en Angleterre hastier le secours, & passa sans aucun empeschement.

Mars.

Le troisieme Mars, Les Rochelois receurent lettre par terre des Sieurs Dauid, Vincent, & Dehinse, dattée du quatrieme Fevrier, & escrite en chiffre, qui portoit que dans le mois de Mars où d'Auril au plus tard, l'armée seroit preste pour leur porter le secours d'hommes, de viures & munitions necessaires; ce qui réjoüit bien fort toute la Ville. La lettre estoit telle.

**M**ESSIEURS, Ayans receu la vostre par le Sieur de Baussay, nous auions tellement pressé l'enuoy des provisions que Monsieur Dehinse qui deuoit les conduire estoit party pour Plemud, mais ayant rencontré par le chemin le Sieur Gorribon, qui en son passage à trouué vers Bretagne l'armée Navale du Roy, qui estoit d'enuiron soixante voiles. Ils ont creu que le conuoiestât foible indubitablement le tout seroit pris, ainsi ils sont retournez & auons representé à sa Majesté vostre estat, il nous a promis de vous secourir d'une puissante armée de mer, en Mars pour



le certain, où au moins en Auril, sous le <sup>1628.</sup>  
bon plaisir de Dieu ; & cependant qu'on <sup>Mars.</sup>  
fera risquer diuers petits Vaisseaux avec  
dubled. Ayez bon courage, sans delay on  
ira à vous avec hommes & toutes proui-  
sions, faites en estat, & faites aussi proui-  
sion de chaloupes, ce sont,

MESSIEURS,

*De Londres le 4.*

*Fevrier 1628.*

Vos tres-humbles &  
obeïssans seruiteurs.

DAVID, VINCENT.

En ce mesme temps furent mis nombre  
de Navires en plusieurs endroits de la Di-  
güe, outre ceux qui y estoient, & estoient  
liez les vns aux autres par de gros cables,  
pour empescher que rien ne passast.

Le 6. Il y eut vne escarmouche entre  
les Assiegeans, & ceux du Fort de Taddon:  
sans grande perte de costé ny d'autre.

Le 11. Monsieur le Cardinal de Riche-  
lieu Lieutenant general pour le Roy en  
l'armée, ayant (comme on disoit) des in-  
telligences secretes avec aucuns de la  
Rochelle, vint avec environ huit mille  
hommes, tant Infanterie que Cauallerie;  
& grand nombre d'eschesles, ponts, pe-  
tards, cordages, madriers, & artifices, qui

1628. estoient portez dans dix chariots , iusques  
Mars. au Plessis , maison ruinée & distante de la  
Ville de cinq à six cents pas : la nuit luy  
estant fauorable pour faire seurement les  
aproches , veu qu'elle estoit fort obscure &  
venteuse. Le principal but de son dessein  
& entreprise estoit de pettarder la fausse  
Porte des Salines , qui est Maubec ; escaler  
les Bastions du Gabut & de l'Euangile ; es-  
sayer par le pettard la Porte neufue , & cel-  
le de Saint Nicolas , tenter à bon escient  
l'ouuert de la Chaisne , & branqueter en-  
tre les deux le Fort de Tadon : Cependant  
que diuerses bandes iroient donnant en di-  
uers endroits de fausses alarmes , pour di-  
uertir & dechirer les forces de la Ville : Et  
luy assistoient à cette haute expedition , les  
Mareschaux de Schomberg , & de Bassom-  
pierre , exhortans l'Infanterie de donner  
avec cette assurance , que iamais dessein  
ne se fit avec si peu de risque. Que sa Ma-  
jesté auoit dans la Ville , huit à neuf cents  
confidans ; tous bons hommes , & que par  
l'ouverture du Pettard , le trajet des Ponts ,  
& l'aide des Eschelles , tous moyens bien  
adjustez , on les rendroit à l'aise & quasi en  
bataille dans le milieu des ruës , & places  
d'armes : Que là s'embrasseroit en tout

heur & felicité la fortune toute entiere, <sup>1628</sup>  
avec ses meubles plus precieux, & qu'a-  
<sup>Mars.</sup>pres vne telle gloire, il n'y auoit plus rien  
à souhaiter pour eux. Mais tandis que ces  
belles paroles couloient avec facilité, &  
que le cœur voloit aux gens de guerre: voi-  
cy que tout à coup la rouë du dessein se  
trouue cloüée & cheuillée sans qu'on sa-  
che à quoy l'attribuer, sinon à ce que la  
nuict que ledit Seigneur Cardinal, avec  
raison auoit choisie tres obscure, mit de  
la confusion dans l'ordonnance des trou-  
pes & executeurs, où à la varieté de tant  
de pieces & de ferrailles, qui causa de  
l'embarras, où bien à quelque mal enten-  
du parmy l'armée; quoy que soit, toute  
cette nuict s'escoula iusqu'au iour, sans  
qu'il fust rien entrepris, sinon qu'on en-  
uoya recognoistre les Portes par quelques  
Soldats asseurez, qui en fraperent les Ret-  
teaux & premiers Ponts leuis, sans que le  
Guet de la Ville, qui se faisoit assez bon en  
ces lieux en ouïst aucune chose.

La nuict du Dimanche venant au Lun-  
dy 13. ledit Seigneur Cardinal de Riche-  
lieu, voyant que son dessein sur la Ro-  
chelle auoit manqué, en entreprit vn autre  
sur le Fort de Tadon, afin de voir s'il ne



1628. luy reüssiroit point mieux. Et pour cet ef-  
Mais. fect il choisit la fleur des troupes de l'armée, qu'il fit mettre en trois Bataillons: Au premier estoient les Enfans perdus, de quelque cent cinquante à deux cents hommes, commandés par les Sieurs de Marillac & de Sourdis, Capitaine au Regiment des Gardes : Le second faisoit le Corps de Bataille, ou commandoit le Marechal de Schomberg en propre personne, & estoit de quelques huit cents des plus lestes hardis & vigoureux Soldats de l'armée, avec la fleur de la Noblesse, qui deuoient donner ensemble : Le troisieme ; qui estoit le plus gros, ne deuoit seulement que soustenir, sans se faire de la meslée, ayant la Cannallerie à ses aisles. Cela ainsi ordonné, il les fit marcher tout le long de la Falaise, sans faire de bruit, iusqu'à la teste du Fort de Taddon, chascque Mousquetaire ayât son cachemesche, afin de n'estre descouverts. Mais auant que de rien entreprendre, furent enuoyez vne trentaine de Soldats, qui passerent à sec le canal, veu que la mer auoit entierement perdu, voulans harfeler & amuser le Corps de Garde de la Tenaille, & Porte des deux Moulins, & donnans l'alarme de ce costé là, d'autant mieux asseurer

1628.  
Mars.

feurer la vraye entreprife sur ledit Fort de Taddon, qui est presque à l'opposite. De plus il adiousta à ce tour de guerre, cét autre, d'enuoyer vn soldat accort à la Porte de Saint Nicolas, hucher à ceux qui estoient en garde au Rasteau de ladire Porte, au nom de ceux dudit Fort, qu'ils n'eussent point à tirer, pour quelque chose qu'ils ouïssent, & aduisassent, tout le long de la Courtine dudit Fort, d'autant qu'ils auoient vn contre dessein à iouer sur les assiegeans qui venoient à eux le long de la mer & qu'ils ne pouuoient tirer dans la confusion de cette meslée, qu'avec plus de peril pour ceux du Fort, que pour les attaquans, lequel aduis ils receurent, & fut la cause qu'ils ne firent point de feu, & seulement entendans tirer donnerent l'alarme en Ville. Ce soir commandoit dans ledit Fort, par le sort du billet, le Sieur Pontleuain, Gentilhomme de Xaintonge, qui outre sa compagnie en auoit cinq autres; sçauoit, quatre Françoises & vne d'Anglois. La Sentinelle qui estoit à l'œst entrouït bruire les cailloux du riuage, mais le vent qui venoit du Nort en le croïsant, luy desroboit le iugement de son ouye, & l'occasionna de regarder plus attentiuement

1628.

Mars.

de cette part , vers laquelle il luy sembla apperceuoir comme vne grosse ombre, qui flotloit à hauteur d'homme deuant luy, sans pouuoir autrement discerner que ce pouuoit estre. Il s'esmeut neantmoins & tira son coup , à la lueur duquel il descouurit ces bataillons , & vit que desia ils estoient dans les approches. Leur Chef se voyant descouuert fit marcher deux de ses premieres troupes par le trauers des laisses de la mer , comme s'il eust voulu donner à la Porte de Saint Nicolas , & après les auoir faict aduancer iusqu'entre la Ville & ledit Fort , vis à vis du Gabut, pour se mettre le vent aux espauls ( qui de ce costé là souffloit impetueux aux yeux de ceux dudit Fort ) & en suite ayant fait faire demy tour à droit , & descouvrir leur mesche , leur commande à haute voix la premiere attaque. A quoy ils obeïrent sans marchander , & sur tout les enfans perdus. Mais ils y trouuerent leur partie en bon estat , & bien disposée à les receuoir , & le Fort moins accessible qu'on ne leur auoit figuré. D'abord & presque tout le temps que dura l'attaque, les Capitaines du Fort , furent d'aduis de ne faire tirer qu'à brusle pourpoint , quelque impatien-



ce & enuie qu'en eussent les Soldats : par 1628.  
ce qu'à leur iugement ils n'auoient point de Mars.  
coups à perdre , & qu'ils auoient assez  
dequoy s'exercer en cette occasion qu'ils  
voyoient auoir esté commencée avec beau-  
coup de conduite , & estimoient deuoir  
estre poursuiuie avec vne longue opinia-  
streté. Mais cette pensée quelque raison-  
nable qu'elle fust, n'arriua pas ; car les pre-  
miers ayans donné viuement iusques sur le  
bord du fossé , & y ayans rencontré de l'em-  
barassement par les Cheuaux de frise,  
qu'on auoit mis le long de la falaise, furent  
arrestez sur le cul , & là chaudement saluez  
en front & par le flanc de la mousqueterie,  
& de quelques coups de pierriers, dont les  
plus aduantureux Soldats & des premiers  
donnans y demurerent morts, où hors de  
combat. Le Mareschal de Schomberg,  
vingt luy mesme à la charge. Mais comme  
il vit que ses gens estoient en desordre il se  
retira , & s'en alla vn peu à l'escart du Fort  
où il fit son raliement comme s'il eust vou-  
lu redonner : C'est ce que ceux du Fort  
creurent & espargnerent leurs coups , les  
reseruans pour cette seconde charge. Mais  
ledit Sieur Mareschal se contenta de retirer  
ses morts & blesez. Ce qui ne fut senty

1628. Mars. par eux qu'apres qu'il eut desiademy tourné teste pour sa retraite, laquelle fut serrée en queue de quelques coups de canon & pierriers, tant de la Ville que du Fort, & de quelque escopeterie. Le vent estoit si grand que pas vn des premiers coups ne fut ouy dans la Ville. Ce qui fit avec la surprise faite ( comme i'ay dit ) à ceux de Saint Nicolas, que l'alarme ne s'y donna point qu'il ne fust iour, & que l'attaquant n'eust presque tout à fait disparu. Le iour venu il ne se trouua que dix morts & quelques blesez d'entre les entrepreneurs, les autres ayans esté remportez par leurs Camarades, comme il fut sceu puis apres par quelques Soldats qui se rendirent en la Ville, où ils rapporterent qu'il y estoit mort quelque quatre vingt à cent hommes & force blesez. Quant à ceux du Fort aucun n'y fut blessé ny tué.

Le 14. Les Rochelois firent extraordinairement dans tous leurs Temples des prieres publiques, pour rendre graces à Dieu, de ce qu'il les auoit gardez & deliurez de cette entreprise, & le prier de vouloir continuer à l'aduenir sa sauuegarde sur eux.

Le Mercredy 22. Sur les cinq heures

du soir & estant pleine mer , le Sieur Iean 1628.  
Dauid, Capitaine d'une Patache de guer- <sup>Mais</sup>  
re, venant d'Angleterre, passa au trauers  
de toute l'armée. Navale, & de tous les  
embarras de la Palissade, ayant pris du co-  
sté de Portneuf, & entra dans la Rochel-  
le sans perte d'hommes, nonobstant envi-  
ron deux cents coups de canon, & vn nom-  
bre infiny de mousquetades, qui furent ti-  
rez sur luy en passant, tant des Navires  
que de toutes les Batteries. Ce qui le mit  
en plus de peril furent les Galiottes qui le  
poursuiurent iusques fort proche de la  
Chaisne, bien qu'il fist iouer son canon &  
ses pierriers sur icelles à mesure qu'elles  
s'approchoient de luy. Quoy que ce soit, il  
arriua sain & sauf, seulement il ietta dans  
l'eau son paquet de lettres, sur la crainte  
qu'il eut d'eux à trois fois d'estre pris, &  
fut sçeu que il fut trouué par ceux de la  
Palissade.

A la mesme marée sur les six heures du  
soir, le Capitaine Iean Martin, dit Sacre-  
more, commandant aussi dans vne Patache  
de guerre, passa au mesme lieu qu'auoit  
fait l'autre, tirant apres soy vne prile char-  
gée de vin de Bourdeaux. Mais veu que la  
mer perdant, il ne se trouua pas assez d'eau



1628.

Mars.

pour entrer en la Ville, sa prise s'eschoïa contre la Palissade, & fut aussi tost abordée & prise des Galiotes. Quant à luy il donna iusques sur les vazes du costé du Fort de Tadon, & à demi-portée de mousquet de la Ville, d'où il se rendit en Ville en vne Chaloupe; pour porter son paquet au Maire. Lors que ce vint sur la minuiet, (la mer estant toute basse & retirée) ceux de Coureille vindrent attaquer son Vaisseau; apportans forces eschelles pour y monter, & aussi du bois & du feu pour le bruler, en cas qu'ils ne le peussent prendre. Mais encore qu'il n'y fust resté que dix hommes, ils se deffendirent avec tant de vigueur, qu'ils donnerent temps à ceux de la Ville de les secourir & à la marée du matin se rendirent au port, ayant perdu en ce combat cinq hommes, & trois de blessez: Il y auoit esdites deux Pataches, quelque vingt & cinq à trente thonneaux de bled, tant froment que seigles & autres provisions & rafraischissemens qui apartenoient à des particuliers.

On receut beaucoup de joye de l'entrée de ces Pataches, sur tout à cause du paquet que la derniere auoit conserué, où estoient les copies de toutes les depesches

que les Deputez auoient iusques là escri- 1628  
tes, & les memoires de leur negotiation. Mars.  
Voicy le contenu du tout.

**M**ESSIEURS, Nous ne dou-  
tons point que vous ne vous soyiez <sup>Copie des</sup>  
trouuez aussi perplex que nous fusmes <sup>Lettres</sup>  
estonnez du depart de l'armée Angloise, <sup>& nega-</sup>  
d'autant plus que vous n'auiez receu ny les <sup>tions</sup>  
hommes ny les prouisions promises, & qu'il <sup>des D<sup>e</sup>.</sup>  
sembloit que Monsieur le Duc par nostre <sup>puez</sup>  
euuoy estoit obligé d'attendre nostre <sup>d'Angles</sup>  
retour. Comme cela nous fut le sujet de <sup>terre.</sup>  
beaucoup de diuerses pensées, il pourra  
aussi auoir esté l'occasion de plusieurs dis-  
cours au milieu de vous, & peut estre de  
scrupules, pour lesquels leuer nous som-  
mes bien aises que cette occasion se pre-  
sente si à propos. Nous la prendrons donc  
pour vous rendre vn compte particulier, &  
de nostre voyage, & de ce que nous auons  
fait depuis nostre arriuée en ce lieu. Vous  
vous souuenez sans doute, Messieurs, que  
de bon heur nous nous estions embarquez  
tous trois en la petite Patache Angloise,  
qui nous auoit menez vers vous : Le Mai-  
stre d'icelle ne trouuant plus la Flotte he-  
sita du commencement si il deuoit entre-

1628. Mars. prendre le voyage ; mais nous l'y encourageasmes & suivismes nostre route depuis le leudy iusques au Samedy , sans apprendre nouvelles de l'armée , mais vers le midy nous la descouvrismes vers Ouessan , & sur le soir en atteignismes l'arriere garde , avec tant de bon heur , que nous nous rencontrasmes pres la Remberge de Monsieur le Duc. Si tost qu'on luy eut donné aduis que nous estions là , il parut sur le Tillac , pour nous faire la bien venuë , sans toutes-fois nous obliger de passer à son bord. Le lendemain sur le midy , comme on croyoit que nous estions proches d'entrer en la manche , il se fit deualer en nostre Patache , & nous ayant tirez à part , nous dit que le vent s'estant rendu fauorable , ses Capitaines n'auoient pas voulu en perdre l'occasion , que cependant il auoit bien donné ordre que le bled , le foin & les autres petits Vaisseaux , allassent vers vous , mais qu'il auoit appris qu'ils auoient suiuy l'armée , & qu'à l'arriuée ils auroient à luy en rendre conte. Au reste qu'il estoit venu en nostre Vaisseau , ayant donné ordre à tout le reste de l'armée d'aller à Portsmouth , pour descendre avec nous à Plemud , où il esperoit trouuer Monsieur le Comte de



de Holland & le secours, & là dōner tel or-<sup>1628.</sup>  
dre à nos affaires que nous en aurions du cō-<sup>Mars</sup>  
tentement. Suiuant cela le Lundy qui estoit  
le 22. nous abordasmes audit lieu de Ple-  
mud, où nous rencontraſmes vne partie de  
la Flotte, & particulièrement nos François  
qui estoient en vn trespiteux estat. Selon que  
M<sup>r</sup> le Duc l'auoit esperé, il y trouua aussi M<sup>r</sup>  
le Conte de Holland, avec lequel s'estant  
abouché, & ayant leu quelques lettres que  
luy escriuoit sa Serenissime Majesté, incon-  
tinent il nous manda, & en presence dudit  
Séigneur Conte nous declara que l'inten-  
tion du Roy son Maistre estoit de nous se-  
courir avec toute sorte de puissance, que si  
le secours ne nous estoit arriué à temps, il  
n'en faloit imputer le blasme qu'aux vents  
qui Par trois fois l'auoient fait relascher  
(de fait il relascha pour la troisieme fois  
le mesme iour que nous arriuasmes, & cro-  
yons que quelques Vaisseaux auront gai-  
gné iusques à vous) qu'à l'aduenir nous  
resentirons les effets de sa bonne volonté;  
mais, que pour le present il nous man-  
doient, pour aduiser avec nous aux neces-  
sitez plus pressantes: sur cela, apres nos  
remerciments, nous representasmes que la  
faim pour le present estoit nostre plus dan-

1628. gereux ennemy , partant que nous suppli-  
mars. ons ledit Seigneur Duc de se souuenir de  
la promesse qu'il nous auoit faite pour les  
bleds ; en suite de donner ordre pour le  
renuoy de nos François , & d'y vouloir ad-  
joindre deux où trois cens Anglois , qui à  
nostre aduis suffiroient en la necessité pre-  
sente. Sur cela nous le laissasmes , & le mes-  
me iour fusmes visitez par Monsieur Dol-  
biere qui nous entretint sur les deux chefs  
de nostre demande , & sur le dernier , a sça-  
uoir les Soldats , nous demanda si nous en-  
tendions qu'ils fussent armés , ce que nous  
luy respondismes estre necessaire , la Ville  
estant fort démunie d'armes , depuis le  
grand nombre qu'elle en à perdu és occa-  
sions qui depuis quelque temps se sont  
rencontrées. Sur l'autre chef , asçauoir ce-  
luy des bleds , nous le trouuions comme  
marchant sur des espines , Nous represen-  
tant des despenses immenses , qu'à fait le  
Roy en cet affaire & qu'il luy faut souste-  
nir à l'aduenir , celles aussi de Monsieur le  
Duc qui y auoit mis du sien , nous disoit il  
plus de cent mille liures sterlin. Bref , cela  
aboutit , à sçauoir de nous , si par delà  
nous pourrions asseurer le payement. Or  
encores que nous eussions bien desiré vous

procurer ce soulagement , & faire qu'il vous fust enuoyé gratuitement ; neant-  
moins crainte que pour nous y opiniastrer, 1628.  
nous perdissions le tout , ou qu'au moins la Mars.  
chose allast en vne telle longueur qu'elle  
vous fust preiudiciable , nous tesmoignas-  
mes que vous receuriez avec beaucoup de  
resentiment d'obligation , si il plaisoit a  
Monsieur le Duc en faire seulement les  
aduances , & vous le rendre à Chef de Baye  
d'où vous l'enuoyeriez querir & donneriez  
ordre au payement. Nous recognusmes  
bien que cetteresponse le tiroit de beau-  
coup de peine , aussi des le lendemain ma-  
tin qui fust le Mardy , il vint à nostre logis,  
& nous dit que pour les Soldats la chose  
nous estoit accordée selon nostre desir , &  
que pour le bled , Monsieur le Duc presen-  
tement auoit conté vingt & cinq mille  
livres ; & estably fonds asséuré pour autre  
vingt & cinq , afin d'en acheter pour nous  
& que nous l'entendrions de sa propre  
bouche. De fait l'estans allé trouuer a  
l'issuë de son disner , il nous confirma l'un  
& l'autre , & nous dit , que pour l'exécution  
de cela il laissoit la charge à Monsieur son  
Vice Admiral , qui estoit la present & qui  
est sa creature , & à vn Gentilhomme de



1628. ses Domestiques, qu'il faisoit demeurer là  
Mars. expressement, nous demandant au reste  
lequel nous aimerions le mieux d'envoyer  
les Navires l'un apres l'autre à mesure  
qu'ils se chargeroient, ou bien en faisant  
partir ce qui se pourra presentement, qui  
revient enviro à dix mille francs, assembler  
tout le reste & l'envoyer à vne fois avec  
vn puissant convoy. Ayans remis cela à sa  
prudence, Monsieur le Conte de Holland  
qui estoit là, conclud à ce que ce dernier  
advis fust suivy. Ainsi il fut arresté qu'on  
envoyeroit presentement vn Navire où il  
pourra tenir environ deux cents thon-  
neaux de bled, & dans le mesme tous nos  
François, pour auxquels pourvoir en at-  
tendant le vent on donneroit ordre pour  
les nourrir. Apres celà, Monsieur le Duc  
nous dit, qu'il alloit prendre la Poste pour  
Porsmuth, afin de donner de là quelque  
ordre à l'armée, & faire que les Anglois par  
nous demandez partissent au plustost, ce-  
pendant que nous pourrions aller droict à  
Londres où il ne manqueroit de nous ren-  
dre tous les Offices possibles. Surquoy  
Monsieur de Holland prenant la parole  
nous representa avec vehemence combien  
les intentions de sa Maiesté estoient bien

portées pour nous , & que nous n'eussions 1628.  
aucune crainte d'en estre iamais abandon- Mars.  
nez , que cecy n'estoit qu'un commence-  
ment qui auroit bien d'autres suites , &  
qu'outre la Flotte qu'il nous menoit il s'en  
preparoit un autre , & que nous pouuions  
bien voir nous mesmes , si ils auoient des  
Nauires. Tout se conclud lors par nos re-  
mercimens , & Monsieur le Duc ayant pris  
la Poste , comme il auoit dit , nous aduisa-  
mes d'arrester un peu icy pour voir quel  
devoir on feroit d'exécuter ce qui nous  
auoit esté promis. Hier nous n'y vismes  
autre aduancement , sinon qu'on pourueut  
à la nourriture de nos pauvres François ,  
aussi que le Vice-Admiral estoit absent.  
Aujourd'huy l'ayans esté trouver nous a-  
uons obtenu pour nosdits François six sols  
& huit deniers par iour , qui est la plus  
haute solde que le Roy donne par deçà , &  
qui aussi suffit pour les nourrir honnestement ,  
& les auons remis sous la conduite  
du Capitaine Enseigne de Monsieur de  
Savignac , luy ayant adjoind Monsieur de la  
Lande , afin qu'il eust l'œil avec luy sur les  
deniers qui seront distribuez aux Soldats ,  
de sorte que cela se face fidèlement , ne  
vous pouuant celer au reste que ce Capi-

1628.  
Mars.

taine Enseigne nous à attaquez par propos insolens & injurieux en la presence de Monsieur le Duc. Quant au bled nous auons appris qu'on fera au plustost toute diligence de le charger, ne fust ce que pour se bien tost défaire de nos François, qui doiuent aller avec. Ainsi nostre séjour par deçà n'estant plus requis nous nous proposons de partir demain Dieu aidant pour aller à Londres, mais par chemins differens, a sçauoir deux de nous par Bristo où est le Navire qui du commencement nous auoit esté assigné par Monsieur le Duc, & auquel sont nos hommes, hardes & papiers : & le troisieme qui sera le Sieur Vincent par Porstmuth, pour n'esloigner trop Monsieur le Duc & s'aboucher avec Monsieur de Soubize. Bref, Messieurs, ayez s'il vous plaist cette creance de nous, que nous n'espargnerons ny peine ny vigilance pour nous acquitter au mieux qu'il nous sera possible de la charge qu'il vous à pleu nous commettre, & vous advertir autant que nous pourrons de tout ce qui se passera. Nous ne devons vous obmettre qu'outre l'armée qui s'estoit embarquée avec le Côte de Holland qui estoit de trois mille Soldats, il y a six mille hommes de leuez en



ces entours , que le Roy souldoye , & cela 1628.  
sans les Escossois , qui tres asseurement se <sup>mars,</sup>  
tiennent prests & d'autres troupes qu'on  
leue , tellement que toutes sortes d'appa-  
rences nous font croire qu'on à intention  
de nous secourir à bons escient. Nous espe-  
rons que cependant Dieu vous fortifiera.  
Quelques vns de ceux qui s'interessent en  
vos affaires , tesmoignent auoir apprehen-  
sions qu'avant qu'on soit à vous l'opinion  
d'estre abandonnés , vous porte à plastrer  
quelque mauuais accommodement : Mais  
nous nous confions que leurs craintes se-  
ront vaines, & que les choses estant en estat  
qui nous donne tant de sujet de bien espe-  
rer , vous ne vous relascherez point à entē-  
dre à vne paix qui fut ruineuse , comme  
sans doute elle seroit telle si S. M. n'y en-  
trevient; là où si il plaisoit à Dieu de benir  
les bonnes intentions de pardeçà , il y aura  
moyen de la faire bonne , & telle qu'elle  
ne laisse plus de leuain pour vne guerre sui-  
uante. Il nous reste encor' vn advis à vous  
donner, c'est que quand ces premiers bleds  
seront arriuez, il vous plaise donner ordre à  
ce qu'ils soient bien & promptemēt payez.  
Vous iugez combien cela est de consequen-  
ce pour la suite , & partant nous superce-

1628. dons de vous le dauantage recommander.  
 Mars. Nous ne vous escriuons rien du prix duquel  
 ayans parlé à Monsieur le Duc, il nous à dit  
 qu'il entendoit que vous mesme l'establis-  
 siez, mais peut estre sont ce paroles de com-  
 pliment ausquelles il ne faut pas prendre  
 pied. Il nous à reïteré la priere que nous  
 vous auions faite de luy enuoyer des Pilo-  
 tes, vous y aduiserez donc s'il vous plaist,  
 comme aussi à executer la promesse qu'il  
 vous à pleu nous faire de nous enuoyer fre-  
 quemment de vos Pataches pour nous in-  
 former de vos necessitez & rendre plus  
 puissantes nos instances, lors que nous  
 pourrons les fonder sur des aduis fraische-  
 ment receus. Cela est si necessaire que nous  
 ne sçaurions vous le recommander assez  
 instamment. Nous vous en supplions donc  
 derechef, & nous remettans de ce que nous  
 pourriõs auoir obmis au Sieur du Faux qui  
 vous rendra la presente, nous ne la ferons  
 plus long que pour adresser nos vœux à  
 celuy qui à esté iusques icy vostre garde à ce  
 qu'il vous enuironne de sa proteatiõ. Ce sont  
 MESSIEURS,

*De Plemudce 25.* Vos tres humbles & tres  
*Novemb. 1627.* obeïssans seruiteurs,

DAVID, VINCENT, DEHINSSE.

Lors



Lors qu'il vous plaira nous escrire, vous adresserez s'il vous plait les lettres à Monsieur Hofst.

**M**ESSIEURS, C'est icy la troisième depuis nostre arriuee en cette Isle, vous ayans escrit de Plemud le 24. du passé, & de Bristo quelques huit ou dix iours apres, sans vous ennuyer de la repetition de ce que nous vous auons desia mandé, Nous vous rendrons conte de ce que nous auons fait icy du depuis. Nous y estans rendus le 6. du courant, des le lendemain nous nous adressames à Monsieur le Duc, qui nous accueillit avec des demonstrations de tres particuliere bonne volonté, & des l'heure mesme nous moyenna l'audiance de sa Serenissime Majesté, à laquelle ayans eü l'honneur de faire la reuerence: Monsieur Dauid luy fit de tres humbles remercemens de l'interest qu'il luy auoit pleu prendre en nostre oppression, luy representa combien elle s'estoit agrauée depuis la bonne volonté qu'il nous auoit tesmoignée, puis y adiousta vne tres instante supplication de vous secourir promptement & puissamment, nous listons au visage de sadite Serenissi-

*Aussi  
Leuue  
de dits  
depuis  
aux  
Roches-  
lois.*



1628. me Majesté la gracieuse responce qu'il  
Mars. nous fit, reuenant en somme à nous asseu-  
rer, qu'encores que les succès n'eussent pas  
respondu à ses bonnes intentions, neant-  
moins il ne discontinueroit point de nous  
assister, iusques à faire de nostre cause la  
sienne propre, adioustant en propres ter-  
mes, que les défauts du passé seruiroient  
d'aduertissemens pour l'aduenir : Mon-  
sieur le Duc estoit present qui entendit en-  
cores ce que le Roy venoit de nous dire,  
& comme il nous auoit introduits pareil-  
lement nous ramena. Les iours suiuians  
furent employez à visiter les Seigneurs du  
Conseil, entre lesquels il n'y en eut pas vn  
qui ne nous receust tres humainement &  
ne nous assurast que les inclinations de sa  
Majesté estoient tellement portées pour  
nous que nous n'auions besoin d'aucuns  
moyenneurs, entre les autres vn nous dit  
que ses discours durant le iour & ses son-  
ges durant la nuit, n'estoient que de nos  
affaires, & vn autre des principaux nous  
adiousta que plustost perdoit il la Couron-  
ne que de desister de nous faire bonne sa-  
parole. Ces visites de compliment ne nous  
occupoient point tellement que nous ne  
vacassions au plus essentiel de vos affaires

& iugeans que l'enuoy des bleds estoit le plus pressé nous nous en adressames a Monsieur le Duc , sur tout pour ce que nous auions appris que l'ordre donné a Plemud , estoit reuoqué ce qui nous mettoit en peine , mais nous sceusmes de luy que depuis son arriuee icy , il y auoit trouué le bled a beaucoup meilleur conte & en plus grand quantité que non pas en l'autre lieu , ce qui luy auroit fait changer son ordre. Au reste que deslors on trauailloit puissamment a l'achapt. Du depuis nous auons continuellement sollicité , & la chose est en tels termes que tres bonne quantité de bled est toute presté n'y ayant difficulté , que pour les vaisseaux , dont il faut suracheter le fret , & encores n'en peut on trouuer, combien qu'ils doiuent aller puissamment escortez. Le vent opiniastrément contraire en a retenu dans Plemud quelques vns dont on faisoit estat pour cela. Neantmoins on est desia asseuré de quelques vns , & y a toute apparence que dans peu de iours tout sera prest a faire voile , si Dieu donne vn temps fauorable. Avec le bled vous receurez , outre les François, quatre ou cinq cents Soldats Anglois, que nous auons demandez , avec ordre

1628.  
Mars.

pour leur paye comme aussi pour celle de ceux que vous auez desia, & pour le passé, & pour l'aduenir. Si tost que nous serons hors de cette affaire nous presserons les autres chefs, contenus ez memoires dont vous nous auez chargez. Mais l'importance de cette cy à fait que nous n'auons voulu la traverser d'aucune autre proposition. Au reste la bonne volonté de sa Serenissime Maiesté ne se limite pas à quelque secours de vivres, ains elle nous fait esperer vne puissante assistance, dont les preparatifs se font, & pour laquelle la ville de Londres ces iours passez luy à fourny douze cents mille livres, nous n'estimons pas pourtant que la chose puisse estre en estat auant le Printemps. Monsieur de Soubize qui est icy arrivé vne semaine apres nous, ypousse de tout son pouvoir, & est tres bien veu de S. M. & en tres bonne intelligence avec Monsieur le Duc, tellement qu'il ne contribue pas peu a nos affaires, esquelles aussi nous l'interessons avec nous, comme en vne cause qui nous est commune. Ce qui nous confirme en l'esperance qu'on embrassera à bon escient nostre deffense, est la responce qu'on à donnée ces iours à l'Ambassadeur du Roy de Dannemarck,



qui se voulant entremettre de l'accommo- 1628.  
dement des deux Couronnes, pour estre Mars:  
plus puissamment assisté, & particulieremēt  
par la mer, sans toucher aucunement à cet-  
te proposition d'accommodement, on luy à  
seulement donné assurance que sa S. M.  
luy continuera, comme elle à fait iusques  
icy, toute l'assistance promise, & que quand  
à des Vaisseaux, il en peut auoir plus com-  
modement du Roy de Suede, & de Mes-  
sieurs les Estats, qui ont leur commerce en  
la mer Baltique. Voila, Messieurs, en quels  
termes sont vos affaires pour le present.  
Nous ne manquerons de vous tenir aduer-  
tis des progres, comme aussi nous vous  
supplions de nous departir frequemment  
des aduis bien particuliers de vostre estat,  
mesmes par Pataches expresses, cela estant  
si absolument requis, que nous ne pouuons  
nous lasser de vous en reïterer la supplica-  
tion. Nous auons receu la vostre du 24.  
du passé & auez peu voir cy dessus par l'or-  
dre que nous vous auons dit auoir esté don-  
né pour le payement des Anglois, qui sont  
au milieu de vous que nous auons fait va-  
loir, ce que vous nous en auiez escrit. Les  
procedures des Capitaines ont esté trou-  
uées tres mauuaises & les vostres telles

1628. qu'on en à beaucoup de satisfaction; lesdits  
Mais. Capitaines recevront les commandemens  
de S. M. lors que les bleds iront , & peut-  
estre ne fera ce pas au contentement d'eux  
tous ; Cependant on ne trouuera point  
mauvais que vous les obligiez à se tenir  
en leur deuoir, Nous vous auions escrit  
cy deuant touchant le Navire de Monsieur  
le Maire pris par les Anglois & amené à  
Bristo , & comment on le vouloit faire ad-  
iuger. Il est certain qu'il en à esté sur le  
point, y ayant diuerses raisons qui s'alle-  
guoient pour cela , & sur tout la deposition  
de l'Equipage que Monsieur le Maire y à  
fort peu de part. Mais nous auons tant  
fait enuers Monsieur le Duc, que d'autho-  
rité absoluë, en qualité de grand Admiral,  
il en à fait suspendre les procedures cette  
semaine icy , & tascherons autant que  
nous pourrons d'en auoir la deliurance en-  
tiere. Mais nous vous supplions qu'a l'a-  
uenir le desir de garantir les autres ne nous  
mette en danger de perdre le nostre pro-  
pre ; & de ne donner aucuns passeports  
qui rendent les autres suspects, car on est  
cy fort exact. Nous vous adjousterons  
pour la closture de ceste cy qu'ayans veu  
ces iours passez Monsieur l'Ambassadeur

de Hollande , qui est vn personnage tres <sup>1628.</sup>  
affectionné pour nous , nous auons ap- <sup>Mars</sup>  
pris de luy que Messieurs les Estats auoient  
resolu d'enuoyer des Ambassadeurs aux  
deux Rois , pour chercher quelque voye  
d'accord , & qu'ils deuoient partir des le  
25. de Nouembre , ne scachant qui les à  
peu retarder , & si la resolution n'a point  
changé. Si ils passent icy ils y trouueront  
les inclinations disposées , moyennant vn  
reel accomplissement des choses qui vous  
estoient promises par la paix , & sans tou-  
tesfois que cela arreste en rien les execu-  
tions de guerres. Le temps nous instruira  
touchant les succez de cette entremise.  
Cependant nous prions Dieu que soit par  
cette voye là , où par autre nous puissions  
paruenir a vne paix qui en ait le nom &  
l'effect , & qui ne cache plus sous ses cen-  
dres la matiere d'vn embrasement nou-  
ueau. Quoy que soit nous nous tenons  
asseurez que si aucunes propositions vous  
en sont faites , vous nous ferez la faueur de  
nous en promptement aduertir , & que  
vous ne prendrez aucune resolution sans  
sa S. M. autrement si on en oyoit quelque  
chose par deçà , ce seroit ruiner entiere-  
ment vos affaires. Nous ne la ferons plus



1628. longue, sinon pour vous asseurer que nous  
 Mars. sommes & par deuoir & par affection,

M E S S I E V R S,

*A Londres ce 25.* Vos tres humbles & tres  
*Decemb. 1627.* obeïssans seruiteurs.

DAVID, VINCENT, DEHINSES.

**M**essieurs, Nous vous auons donné ad-  
 uis par celle de Plemud, que soit que  
 n'eussions pas bien compris l'intention de  
 Monsieur le Duc, soit qu'il en eust changé,  
 elle n'est sinon de faire les aduances du  
 bled qui vous sera enuoyé. Nous vous le  
 reïterons, afin que vous aduisiez s'il vous  
 plaist, à ce que le payement en soit bien &  
 promptement fait, crainte que cela estant  
 autrement on n'en enuoyast plus cy apres.  
 Vos &c.

**M**ESSIEURS, Nous vous auons  
 enuoyé vne copie du corps de la pre-  
 sente par le Sieur Pepin, l'un de nos Con-  
 citoyens, qui partit le susdit iour de cette  
 Ville, pour aller à Douvres faire charger  
 vne sienne Barque de Froment, & autres  
 commoditez pour porter à la Rochelle, il  
 fait estat de partir du premier temps, non-  
 obstant quoy nous auons iugé à propos de  
 vous

vous enuoyer cette cy par Plemud, & n'a- 1628.  
 uons à y adiouster sinon que l'on nous as- Mars;  
 seure que les bleds que Monsieur le Duc  
 doit enuoyer en vostre Ville se chargent  
 en toute diligence avec tres grande quan-  
 tité de biscuits, biere, bœufs, pourceaux  
 salez, fromages, beure & autres commo-  
 ditez, & que le tout sera prest à faire voile  
 moyennant la grace de Dieu, dans la fin  
 de ce mois au plus tard sous vn puissant  
 conuoy de Nauires de guerre, ce sont  
 Messieurs, Vos &c.

*A Londres ce 7. Iannier Isle de France 1628.*

Messieurs, Toutes nos precedentes *Autre*  
 vous auront rendu compte de ce que *lettre*  
 nous auons negocié par deçà depuis que *desdits*  
 nous y sommes arriuez, & de la diligence *Depu-*  
 que nous auons tasché d'apporter à vous *tés aux*  
 enuoyer des prouisions. Si les effets ne *Roches*  
 vous ont paru si tost que vos necessitez *lois*  
 l'eussent requis, & que nous l'eussions de-  
 siré, ce n'est ni manque de bonne affection  
 par deçà, moins encor de nostre sollicita-  
 tion; mais ç'a esté la difficulté de trouuer  
 des Vaisseaux és lieux où l'on vouloit char-  
 ger le bled, & l'opiniastre contrarieté du  
 vent, qui ne permettoit pas qu'on en ame;

P.

1628.  
Mars.

114

*Journal du dernier*

nast des lieux où on en pouuoit trouuer. En fin le Sieur de Bossay estant arriué de vostre part, le seiziesme du courant, nous auons fait de si pressantes instances, que la resolution a esté prise de faire partir ce qu'il y a de prest, afin que ce vous soit vn gage & assurance du reste. Mesme pour vous le confirmer mieux, S. M. Serenissime & son Conseil ont trouué à propos que l'un de nous s'acheminast vers vous, pour vous informer particulièrement des bonnes inclinations qu'on à icy pour vous, & des preparatifs qui s'y font pour vous assister. Combien que chacun de nous desirast de faire le voyage, nous sommes conuenus que ce seroit Monsieur Dehinssé nostre Collegue, & hier allasmes avec luy, afin qu'il prist congé de sa Maiesté; il vous dira les bonnes paroles que nous en eumes, qui sont telles que nous auons creu les deuoir icy coucher en propres termes. Ne prenez pas cecy pour vn secours, ce n'est qu'un petit rafraichissement, afin de donner courage à vostre Ville, iusques à vne plus puissante assistance, aussi tost que le temps, c'est à dire la saison du Printemps le pourra permettre. Asseurez-vous que ie vous assisteray si puissamment, que ie vous



feray obtenir vne bonne paix du Roy de 1628.

France, ou bien que i'obligeray ceux qui Mars.

sont autour de vous de se retirer ; ouy assurez vostre Ville que ie ne vous abandonneray point. Surquoy Monsieur le Duc prenant la parole nous dit , vous voyez , Messieurs , vous avez la parole du Roy. De cela & de tout le reste : ledit Sieur Dehinffe vous esclaircira plus particuliere-  
ment, s'estant chargé & de la Requeste que nous presentasmes au Conseil le quatorziesme du courant , & du projet entre Sa Maiesté & nous , qui a esté dressé en suite. Si au premier vous trouuez que nous nous soyons estendus en de long discours, & qui pourroient d'abord sembler superflus, ledit Sieur vous en deduira les motifs , comme aussi de la necessité que nous auons eüe de nous estendre iusques où vous nous en auiez donné pouuoir ; Vous pouuant assureur cependant qu'autant que nous en pouuons iuger, on n'a par deçà que de s'inceres intentions. Nous nous promettons que receuans ce commencement d'assistance avec toute sorte de gratitude , vous establirez vn si bon ordre pour le prompt debit , & seur payement des prouisions qui vous sont enuoyees , que ce sera pour ac-

1628. Mars. courager tous les autres à vous en porter  
cy apres. De nostre part nous continuerons de trauailler à ce que vous n'en ayez point manque , & à executer autant que nous en aurons le moyen tout ce que vous nous auez enjoint par nos memoires. Vous supplians au reste , que pour nous y aider , il vous plaise nous renuoyer au plustost Monsieur Dehinsse, qui apportant icy de vos nouuelles contribuera beaucoup à haster la diligence des preparatifs, & seroit besoin que toutes lestrois semaines ou à chacun mois pour le moins il nous vint vne recharge de vostre part. Nous remettons à luy de vous dire le fruit que nous a fait l'arriuee du Sieur de Bossay, & à vostre prudēce de luy tesmoigner le gré que vous luy sçauiez de s'estre acquité si dignement de la commission hazardeuze que vous luy auiez donnee. Ainsi il ne nous reste sinon de prier Dieu qu'il vous fortifie, & vueille esprendre sa Benediction sur la iuste defense de vos armes, iusques à ce qu'en fin nous puissions obtenir vne bonne paix. C'est le souhait de ceux qui sont

Messieurs,

*Vos tres humbles & tres-*

A Londres le 29.

*obeyssans seruiteurs.*

Januier 1628. DAVID, VINCENT.

**M**Efsieurs, Si les deux que nous vous auons despeschez par la terre, depuis l'arriuee du Sieur Gorribon, ont peu passer iusques à vous, les billets dont ils estoient porteurs, vous auront fait scauoir en sommaire ce que nous vous deduirons plus particulierement par cette cy. Nos instantes sollicitations ayans enfin obtenu vn conuoy de bleds, biscuits, biere, chairs & autres prouisions, qui estoit tout prest, & ayant esté iugé à propos que l'un de nous l'accompagnast, Monsieur Dehinffe estoit party pour cet effect le Dimanche trentiesme du passé, & vous estoit porteur des bonnes paroles de sa Serenissime Maiesté, selon que nous vous les touchions par celles dont nous l'auions chargé. Mais le iour mesmes ayans faict rencontre dudit Sieur Gorribon, qui l'informa du succez de son voyage, lequel il auoit esté cōtraint de faire par mer, & comment il auoit faict rencontre à la hauteur de Belle-Isle de l'armee Nauale, qui assurément alloit vers vous; Ils iugerent que les Nauires de guerre qui estoient ordonnez pour la seureté de ce conuoy, ne pourroient pas empescher qu'il ne tombast és mains de ceux qui vous bloquent. Ainsi il retourna icy avec



1628. le dit Sieur Gorribon, qui nous rendit la Mars. vostre: en datte du 30. Decembre. Aussi tost nous vismes Monsieur le Duc, & par son moyen presentasmes vne nouvelle Requête au Conseil, pour représenter l'extrémité de vostre nécessité, & que si on ne se hastoit de vous secourir en toute diligence, vous estiez perdus sans ressource. Cela leur donna à tous l'alarme bien chaude, & l'Admirauté mandee assura que dans six semaines on pourroit mettre sur pieds vne flotte assez puissante pour aller choquer celle qui est en vos rades. Cependant pour ce que vos necessitez pressoient, il fut resolu qu'on feroit toute diligence de charger les provisions en de petits Navires, pour vous les envoyer à la faueur d'un bon vent, & les faire passer à la desrobee. C'est l'aduis que nous vous enuoyasmes par terre, par deux diuers Messagers, partis le quatriesme du courant. Du depuis toute nostre occupation a esté de solliciter à ce que promptement les provisions pussent partir, ainsi qu'on l'auoit promis, & que le Beau frere de Monsieur le Duc, Monsieur le Comte D'Embey allast en diligence à Plemud, pour y mettre l'ordre necessaire, puis qu'il estoit nommé pour cela, Sur ces

entrefaites nous est venu Monsieur David qui nous a rendu les vostres du 24. du passé, & informé de bouche de tout vostre estat, son arriuee ayant esté le septiesme au soir, dés le matin nous allasmes vers Monsieur le Duc, auquel nous rendismes vne lettre comme de vostre part, par le moyen d'un de vos blanc signez; & à la presdinee fusmes conduits par luy & Monsieur de Soubize à S. M. à laquelle nous presentasmes la vostre, laquelle nous accompagnasmes de nouvelles & tres instantes supplications & en des termes qui faisoient paroistre vne vehemente esmotion. Sa response fut qu'il auoit preueni nos demandes, & que l'ordre pour tout ce dont nous le supplions estoit donné, apres quoy nous ayans enquis de l'estat particulier de la Ville, & luy ayant esté respondu par nous conformément à ce que vous nous en escriuez particulierement touchant les propositions d'accommodement qui vous auoient esté faites, & vos responses; C'est, dit-il, fait en gens de bien, assurez vous que de ma part aussi ie ne vous delaisseray point. Fort contents de ces bonnes paroles nous laissasmes couler le iour suiuant, pour attendre quelques effects, &

1628. le lendemain voulusmes voir Monsieur le Mars. Duc, pour le supplier que le partement de Monsieur son Beau-frere ne fust plus différé. Mais Madame la Duchesse sa femme estant en mal d'enfant, nous n'en peusmes auoir le moyen. Ayans appris au soir qu'elle s'estoit heureusement deliuree d'un fils, nous prismes l'occasion dès le matin de luy aller tesmoigner la part que nous prenions, & celle que vous prendriez sans doute, en sa ioye : Dequoy nous ayant tesmoigné vne particuliere satisfaction, il nous assura que sans doute Monsieur son Beau-frere devoit partir le lendemain, qui est aujourd'huy, & que la resolution estoit prise de faire conuoyer par des Nauires de guerre, tout ce qui se trouueroit de provisions en de petits Vaisseaux, pour les conduire iusques à la hauteur de Bayonne, & là attendre l'occasion d'un bon vent, pour faire passer le tout à la fois, & qu'à cét effect ils s'attendoient que nous leur adresserions des Pilotes, leur ayant fait esperer que nous en pourrions rencontrer à Plemud. De cela derechef nous l'assurames & que le Sieur Dehinse iroit à cét effect audit Plemud, & si besoin estoit s'embarqueroit avec Monsieur le Comte D'Embey, pour



pour l'ayder de son aduis sur les occurrēces qui se pourroient presenter, ne iugeans pas au reste que pour le present il deust donner iusques en vostre Ville. C'est ce qu'il tesmoigna fort agreer, & suiuant cela le dit Sieur se dispose de partir demain Dieu aydant, & vous escrira plus particuliere-  
ment du succez de son voyage. Cependant nous remettons cette cy és mains de Monsieur David Capitaine, afin que si il se rend à vous le premier, comme il l'espere moyennant l'ayde de Dieu, vous soyez informez des progresz que nous auons pû faire iusques icy. Il vous pourra dire de bouche les bonnes paroles que nous auons de S. M. l'ayans mené expressément avec nous lors que nous luy allasmes rendre la vostre. La chose seule de laquelle nous doutons, c'est si la Flotte pourra estre preste au temps qu'on vous fait esperer; mais nous nous assurons que si vous pouuez estre raffraischis de viures, comme on y traueille, vous pourrez bien patienter quelques semaines au delà. Quoy que ce soit il semble, par ce que nous pouuons voir, que c'est à bon escient qu'on veust embrasser vos affaires, & pource que cela requiert des despenses immenses, on

1628.  
Mars.

122

*Journal du dernier*

a en fin resolu vn Parlement au dixseptiesme de Mars prochain, dont on espere toute sorte de bien pour nous. Cependant on nous assure que le fonds de l'armement present est trouué, & qu'il ne faut point que nous craignons qu'on attende l'issüe de ce Parlement à pouruoir à nous. Au reste hier que nous estions avec Monsieur le Duc, luy ayans communiqué les vostres pour la Hollande, il fut d'aduis non seulement de les enuoyer, mais en outre que l'vn de nous y passast, & prist l'occasion d'aller avec Monsieur Dolbiere, que S. M. y enuoye, tant pour acheter des armes en nombre & des cheuaux, que pour obliger Messieurs les Estats à se joindre à S. M. pour nostre defense. Suiuant cela nous sommes conuenus, que le Sieur Vincent, qui a desia là ses habitudes, entreprendroit ce voyage, & outre les instructions dont vous nous auiez munis, luy en auons donné vne nouvelle, dont nous vous enuoyons coppie, l'ayans conceüe telle que vous la trouueriez par l'aduis de Monsieur le Duc, & se dispose ledit Sieur à partir demain. Cependant nous attendons à aujourd'huy Messieurs Bragneau & Gobert, que nous auons appris auoir abordé

vers Falmud & venir icy par terre. Nous  
consulterons tous ensemble de ce que cha-  
cun de nous aura à faire pour l'exécution  
de la Commission qu'il vous a pleu nous  
donner, & vous supplions de croire que  
nous y vacquons avec le plus d'assiduité &  
de vigilance qu'il nous est possible, & que  
nous portons vn extreme & tres sensible  
desplaisir de ne pouuoir aduancer d'avan-  
tage les affaires. Mais nous auons eu vn  
double obstacle, l'vn la lenteur naturelle  
de ceux de ce climat, l'autre la grande  
difficulté qu'il y a eüe à trouuer de l'argent,  
non pas que le pays n'en abonde; mais  
pource que on ne le cherchoit pas par les  
formes ordinaires. Quant à la bonne affe-  
ction, il nous semble iusques icy que nous  
pouuons vous tres certainement asseurer  
qu'elle est telle que nous la sçaurions de-  
sirer. Nous ne manquerons à vous escrire  
diligemment vn chacun des lieux où nous  
nous allons escarter; & cependant nous  
vous asseurerons icy conjointement, com-  
bien nous sommes,

MESSIEURS,

*A Londres l'11,*

*Feurier 1628.*

Vostres humbles & tres

obeyssans seruiteurs,

DAVID, VINCENT, DEHINSSE.



1628.  
Mars.

*Autre  
Lettre  
desdits  
Depu-  
sez  
aux  
Roche-  
lois.*

**M**essieurs, Le mesme iour du datte de la precedente, les Sieurs Bragneau & Gobert arriuerent, & nous ont rendu toutes les vostres, & exprimé d'abondant vos necessitez, que nous allasmes représenter ensemblement à Monsieur le Duc, avec supplication de nous hastier les effects des promesses de S. M. Suiuant cela il despescha vn Courier pour tenir toutes choses prestes, & fut arresté que Messieurs Bragneau & Dehinsse partiroyent demain, pour establir l'ordre qui seroit iugé à propos. C'est à cela qu'ils se disposent, & ne faudront quand ils seront à Plemud de vous escrire amplement de tout ce qu'ils y auront fait. Nous en remettans donc à eux nous trauaillerons vn chacun de son costé à ce qui est de vos affaires, & prions Dieu que ce puisse estre avec le succez que nous desirons. Nous vous reïterons icy ce que vous ont dit plusieurs de nos precedentes; à sçauoir que Monsieur le Duc n'ayant pas trouué à Plemud les bleds qu'il auoit esperé, & ne se trouuant pas en puissance d'executer ce que nous vous auions proposé de sa part, pour l'octroy gratuit d'iceux; la crainte que nous eusmes que si nous eussions infi-

Ité à les auoir en don , c'eust esté pour n'en 1628.  
 auoir point du tout , nous empescha de Mars  
 presser l'exécution de cette promesse ; seu-  
 lement nous requismes qu'il fist les aduan-  
 ces , & que vous les rembourceriez par de-  
 là. Ainsi ce sont des Marchands particu-  
 liers qui ont chargé ce qui va vers vous , &  
 comme c'est l'esperance du gaing qui les  
 meine , nous nous asseurons que vostre  
 prudence sçaura bien iuger combien il im-  
 porte qu'ils soyent contents de vous , afin  
 que cela en oblige d'autres à entreprendre  
 le mesme. Le vent ayant arresté le Sieur  
 Vincent , il est encores icy , & partant il  
 vous asseurera icy avec nous combien c'est  
 que nous sommes tous,  
 Messieurs,

A Londres ce 14. Vos tres-humbles & tres  
 Feurier 1628. obeyssans seruiteurs.

DAVID, VINCENT, DEHINSE.

RELATION TOVCANT LA  
 Negotiation des Deputex de la Rochelle en  
 Angleterre depuis le contenu en la  
 lettre du 25. Decembre.

Le Mardy 3. Ianuier 1628. le Millord  
 Montjoye , & les autres qui auoyent esté  
 pris en l'Isle de Ré , arriuerent à Londres,

1618. Mars. estans conduits par le Sieur de Meaux, qui les presenta à la Roynie, de la part de la Roynie sa Mere, qui auoit obtenu du Roy qu'ils fussent renuoyez sans rançon, & dirent merueilles du courtois traitement qui leur auoit esté fait, & mesmes qu'ils auoyent esté deffrayez par tout le Royaume. Ce Gentilhomme qui estoit accort negotioit aupres des Principaux du Conseil, pour nouïer vn pourparler d'accommodement, duquel les Ambassadeurs de Danemarck ayans fait dès auparauant quelques ouuertes, nous remarquasmes qu'il leur donnoit de frequentes visites, & qu'en suite ils prirent vne soudaine resolution d'aller en France, où nous éuentasmes qu'ils auoyent desseing de poursuiure cette negotiation.

Sur cela nous eusmes deux craintes, l'vne que ces propositions d'accommodement ne fussent vn artifice pour retarder les preparatifs, dequoy nous voyons la consequence, veu le peu de commoditez que nous scauions estre en la ville. L'autre que cas aduenant que tout à bon on vint à traiter, ce ne fust à nostre des-auantage, n'y ayant point d'apparence qu'apres la disgrace de Ré, les Anglois fussent en la



consideration necessaire pour faire sauter le Fort , & la Citadelle , que leurs armes n'auoyent pû abattre : En toutes maniere doncques nous resolumes de faire effort aupres du Duc de Buckinghant , pour tacher de le diuertir d'y prester l'oreille.

Lors que nous recerchions l'opportunité de l'en entretenir , luy mesme nous preuint & nous dit , l'onzième du mesme mois , qu'il auoit bien senty où tendoit la France par ses courtois déportemens. Que pour ne luy ceder en courtoisie , S. M. renuoyoit aussi les prisonniers François qui seroient conduits par le Sieur Dolbierre. Cependant que nous prissions assurance entiere , & la donnassions à ceux de la Rochelle, qu'ils n'auoyent veine aucune qui tendist à vn traitté , iusques à ce que par quelque exploit notable ils se fussent mis en estat de le faire aduantageux , & pour eux , & pour nous : que si en France on en conceuoit autre creance , elle ne pourroit que nous estre aduantageuse , veu que ils se pourroyent relascher , là ou quant à eux ils redoubleroyent en diligence.

Ce ne nous fut pas peu de satisfaction de l'ouïr parler ainsi , sur tout lors que le lendemain il nous fit ouuerture de nous

1628.  
Mars.

présenter au Conseil, & exprimer fortement nos iustes craintes, que sur les bruits qui s'espandoyent d'un accommodement, les affaires communes ne receussent du preiudice, & nous donna par aduis que nous en representassions mesmes vn memoire raisonné.

Le Ieudy treiziesme nous luy portasmes nostre memoire, lequel ayant approuvé il nous donna rendez-vous au lendemain en sa chambre, où sur les quatre heures du soir il nous vint querir luy mesme, pour nous conduire en celle du Conseil; mais auparavant il nous tint vn discours qui nous donna fort à penser, Nous aduertissant de ne nous estonner pas, si par aduantage quelques vns nous faisoient enqueste de ce que nous auions à offrir à S. M. à mesure que nous luy demandions son assistance: & sur tout quelle assurance nous pouuions donner que le Roy s'engageant plus outre à nous secourir, la Ville ne se lairoit point emporter à vn traitté particulier. Quand à luy qu'il estoit esloigné de telles pensees, & neantmoins que pour nous seruir plus vtilement il eust desiré apprendre de nous ce que luy mesme auroit à leur dire, posé qu'ils continuassent à  
tenir

tenir tels propos, & sur tout quel iugement nous faisons de l'ouuerture que faisoient quelques vns d'eux, que la Ville enuoyast pardeçà certain nombre d'enfans, choisis des plus considerables Maisons, qui seroyent traittez honorablement, & aux frais du Roy, & seruiroyent d'ostages de la foy que la Ville engageoit par nous.

Cette proposition, nonobstant le debit artificieux du Duc, nous fut d'un fort mauuais goust, & craignismes que nostre response, la faisant sur le champ, ne peust estre si bien conceüe qu'elle ne nous nuisist, soit en nous tenans trop serrés, ce qui les eust peu desgouter, & retarder l'enuoy du secours; soit en nous relaschans par trop, & au delà de nos Memoires, de sorte que nous fusions des-aduoüez. Nous luy dismes doncques, qu'en general nous luy pouuions donner toute assurance que iamais la Rochelle ne s'esloigneroit de toutes ouuertures raisonnables pour donner tout iuste contentement à S. M. là dessus. Mais que quant à ce qui estoit du detail, nous le Supplions tres-humblement, que comme il luy auoit pleu que nous couchassions nos demandes par escrit, il trouuaft bon qu'on nous y respondit en la mesme

R



1618.  
Mars.

130

*Journal du dernier*

maniere , afin que concertans entre nous sur ce qui nous pourroit estre proposé , ce que nousaurions ày dire fust mieux digeré.

Ayant tesmoigné y donner son approbation , de ce pas il nous conduisit en la chambre doree, où estoit le Roy , avec tout son Conseil, deuant lequel ayans fleschy le genouil , & par son commandement nous estans redressez , Mr. Dauid representa sommairement ce que nous auionsestendu plus au long en nôtre escrit, lequel en suite il presenta.

Le Roy l'ayant pris, nous le remit entre mains , & nous commanda de luy en faire la lecture. Ainsi nous le luy leusmes à haute voix & distincte, afin que tous le pussent ouïr, & estoit de cette teneur.

Les Deputez de la Ville de la Rochelle vers sa Serenissime Majesté, ayans eu des cydeuant quelques aduis qu'il se faisoit vne fourde pratique pour nouïer vn pourparler d'accommodement entre les deux Couronnes , à quoy les Ambassadeurs du Roy de Dānemarc travailloyent, & se trouuans confirmés en cette creance par l'enuoy du Gentilhomme venu de France sous pretexte de la conduite des prisonniers, qui en a tenu propos à diuers des Seigneurs du

Conseil, & a eu d'estroittes conferences avec les Ambassadeurs de Dannemarc, en suite desquelles ils sont promptement partis pour Paris: Ils ont creu estre de leur deuoir de Supplier tres-humblement S. M. de leur donner audience, afin qu'ils peussent luy faire entendre, & aux Seigneurs de son Conseil, ce qu'ils croient leur deuoir estre necessairement representé sur cette occurrence.

Au prealable ils se sentent obligez de coucher icy, & reïterer leurs tres-humbles Actions de graces, qu'ils ont desia eu l'honneur de rendre à S. M. de ce qu'il luy a pleu, de son bon & simple mouuement, se mettre en deuoir de leur faire bonne saparole Royale, au regard des conditions de la paix laquelle le Roy leur Souuerain auoit eu agreable qu'il leur moyénast, en l'an mil fix cens vings & six, & veu l'exécution d'icelles, auoit enuoyé la puissante armee conduite en leurs Costes par Monsieur son grand Admiral au mois de Iuillet dernier.

Comme S. M. en cette assistance a fait paroistre à tout le Monde sa pieté & sa generosité, & la confiance entiere que peuvent prendre en sa parole Royale tous ceux ausquels il la donne; Aussi tenons nous

1628.

Mars.

pour indubitable qu'il luy plaira faire voir en nous combien sont heureusement protegez ceux qu'il entreprend de defendre par ses armes , & que comme elles sont invincibles , aussi sa prudence ne scauroit estre circonuenuë par nul artifice.

Là dessus ils la Supplient en toute Humilité de vouloir considerer si ce n'est pas pourtant le vray but que se proposent ceux qui mesnagent ces ouuertures , & mettent sur le tapis les propositions d'un traité.

Il est vray que la paix est desirable par dessus toutes choses ; de sorte que la Ville pour laquelle ils agissent la souhaite avec vne passion ardante , sur tout ne faisant quasi que sortir des miseres de deux guerres consecutives.

Mais la question est , si en la conjoncture presente , ce qui s'en propose est le vray moyen d'y paruenir , & si au contraire il n'y a point subiet de craindre que ce soit un piege tendu à leur ruine , laquelle ( si il ne plaist à S.M. d'y pourvoir ) ils y voyent tres ineuitable ? ne faisans nul doute que cette negotiation ne tire avec elle ces necessaires consequences.

Premierement elle pourra ralentir, non pas de vray les bonnes affections de S.M.



dont ils ont vne confiance entiere : Mais au moins la diligence de Messieurs ses Ministres , pour les preparatifs de leurs secours , considerans que le traité venant à se conclurre , comme sans doute les entremetteurs d'iceluy ne manqueroient d'abord d'en dōner toutes les assurances imaginables , ce seroit auoir surchargé son espargne de grandes despenſes , sans aucune vtilité. Or le moindre delay entraine leur ruine , veu l'estat auquel ils se trouuent.

2. Les nouuelles qu'on traite estant espanduës, retiendroyent en leurs Maisons ceux qui se preparent à monter à cheual dès aussitost que le Printemps sera venu , n'y ayant aucun si imprudent d'endosser le harnois lors qu'on est prest de faire la paix.

3. Ce mesme bruit de traité mettra en danger de dissipation les troupes de Monsieur de Rohan , l'experience ayant tousiours fait voir , que celles de la nature des fiennes, composees de volontaires, & non soldoyés, s'escartent aisément , dès qu'on parle d'accommodement , chacun ayant de l'impatience pour regagner sa Maison.

4. Le pis est que durant ce delay ceux qui assiegent leur Ville bastiront à leur aise tous leurs forts, & parcheueront leurs li-

1628.  
Mars.

gnes du costé de la terre : Assembleront leur armee Navale, qui n'est encor en estat : travailleront sans y perdre vn tout seul moment à la Digue qu'ils ont commancee, & à fermer le passage par la mer de tant d'embarras que leur havre sera entiere-ment inaccessible : Ce peu de provisions qui restent en la Ville, apres celles dôt ils ont secouru l'armee de S. M. sera tout ausi tost consommé : Bref les affaires se trouveront en tel estat que l'opportunité du secours estant passée, toutes les forces de l'Europe n'y pourroyent plus rien ; Puis en suite le traitté qu'on propose à cette hebre allant en fumee, S. M. demeureroit mocquee, & la Ville qu'elle a engagée en ses armes, forcee necessairement à se rendre, & subir le courroux d'un Maistre irrité, & victorieux.

Comme S. M. sçaura bien iuger de la validité de ces raisonnemens & consequences, aussi ils le Supplient en toute Humilité, que nonobstant toutes les pratiques qui pourroient estre faites, au contraire, il pourvoye à ce qu'on ne ralentisse en maniere aucune la diligence necessaire pour les preparatifs du secours qu'il luy a pleu leur promettre, & veu que le conuoy

d'hommes & de viures s'en va quasi prest, 1628.  
par le bon soin qu'en a pris Monsieur le <sup>Mais.</sup>  
Duc de Buckingham son grand Admiral,  
il luy plaist de commander que le tout fa-  
ce voile au plustost, en attendant que S.  
M. puisse mettre en estat les forces qu'elle  
se propose d'assembler pour faire quelque  
execution digne de la puissance d'un si  
grand Monarque, & qui l'oblige à penser  
serieusement à vn bon accord, ceux qui  
de present n'en auront pas l'intention.

C'est mot à mot l'escrit que nous leus-  
mes, & remarquasmes que le Roy à ce mot  
d'accommodement se prit à soubzrire, &  
regarda le President du Conseil qui estoit  
à la droicte, & le Duc qui le suivoit, &  
leur dit quelque chose en Anglois que nous  
ne peusmes ouyr. Mais le geste nous fit  
comprendre qu'il leur témoignoit en estre  
bien esloigné. Quant à tout le reste, luy  
& le Cōseil l'ouïrent fort attētiuelement, &  
nous fut commandé de mettre nostre es-  
crit és mains du Millord Canoé, Secretai-  
re, avec promesse que nous fit le Roy qu'il  
y auroit égard, puis nous congedia avec  
vn visage fort serein, sans qu'il nous fust  
fait pour l'heure aucune des propositions  
dont le Duc nous auoit parlé.



1618. Le 16. qui estoit iour de Dimanche  
Mars. ayant esté donné à la deuotion, Dés le lendemain matin nous nous trouuâmes au leuer du Duc, qui nous dit que luy & trois autres du Conseil auoyent esté nommez pour Commissaires, afin de faire avec nous vn traitté en forme, au nom de sa Majesté, qui seruist à faire paroistre à tout le monde vne telle vnion entre luy & nous, qu'on perdit toute esperance, ou qu'il nous abandonnast, ou que quant à nous, nous peussions nous destacher de luy par vn accommodement separé. Mais en suite il reuint à la proposition qu'il nous auoit desia faite, & nous dit que c'estoit à nous d'aduiser à ce que nous pourrions proposer de nostre part, pour bien assurer sa Majesté, & l'obliger aux grands frais qu'il conuiendrait faire, pour entreprendre à bon escient nostre defence.

A ceste demande nous iugeâmes plus seur d'interroguer que de respondre, & luy dismes qu'en l'infinie disproportion de nous à vn si grand & puissant Monarque; Nous n'auions pas assez de temerité pour presumer que nous eussions chose aucune qui fust digne de luy estre offerte, ni qui peust estre mise en parâgon avec la gloire  
d'une

d'une action si grande & si genereuse, comme seroit celle de nous auoir secourus.

Que les grands Roys sont en cela les images de Dieu, qui font du bien à ceux dont ils n'en peuvent receuoir. Neantmoins que si il y auoit chose aucune où nous fussiôs capables de lui témoigner nos entieres reconnoissances, & en attendant l'assurer de la sincerité de nos intentions, à ne point faire vn traitté separé, nous l'escouterions avec tout respect.

Sur cela avec assez de difficulté, & en paroles fort embrouillees, comme vn homme qui a à dire vne chose dont il ne se voudroit pas exprimer, il noustoucha deux choses. Premièrement ce qu'il nous auoit desia ouuert, touchant quelques ieunes enfans de maison, qu'on enuoyast icy pour ostages. Secondement qu'en cas de necessité, nous nous obligeassions de donner retraitte aux armées du Roy, soit de Mer, soit aussi de terre. Aquoy il adiousta qu'il auoit desiré en communiquer avec nous, auant nostre abouchement avec les Commissaires, afin que deuant eux il n'y eut rien à debattre, ce qui nous pourroit porter preiudice.

Nous luy respondismes, que puis que S.



1628. M. auoit à gré que nous couchassions vni  
Mars. traité nous en esbaucherions les Articles,  
& les luy communiquerions au plustost.  
Ce qu'il trouua bon, & nous promit de  
nous enuoyer le Sieur de Vic son Secre-  
taire, à l'apres midy.

Lors que nous fusmes en nostre priué, &  
que nous peusmes communiquer entre  
nous, nous tombasmes d'accord que ces  
deux ouuertes estoient d'agereuses, & vn  
piege tendu à nostre liberté. Quant aux  
ostages, qu'il seroit grief à nos concitoyens  
de se voir arracher leurs enfans, pour aller  
humervn air estranger, & d'estre liez par  
de si chers gages. Quant à l'autre, la con-  
sequence nous en sembloit plus grande, &  
le danger plus imminent: Veu que s'ils  
auoyent la pensee de se saisir de nous, ils  
n'auroient sinon à faire vne feinte, & sous-  
ombre de chercher retraitte, estans entrez  
les plus forts, forcer la Ville à repren-  
dre leur ancien ioug. Si vn tel malheur  
aduenoit, que nostre Ville seroit vn thea-  
tre eternal de guerre; Veu que le Roy ne  
nous l'airroit iamais entre leurs mains.  
Cela mesme ne fust il à craindre, que le  
ioug de leur domination estoit trop pesant  
pour le subir de plein gré, & que prix pour



prix , s'il falloit en estre reduits à ce point, de perdre nostre liberté , toutes sortes de raisons nous obligeoyent à demeurer sous nostre vray & legitime Maistre , & ainsi recercher les moyens , lors que nous nous en verrions là de faire avec luy nos conditions. Mais veu que c'estoit la derniere extremité , à laquelle nous deuions tascher par tout ce qui le pourroit de prudence , de ne nous laisser pas reduire. Ce qui eschoit pour l'heure , estoit de nous temperer en sorte , d'un costé que nous esquiuaissions ces propositions , autant que nous le pourrions , sans les mescontenter: Mais de l'autre , si ils y insistoient , qu'en l'instant d'un coup si importât comme estoit celuy du ravitaillement present de la Ville , nous ne le retardissions point , par le rebut de ce qu'ils pourroyent demander , & leur accordassions tout ; Nous remettans pour le surplus à la Ville , qui en suite en ratifieroit ce qu'elle verroit à propos pour sa sureté.

Estans tombez tous trois dans ce sentiment , selon qu'en toute nostre gestion nous auons tousiours esté tres-vnanimés , nous prîmes la plume , & dressâmes le projet de nostre traité , afin que les Articles d'iceluy estans arrestez entre nous , &

1628. couchez sur le papier, nous marchassions  
Mars. plus seurement en nostre communication,  
soit avec le Secretaire du Duc, soit avec  
les Commissaires. Ainsi en ayans assez  
long-temps conferé ensemble, nous luy  
donnasmes cette forme.

*TRAITTE' ENTRE TRES-  
glorieux Prince, Charles, par la grace de  
Dieu Roy de la Grande Bretagne, & les  
Maire, Escheuins, Pairs, Bourgeois & ha-  
bitans de la Ville de la Rochelle, faisant pour  
eux leurs Deputez & sous-signez.*

**L**Es Deputez de la Ville de la Rochelle, munis de bons & amples pouvoirs, s'estans presentez à sa Serenissime Maiesté, & l'ayant tres-humblemēt Supliee de vouloir prendre & recevoir ceux de la Ville de la Rochelle, sous sa protection & sauvegarde & leur en faire sentir les effects, par vne assistance digne de sa Maiesté, au moyen de laquelle ils puissent estre delivrez de l'oppression laquelle ils souffrent maintenant, & estre remis en la bonne grace de leur Prince, le Roy tres-Chrestien, pour iouir d'une bonne & asseuree paix: Sa Serenissime Maiesté enclinant fauora-

blement à cette Requête , leur a accordé sa protection, & en ont esté reciproquement stipulés les articles qui s'ensuiuent.

Premierement quant ausdits de la Rochelle, ils prestent toute l'ayde & faueur à eux possible pour l'aduancement & heureux succès des armes de sa Serenissime Maiesté : en équipant le plus de vaisseaux de guerre , qu'il leur sera possible , pour fauoriser les executions de l'armee de mer de S. M. en luy fournissant de pilottes experimentez , pour ce qui est des costes qui leur sont voisines, & les emboucheures des Riuieres , en pouruoyant à ce que ceux ausquels S. M. en pourra donner l'ordre, trouuent en leur Ville , des magasins & lieux propres , pour faire vne Estape de toutes sortes de prouisions , si il est iugé à propos ; en receuant les Vaisseaux , que le mauuais temps contraindrait de relascher vers eux , ou qui y seroyent poussez par quelqu'autre necessité ; en cas mesme que toute l'armee de S. M. se trouuast pressée ; luy donnant retraite & abry, & pouruoyant à sa seureté.

2. Lesdits de la Rochelle ne prestent l'oreille à aucun accommodement particulier , & n'entendront à traitté quelconque



1628. de paix, sinon du gré & entier consente-  
Mars. ment de sa Maiesté.

3. S'il auenoit 'cy-apres, qu'il se fist quelque entreprise de la part de la France, sur les Estats de S. M. au suiet de ladicte assistance, laquelle maintenant il leur offre; Ils se declareront en sa faueur, & diuertiront de tout leur pouuoir les desseins qu'on auroit à son preiudice.

4. Pour foy & assurance de cela, dès à present lesdits Deputez, le prometttront au nom desdits de la Rochelle, & s'obligeront de leur faire ratifier, & en faire faire vn serment solemnel, tant aux Maires Escheuins & Pairs de la Maison commune, qu'aussi à tous les Bourgeois & habitans, extraordinairement assemblez pour cét effect.

5. Quant à sa Serenissime Majesté, il leur promet en parole de Roy, de les secourir à ses propres frais & despans, & par Mer & par terre, selon sa puissance Royale, iusques à ce qu'il les ait liberez des forts qui sont tant en l'Isle de Ré, qu'és enuiron de leur Ville, & leur ait moyenné la paix. Pour cét effect que dès à present il fera armer puissamment pour à ce Prins-temps, executer quelque chose digne de S.

M. Moyennant quoy les desseins qu'on a contre ladite Ville puissent estre diuertis, & les troupes qui la pressent soyent obligees de luy donner du relasche, iusques à ce que enfin par l'heureux succès qu'il plaira à Dieu de donner à ses armes elle en soit entierement deliuree.

6. Sa Majesté durant tout le temps que la guerre continuera, assistera ladite Ville, d'un tel nombre de soldats d'entre ses Sujets, qu'elle iugera en auoir besoin pour se garder, lesdits soldats soldoyez par sa Majesté.

7. Sa Maieité permettra, tant à ses Suiets, qu'aux habitans de ladite Ville, de charger en tous ses Estats, toutes les provisions, desquelles elle a besoin, & en fera expedier, des Pattentes Authentiques, qui seront enuoyees en tous les Ports & Haures; afin qu'en vertu d'icelles, sans autre plus particulier passeport, les Marchands puissent faire librement leurs Achats & Cargaisons, sans estre troublez au transport.

8. Dés à present S. M. fera partir avec vn suffisant conuoy les bleds & autres provisions, qui par son commandement se trouuent chargez, pour au plustost estre

1618.  
Mars.

portez en ladite Ville, & y estre debitez à prix honneſte.

9. Pour ſoulager la pauvreté de la Ville, & ſubuenir à ſes plus preſſantes neceſſitez, S. M. permettra vne Collecte en tous ſes Eſtats; & dès à preſent eſtablira l'ordre qui eſt neceſſaire pour cela.

10. Ayant eſté cy-deuant compilé certains articles de traitté, entre le Seigneur Duc de Buckingham ſon grand Admiral, & leſdits de la Rochelle, dont ledit Sieur Admiral auroit accordé les vns, ſoubs le bon plaifir de S. M. & remis les autres à vne plus particuliere conference, Dès à preſent ſa Maieſté a agreé & tient pour bons & valables ceux que le dit Sr. Admiral en a paſſé, & quant aux autres, les fera examiner au pluſtoſt, pour, ſur iceux donner auſdits de la Rochelle, tout le iuſte contentement qu'ils peuuent attendre.

11. Enfin en cas aduenant que S. M. Vienne cy-apres à quelque pourparlé de paix avec le Roy tres-Chreſtien, leſdits de la Rochelle y ſeront appelez par ſa Maieſté, & nul traitté ne ſe conclurra, ſans ſtipuler bien expreſſément leurs Priuileges & immunitéz, ſelon les memoires qu'ils en fourniront; Sa Maieſté s'obligeant en outre  
de



de leur garantir ledit traité.

1628.

Mars.

DAVID, VINCENT, DEHINSSE.

Ces Articles ainſi compilés , nous attendions le Secretaire du Duc, Mais il ne vint point ny ce jour là ny le lendemain , de sorte que nous mesmes le Mercredy 19. les allasmes porter au Duc , qui les retint pour les considerer à loisir , & nous promit qu'il en confereroit avec les Commissaires , & nous manderoit.

Retournez à la Maison , nous y trouvasmes son Secretaire , qui tesmoigna estre fort marry de son delay, qu'il excusa sur des affaires pressées ; Mais de nostre part il nous vint bien plus à gré qu'il ne nous eust point veus , aymans mieux communiquer avec le Maistre, que non pas avec le Serriteur.

Nous laissasmes couler iusques au Samedi 22. & voyans qu'il ne nous mandoit point , nous recherchasmes l'occasion de nous presenter à luy; Mais il nous fit dire qu'il estoit occupé pour des affaires vrgentes du Roy. Mais au fonds la verité estoit qu'il éuitoit nostre rencontre, sur vne difficulté que luy & les autres Commissaires auoyent trouuee sur le cinquiesme Article de nostre traité, qu'il vouloit estre changé

1628.  
Mars.

Mais ne desiroit pourtant en entrer en contestation avec nous.

Le moyen qu'il choisit, fut d'enuoyer son Secretaire vers Monsieur de Soubise, auquel il fit entendre que les termes esquels nous desirions que le Roy s'obligeast à nous, auoyent quelque chose de trop precis. Ainsi qu'il le prioit de nous amener à les adoucir, & le conceuoir en ces termes.

Quant à sa Majesté, estant meüe, de la bonne affection qu'elle à tousiours eüe pour les Eglises, & particulièrement pour ladite Ville de la Rochelle, Elle promet en foy & parole de Roy, de leur donner toute l'assistance conuenable, iusques à vne bonne & ferme paix.

Monsieur de Soubise en ayant conféré avec nous, nous receusmes grand déplaisir de ce changement, & craignismes qu'il ne vint de quelque crainte qu'ils eussent de ne nous pouoir obtenir vne paix qui nous deliurast de nos fers, & sur tout de ce fort, pour lequel ils auoyent entrepris la guerre. Neantmoins nous ne iugeasmes pas qu'il falust apporter la moindre accroche au traitté. Ainsi nous remismes au net nos articles ainsi corrigez, & le leudy 27. les portasmes au Duc, qui les ayant pris de

noster main, & leus en nostre presence, 1628.  
nous tesmoigna qu'il les approuuoit, & Mars.  
nous dit que sans autre communication avec les Commissaires, dont il n'estoit de besoin, puis que tout estoit conuenu, il les porteroit au Roy, & les presenteroit au Conseil, & nous asseuroit que nous en aurions tout contentement.

Estans partis d'aupres de luy ce nous fut beaucoup de ioye, de ce que le Duc ne nous auoit plus parlé ny d'ostages ny de recevoir les armées en la Ville. Et d'ailleurs que sans auoir esté obligez à nul debat avec les Commissaires, nos articles estoient receus.

Le Vendredy 28. ayans eu l'aduis qu'il y auoit vn nombre competant de provisions à Plemud, nous allasmes vers le Duc pour le conjurer que le Comte d'Embey partist dès le lendemain, & que le Sieur Dehinffe nostre Colleague, qui selon que nous estions conuenus luy deuoit tenir compagnie en ce voyage, eust l'honneur de recevoir les commandemens du Roy, & les siens.

Ainsi tost il nous mena vers le Roy, qui nous vsa de ces propres termes, Ouy, j'entends que le Comte d'Embey parte sans



1628. plus de delay , ne prenez pas ce qui part  
Mars. presentement pour vn secours, ce n'est que  
pour vn rafraischissement , & afin de donner  
courage à vostre Ville , iusques à vne  
plus puissante assistance aussi tost que le  
temps le pourra permettre. En suite , apres  
vn peu de pause , de crainte que ce mot de  
temps ne fust pas pris de nous selon son intention,  
i'entends , dit il la saison , & aussi  
tost que le Printemps sera reuenu. Luy  
ayans fait quelques remerciemens, il nous  
dit encore ; Assurez vous que ie vous  
assisterai si puissamment que ie vous ferai  
obtenir vne bonne paix. Le Duc adiousta  
que toutes guerres estoient pour paruenir  
à la paix ; Mais que S. M. n'entendoit parler  
que d'une qui fust bonne. A quoy ayans  
respondu que nous la receurions de la main  
de S. M. telle que luy mesme l'estimeroit  
raisonnable. L'aimerois beaucoup mieux,  
repartit il, l'auoir mauuaise pour moy, que  
pour vous ; Car pour moy ie m'en sçaurai  
toufiours tirer , mais quant à vous vous seriez  
perdus. Apres ces propos le Sieur Dehinssé  
s'estant encliné pour receuoir ses cōmandemens,  
Assurez, luy dit-il, ceux de la Rochelle  
que ie ne les abandonnerai point. Surquoy le Duc  
nous dit vous voyez

Messieurs, vous avez la parole du Roy. Quant à vos articles que vous me communiquastes hier, le Roy les agree, & de ce pas les va faire ratifier en son Conseil, & vous en faire expedier les lettres.

Fort contens de toutes ces bonnes paroles, nous nous retirasmes, & dès le lendemain apprismes que le Comte d'Embey se dispoisoit à partir pour Plemud, ce qui obligea ledit Sieur Dehinffe nostre Colleague de se mettre aussi en chemin.

Ce qui se passa du depuis au suiet de l'arriuee du Sieur Gorribon, qui donna occasion au retardement de l'enuoy des provisions est contenu en la lettre du onziemesme Feurier.

C'est le contenu du paquet que le Capitaine Sacremore rendit au Maire & à son Conseil, par lequel ils eurent ample information de toute la gestion de leurs Deputez, & louèrent leurs diligence, & le soin qu'ils auoyēt eu de leur enuoyer diuers exemplaires de leur paquet, afin que l'un suppléast à l'autre, si il se perdoit, comme il aduint.

Le leudy 24. furent fonduës dans la Rochelle, quatre pieces de canon de fonte verte, deux entorçis de dix-huict liures de

1628.  
Mars.

balle, & les autres deux en demy torsis de dix liures de balle: dont il ne s'en trouua que trois de bonnes, vne des grosses ayant manqué, veu que le moule n'estoit bien fec.

Le 30. les Maires, Escheuins, Cōseillers, Pairs, Bourgeois & gens de guerre, s'estans assemblez en l'Hostel de Ville, iurerent & promirent garder le traité, qu'auoyent fait leurs Deputez avec le Roy de la Grande Bretagne: en la protection & sauuegarde duquel ils se mettoient, sans toutesfois desroger à la fidelité & obeïssance qu'ils deuoyent au Roy tres-Chrestien leur Natu-  
rel & Souuerain Seigneur.

Le premier d'Auril arriua à la Rochelle vn jeune homme nommé Viuier, seruiteur du Sieur Vincent, despeché par luy de Hollande: où suiuant l'ordre qu'il en auoit, il estoit passé, pour procurer quelque soulagement de viures & munitions pour ladicte Ville. Lequel Viuier rendit au Maire cette lettre dattee du sixiesme de Mars de cette teneur, en chiffre.

Lettre  
de Hol-  
lande  
du Sr.

**M**ESSIEVRS,      outre deux hom-  
mes que ie vous ay enuoyé de ce pays,  
ie vous depesche ce troisieme pour vous  
donner aduis de l'estat, où i'ay laissé les



affaires en Angleterre , & de ce que ie fay  
 icy. le vous diray donc que là on se dispo-  
 se à vous secourir avec de grandes puissan-  
 ces, & par mer & par terre , moyennant la  
 grace de Dieu, & qu'en attendant on auoit  
 resolu de vous faire couler des prouisions:  
 Pour à quoy traualier, Messieurs Bragneau  
 & Dehinſſe deuoyent partir de Londres  
 pour Plemud le quatorze du passé , & que  
 Monsieur le Comte d'Embey les suiroit  
 aussi tost. I'espere que vous en aurez receu  
 quelque chose. Quand à moy : le partis de  
 Londres le dix sept avec Monsieur Dolbie-  
 re , venu icy pour acheter des armes & des  
 cheuaux , & arriuay le vingt & vn en Ze-  
 lande : où i'ay sejourné huiſt iours , pour  
 disposer des particuliers à charger des  
 bleds pour vous enuoyer. Ce qu'ayant mis  
 en train, comme i'espere que vous en sen-  
 tirez les effets , & qu'il vous en ira de là  
 cent cinquante thonnes : le suis venu  
 icy , où ie parlay hier au soir à Monsieur le  
 Prince d'Orange , qui me fit bon accueil,  
 & ne suis pas sans esperance , que sous  
 main nous n'en tirions quelque ayde , à  
 tout le moins d'argent. Cela estant , i'espe-  
 re faire vne grande Cargaison à Amster-  
 dam , où j'iray au plustost , & desia ay dis-

1628.  
 Avril.  
*Vincēt*  
*aux*  
*Ro-*  
*chelois*

1628.  
Auril.

posé par lettres plusieurs Marchands à y entrer. De tout cela i'ay creu qu'il importe vous donner aduis, & qu'il ne faut point espargner l'argent en Messagers, afin que de plusieurs l'un au moins vienne à vous. I'ay donné cent liures à certui cy, & vous prie s'il s'acquitte bien de sa promesse de luy faire vne honnesteté, C'est

MESSIEURS,

*De la Haye en* Vostre tres-humble & tres-  
*Hollande ce 6.* obeyssant seruiteur

*Mars 1628.* & Deputé PH. VINCENT.

L'esperance qu'on conceut de la prompte arriuee du Comte d'Embey suiuant ces lettres réjouit grandement les Rochelois.

Le 8. la nuit du Dimanche venant au Lundy la Batterie Royale & les forts Louys, Miroeil ( dit du Saint Esprit, qui n'auoit encores tiré ) & la Fons, tirerent depuis les neuf heures du soir, iusques à quatre heures du matin des boulets à feu. Ce fut neantmoins sans tuer ny blesser personne, ny mettre le feu en aucune maison, & ce au moyen de la pouruoyance qu'on y aporta, ayant mis des sentinelles aux Clochers, qui aussi tost que le boulet estoit tombé crioient pour aduertir du lieu

lieu où les particuliers l'alloyent chercher, avec vne griffe de fer faite expressement pour cela, les faisoient aisément, & les portoyent en ruë. Autrement leur ardeur estoit telle que les laissans tant soit peu ils embrasoient tout aussi tost les planchers, qui sont d'ordinaire d'ais de sapin. Et s'en est trouué tel qui a percé en moins de rien trois estages.

Le Mardy 10. le Maire ayant eu aduis que les assiegeans faisoient miner és premieres Maisons ou Mazures de la Fons, à cinq cens pas de la Ville, fit sortir par la Porte de Coigne deux compagnies d'Infanterie, & quinze à vingts chevaux pour en sçauoir la verité. D'abord ils descouplerent huit Cavaliers, & vne quinzaine de soldats, conduits par vn Sergent, pour recognoistre quelle force il y auoit, tandis que se coulans par le couuert du grand chemin, ils donnerent iusques ausdites Maisons, dont ils esperoient se rendre maistres. Mais le secours qui leur vint des forts prochains les força quant à eux de se retirer, & se jetterent pour la plus grand part, dans les Mazures & Tonnelles des Moulins, à trois cents pas de la contr'escarpe: où les autres tout incontinent les vindrent



1628. escarmoucher, quoy qu'assez peu en nom-  
Mars. bre pour les attirer dans l'embuscade, qu'ils  
leurs auoyent dressée à cent pas de là,  
dans vn fonds de chemin : Ce fut toutes-  
fois sans effet, Veu qu'ils se retindrent en  
leur fort, iusques à ce que le secours qui  
leur vint de la Ville leur donna moyen de  
se retirer. De ceux de dehors vn Sergent  
fut blessé à mort, d'un coup d'arquebuse à  
rouët, au trauers du corps : & fut enterré  
à la piece destachée de la Porte de Coigne.  
De ceux de dedans vn soldat fut blessé le-  
gerement à la jambe. Cette sortie n'ayant  
peu rien descourir de ce qu'on auoit desir  
de sçauoir, le Maire en tout éuenement  
fit creuser au milieu du fossé depuis ladite  
Porte iusqu'au Bouleuart de l'Euangile.

Le 12. de la nuit du Mercredy venant  
au leudy sur les quatre à cinq heures du  
matin, vn boulet à feu venant du Fort  
Louys, mit le feu dans vne des maisons de  
l'hospital, qui se trouuant pleine de foin &  
de paille, il eut bien de la peine à l'estein-  
dre : & y fut tué vn homme, & vn autre  
blessé d'un coup de canon, tiré dudit Fort  
Louys, qui en délascha iusques à vingt,  
pendant que le feu dura : L'hospital ne re-  
ceut neantmoins aucun dommage, au

moyen du secours qui fut diligent.

1168.

Auril.

La nuit du Samedi venant au Dimanche 15. vn boulet à feu venant de la Batterie Royale, tua vne rōde comme elle alloit du Corps de Garde de la Porte de Coigne à celui du Bastion des grands Lappins.

Le Mardy au matin 17. & dès l'aube du iour, le Maire fit sortir par la Porte de Coigne, vingt & cinq chevaux & cinq compagnies d'infanterie, avec quelques volontaires pour descourir de nouveau si les assiegeans faisoient traualier cōme on auoit dit aux premieres Maisons de la Fōs; Mais ils n'y trouuerent personne, ny apparence de traual.

Le Mercredi venant au Ieudy 19. sur la minuit, ceux de la Fons vinrent abattre & raser à fleur de terre, les Maisons à demi-rompuës des Moulins de la Fons pres la Ville: & de là mirent le feu en trois Moulins les plus proches. Ce qui ayant faict monter vne fort haute flame dans l'air, fit croire à ceux des forts Louys, Miroeil, & Batterie Royale, que le feu fust en plusieurs maisons de dedans, & les occasionna de tirer tout le reste de la nuit des boulets à feu, & autres, à trauers la Ville. Ce fut

1628. toutefois sans tuer ny blesser personne,  
Auril. combien qu'il fust tiré cette nuit, cent  
soixante & cinq coups de canon.

Le Lundy 23. sur les deux à trois heures  
apres midy, le Roy arriua pour la seconde  
fois deuant la Rochelle, ayant fait ses Pas-  
ques à Surgeres. Pour sa bien venue on  
délascha trois fois le canon de toutes les  
Batteries & Nauires, & sur tout furent en-  
uoyez plusieurs boulets à feu sur la Ville.  
Le soir à neuf heures la mesme Musique se  
fit ouyr sans autre effet, toutesfois que le  
fracas de quelques toits. Sa Maiesté auoit  
esté absente depuis le dix de Feurier ius-  
qu'audit iour vingt & trois d'Auril. C'est  
à dire deux mois treize iours.

Le Mardy 24. vinrent à la Porte de  
Coigne vn tambour & deux trompettes,  
qui dirent auoir charge de sçauoir si ceux  
de la Ville receuroient vn heraut en cas  
que le Roy le leur enuoyast, mais on ne fit  
point de responce, d'autant mesmement  
qu'on ne sçauoit pas encores que sa Maie-  
sté fust au Camp.

Le mesme iour sur les onze heures du  
soir, vn boulet à feu venant de la Batterie  
Royale mit le feu dans vne maison pleine  
de foin & de paille, deuant le Clocher de



saint Barthelemy, joignant la grand Escor- 1628.  
le, qui est l'un des Magasins de la Ville, & May,  
fut cette maison presque toute bruslee, sans  
toutesfois endommager ledit magasin, tant  
pource que la muraille estoit bonne & fort  
espaissie de ce costé là, que pource qu'on fit  
grand deuoir d'esteindre le feu avec des  
peaux de Bœufs, & autres choses sembla-  
bles.

Le Dimanche deuxiesme de May fut  
faict Maire au lieu de leâ Godefroy Escuyer  
Sieur du Richard, Iean Guitton Escuyer; Le  
mesme qui auoit esté Admiral pour les Ro-  
chelois és guerre de mil six cens vingt &  
vn, & mil six cens vingt & cinq.

Le Mardy 4. il fut trouué à la Coste de  
S. Nicolas vn petit coffret de planches de  
sap, bien clos, dans lequel estoit vn billet,  
aduertissant les Rochelois de prendre gar-  
de à eux, & qu'en peu de iours ils deuoyent  
estre attaqués en plusieurs endroits, & prin-  
cipalement à la Chaisne, & au Fort de  
Thadon, & qu'il seroit ietté dans la Ville  
forces feux d'artifices. Ce qui leur fit dou-  
bler leurs gardes, & se tenir en estar.

Le Ieudy 11. sur les deux à trois heures  
apres midy, l'armee Angloise commandee  
par le Comte d'Embey (beau frere du Duc

1928. de Buckingham) parut vers le pertuis Bre-  
May. ton, composee de onze Ramberges, trente  
à quarante Nauires de guerre , & autant  
d'autres vaisseaux chargez de viures & mu-  
nitions : & vint sur les quatre à cinq heu-  
res du soir , mouïller l'ancre à Chef de  
Baye. A son arrivee l'armee du Roy , qui  
y estoit en rade se vint mettre à couuert  
prés la Digue , & les Batteries des pointes  
de Coureille & de Chef de Baye , que le  
Roy y auoit fait dresser expressément pour  
battre en ladite rade , & empescher les Na-  
uires , qui voudroyent passer , pour porter  
des Viures dans la Rochelle. Ces Batta-  
ries incommoderent tellemēt l'armee An-  
gloise ( & entr'autres l'Admiral qui auoit  
mouïllé le plus proche de terre ) que dés le  
soir mesme elle desencra pour se mettre  
plus au large , & hors de la portee du canon  
desdites Batteries.

Le Dimanche 14. les Sieurs Bragneau  
& Gobert Deputez de la Rochelle , & tous  
les Capitaines François , voyans comme  
le Comte d'Embey & son Conseil ne se  
mettoient en deuoir de forcer la palissade,  
pour faire entrer le Rautaillement dans la  
Rochelle , & que le temps s'escouloit sans  
rien faire , luy presenterent & à son Con;

seil, vn escrit, signé d'eux tous: par lequel ils le supplioyent de mettre à execution les commandemens que le Roy leur Maistre leur auoit faits, aussi tost estre arriuez deuant la Ville d'y faire entrer le secours. Et à cét effet leur dirent qu'il estoit necessaire.

1628.  
May.

1. De faire garnir les Barques Françoises où estoyent les vituailles de nombre suffisant de soldats, pour les deffendre des Pattaches & Galiottes qui gardoyent la Palissade.

2. Que chacun des Nauires à feu, eust, outre sa chaloupe, vn bon grand bateau, bien armé & équipé d'hommes pour les garantir des empeschemens qui leur pourroyent estre donnez en leur execution.

3. Que tous les Nauires Anglois, tant ceux de sa Majesté, que autres, eussent par leur commandement à s'aduancer vers la Palissade, pour avec les Nauires de guerre François faire retirer ceux des assiegeans, & tandis qu'ils feroient leur execution, & qu'on combattroit faire passer les Nauires chargez de Vituailles, tant François que Anglois dans la Ville.

Et pour les mieux accourager, ils promettoient tant en leur nom propre & pri-



1628.  
May.

160

*Journal du dernier*

né, qu'au nom de laditte Ville, en vertu de leur Commission; Qu'en cas que dans cette execution, il vint à se perdre quel-qu'un des Nauires, il seroit payé au Roy, ou au Bourgeois selon sa iuste valeur: Et de plus que si estans entrez dans la Ville, ils n'en pouoyent sortir, ils seroyent nourris & payez aux despens du Public.

Cét escrit estant présenté audit Comte & à son Conseil, & les Deputez ayans viuentement représenté de bouche tout ce qui se pouoit pour les animer, ils leur respondirent que leur charge, ne portoit pas de combattre; Mais qu'elle estoit seulement de les conduire iusques où ils estoient, afin que leur presence facilitast leur entree dans la Rochelle s'il se pouoit. Qu'ayans executé leur ordre, ils auoyent resolu de mettre à la voile le leudy au soir, pour s'en retourner en Angleterre, & ce d'autant plus qu'ils auoyent esté aduertis, qu'il deuoit venir bien tost en ces costes vne armee Espagnolle, pour les combattre; Ce qu'ils vouloyent éuiter, afin de ne hasarder & perdre les Vaisseaux du Roy.

Les Anglois estans obstinez en cette resolution, les Sieurs Bragueau & Gobert considerans en quel danger estoit la Rochelle,

chelle , dépescherent dès le mesme soir, <sup>1628</sup>  
pour l'en aduertir vn nommé. Vidault, & <sup>May.</sup>  
ce dans vn petit équif que le Comte d'Em-  
bey leur donna, & le munirent de deux let-  
tres , l'vne qu'il deuoit ietter en l'eau vis à  
vis de la Palissade , qui contenoit sommair-  
ement, que les Rochelois n'eussent point  
à s'estonner , s'ils voyoient dans le leudy  
au soir l'armee mettre à la voile , d'autant  
que ce qu'elle en faisoit n'estoit à autre des-  
sein , qu'apres auoir esté à Bel-Isle , ren-  
contrer vne partie de ses vaisseaux , que la  
tourmante & mauuais temps auoit séparé  
du gros , retourner en bref plus puissante,  
pour les secourir au peril de leur vie. Et  
l'autre toute contraire & plus veritable,  
pour aduertir leurs Concitoyens , du peu  
ou point du tout d'affection & volonté  
qu'auoit l'armee Angloise de les secourir, &  
la resolution qu'elle auoit prise de mettre à  
la voile le leudy au soir , pour s'en retour-  
ner en Angleterre , nonobstant toutes les  
prieres & remonstrances qu'ils luy auoient  
pû faire , de donner combat , ou du moins  
de demeurer en la Rade pour quelque  
temps : afin que tandis qu'elle seroit là , &  
les armes à la main, la Rochelle eust moyen  
de recourir à la bonté & clemence de son

1628. Prince, pour y trouuer grace, au lieu d'une May. ruynes totale, que luy pourroit apporter sa retraite. Que la chose en estant là, ils leur en donoyent aduis, afin qu'ils vissent, si tandis que l'armee demouroit là, ils ne deuoyent point recercher la Clemence du Roy, & essayer de faire leur apointement.

Dés le mesme soir ledit Vidault se rendit en la Ville sur les onze heures de nuit, ayant passé sans empeschement à trauers les Nauires de guerre & la Palissade, & faisant bonne mine remplit toute la Ville de bonne esperance, & dit merueilles de la resolution des Anglois. Mais en particulier il representa au Maire le vray estat des choses, & luy rendit sa lettre.

Sur l'heure mesme le Maire fit assembler le Conseil de guerre, & auparauant que de faire lecture de la lettre fit iurer & faire serment deuant Dieu à tous, de tenir secret ce qui y seroit contenu, puis le leur communiqua, & de plus fit entrer ledit Vidault qui les instruisit de tout ce qui se passoit en l'armee Angloise. Là dessus ils se resolurent de ne perdre point de temps, & pendant qu'elle estoit là, de recercher la grace du Roy sous les meilleures conditions qu'il se pourroit, & en telle sorte



neantmoins, qu'on ne cognust point que  
cela vint d'eux. Comme ils estoient en  
peine comment ils s'y gouverneroyent, ils  
s'aduiferent qu'ils ne le pourroyent mieux  
qu'en se seruant du sieur de la Leu, qui  
quelques iours auparauant auoit demandé  
permission de se retirer hors la Ville, &  
mesme auoit obtenu du Roy sauf conduit  
pour cela, & donnerent ordre à lean Go-  
defroy Escuyer Sr. du Richard de le voir, &  
le prier en leur nom d'en prédre la Cômif-  
sion, Ce que ledit sieur Godefroy fit le  
lendemain matin, allant trouuer ledit Sr.  
de la Leu, qui en accepta la charge, &  
conuinrent ensemble, Que si il y auoit es-  
perance de la part du Roy d'obtenir la paix  
sous des bonnes conditions il enuoyeroit  
dans le iour vn trompette; si soubs de pas-  
sables & non trop aduantageuses, vn tam-  
bour; & s'il ne pouuoit rien obtenir, il  
n'enuoyeroit n'y l'un n'y l'autre. Mais  
quand il deuroit courir risque de perdre la  
vie il retourneroit dans la Ville rendre  
conte de ce qu'il auroit faict.

*Cecy est ré-  
d'une  
relatiō  
dudit  
Sieur  
Gode-  
froy.*

Cela accordé entr'eux & raporté par led.  
Sr. Godefroy au Maire & Cōseil de guer-  
re, il fut arresté que ledit Sr. de la Leu forti-  
roit de la Ville le Mardy matin, seize pen-

1628.  
May.

dant que l'on seroit au Presche, afin qu'il ne fust veu de personne, craignant que si on le voyoit sortir, ses ennemis ne suscitassent le peuple contre luy, pour luy faire du desplaisir, & cependant qu'on tesmoigneroit auoir de bonnes nouvelles, & mesme qu'il seroit donné vne chaisne d'or audit Vidault, afin que cela estant rapporté au Camp du Roy, le mesnagement qu'on projettoit se peust faire plus aduantageusement.

De plus, auant que de se separer ledit Maire fit d'abondant faire serment à tous sur la Sainte Bible que ils n'acheteroyent aucunes prouisions, soit directement ou indirectement, pendant le temps que ladite armee Angloise seroit en Rade à chef de Baye, craignant que cela donnast à cognoistre au peuple que ladite armee Angloise (se sentant trop foible pour forcer la Digue, & faire entrer le Rautaillement dans la Ville) se vouloit retirer, & les laisser en proye, & par ainsi empeschast non seulement le traitté qu'on desiroit faire par le moyen dudit Sieur de la Leu, mais mesme mist toute la Ville dans l'espouuante.

Le Mardy à l'heure designée, on fit for-

tir ledit Sieur de la Leu, & ne fut aperçeu  
que de bien peu de gens.

1628.  
May.

Sur les deux à trois heures du soir ( soit que ce fust par son entremise comme il auoit promis, ou pour autre suiet ) il se presenta vn trompette au fort de Taddon, Mais l'vn des Capitaines qui y commandoit fit tirer sur luy, sans vouloir permettre qu'il acheuast sa chamade, non plus qu'à vn tambour, à qui il fit rompre la caisse, n'y qu'on aduertist le Maire de leur venue, estant indigné ( & plusieurs autres ) contre le Maire & Conseil, de ce qu'ils n'auoyent voulu leur donner communication de cette lettre, ny dire pourquoy on auoit fait sortir ledit Sieur de la Leu. Mesme ils en vinrent iusques là que de les accuser de vouloir faire par luy leur paix particuliere, & les abandonner à la mercy & discretion de leurs ennemis. Et d'autant qu'on fut contraint d'insinuer quelque chose de la lettre à aucuns des plus eschauffez, ils s'escrioyent qu'elle estoit supposée, & que ledit sieur Godefroy l'auoit fait faire, & signer audits Bragueau & Gobert avant qu'e de partir, & ainsi que c'estoit vn artifice pour les perdre sur le point de leur deliurance. Mais le



1628. leudy au soir venu comme ladite armee  
May. Angloise mettoit à la voile il ne parut que  
trop, que la lettre estoit vraye, & que ces  
opiniastres auoyent tout perdu par leur  
trop de curiosité, & peu de confiance, en  
ceux qui traualloyent plus pour leur bien  
que pour le leur propre, dont quelques vns  
vinrent à resipiscence, & à recognoistre  
leur faute, mais il n'estoit plus temps.

Aussi tost que ledit Vidault fut entré  
dans la Rochelle, le Maire fit faire des Si-  
gnals de feu au haut des Tours de Saint  
Nicolas, de la Chaisne & de la Lanterne,  
pour aduertir l'armee Angloise de son ar-  
riuee. Et au matin arborer ausdites tours  
des Enseignes qui y demurerent, iusques  
à ce que laditte armee Angloise s'en re-  
tournast en Angleterre.

Le 15. les Anglois enuoyerent vn Bru-  
lot plein de feux d'artifices en forme de pe-  
tards dans l'armee du Roy pour y mettre le  
feu; Mais le feu s'y estant pris auparauant  
qu'il fut temps, le Brulot & ceux qui estoient  
dedans, perirent miserablement, sans qu'il  
s'en sauast aucun.

Le leudy 18. sur les deux à trois heures  
apres midy, l'armee Angloise mit à la voi-  
le, pour s'en retourner en Angleterre,

'Ayant esté en rade à Chef de Baye huit iours, sans auoir fait aucun effort, ny tenté de faire entrer des viures dans la Rochelle, ce qui attrista grandement les Rochelois, & les mit en grand peine & perplexité. Toutefois ils se resolurent de souffrir toute extremité auparauant que de se rendre; Et pour cét effet, acheterent les vns des autres toutes sortes de prouisions: & afin de tenir plus long temps, retrencherent leur ordinaire de la moitié de ce qu'ils auoyét de coustume de manger, & sur tout le pain, qu'ils commencerent à peser.

Le mesme iour que ladite armee Angloise mit à la voile, les Sieurs Bragneau & Gobert firent assembler dès le matin tous les Capitaines François au bord dudit sieur Bragneau, & là sur la resolution que ladite armee Angloise auoit prise de mettre à la voile, pour s'en retourner en Angleterre, sans auoir voulu pour quelques remonstrances, prieres & supplications qu'ils luy eussent peu faire, leur donner main forte, pour faciliter l'entree des Nauires du raitaillement dans la Rochelle: Il fut ingé à propos & arresté du consentement vnanime de tous, que le sieur Gobert prendroit dès l'heure mesme la Pattache

*Cecy  
est in-  
seré  
d'une  
relatiō  
dresse  
par le  
Sieur  
Gobert*

1628.  
May.

du Capitaine Guillet , pour le conduire en toute diligence en Angleterre , représenter, au Roy, le peu d'effort qu'auoit fait son armee , & le danger euident , où elle laissoit la Rochelle : afin qu'il pleust à sa Majesté d'y remedier. Ce que ledit sieur Gobert ayant accepté , & le vent luy estant fauorable , arriua le vingt & deux du mois à l'Isle d'Wic proche d'Angleterre, & de là se faisant passer à Portsmouth, print la poste pour aller à Londres ; où estant arriué, il alla aussi tost trouver Monsieur de Soubise , auquel ayant fait le recit de ce qui s'estoit passé en son voyage , & le retour de l'armee Angloise , sans auoir rien fait , ils allerent de compagnie porter ces mauuaises nouvelles au Duc de Buckinghant , qui en tesmoigna beaucoup de ressentiment, & les mena aussi tost vers le Roy , auquel le sieur Gobert ayant fait la relation particuliere du tout, il en fut viuement touché , & luy demanda quel sujet pouuoit auoir obligé son armee de faire vne si prompte retraite , sans auoir au prealable combattu, secouru & raitaillé la Rochelle. Puis prenant ledit sieur Gobert le mena contre vne fenestre , & s'apuyant sur son espaule & plorant à chaudes larmes , luy reïtera la  
mesme



mesme demande en ces mots, quel sujet donc ont eu mes gens de se retirer, & abandonner cette pauvre Ville? A quoy il respondit qu'il n'en scauoit autre sujet, qu'une terreur panique, qui les auoit pris sur certain faux bruit, d'une armee Espagnole, preste à venir es Costes de France, & la crainte qu'ils tesmoignoient auoir de risquer & perdre les Vaisseaux. Alors sa Maiesté plus esmeue que deuant, & se retirant trois à quatre pas en arriere luy dit, hé quoy! mes vaisseaux sont ils faits pour faire peur, & non pour combattre en les hasardant, & en mesme instant commanda audit Duc de Buckingham de faire assembler le Conseil. Ce qui fut fait à l'heure mesme: où ledit sieur Gobert estant appelé, & enquis quel iour l'armee estoit arriuee deuant la Rochelle, quel combat elle auoit esté contrainte d'y faire, quels morts, & quel dommage elle y auoit receu: Il leur déclara que l'armee estoit arriuee deuant la dite Ville le onzieme, que de combat il n'y en auoit point eu, pour ce que l'armee du Roy de France s'estoit retiree proche de la Digue: Mais que seulement de dessus la terre, & les pointes qui aduancent, l'Admiral auoit receu de quelques batte-

May. rîes qui y estoient posees vn coup de can<sup>on</sup>  
1628. sans auoir blessé personne. En suite de-  
quoy le Roy & son Conseil , resolurent de  
despescher vn Gentilhomme avec ledit Sr.  
Gobert , pour dans le mesme vaisseau , qui  
l'auoit amené, aller retrouver ladite armee  
Angloise en quelque part , qu'elle fust,  
avec commandement exprés au Comte  
d'Emby de retourner mouiller l'ancre dâs  
les rades de la Rochelle , & attendre là , le  
renfort , que le Roy alloit faire preparer  
pour ladite Ville. Sadite Maiesté faisant  
en mesme temps commandement audit  
sieur Gobert d'escire vne lettte à ceux de  
ladite Ville , & leur'dire qu'ils ne s'eston-  
nassent point , si son armee s'estoit retirée  
sans rien faire : Veu qu'il leur preparoit  
vn si puissant secours, qu'il s'assuroit, qu'ils  
seroyent deliurez en bref , & qu'il perdrait  
plustost la moitié de son Royaume , que de  
les laisser perir. Ce que ledit sieur Gobert  
fit, en la presence de tout le Conseil , & le  
Roy l'ayant signee , fut par homme exprés  
enuoyee à ceux de laditte Ville. Apres  
quoy les susdits Gentilhomme & Gobert  
prindrent la poste pour Portsmouth : où es-  
tans arrivés , s'embarquerent dans ladite  
Pattache , pour tascher de rencontrer ladi-

te armee Angloise, Comme ils firent le <sup>1168.</sup> quatriesme iour de leur depart dudit Ports-  
mud à la coste de Cornoüailles, mais dés-  
ja dissipee pour la plus grand part, n'y  
ayant plus que quatre ou cinq vaisseaux de  
guerre, avec l'Admiral, tous les autres  
s'estans retirez aux plus prochains havres  
d'Angleterre, lesquels ne laisserent pour-  
tant d'aller au Bord dudit Admiral presen-  
ter au Comte d'Embey de la part du Roy  
& de son Conseil les pacquets qu'ils auoyēt  
entre-mains, & les commandemens que  
sa Majesté luy faisoit de retourner és Cos-  
tes de France. Lequel leur dit, qu'il luy  
estoit du tout impossible de ce faire, veu  
que son armee estoit dissipee, & ses viures  
pour la pluspart consommez, & conti-  
nuant sa route, alla mouïller l'ancre entre  
l'Isle DVvic & Portsmouth.

L'Armee Angloise ainsi retiree & les  
Rochelois nonobstant estans resolus de te-  
nir bon, ils firent choix du sieur de la  
Grossetiere, Gentilhomme de Poictou,  
pour aller en Angleterre aduertir le Roy  
de la grande Bretagne & leurs Deputés de  
leur estat & necessités, & haster le secours.  
Il partit le Dimanche 21. & fut porteur de  
cette lettre.



1628. SIRE,

May.

Lettre  
des Ro-  
chelois  
au Roy  
de la  
Grand  
Breta-  
gne.

Nous sommes asseurez, quel'image de  
nos malheurs aura preuenu nos plaintes,  
& que vostre Serenissime Maiesté, se l'es-  
tant portraite effroyable en la force de son  
esprit, celle-cy ne scauroit faillir à trouuer  
vne audience fauorable d'un cœur si gene-  
reux & si grand que le vostre. SIRE, Vous  
nous auez auoüez de vostre grace, & nous  
auez promis la deliurance; Mesme vous  
auez pris les armes pour faire entretenir la  
foy publique des traittez que l'on vous  
auoit depolez. Mais vos gens, SIRE,  
nous ont abandonnez contre vos Magna-  
nimes & tres fidelles instructions, & celle  
de leur General, n'ayant pas osé seulement  
halener de prés, ni enuifager le peril d'une si  
glorieuse executiõ, de vötre parole Sacree.  
Quelle sorte d'excez où de prodige peut  
auoir ainsi cõjuré cõtre la dignité de vötre  
nom, & l'estat de nostre patrie. SIRE,  
Nous vous parlons les larmes aux yeux, les  
mains jointes, & le cœur desia transpercé  
de plusieurs coups, pour demeurer en l'hõ-  
neur, & aux conditions de vostre prote-  
ction. Les choses estant en leur entier,  
Nous auons mesprisé le Conseil de nos  
amis, & s'il faut l'exprimer ainsi, les res-

pects de nostre naissance. A ce coup, que <sup>1628.</sup>  
tout est perdu, que nous trouuions au May,  
moins s'il vous plaist, S I R E, en vostre  
Iustice, ce que nous n'auons plus moyen  
de recouurer en la clemence du Roy nostre  
Souuerain. Dieu nous fournit encore as-  
sez de vie & de vigueur en ces blessures  
toutes fraisches, pour attendre vostre ren-  
fort plus d'un bon mois. Que vostre Ma-  
iesté seconde ce miracle, & vous nous  
verrez ressucitez à sa gloire immortelle,  
& à la restauration des Eglises de ce Roy-  
aume, qui ne peuent attendre que les re-  
uers du mesme couteau qu'on nous tient  
si près de la gorge. Voila, S I R E, nos tres-  
humbles & tres ardantes Supplications, où  
pour mieux dire en vn mot, C'est nostre  
testament, que nous laissons escrit sur vô-  
tre Thrône, deuant le Ciel & la terre, pour  
vn Memorial à la posterité de la plus es-  
trange & memorable desolation, qu'un  
peuple innocent ait iamais soufferte, &  
dont l'occasion incomparable puisse ia-  
mais sommer la puissance d'un grand Roy,  
comme vous, Pardonnez, S I R E, à des  
femmes, des petits enfans, des Meres &  
des Peres, trainez ensemble à mesme  
Supplices, s'ils ne peuuent parler aujourz

1628. d'huy qu'avec des mots trenchans. La face  
 Iuin. des mourants est tousiours affreuse : Mais  
 l'angoisse de la mort ne nous fera iamais  
 desdire d'estre pour tout cela de vostre Se-  
 renissime Majesté.

S I R E

De la Rochelle

ce 18. May

1628.

Tres-humbles & tres-  
 obeyssans seruiteurs,  
 Les Maires , Esche-  
 uins, Conseillers,  
 Pairs, Bourgeois & ha-  
 bitans de la Rochelle,  
 & pour tous  
 G V I T T O N.

**L**E premier Iuin, la nuit du Mercredy  
 venant au Ieudy, les Rochelois firent  
 sortir deux chaloupes, l'une pleine de feux  
 d'artifices, & l'autre en Brulot, pour fai-  
 re sauter quelques vaisseaux de la Palissa-  
 de, afin de faire passage aux Galiottes,  
 qu'ils vouloyent enuoyer en Angleterre.  
 Mais ayans mis le feu trop tost, l'une où  
 estoient les feux d'artifice se mit en pieces  
 auant que d'arriver à la Palissade, & l'aut-  
 re s'alla eschoüer vers Port-neuf. Ce  
 qui obligea lesdites Galiottes de retourner  
 dans la Ville,



Le mesme iour sur les six à sept heures du matin le sieur Tallement, vint dans la Rochelle, tant pour quelques affaires qu'il y auoit, que pour sonder les Rochelois s'ils voudroyent venir à quelque traité, Mais il n'aduança point & se retira au soir.

Le mesme iour le sieur de Grandzay Colonel d'une compagnie de chenuaux legers, vint à la Porte de Coigne demander à parler au Maire, ou à quelqu'un de sa part. Aussi tost le furent trouver, les Srs. Prou, Pierre Toupet, Defos, & Mocquay nommez par le Conseil, auxquels il offrit de la part de Monsieur de Bassompierre (comme ayant pouuoir du Roy) tout ce qu'il pourroit pour leur faire auoir une bõne paix. Ils luy respondirent, parlans pour tout le Corps, & suivant la charge qu'ils en auoyent, qu'ils desiroyēt demeurer dans l'obeyssance qu'ils deuoyent au Roy, Mais qu'ils ne pouuoient rien faire, sinon qu'au prealable ils en communiquassent avec les Deputez qu'ils auoyent en Angleterre, Monsieur le Duc de Rohan, & les Eglises. Ainsi qu'apres leurs humbles remerciemens à Monsieur de Bassompierre, ils le supplioient de leur moyenner de la part du Roy, les Passeports necessaires

1628. pour cela, & en mesme temps la permis-  
Iuin. sion de laisser entrer des viures competement en la Ville, afin que pendant cette Negotiation il ne fust point touché à ses Magasins. Apres cette responce il partit promettant de retourner le lendemain matin pour leur apporter la responce. Ce qu'aussi il fit, & leur declara que le Roy ne les vouloit recevoir à leurs propositions: Mais que sa volonté estoit qu'ils se soubmissent à vne obeyssance entiere: A quoy luy fut dit que la Ville n'y pouuoit entendre, & plustost attendroit tel euenement qu'il plairoit à Dieu luy donner, & ainsi se separerent.

Le Mercredy 7. à la maree de la nuit, sur les dix à onze heures du soir, les Rochelois, firent sortir vne galiotte pour la faire passer à trauers la Palissade: Ce qui luy fut impossible, à cause que ceux de ladite Palissade faisoient bonne garde avec leurs galiottes, qui poursuiuirent l'autre iusques dans le Havre, & lui tirerent quantité de coups de canons.

Le Samedy au matin 10. à l'ouuerture de la porte S. Nicolas, entra le sieur de la Lande du Lac venant d'Angleterre, apportant vne lettre du Roy de la Grande Bretagne, signee

signee Charles R. dattee du dix-neuf de 1628.  
May Vieil stile, Addressée aux Maire, Iuin,  
Escheuins, Pairs, Bourgeois & habitans  
de la Ville de la Rochelle, sans en auoir  
aucune des Deputez. Ce qui mit en quel-  
que doute lesdits Rochelois, ne pouuans  
croire que ledit Roy eust escrit sans lesdits  
Deputez, Veu qu'ils estoient auprés de sa  
personne. Par laquelle lettre, il les assu-  
roit d'un puissant secours dans vn peu de  
iours, & de sa bonne volonté en leur en-  
droit: les exhortant d'auoir bon courage,  
& qu'en bref ils se verroyent tout à fait de-  
liurez, en voicy la teneur.

**M**ESSIEVRS, Ne vous des- *Lettre*  
confortez pas, encore que ma flotte *du Roy*  
soit retournée, tenez bon iusqu'au dernier *de la*  
jour, Car ie suis resolu, que toute ma *Gran-*  
flotte perira, plustost que vous ne soyez se- *de Bre-*  
cours. A cét effet iel ay contremandee, & *tagne*  
ay enuoyé Nauires pour luy faire changer *aux*  
son dessein, qu'elle auoit pris, de reuenir; *Rochel-*  
le vous enuoye promptement quantité de *lois,*  
Vaisseaux pour la renforcer; avec l'aide de  
Dieu le succez sera heureux pour vostre  
deliurance.

Ce 19. May V. still, Vostre bon amy  
A Mrs. les Maire, Esch. &c. CHARLES. R.



1628.  
Juin.

Le 15. les Rochelois escriuirent cette lettre à leurs Deputez en Angleterre, tant pour leur faire entendre leurs necessitez, que faire haster le secours,

*Lettre  
des  
Rochelois à  
leurs  
Deputez en  
Angleterre.*

**M**essieurs, Voicy la septiesme depuis nos dernieres perple-  
xitez. Elle tend à vous presser, estans de  
nostre part estrangement pressez, & quasi  
oppressez: Iusques là, qu'il n'y a plus  
guere loin, iusqu'à nostre perte entiere.  
Si vous ne venez prôptement nous en rele-  
uer; Il ne nous reste plus de viures que pour  
vn mois à côter de ce iour mesme, quelque  
bon ordre qu'on y puisse mettre. Il y a dé-  
ja plusieurs familles en vne extrémité hor-  
rible, & qui ne vivent que d'herbages. Si  
est-ce pourtant que nous esperons moyen-  
nant Dieu de trainer nostre vie, iusques  
dans le mois de Iuillet bien auant, tirez  
de là les argumens, de la diligence que  
vous devez apporter à presser & importu-  
ner sans fin sa Serenissime Majesté. De la-  
quelle nonobstant nos extrêmes necessitez,  
& les Artifices qu'on a employez pour ce-  
la, il n'a esté aucunement possible de nous  
destacher. Ces iours passez on nous auoit  
fait de nouvelles semonces de traiter. Mais

ayans demandé passeport pour enuoyers 1628.  
S. M. & Monsieur de Rohan, au refus qui Iuin.  
nous en a esté faict, le traitté à esté rompu.  
Ne manquez de le luy représenter: Côme  
aussi la confiance que nous auons en la  
parole Royale, qui apres Dieu est nostre  
vnique soubstien. D'autant plus, nous pro-  
mettons nous son secours, que la facilité  
y est entiere. Que si Monsieur le Comte  
d'Embey eust donné, il emportoit infailli-  
blement la Palissade. Auioird'huy nostre  
crainte est, que si on tarde, on acheue la  
Digue de Maçonne. Si ledit Seigneur eust  
demeuré, il affamoit le Camp du Roy, &  
nous entretenoit d'une puissante esperan-  
ce, comme aussi les affaires de Monsieur de  
Rohan, en vne forte reputation. Vous  
sçaurez bien de là tirer vos conjectures.  
Pour fin, Messieurs, Nous vous mande-  
ront ces mots de consolation. Que Dieu  
par sa grace, nous a mieux remis que ia-  
mais en ce commun peril d'un chacun.  
Nous estans tous resolu d'attendre de  
vous bien tost vne vie asseuree, & de pren-  
dre la mort en patience, pour ne suruiure  
à la perte de nostre Religion, & de nô-  
tre pays, & au carnage de nos familles.  
Ce sont.

1628. MESSIEVRS,

Iuin.

*De la Rochelle*

ce 15. Iuin

1628.

Vos tres-Affecti-  
onnez Seruiteurs  
les Maire, Esch.  
Conseillers, Pairs,  
Bourgeois, &c. &  
pour tous  
GVITTON.

Durant cette sepmaine aucuns Soldats  
tuerent quelques cheuaux, qu'ils vendi-  
rent à des particuliers en guise de chair de  
Bœuf, de dix à douze sols la liure. Estans  
descouverts ils furent mis en prison, veu  
que iusques alors on n'estoit pas reduit à  
manger de telles viandes, y ayant encor des  
Bœufs & moutons & de la volaille, qui se  
vendoyent publiquement.

Le Mardy au matin 21. entra dans la  
Rochelle, venant d'Angleterre vn soldat,  
nommé la Paillette, aportant vne lettre  
du Roy de la Grande Bretagne, en datte  
du dix-sept de May Vieil stil, scellée des  
armes d'Angleterre, & soubscrite vostre  
bon Amy Charles R. & vn autre des De-  
putez escrit de Plemud, le neuf de Iuin:  
Lateneur d'icelle confirma celle du sieur  
de la Lande du Lac: comme aussi fit celle  
dont fut porteur vn autre Gentilhomme



nommé Sainct Martin , qui arriua la nuit 1628.  
de Vendredy venant au Samedy vingt & Iuin.  
quatre sur les onze à douze heures du soir.  
Elle estoit seellée du cachet du Roy , sur  
Cire Rouge, & soubscrite vostre bon Amy  
Charles R. & se trouua de cette teneur.

MESSIEVRS, I'ay esté fasché *Secöde*  
d'apprendre que ma flotte estoit sur le *Lettre*  
point de retourner , sans auoir fatisfait à *du Roy*  
mes commandemens: qui estoient de vous *de la*  
faire entrer des prouisions , à quelque prix *Gräde*  
que ce fust. A laquelle i'ay fait nouveau *Breta-*  
commandement de retourner dans vos *gne*  
Rades, & de n'en bouger , qu'elle ne vous *aux*  
ait fait entrer des viures , ou que ie ne l'aye *Roche-*  
fortifiée. A quoy ie vay faire trauailler en *lois.*  
toute diligence. Assurez-vous , que ie ne  
vous abandonneray iamais , & que i'em-  
ployeray toutes les forces de mō Royaume  
pour vostre deliurance , iusqu'à ce que  
Dieu m'ait fait la grace de vous faire don-  
ner vne paix assurée.

MESSIEVRS,

*Donné en nostre Palais  
de Vvestminster ce 27.  
May 1628. Vieil stil.*

Vostre bon Amy  
CHARLES.R.

Durant ce temps la Digue de Masson-  
ne se rendoit de iour à autre plus forte, &

1628.  
Iuin.

s'auançoit de telle sorte par les deux costez qu'il ne restoit plus qu'un petit Canal, par où passoit le courant de la Maree à fermer, & estoit ce Canal remply d'un bout à l'autre de Vaisseaux & Machines. D'ailleurs il y auoit deuant la Digue vne stacade ou Palissade de vaisseaux flottans, ancrez & attachez l'un à l'autre par des gros cables & chaines de fer, que la mer faisoit hausser & baisser, à mesure qu'elle venoit & se retiroit : & nombre de Machines & chandeliers afin que leur embarras en rendist l'accès plus difficile & perilleux pour ceux qui voudroyent entreprendre de l'aborder, ou forcer, & entrer dans la Rochelle.

En ce mesmetemps mourut en la Ville le Sieur de Loudriere, de maladie chaude : & fut honnorablement enterré, selon que son rang & qualité, de Seneschal le requeroient.

Sur la fin de ce mois & commencement de Iuillet, on se mit à tuer dans la Rochelle, les Cheuaux, Asnes, Mulets, chiens, chats & autres tels animaux, dont la chair se vendoit dix & douze sols la liure. Celle du cheual surtout estoit sauoureuse, de sorte que les plus riches en achetoyent, & n'y trouuoient que bien peu de différence à

celle de Bœuf. Cependant la famine se <sup>1628.</sup>renforçoit, & se trouua que tout à coup Juillet  
chacun reserrant ses prouisions, la plus  
grâde partie en auoyent grande disette, &  
le pain manquant, coururēt aux sucres, cas-  
sonnades, drogues, colle de Flandre fricaf-  
see avec vn peu de suif, & tels autres ali-  
mens. Peu auant & sur tout lors que  
l'Anglois vint se monstrier à Chef-de Baye  
au mois de May, le Maire & son Conseil  
auoyent fait ietter plus de deux cents Bari-  
ques de Sardines qui estoient quelques peu  
gastees, sur la crainte qu'elles missent la  
Contagion dans la Ville, se confians  
qu'on n'en auroit plus affaire, puis que le  
secours estoit à la Porte: Mais en ceste ex-  
tremité elles fussent venuës bien à point.  
A defaut d'autres viures, le peuple s'es-  
pandoit sur les Marais, pour faire la guer-  
re aux Anguilles, & autres petits poissons  
& chevrettes, & la Coste pour y pescher  
le Coquillage: & apres cela se jetta sur tou-  
tes sortes d'herbes, comme le pourpier  
sauuage, Christe-marine, Salicor, & les  
assemblant bonnes & mauuaises les fai-  
soient bouillir en deux & trois eaux, pour  
en oster l'amertume, & mauuais goust, &  
s'en remplissoient. A la fin on se rua sur les



1628. cuirs & peaux de toutes sortes qu'on faisoit  
Juillet tremper & bouillir, & les decoupās à petits morceaux, en guise de blanc de bœuf, qu'on vend aux triperies, les fricassoient avec vn peu de suif & d'eau dans la poëlle, autres en faisoient des gelees avec vn peu de Sucre. Bref dès ce temps la famine commença d'estre horrible.

Outre les autres maux dōt la Ville se sēt pressée, la mauuaise nourriture engendroit en plusieurs vn certain mal de bouche, qui faisoit pourrir les gēciues, cauſoit la courte haleine, faisoit deuenir les iābes noires, & peu à peu faisoit perir & mourir ceux qui en estoient atteints; estant tel à peu près qu'on represente le scorbut, qui n'est que trop cognu à ceux qui font de longues navigations sur la Mer, lors que leurs viures se corrompent. D'abord il y eut plusieurs qui en moururent, mais l'vn des Medecins de la Ville nommé Mathias Goyer, personnage sçauant, & d'experience en son art, s'aduisa d'vn remede, qu'il iugea analogue, à ceux dont on vſe contre cēt autre maladie, & qui se trouua singulier contre cette-cy. Cefut de la Mouſtarde en herbe, dont les Boſſes des Marais fournisſoyent telle quantité qu'on vouloit, laquel-

le il faisoit piler dedans vn mortier , & 1628.  
mesler avec du vin blanc , & exprimoit l'aillet  
la valeur d'un verre commun , le faisant  
prendre à ieun tous les matins. Combien  
que ce remede ne laschaft point le ventre,  
& ne fist point vriner , & ne causast nul  
autre tel effect qui parust , neantmoins il  
guerissoit infailliblement dans huit ou dix  
iours. D'abord quelques vns le voulurent  
porter à celer ce remede , luy faisans voir  
l'esperance d'un grand profit , selon que de  
vray il y eust eu de quoy s'enrichir. Mais il  
dit qu'il ne vouloit pas profiter de la cala-  
mité publique , & que puis que Dieu cōme  
par inspiration luy auoit descouuert ce se-  
cret , il en vouloit donner gratuitement la  
recepte à tous; Ce qu'aussi il fit , & en cela  
merita fort du public , & sauua la vie à vne  
infinité de personnes. Quant à la goutte,  
grauelle , & autres telles maladies , alors il  
ne s'en parloit point du tout.

Le 2. de Iuliet , fut veu du costé d'E-  
st & de la Leu, force Cauallerie & Infan-  
terie en bataille , ce qui mit en peine les  
Rochelois. Mais au soir ils sceurent que  
c'estoit l'armee qui auoit fait monstre.

Le 8. vint à la porte de Coigne vn  
tambour , qui apporta vne lettre au Maire



1628. de la part de Monsieur le Cardinal de Richelieu, qui tendoit a le conuier de rendre la Ville. Ceux qui estoient en garde firent vn temps difficulté de la receuoir. Mais en fin ayans enuoyé en aduertir le Maire, il vint accompagné de ceux de son Conseil, avec lesquels il leut la terre, puis dit tout haut au tambour, afin que tous ceux qui estoient là l'entendissent, qu'ils n'estoient pas au point de se rendre ny de traiter, & auoyent des prouisions au delà de ce qu'on leur faisoit entendre. D'ailleurs que dans huit ou quinze iours, ils esperoyent estre secourus des Anglois par Mer & par terre, ainsi qu'ils n'auoyent nulle autre responce à faire.

Le Lundy 10. Iean du Mont dit la Rose, natif de Bourdeaux, bien cognu en la Ville, où il auoit sejourné vn longtemps, Mais s'en estoit retiré il y auoit delia quelques annees, à cause de ses mauuais portemens, s'y estant ietté du Camp, fut conuaincu de conspiration, & outre qu'il auoit esté soupçonné dès son arriuee, vne lettre escrite de Montauban à Madame de Rohan, donna aduis qu'on se faisoit de sa personne. Ce qui ayant esté fait, on trouua sur luy des Tablettes qui le conuainqui-



rent. On ne manqua de le mettre à la que- 1618.  
stion ordinaire & extraordinaire, pour sça- Juillet  
voir s'il n'auoit point de complices, Mais  
il n'accusa personne, & sur le gibet, ex-  
horta fort les Rochelois de ne se fier à au-  
cunes des promesses & capitulations qui  
leur pourroyent estre proposees, leur di-  
sant qu'il sçauoit qu'elles ne leurs seroyent  
point tenuës, & que leur ruine auoit esté  
arrestee à quelque prix que ce fust. Ce qui  
ayda à faire mourir beaucoup de gens.

Le Vendredy 14. à la maree du soir, &  
sur les deux à trois heures apres midy, la  
Digue, du costé de Portneuf fut heurtee  
d'un fort grand & impetueux vent de Su-  
roest, de sorte qu'elle fut presque toute de-  
rasee, les Nauires maçonnez remuez de  
leur lieu, les Machines & ponts rompus &  
brisez, & y eut partie de ce desbris, qui se  
vint rendre dans la chaisne, avec vne Bar-  
que de vingt cinq à trente tonneaux. Ce  
qui resioiuit grandement les Rechelois, &  
lestint en bonne esperance, que de là en  
auant de pareilles tormantes & mauuais  
temps, en deferoyent plus en vne maree,  
qu'on n'en pourroit refaire en plusieurs  
moys.

Le mesme iour vn artisan nommé Pierre

1628. du Bourg, Refuge depuis quelques années  
 Juillet dans la Rochelle fut pendu à la place du  
 Chasteau à cause des intelligences qu'il  
 auoit avec les Assiegeans, & fut descou-  
 uert par vn sien fils aagé d'onze à douze  
 ans, de l'innocence duquel il se seruoit le  
 chargeant de ses lettres qu'il mertoit en  
 certain lieu, où ceux de dehors les venoyēt  
 querir. A la question il accusa diuers ha-  
 bitans, Mais dit sur le gibet que les tour-  
 mens de la gehenne luy auoyent fait dire  
 plus qu'il ne sçauoit, & qu'ils estoyent in-  
 nocens de ce qu'il leur auoit mis sus. Ce  
 qui fut leur gain de cause, Veu qu'autre-  
 ment ils couroyent mesme risque que luy,  
 leur procès estant desia bien aduancé.

Le 24. les Deputez qui estoyent en An-  
 gleterre voyans que les preparatifs qui se  
 faisoient pour le secours de la Rochelle al-  
 loient lentement, firent au Roy, seant en  
 son Conseil, vne harangue libre & pres-  
 tante prononcee par le Sieur Vincent de  
 cette teneur.

Harā.  
 que du  
 fleur  
 Vincēt  
 au Roy  
 de la

SIRE

La douleur qui nous oblige à remplir  
 de nos cris les oreilles de V.M. & à les  
 reïterer si souuent, doibt bien estre du tout  
 extrême. Nous voicy encore à vos pieds



pour les mouïller de nos larmes : Et Dieu 1628.  
vueille que bien tost nous n'y venions point Iuillet  
jetter les derniers souspirs, aux nouvelles Gran-  
de la desolation de nostre pauvre Ville. de Bre-  
Nous ne sçaurions vous le celer, SIRE, tagne  
la cognoissance que nous auons qu'elle est Ex-  
aux derniers abois nous met dans le desef- trait  
poir, voyans differer de iour à autre le se- du  
cours que V. M. nous auoit fait esperer de- Iour-  
voir estre prest il y a plusieurs semaines. nal du  
SIRE, la Ville de la Rochelle vous ayant Sieur  
supplié tres-humblement par nos bouches Vincē  
qu'il vous pleust la receuoir en vostre pro-  
tection, vous la luy auez solemnellement  
accordé. Depuis elle a eu à diuerses fois,  
toutes les assurances possibles, tant de la  
bouche que de la main propre de V. M.  
qu'elle n'en feroit point abandonnee. En  
suite, par vn miracle de constance, elle a  
tenu bon iusques icy, c. d. vn an entier,  
combattant les horreurs les plus espou-  
uentables de la famine, pour donner tout  
loisir à V. M. de luy enuoyer le secours  
qu'il luy a pleu luy promettre. Voire lors  
que toute l'Europe a creu qu'elle en deuoit  
desesperer, puis que l'ayant eu à sa veüe  
plusieurs iours, il s'en estoit retourné, sans  
auoir rien efectué, non pas mesme tenté,



1628. Cela ne l'a point esbranlee : & combien  
Juillet qu'on en ait pris l'occasion pour luy ouvrir  
diuerſes propositions d'accommodement,  
auſquelles ſon extrême neceſſité ſembloit  
luy deuoir conſeiller d'entendre, elle a  
mieux aymé riſquer ſa dernière perte, que  
de manquer aux promeſſes que nous auions  
iurées pour elle à V. M. ou de teſmoigner  
qu'elle euſt quelque deſiance de la certitu-  
de des voſtres. Apres tout cela, SIRE,  
fera il leu en l'Histoire de voſtre regne,  
qu'elle ſoit perie entre vos mains, & n'ait  
tiré autre fruit de la bonne volonté que  
Voſtre M. a teſmoigné auoir pour elle, &  
de l'assurance qu'elle y a miſe, ſinon de  
ſ'eſtre rendu irreconciliable ſon Roy, par  
deuers lequel, autrement, elle euſt eſperé  
de trouuer grace? Pardonnez, SIRE, à  
des gens qui ſe voyent ſur le Sueil du tom-  
beau, ſ'il leur eſchape des gemiſſements.  
C'eſt l'ordinaire de ceux qui ſont proches  
de leur fin d'acheuer leur vie par des ſouſ-  
pirs. Or c'eſt là que nous en ſommes, ſi  
apres les remiſes precedentes, il ſuit le  
moindre delay. AV NOM de Dieu SIRE,  
tandis qu'il nous reſte encore quelque ha-  
leine, & auant que tout à fait nous ſoyons  
expirez, Commandez que voſtre ſecours

Je haste de courir à nostre ayde. Pourueu  
qu'il y vse de diligence, nous demeurons  
pour cautions à V. M. & sur le peril de nos  
testes, qu'il arriuera assez à temps pour  
nous sauuer. Quant aux impossibilitez que  
quelques vns y veulent faire trouuer, per-  
mettez que nous vous le disions librement,  
SIRE, elles ne sont sinon en leur crainte,  
ou en leur peu d'affection. Outre le raport  
que des gens non suspects en ont fait à  
V. M. elle iugera, si nostre Ville, qui a la  
Digue & la Palissade à la portee de sa veüe,  
& de son canon, enuoyeroit coup sur coup  
vous demander vne assistance qu'elle re-  
cognoistroit luy denoir estre inutile, & si  
ayant tous les iours en main les occasions  
de capituler à des conditions aduantageu-  
ses, si elle le vouloit faire pour elle seule,  
elle seroit si imprudente de les negliger.  
De fait nous sommes prests s'il plaist à V.  
M. le permettre, de prendre sur nous les  
premieres risques de l'execution, afin qu'il  
demeure iustificié à tout le monde de la sin-  
cerité avec laquelle nous y procedons, &  
qu'on ne nous impute pas de prodiguer mal  
à propos, le sang des sujets de V. M. là où  
nous espargnerions le nostre. Non, SIRE,  
il n'y a point d'impossibilité que celle

1628.

Juillet



1628. qu'on s'y veut feindre. L'unique faict de  
Juillet nos apprehensions vient de la lenteur, &  
des continuelles remises, qui font reculer  
nos esperances d'un iour à l'autre, & d'une  
semaine à la suivante. Apres le retour  
de vostre flotte nous nous consolions sur la  
promesse qu'on faisoit à V. M. qu'elle par-  
tiroit dans quinze iours: il en estoit cou-  
lé plus de vingt, qu'on y en adiousta qua-  
torze; apres cela diuerses autres remises,  
de sorte que voicy le deuxiesme mois tout  
complet. Bon Dieu, Sire, quel long-temps  
à des gens qui n'ont point de pain. Nous  
sçauons les bonnes inclinations que V. M.  
a pour nostre bien. Aussi auons nous des  
preuues tres certaines de la passion avec  
laquelle Monsieur le Duc de Buckingham  
vostre grand Admiral s'y employe, & par-  
reillement Messieurs de vostre Conseil,  
mais ne serons nous point excusables, si  
voyans que les effects en sont trauersés par  
tous ces delais, nous entrons en appre-  
hension que V. M. ne soit pas bien seruie,  
& qu'il y ait quelque main cachee, qui ar-  
reste clandestinement ce que le zele des  
autres tasche d'auancer? C'est l'ordinaire  
de la misere d'estre soupçonneuse, & peut-  
estre que nous le sommes icy à tort: De  
fait



fait il n'y a aucun sur qui nous entendions <sup>1628.</sup>  
dererminer nostre desiance, & n'auons <sup>Iuillet</sup>  
point d'intention de rien remuer de tout  
le passé. A iamais, S I R E, puisse-t'il  
demeurer enseuely en vne derniere oubli-  
ance, Et qu'à l'aduenir au moins, ceux  
ausquels V. M. adressera ses Commande-  
mens; correspondent si bien à sa bonne  
volonté, par leur affection & diligence,  
que sans plus de longueur vostre flotte se  
puisse mettre à la voile, & nous aille tirer  
des bras de la mort. Que si en ceste  
occasion, S I R E, vous voulez bien dis-  
cerner ceux qui vous y seruiron fidele-  
ment d'auec les autres ( si aucuns y en  
auoit ) que V. M. tienne s'il luy plaist  
pour indubitable, que tous ceux qui soubs  
quelque pretexte que se puisse estre, con-  
seilleroyent la moindre remise; ont vne  
tres-mauuaise intention, n'y ayant celuy  
qui ne sçache les horribles necessitez où est  
nostre ville, & qu'un seul iour de dilaye-  
ment peut estre cause de sa ruyne. Ayez y  
donc esgard, S I R E, Nous vous en con-  
jurons, par les larmes & cris pitoyables de  
plus de douze mille pauures languissans,  
que la faim deuore, & qui sont tous prests  
de perir: Par l'interest de plus d'un mil-

1628. lion d'autres, qui sans doute se verront es-  
Inillet crazez dessoubs nos ruynes, & se trouue-  
ront le cousteau à la gorge dès le lende-  
main de nostre perte: Par la gloire de vô-  
tre sceptre, à l'abry duquel nous nous som-  
mes venus mettre, & lequel il vous a pleu  
nous tendre pour nous assurer: Par ce til-  
tre magnifique de Defenseur de la foy, qui  
oblige V. M. de subuenir à ceux qu'on op-  
prime en haine d'icelle: En fin par la foy  
& parole Royale laquelle il vous a pleu de  
vostre grace nous engager. Ne permettez  
pas, S I R E, que nostre sang innocent  
rejaillisse sur vostre Couronne, pour la  
ternir aux sieclesqui viendront apres nous,  
& dès à present crier contre V. M. deuant  
Dieu & deuant les hommes. C'est là,  
S I R E, ce que nos consciences, & les  
devoirs dont nous sommes tenus à nos affli-  
gez concitoyens, nous ont obligé de venir  
représenter de nouueau à V. M. & auons  
telle confiance de sa charité, magnanimi-  
mité, pieté, & inuiolable fidelité, que  
nous nous assurons qu'elle le prendra de  
bonne part, & en fera la consideration  
conuenable. Et puis que toutes nos suppli-  
cations aboutissent, à ce qu'il luy plaise  
faire acheminer avec toute diligence le



partement de sa flotte, & que pour cela sa  
presence à Portsmouth est si absolument ne-<sup>1628:</sup>  
cessaire, qu'à peine, autrement, sçauroit  
on esperer aucun succès; Nous l'osons  
supplier en toute humilité de vouloir met-  
tre bien tost en execution la resolution  
qu'elle a prise de s'y rendre. Et icy, SIRE,  
nous ployerons le genouil devant V. M.  
avec de tres ardantes prieres à Dieu, à ce  
qu'il luy plaise nous faire trouuer de plus  
en plus grace deuant vous, tellement que  
nous mesmes, qui maintenant vous sup-  
plions, vous venions rendre nos tres-hum-  
bles recognoissances, comme à nostre  
grand liberateur, duquel, apres Dieu, nous  
tiendrons le bien, l'honneur, & la vie, &  
en recommanderons la memoire à nos en-  
fans, afin qu'ils la celebrent apres nous.

Le Ieudy 27. Madame de Rohan fit  
tuer deux de ses cheuaux de Carosse, tant  
pour elle mesme, que pour ceux de sa mai-  
son. Outre sa necessité dont elle sentoit sa  
part, c'estoit vn exemple aux autres de  
souffrir toute extrémité plustost que de se  
rendre.

En ce temps, la necessité qui estoit horri-  
ble obligeant diuers à chercher le moyen de  
passer les lignes, & d'autres à s'espandre és



1628. vignes pour tascher d'y recouurer quelques  
 Juillet grappes de verjus, & d'autres ausi à s'al-  
 & ler rendre volontairement : Il fut publié  
 Aoust au Camp sur peine de la vie, qu'on n'eust  
 plus à laisser approcher les lignes, ny à  
 prendre à prisonniers aucuns Rochelois  
 sortans de la Ville, mais qu'on les ren-  
 uoyast & repoussast à coups de mousquet  
 iusques dans leurs Portes & contrescarpes.  
 De là vint que plusieurs furent tuez, ay-  
 mans autant finir leur vie miserable & lan-  
 guissante, d'un coup de mousquet, que de  
 retourner chez eux y mourir de faim:  
 D'ailleurs plusieurs femmes & filles du  
 menu peuple s'aduançans és vignes y es-  
 toient violees & battuës de coups de four-  
 chettes, & hampes d'hallebardes, puis des-  
 pouillées, & toutes nuës & sans chemises,  
 comme quand elles estoient sorties du ven-  
 tre de leurs Meres, estoient renuoyees  
 vers la Ville: & en ay veu quelques vnes  
 retourner de la sorte, au deuant desquelles  
 d'autres femmes alloyêt, & leurs portoyent  
 des garderobes, pour les couvrir.

Le troisieme Aoust le sieur de Fe-  
 quiere (prisonnier depuis sept à huit mois  
 dans la Rochelle, en la tour de Moureille,  
 comme a esté dit au mois de Ianuier) fit

dire par ses Gardes , qu'il desiroit parler au <sup>1628.</sup> Maire ou à quelqu'un de sa part , afin de <sup>Aoust</sup> voir s'il n'y auoit point moyen de venir à quelque accommodement , ou traité de paix. Aussi-tost luy furent enuoyez , les Sieurs Viette & Defos, qui l'ayans ouy en ses propositions en vinrent faire le rapport au Maire & à son Conseil. Mais il se trouua en beaucoup de choses de la difficulté, & sur tout comment ils deputeroyent vers le Roy. Ce qu'ils iugerent de trop grande consequence, veu la crainte qu'ils auoyent que le bruit d'un traité s'estant espandu cela ne ralentist le secours. De plus ce que la Rose auoit dit à sa mort estoit fort imprimé dedans les esprits. Ainsi la chose ne passa outre.

Le 8. sur la remonstrance faite le iour precedent au Maire & Conseil de guerre, par le sieur Paul Mervault , pour lors Maître de l'artillerie, qu'il ne se trouuoit comme plus és Magasins de Boulets qui fussent propres pour les couleurines & pieces Bastardes , & que de s'attendre dauantage aux entrepreneurs d'en fondre (comme on auoit fait depuis trois mois ) c'estoit du temps & de l'argent perdu , veu qu'ils ne scauoyent le secret de la fonte. Il

1628. fut publié par tous les Cantons de la Ville;  
Aoust que tous ceux qui auroyēt des Boulets propres pour lescdites pieces eussent à les porter chez ledit Maistre de l'artillerie qui leur en payeroit sept liures dix sols du quintal. Ce qui fit que lescdites pieces en furent quelque peu fournies, d'autant que ceux qui en auoyent les luy portèrent.

Le mesme iour diuers Matelots de la Rochelle, se retirerent au Camp, ayans esté desbauchez par d'autres, qui auoyent esté enuoyez en la Ville pour les soustraire. Cela obligea le Maire de faire faire vn proclamat par tous les Cantons, que tous les Matelots qui seroyent pris allant au Camp, seroyent pendus & estranglez sur le champ. Apres cela on n'ouït plus parler qu'aucuns s'allast rendre.

Le 9. le sieur de Ferriere Conseiller qui commandoit ce iour là comme Capitaine à la Porte de Ciogne, s'y estant rendu de fort bon matin & le sieur Desmartes aussi Conseiller, ainsi qu'ils feignoyent se promener, allerent se rendre au fort de Beaulieu. Ceux qui estoient en garde à la dite Porte, ne s'en apperceurent qu'ils ne fussent desia bien loin, & fort proches du fort : & ne pûrent faire autre chose que



leur tirer quelques mousquetades qui ne 1628.  
les atteignirent point. Le suiet de leur re- juillet  
traitte fut tel. Le sieur de la Touruert, fils  
du sieur de Fleurac, Gentil-homme d'An-  
goumois, fut tué à l'occasion de quelque  
querelle particuliere, en la Place du Cha-  
steau, ainsi qu'il s'y promenoit. Le Lieu-  
tenant Criminel ( quoy que soit l'Asses-  
seur Criminel, qui le representoit ) sur la  
plainte qui luy en fut faite, informa &  
decréta prise de corps contre les auteurs.  
Mais le Maire & Conseil de guerre, en  
estans aduertis, voulurent en tirer à eux la  
cognoissance, sur ce que le mort & les  
accusez, estoient gens, que le suiet de la  
guerre & du Siege auoit attirez dans la Vi-  
le. Là dessus ils se contesterent & prin-  
rent à partie les vns les autres. Mais le  
Maire preualant, l'Assesseur Criminel  
avec trois ou quatre autres du Corps Pre-  
sidial, donnerent vne sentence secrette  
contre luy, & le Conseil de guerre, & les  
condamnerent à douze mille liures d'a-  
mende, payable par chacun d'eux solidai-  
rement, son recours reserué contre les au-  
tres. De cette sentence furent faits qua-  
tre corps ou minutes, pour demeurer par-  
deuers chacun d'eux, & les serrer & ca-

1618. cher és lieux plus secrets dont ils se pour-  
Août roient aduiser , en reseruant l'exécution  
iusques à la liberation ou changement  
d'estat de la Ville. Aduint quelque temps  
apres que l'Assesseur sur quelques soup-  
çons , qui ne peurent-pourtant estre aue-  
rez , fut prisonnier , & ses papiers sai-  
sis , parmi lesquels fut trouuee cette Sen-  
tence. C'est ce qui meut ces deux Con-  
seillers à se retirer de la Ville. Mais peu  
s'en fallut qu'ils ne tombassent de fievre en  
chaud mal , veu qu'estant presentez au  
Conseil du Roy, il bastoit mal pour eux,  
Sur ce qu'estans Officiers ils estoient de-  
meurez en la Ville , dont on leur disoit  
qu'ils n'estoyent sortis que par necessité, &  
non par affection au seruice du Roy. Ainsi  
ils couroyent grande risque, n'eust esté le  
secours que leur presta Monsieur de Thoi-  
ras, qui cognoissoit & aimoit ledit sieur  
Desmartes, & obtint de Monsieur le Car-  
dinal de Richelieu qu'ils fussent remis à  
Monsieur le Marechal de Schomberg, qui  
quelque temps apres les laissa aller soubz  
leur foy. Pour le regard du quatriesme  
Iuge, qui estoit Iean Ogier sieur de la Mo-  
riniere, il ne quitta point la Ville pour ce  
subiet, se sentant appuyé de nombre d'a-  
mis,



d'amis, mesme des gens de guerre, aus-  
quels il auoit commandé en qualité de  
Maistre de Camp d'un regiment: de sorte  
que sans grande difficulté il moyenna son  
accord. Quant à l'Assesseur Criminel, il  
demeura en prison iusques à la reduction  
de la Ville.

Le 10. le sieur de la Fitte Sergent Ma-  
jor au Regiment de la Meilleraye, accom-  
pagné du sieur de Delon Lieutenant d'une  
compagnie au mesme Regiment, enuoye-  
rent sur les huit à neuf heures du matin un  
tambour, lequel demanda de la part de  
deux gentils-hommes, & sans les nommer,  
s'ils ne pourroyent point auoir demie heu-  
re d'entretien avec le sieur de la Goute Ad-  
uocat du Roy Honoraire, & avec le sieur  
Pierre Touppet. La garde de Maubec qui  
auoit receu ledit tambour le fit conduire  
chez le Maire, où le Conseil estoit assen-  
blé, & ayant ledit tambour dit la cause de  
son enuoy, on manda lesdits sieurs de la  
Goute & Touppet pour s'enquerir d'eux  
qui estoient ceux qui les demandoient &  
s'ils ne sçauoyent point ce qu'ils leur vou-  
loyent. L'un & l'autre s'estans trouuez sur-  
pris de cette demande, on leur dit qu'ils  
pouoyent aller voir qui c'estoit, & parler

Ce  
narré  
a esté  
tiré de  
la Re-  
lation  
du Sr.  
Veron-  
neau.



1628. à eux , & afin que ledit Conseil peut estre  
Aoust informé de tout ce qui seroit dit & fait pen-  
dant cét entretien , on choisit d'entre ceux  
dudit Conseil Benjamain Veronneau Ad-  
uocat, pour assister à ladite conference, la-  
quelle ayant commencé par diuerses aco-  
ladesque fit particulièrement ledit sieur de  
la Fitte ausdits de la Goute & Touppet,  
avec lesquels il auoit des habitudes de lon-  
gue main, ledit sieur de la Fitte commen-  
ça de parler en cette sorte, Messieurs, le  
Roy estant tres-bien informé de vostre fi-  
delité enuers luy , & que vous avez les  
fleurs de lys si auant empreintes au cœur.  
que vous avez reietté toutes les proposi-  
tions qu'on vous a voulu faire de secoüer  
le ioug de sa domination pour seruir à vn  
autre Prince, c'est le seul subiet de nostre  
enuoy. Monsieur le Cardinal, qui sçait que  
i'ay quelques habitudes en vostre Ville, m'a  
commandé de tascher de conferer avec  
quelques vns de vous sur le suiet de vostre  
misere, afin de vous destourner de vostre  
ruyne, laquelle vous semblez affecter en ne  
recerchant pas pardeuers vostre Prince  
(qui est tout bon) la grace qu'il ne vous re-  
fusera iamais, si vous vous portez à  
la luy demander. Il sçait que la faim vous

presse grandement, que desia vos maisons sont pleines de corps morts, faute de pain, que les voix de diuerses personnes mourantes de la mesme incommodité retentissent au milieu de vos Ruës, Et que ceux qui ont esté les plus preuoyans n'en font que iusques au premier Septembre, il vaut mieux sauuer ce residu que de le perdre, d'autant plustost que ceux qui restent sont les plus considerables. La disette a commencé par le menu peuple plus susceptible de rebellion, Il ayme mieux vos cœurs que vos murailles, assuré qu'il est que si vne fois vous vous estes rengez à son service vous ne vous en departirez plus. Vous auez creu que le Roy en vouloit à vostre Religion, & que Monsieur le Cardinal le portoit à la bannir du Royaume, vous vous estes mescontez, le Roy seroit tres-aise que vous eussiez vne mesme creance avec luy, & fera ce qu'il pourra afin de vous y attirer par douceur, Mais asseurez vous qu'il n'vsera iamais de violence: l'experience du passé fait assez cognoistre à la France que la Religion ne se plante point avec le fer, & que c'est Dieu seul qui flechist les cœurs & illumine les entendemens de la cognoissance. Songez donc à vous



1628. *Augst* tandis qu'il est temps, & ne perissez point en attendant qu'on vous apporte du pain d'Angleterre. Ces gens ne pensent plus en vous, & quand ils auroient dessein de vous secourir ils ne le pourroyent plus faire: le Roy a vne puissante armee de mer pour destruire tout ce qu'ils pourroyent amener de forces, & la Digue est desormais en tel estat que les Anglois ne s'oseroient hazarder de la franchir avec leurs Vaisseaux. Ayez pitié de vous mesmes, Messieurs, ie vous en prie en mon particulier. Ce discours ayant esté receu avec applaudissement par lesdits sieurs de la Goute Toupet & Veronneau, apres vn petit discours plein de remerciemēs, ils firent cognoistre le desir qu'ils auoyēt tous de rētrer en grace enuers leur Prince, & qu'il se stoyēt là pour oüir les propositions & ouuertures qu'on leur vouldroit faire pour les rapporter au Conseil, de la bonne intention duquel ils pourroyent asseurer sa Majesté, Mondit Seigneur le Cardinal, & Messieurs du Conseil, & prièrent tres-instamment lesdits sieurs de la Fitte & de Delon de s'ouurir en quelques propositions; Ce qu'ils dirent ne pouuoir faire, pource qu'ils n'en auoyent aucun ordre, mais que si les ha-



bitans de ladite Ville vouloyent entrer en 1628.  
quelque traité il falloit que ce fust avec Mr. Aoult  
le Cardinal, qui se trouueroit au Fort de la  
Fons lors qu'on voudroit; & mesmes  
qu'ils s'asseuroyent que si on vouloit exiger  
de luy qu'il vinst pour ledit traité dans le  
Rasteau de la porte de Coigne, il ne s'en  
esloigneroit pas, moyennant que pour seu-  
reté de sa personne on donnast vn nombre  
competant des plus qualifiez de ladite  
Ville, qui demeurassent en ostage pendant  
ledit traité. En suite pourtant lesdits  
sieurs de la Fitte & de Delon, s'aduan-  
cèrent à faire diuerses propositions, mais  
sans charge, ce dirent-ils. La premiere fut  
que puisqu'ainsi estoit que les Rochelois ne  
vouloyent pour quelque occasion que ce  
fust penser à secoüer le ioug de la domina-  
tion Françoisé, selon qu'ils l'auoyent tes-  
moigné à ceux qui les y auoyent voulu por-  
ter, ils deuoyent cherir l'honneur de leur  
Prince, & traittans avec luy donner des  
marques de leur soubmission enuers sa  
Maiesté; Qu'un suiet ne deuoit en aucun  
temps penser traiter de pair à pair avec  
sō Roy, encores moins, lors qu'il se voyoit  
aux abois; Qu'il leur venoit en la pensee  
vne ouuerture qui deuoit contenter les vns

1628. & les autres, qui estoit que pour tesmoi-  
Aoust gner par lesdits Rochelois leur humilité, &  
rehausser la gloire de leur Prince, ils iette-  
royent eux mesme par terre la pointe du  
bastion de la Porte de Coigne, que cela  
fait le Roy se retireroit sans que pas vn de  
son armee entraist en ladite Ville, ny par  
ladite ouverture, ny par ailleurs. Aquoy  
il fut dit par lesdits sieurs de la Goute  
Touppet & Veronneau, que si tous les ha-  
bitans de ladite Ville pouuoient auoir au-  
tant de confiance qu'eux en la bonté du  
Roy, & parole de ses principaux Ministres,  
cette proposition pourroit estre receuë,  
mais que ceste Ville estant cōposée de per-  
sonnes à qui tout fait peur, il n'y auoit pas  
d'apparence de les persuader qu'ils seroyent  
en seureté des troupes qui les tenoyent  
assiegez, apres qu'il y auroit vne bresche  
raisonnable en leurs murailles, puis qu'ils  
se desfioient d'eux mesme : Qu'il ne falloit  
pas croire qu'ils fussent si simples d'aller  
mettre en auant vne telle proposition,  
moins encore de la vouloir faire valoir, &  
en alleguer les raisons. Lesdits sieurs pas-  
serent apres cela à vne seconde ouverture,  
qui estoit que le Roy entreroit avec deux  
cents personnes par la porte de Coigne de

ladite Ville, & sans entrer au dedans des <sup>1628.</sup>  
Ruës d'icelle, s'en iroit sortir en suivant Aoust  
le long des remparts par la porte de Saint  
Nicollas. Cette seconde comme plus dou-  
ce fut mieux escoutée, & toutesfois non  
receuë par lesdits sieurs de la Goutte Tou-  
pet & Veronneau, lesquels faisans fort sur  
la cognoissance qu'ils auoyent desdits ha-  
bitans, dirent que demander que la seule  
personne du Roy y entraist estoit autant  
que de demander l'entree de toute son ar-  
mee, d'autant qu'il n'y auoit aucun en tou-  
te ladite Ville, qui voyant sa Majesté de-  
dans ladite Ville, ne pensast plustost à  
s'humilier deuant luy, & à luy demander  
grace, que à donner l'ordre qu'il n'y en-  
traist que deux cents prisonnes, que il se  
pourroit faire que en cette occasion tel  
Seigneur se trouueroit aupres du Roy, le-  
quel contre ses bonnes intentions, outre-  
passeroit la parole qui auroit esté donnée,  
& posé qu'aucun ne le voulust faire, il s'a-  
gissoit auât que de mettre cela à execution  
de le persuader au peuple, qui ne trouue  
de seureté qu'en la desiance. Cette excep-  
tion ayant aussi esté ingee auoir sa raison,  
on passa à vne troisieme ouuerture, qui  
estoit qu'en tout cas pour faire voir tant à



1628. ceux du Royaume, qu'aux Estrangers,  
Aoust que le Roy auoit eu l'aduantage, sur ses su-  
jets de la Rochelle ils firent raser l'vne  
des trois tours, qui sont sur le havre de la-  
dite Ville, iusques à la hauteur seulement  
des murailles. Cette proposition fut trou-  
uée si douce que lesdits sieurs de la Goute  
Toupet & Veronneau dirent que si la Ma-  
iesté se vouloit contenter, du razement  
des trois tours, & qu'il dépendist deux seuls  
ils s'y soumettroient sans plus atten-  
dre. Apres cét entretien, qui fut de trois  
heures du moins, les vns & les autres se  
retirerent en disposition de rapporter cha-  
cun de leur costé ce qui s'estoit passé en  
cette entreueüe, & de tascher de porter les  
affaires à vn accommodement, & d'enga-  
ger en quelque traité. Et de fait lesdits  
sieurs de la Goute Toupet & Veronneau  
ayans rapporté au Conseil qui s'estoit tenu  
sur pieds en les attendant, qu'ils en auoyēt  
pour vne seance entiere, on prit heure  
pour l'apresdinee, où apres auoir entendu  
desd. Srs. de la Goute Toupet & Veronneau  
ce qui leur auoit esté dit & leurs responce,  
on pensa à engager vn traité: Mais la diffi-  
culté se trouua si grande sur la maniere,  
que finalement la pluralité des voix fut  
qu'on

qu'on differeroit encores quelques iours, 1629.  
pendant lesquels chacun penseroit à par Aoust  
foy aux moyen plus conuenables.

Le mesme iour suiuant l'ordre du Conseil de guerre, le sieur Paul Meruault fit mettre sur les Portes & pietes destachees de la Porte de Coigne, & aux dessus des Cassemates desdites Portes, & sur la Porte & herse de Maubec, & sur les Portes & ponts de Saint Nicolas, & des deux Moulins deux cents trente gros Boulers de Batterie, pour en cas d'escalade, ietter sur ceux qui vouldroyent monter.

Le Mardy 16. sur les deux à trois heures apres midy, vint à la portee du mousquet de la porte de Coigne, vn Herault avec deux trompettes sommer les Rochelois de la part du Roy, de se rendre; auquel ne fut point fait de responce.

La nuit du 21. venant au 22. les Rochelois firent sortir par terre vn homme, pour aller en Angleterre, porter à leurs Deputez cette lettre.

MESSIEVRS, Nous vous  
M prions de ne perdre point de temps, la faim nous presse; Vous sçauiez le long temps qu'il y a que nous n'auons receu aucuns viures, la Digue est la plus facile au

*Let-  
tre des  
Rochelois à  
leurs  
Deputez en  
Angleterre*

1628. milieu, n'y ayant que des Vaisseaux flot-  
 Aoust tans, & quelques machines : L'armée en-  
 nemie n'est composée que de treize grands  
 Vaisseaux, les autres sont petits comme  
 vous pourrez voir; Ils ont aussi vne Galere,  
 & quelques trente chaloupes mal équi-  
 pees, n'y ayant pas en tout six cens mate-  
 lots. Pour faciliter le passage, les Nauires  
 à feu sont bons, & d'autres en forme de  
 mine sont meilleurs, des gens avec des  
 haches pour couper sont necessaires. Nous  
 estimons que vos courages vous porteront  
 à executer la volonté du Roy de la Grande  
 Bretagne. Apres Dieu tout despend de  
 vous : Assurez vous que de nostre costé  
 nous y ferons nostre deuoir. Ce sont  
 MESSIEVRS,

*A la Rochelle*

*ce 20. Aoust*

*1628.*

*Et au dessus de la lettre*

*A Messieurs*

*Messieurs David, Vincent, Bragueau, De-  
 hinffe & Gobert.*

Vos tres-Affectionnez

Serviteurs les Maire,

Escheuins, Conseillers,

& Pairs de la Ville de

la Rochelle, & pour

tous GVITTON.

Le 22. les Rochelois eurent aduis que  
 le sieur de la Grossetiere ( qui auoit esté  
 pris retournant d'Angleterre, où ils l'a,



uoient enuoyé pour hastier leurs secours) auoit esté amené au Camp du Roy pour luy faire son procez. Là dessus, outre que dès la premiere nouuelle de sa prison ils auoiēt escrit au Camp à ce qu'on le traittast en prisonnier de guerre, le faisant iouir du quartier, qui s'estoit iusques alors faiët des vns aux autres, & déclaré qu'ils feroient semblable traitement au sieur de Fequiere leur prisonnier, qu'il seroit faiët à l'autre, De plus ils escriuirent à Monsieur le Cardinal de Richelieu par vn tambour, qui l'alla trouuer aux Chasteliers Barlot, où il estoit allé changer d'air, a cause des maladies contagieuses qui estoient en l'armee: & luy rendit cette lettre.

**M**ONSEIGNEVR,                      Ily a desia  
quelque temps que nous auonspris  
que le sieur de laGrossetiere, gentilhomme  
d'entre ceux qui sont sortis d'icy par em-  
ploy de cette Ville, & sous nos Commis-  
sions, a esté pris & arresté, passant par l'vne  
des Prouinces de ce Royaume, & a esté  
amené dans l'armee du Roy. Aussi tost  
nous en escriuismes à l'vn de Messieurs  
les Generaux, & nous reposions sur le  
droict Commun de la guerre, & du quar-

*Autre  
Lettre  
des  
Roche-  
lois à  
Mr. le  
Cardi-  
nal de  
Riche-  
lieu en  
faueur  
de la  
Grosse  
tiere,*

1628.  
Aoust

tier qui s'est tousiours fait iusques icy des vns aux autres. Mais nous aprenons de ce matin seulement qu'on pretend luy faire son procez, & le liurer és mains de la Iustice, pour le condamner à la mort, comme s'il estoit preuenue de quelque crime, ou homme sans adueu, ce qui nous a tres-iustement esmeus, Veu qu'il n'a fait prise, ni voyage, ni action aucune depuis cette guerre, qu'avec charge de nous, & dont il ne soit bien aduoué. C'est pourquoy nous nous adressons finalement à vous, Monseigneur, qui scauez parfaitement les intentions du Roy, les mesnagez avec prudence tres-exquise, & par vostre autorité les retenez au point qu'il faut, contre la chaleur des particuliers, Afin de supplier vostre grandeur, qu'il ne soit fait audit sieur de la Grossetiere aucun mauuais ni extraordinaire traitement: lequel n'ayant rien faict de tout ce que l'on pourroit trouuer à dire en ses comportemens, que par nostre ordre & Commission; ainsi que nous vous certifions encor, s'il vous plait, par la presente, qui est faicte exprés, Nous osons nous promettre de vostre Bonté, que cette cy ne sera pas sans fruiet, & qu'elle nous desuelopera des perplexitez où nous

sommes pour ce suiet, & de tous fascheux <sup>1628.</sup>  
euenemens qui pourroyent naistre de cette <sup>Aoult</sup>  
occurrence. Surquoy nous demeurons,

MONSEIGNEVR,

Vostres-humbles &  
tres-obeyssans Ser-  
uiteurs les Maire, Es-  
cheuins, Conseil-  
lers, Pairs, Bour-  
geois, & habitans  
de la Ville de la Ro-  
chelle, & pour  
tous G V I T T O N,  
Maire & Capitai-  
ne de la Ville &  
gouuernement de  
la Rochelle.

*De la Rochelle*  
*ce 22. Aoult.*  
*1628.*

*A cette Lettre ledit sieur Cardinal de Richelieu*  
*fit par le mesme porteur cette responce.*

• MESSIEVRS,                      Je suis fasché *Res-*  
que vos actions ne demandent au *ponce*  
Roy, plustost que vos paroles, les graces *de Mr.*  
que desirez de sa Bonté: Mais ie m'eston- *le Car-*  
ne grandement, qu'empeschans toute la *dinal*  
Ville, où vous estes, de receuoir des effets *de Ri-*  
de la misericorde de sa Maiesté, vous en *cheliu.*  
*aux*



1628.

Aoust

Rochelle.

lois.

recherchez pour des subiets particuliers, où le general de vos Citoyens n'a aucun interest. Vous n'estes de condition, ni en estat de traiter du pair avec vostre Maistre: la pesee en est criminelle. Partant ie vous conseille de n'augmenter par cette voye le nombre de vos fautes. Je ne sçay quelle est la volonlé du Roy, dont la bonté est infinie, sur le subiet de la Grossetiere: Mais ie sçay bien, qu'il ne sçauroit recevoir aucune peine, qui ne soit moindre que ses demerites. C'est à vous de contenir ceux qui sont dans la Ville, où vous estes dans la ceinture de ses murailles: Sa Majesté estant resoluë de ne souffrir plus, ny que ses soldats passent les lignes du costé de la Rochelle, ny que ceux de la Rochelle s'approchent des mesmes bornes & les passent impunément. Je vous en aduertis: afin qu'aucun ne soit pris par inadvertance. Cependant ie vous prie de croire que j'ay désiré avec passion, que vous me donnassiez subiet de vous tesmoigner mon affection, & que j'eusse esté bien aise de vous faire cognoistre que ie suis,

Messieurs,

Du Chastellier ce

Vostre affectionné Serui-

teur le CARDINAL DE

23. Aoust 1628.

RICHELIEV.

Le 24. les Rochelois enuoyerent en Angleterre, vne lettre à leurs Deputez de cette teneur.

**M**essieurs, Nous attendons depuis trois mois l'effect des excellentes lettres que nous auons receuës du Roy d'Angleterre: & cepēdant nous ne pouons voir par quel defastre nous restons icy miserables, sans voir paroistre aucun secours. Nos soldats n'en peuuent plus, nos habitants meurent de faim par les ruës, & toutes nos familles sont effroyables de gemissemens, d'indigence & de perplexité; Neantmoins nous tiendrons iusqu'au dernier iour, Mais au nom de Dieu, ne tardez plus, nous perissons. Ce sont  
Messieurs, Vos &c.]

*De la Rochelle ce*

24. Aoust 1628.

Le 26. sur les huit à neuf heures du soir les Rochelois firent sortir du costé de terre vn habitant de la Ville nommé Beron Horloger l'enuoyans en Angleterre, pour faire haster leurs secours. Mais estant au quartier du Roy, à Estré, il fut recognu & aussi tost pris, & apres luy auoir trouué vn billet au derriere de son pourpoint entre les deux espales où il l'auoit

1628. mis , il fut condamné à estre pendu : com-  
me aussi le furent deux autres qui estoient  
têbre. sortis en mesme temps.

Le Lundy quatriesme de Septembre, le  
sieur Arnault Maistre de Camp des Cara-  
bins du Roy, vint de la part de sa Maiesté  
à la Porte de Coigne pour parlementer,  
prenant pour pretexte qu'il desiroit trait-  
ter de l'eschange du sieur de Fequiere son  
beau frere, avec le sieur de la Grossetiere.  
Aussi tost l'y furent trouver de la part du  
Maire & de son Conseil, les Sieurs de  
Fiefmignon, & Riffault, pour le Corps  
de Ville, & Defos & Moquay, pour les  
Bourgeois; y menans aussi le sieur de  
Fequiere. Estans là ils demurerent avec  
luy en conference, depuis huiët heures du  
matin, iusqu'à vne heure apres midy, &  
continuerent le mesme pour parler le Sa-  
medy neuf, comme aussi le douze, treize &  
quatorze ensuiuants. Et enfin apres ces  
longs entretiens, il fut arresté que le len-  
demain au matin, il seroit Deputé par de-  
vers Monsieur le Cardinal de Richelieu, &  
pour cét effet furent nommez les sieurs  
Riffault & Iournault, qui apres auoir eu  
passeport du Roy, allerent trouver ledit Sr.  
Cardinal à Ronfay, avec lequel ils confe-  
rerent



ferent iusqu'au soir , & retournerent en la 1628.  
 Ville , avec esperance d'obtenir la paix <sup>Septē-</sup>  
 sous d'assez bonnes conditions. Mais la <sup>bre.</sup>  
 venue de deux enfans de Ville, Mesnier &  
 Beaumont , qui arriuerent le mesme iour,  
 venans d'Angleterre , fit rompre ce traitté,  
 sur les assurances qu'ils donnerent que  
 l'armee Angloise seroit en ces Costes au  
 premier temps fauorable. La lettre qu'ils  
 rendirent au Maire se trouua de cette te-  
 neur.

**M**essieurs, Dieu nous est tesmoin *Lettre*  
 de l'angoisse de nostre cœur , pour *des De-*  
 les maux que vous souffrez : & les hom- *prenez*  
 mes le seront des deuoirs continuels que *aux*  
 nous faisons enuers sa Serenissime Maiesté, *Rochel-*  
 & les Seigneurs de son Conseil , pour ha- *lois.*  
 ster vostre assistance. Iusques icy nous  
 auons esté si malheureux , que nonobstant  
 les excellentes dispositions qu'ils y ont, &  
 les particulierement bons offices que nous  
 y rend Monsieur le Duc , il nous y est né  
 trauerses sur trauerses , Mesme depuis le  
 depart de Monsieur de la Grossetiere, tel-  
 lement que leur bonne volonté ne peut  
 estre secondee de la diligence par eux pro-  
 mise , & qui vous est necessaire. En fin  
 nous arriua Dimanche le frere de feu la

1628.  
Sep-  
tembre.

Forest , avec vos lettres , dont le susdit  
sieur de la Grosseitiere n'auoit pas iugé se  
deuoir charger , & ne scaurions vous dire  
combien nous auons eu le cœur saisi, trou-  
uans en icelles la verité de ce que nos ius-  
tes craintes , nous auoient tousiours fait  
preiuger, de vos extrêmes necessitez. Dés  
le lendemain nous presentasme à Mon-  
sieur le Duc , celle que vous luy adressiez,  
& par son moyen à sa Majesté, aussi la sien-  
ne, leur faisans aussi lecture de celle qu'il  
vous a pleu nous escrire. Combien qu'elles  
parlassent assez d'elle mesmes , si est ce  
que Monsieur de Soubise & nous les ac-  
compagnasmes de toutes les plus instan-  
tes supplications qu'il nous fust possible, &  
d'une abondance de larmes, qui se desbon-  
derent malgré nous , en l'excez de nostre  
douleur , & dont S. M. tesmoignant estre  
extraordinairement touchee , assembla sur  
l'heure mesme , Messieurs ses principaux  
Officiers , despescha vers les havres , où se  
font les preparatifs ; Bref establit tout  
l'ordre necessaire pour faire diligenter.  
De fait , on a fort aduancé ces trois iours,  
qui ont suivi depuis ; en sorte que nous  
conceuons toute esperance , que dans  
quinze iours pour le plus tard , la flotte

mettra à la voile, si Dieu luy donne vne  
saison fauorable. Elle va si bien munie  
de tout ce qui lui est necessaire, avec tant  
de resolution, & portant vn commande-  
ment si exprés de sa Maiesté de vaincre ou  
de mourir, que nous en esperons moyen-  
nant la grace de Dieu toute sorte d'heu-  
reux succès. Cependant pour ce qu'il peut  
suruenir vne contrarieté de vents, sa Ma-  
jesté a trouué bon, outre six qui vous ont  
esté depeschez depuis le retour de l'armée  
de Mr. le Comte d'Embey, de vous réuoyer  
ce porteur, afin que si la saison venoit à  
estre defauorable, & retardoit vostre se-  
cours, vous demeuriez asseurez qu'au pre-  
mier beau temps il ne vous manquera pas.  
Puis donc que les choses sont en cét estar,  
au nom de Dieu, Messieurs, continuez  
les miracles de vostre constance. Nous  
sçauons que vos nécessités ne sçauroient  
estre qu'effroyables; & nous representans  
nos enfans, qui avec les vostres crient à la  
faim, nous ne mangeons morceau qui ne  
soit mouillé de nos larmes. Mais deussiez  
vous retrencher toute nourriture, & à nos-  
dits enfans (Dieu sçait pourtant combien  
ils nous sont chers) & à tous ceux qui ne  
sont capables de s'employer à la defense



1628 commune, faites de la plus extrême neces-  
Sep- sité vertu, en attendant que Dieu la cou-  
tembre. ronne de sa deliurance. Nous vous escri-  
uons cecy les yeux tout baignez de pleurs,  
& ne desirerions rien tant que d'estre au  
milieu de vous, pour auoir nostre part de  
vos maux, comme nous l'auons eu en vos  
biens. Mais puis que la Prouidence de  
Dieu en dispose autrement, au moins vous  
supplions nous d'auoir cette confiance en  
nostre fidelité, que nous n'espargnerons  
nul travail, iusques à ce que Dieu nous  
ait fait la grace de voir cette œuvre icy  
conduite à la fin, à vostre consolation, &  
à la confusion des ennemis de Dieu, & des  
vostres. Il demeure resolu, que l'vn de  
nous d'eux s'embarquera avec la flotte.  
Mais nous sommes en contestation qui le  
doit emporter, chacun le desirant avec  
passion. Elle cederà pourtant à la raison,  
veu que nous iugeons à propos, qu'il en  
demeure vn icy, & conuiendrons aimable-  
ment en cecy, comme nous auons tous-  
jours fait en toute autre chose, apres auoir  
pesé ce qui nous semblera plus utile. Ce-  
pendant nous vnissons nos vœux pour de-  
mander à Dieu, qu'il vous soustien-  
ne par sa vertu, selon que iusques icy il a

fait ; Et nous assurons que comme toute 1628.  
l'Europe a aujourd'huy l'œil sur vous, Sep-  
comme sur l'exemple de la plus courageu-<sup>tébre.</sup>  
se generosité qui soit point. Vous y conti-  
nuerez en sorte, que la Posterité aussi vous  
admirera, pour n'auoir ployé sous le faix  
d'aucune necessité, & auoir surmonté les  
choses mesme les plus insurmontables.  
C'est le desir & la ferme assurance de ceux  
qui sont tant qu'ils auront le moindre sou-  
fle de vie.

Messieurs,  
à Londres ce  
14. Iuliet  
1628.

Vos tres humbles  
& tres obeyssans  
Seruiteurs & Depu-  
tés I. DAVID,  
PH. VINCENT.

*Le sieur Dehinffe est à Plemud , comme aussi  
les Sieurs Bragneau & Gobert à Portsmouth,  
où ils travaillent pour nos affaires.*

**M**essieurs, Nous adiouſtons  
ces lignes, pour vo<sup>r</sup> dire de la part de  
Monſieur le Duc , que cas aduenant,  
que le premier effort ne fuſt accompagné  
du ſucces, qu'il en eſpere ; Vous ne deuez  
douter, qu'il n'en face vn ſecond, vn troi-  
ſieſme , & ainſi en ſuite , iuſques à ce qu'il

1628. soit pery , ou qu'il vous ait secourus. Ces  
Sep- pendant il s'attend , que si le vent est tel  
tembre. qu'il vous puisse aussi servir , ou en cas  
qu'il se tournast , & luy fust contraire , ce  
qui vous le rendroit fauorable , vous ne  
vous espargnerez à faire de vostre costé,  
tout ce qui sera possible avec vos Vaif-  
seaux à feu , Nous ne doutons point que  
vous n'establisiez vn si bon ordre , que les  
ennemis n'aient point lieu de prise sur  
vous , comme iadis les Turcs sur vne pla-  
ce de la Moree , laquelle ils enleuerent  
apres vn long Siege , tandis que le peuple  
imprudent couroit vers le havre , où il en-  
troit du secours.

Le 12. sur les deux à trois heures apres  
midy , Bouffard sieur de la Magdeleine en-  
tra à cheual , dans la Rochelle du costé de  
la Mer , non sans auoir couru risque deux  
à trois fois d'estre pris de la Cavalere Roy-  
ale , qui le poursuivit le long de la Falai-  
se , depuis Pourtneuf , iusques bien près de  
la Porte des deux Moulins , apportant  
nouuelles aux Rochelois , que l'armée An-  
gloise estoit embarquee , & preste à faire  
voile , pour au premier temps fauorable les  
venir secourir.

La nuit du Mardy venant au Mercredy



vingtiesme, le Ciel fut veu depuis les dix 1628.  
à onze heures du soir, iusques au iour, tout Sep-  
en feu & esclairs, tellement qu'il faisoit tembre.  
aussi clair qu'en plein iour, sans toutesfois  
qu'il se fist dans l'air aucun bruit ni coup  
de tonnerre. Quelques vns dirent auoir veu  
du costé de la mer, comme des hommes  
se choquans & combattans les vn les au-  
tres. Depuis le bruit courut par la Ville  
que sur la minuiet il s'estoit apparu au Ciel  
à l'endroit de la Digue, vne armee Na-  
uale, comme de feu, qui attaquoit vne  
forme de Digue, où apres vn grand com-  
bat il s'estoit fait vne ouuerture qui donna  
passage aux Nauires. Les Sages n'y adjou-  
stans pas grande foy, le pauvre peuple s'en  
repaissoit. Quoy que ce soit ceste nuit eut  
de l'extraordinaire, à cause de l'inflâma-  
tion de l'air, de sorte que la Ville eut vne  
alarme bien chaude, & que tous coururent  
aux places d'armes & Corps de Gardes, où  
ils demeurèrent iusques au iour, sur la  
crainte de ces fantosmes, que le guet auoit  
pris pour des hommes.

Le Mercredy matin 28. vn habitant  
nommé Iean Martin venant d'Angleterre,  
entra dans la Rochelle, apportant vne let-  
tre des Deputez, & aduis comme l'armee

1628. Angloise estoit en mer, au deça de la Manche : & qu'elle fust venue plustost, sans la mort du Duc de Buckinghant, tué à Ports-mud par vn Lieutenant Escossois.

D'autant que ç'a esté vn Seigneur de nom, & le premier autheur de cette guerre, j'ay voulu inserer icy, les circonstances de sa mort, les ayant extraittes du Iournal de l'vn des Deputez, qui estoient en Angleterre, qui m'en a fait part depuis son retour.

Ex-  
trait  
du  
Iour-  
nal du  
Sieur  
Vincet

Le deuxiesme de Septembre mil six cens vingt & huit, estans à Ports-mud, & les preparatifs pour l'armee Naualle se faisans en diligence, Monsieur le Duc de Buckinghant, nous manda de bon matin, & nous communiqua quelques lettres receuës du Camp du Roy de deuant la Rochelle, par lesquelles on luy donnoit aduis, qu'il estoit entré dans la Ville, vn notable rafraischissement de viures, & particulièrement cinquante à soixante Bœufs. Nous luy repartismes, que ces bruits s'espandoient artificieusement, afin de ralan-tir le secours, & que à moins de s'imaginer, que les Bœufs peussent voler, il estoit impossible que la nouuelle fust veritable. Monsieur de Soubize arriué sur cet instant luy

1628.  
Sep-  
tembre

luy confirma le mesme, & le suppliasmes tous, que sur cela il ne laissast pas raler sa bonne affection à diligenter les affaires. Il nous promit qu'on ne retarderoit pas vn seul moment. Mais au reste, qu'il cautionnoit cette nouuelle, & l'alloit porter luy mesme au Roy, qui estoit à quatre milles de là. Sur cela il desieune legèrement, & sortant de table, luy fut présenté certain plan par vn Capitaine de fort petite stature, & le consideroit allant tousjours vers la porte : où la tapisserie luy ayant esté leuée, il s'arresta quelque temps resuant sur ce plan. En ce lieu, & à cét instant, s'aduança vn certain ieune homme Escossois, Lieutenant d'une cōpagnie, qui par dessus l'Espaule dudit Capitaine luy poussa avec roideur vn coup de couteau dedans l'estomach, & tout aussi tost se retira en la foule. Le Duc mit sur le champ la main à l'espée, & le poursuivit la longueur de l'Antichambre, prononçant ces mots : Hà chien tu m'as tué ! Puis se sentant defaillir, laissa tomber son espée, & arracha luy mesme le couteau, que celuy qui l'auoit frappé auoit laissé en sa playe. Aussi tost qu'elle eut pris vent, il tomba par terre, & releué par les siens, fut



1628. estendu à dent sur vne table, pour tascher  
Sep- à luy faire rendre le sang, qui sortoit par la  
tembre. bouche; Mais il ne donna plus aucun si-  
gne de vie. Cela fut si soudain, qu'à peine  
se le peut-on imaginer, & ne le peusmes  
voir; Nous qui estions en la chambre à la  
porte de laquelle il fut frappé: seulement  
il s'esleua vne voix, que les François  
auoient tué le Duc. Cela nous mit en  
tres grande alarme; Ioint le bruit & la  
confusion au milieu de la foule qui estoit  
ordinairement à sa suite, où tous mirent  
la main à l'espée, s'escrians, & deman-  
dans que c'estoit; & assurément nous cou-  
rions risque n'eut esté, que celuy qui auoit  
fait le coup, voyant qu'on en accusoit  
d'autres, se produisit luy mesme, & dit hau-  
tement que c'estoit luy: Surquoy il fut sai-  
si & mis en prison, où interrogé sur les  
causes, qui l'auoient meu à ceste action:  
Il respondit qu'on les trouueroit au fond  
de son chapeau, où presupposant qu'on  
le tueroit sur la place, il les auoit cou-  
chées en sommaire. De vray on trouua  
là vn escrit, qui portoit en substance, que  
le Duc ayant esté déclaré par Acte du Par-  
lement (dont il inseroit coppie) ennemy  
de l'Estat, sa vie par les Loix du Royaume

estoit exposée en proye. Outre l'iniure publique, qu'il s'en estoit ioint pour son regard deux particulieres, en ce que pour aduancer ses fauoris, il l'auoit exclus par deux fois de la charge de Capitaine, laquelle luy estoit deuë. Ainsi qu'il croyoit auoir tout droit de venger d'un mesme coup & soy & le public. Si il l'auoit es- crit, il continua du depuis à le dire, & n'y eut iamais moyen de tirer de luy autre chose, sinon qu'il auoit tué vn ennemy Public, y estant authorisé par les Loix. Pour retourner au Duc, aussi tost qu'il fut expiré, toute cette grande foule qui remplissoit sa maison, commença peu à peu à se retirer, & y retournant deux heures apres, ie trouuay le corps estendu en vn coin de la Salle, sur vne miserable natte, & à la garde d'un seul valet de chambre. Ce qui opposé à cette splendeur où nous l'auions veu au matin; ayant autour de luy toute la plus belle Noblesse du Royaume, & les principaux Capitaines de l'armée, presentoit vn triste Document de la vanité & de l'inconstance caducque des choses humaines. La nouuelle en fut portée à l'instant au Roy, qui estoit en sa Chappelle, & assistoit au seruice qui s'y faisoit. Lors

1628.  
Sep-  
tembre.

1628. qu'on le luy eut dit en l'oreille, il ne bou-  
Sep- gea de sa place, & ne s'enquit d'aucunes  
tembre. particularitez. Ce qui fut pris pour vn tes-  
moignage de grande reuerence, qu'il por-  
toit au lieu & à l'action, laquelle il ne  
vouloit pas troubler : Seulement, pour  
marque de sa grande emotion, on observa,  
que le sang luy montant au visage, il de-  
uint noir quasi autant que son chappeau.  
Les prieres finies il s'enquit du fait, pour-  
ueut à enuoyer consoler la vefue, & l'as-  
seurer que les charges du Pere seroient  
conseruées pour le fils, & d'ailleurs nous  
enuoya porter parole que cet accident ne  
diuertiroit en rien sa bonne volonté, nous  
donnant ordre de le faire sçauoir à ceux  
de nostre Ville.

Telle fut la fin de ce Seigneur, esleué  
par le feu Roy Iacques, & qui auoit eu  
tout pouuoir sous le Roy d'apresent son  
fils : auquel ayant mis dans l'esprit d'am-  
plifier les droits de la Royauté, au delà de  
ce que les Loix d'Angleterre semblent le  
permettre, il auoit attiré sur luy la haine  
generale de tout le Royaume, qui ayant  
paru en sa vie, se fit encore mieux con-  
noistre apres sa mort, en ce que l'on vou-  
lut rachepter de plusieurs millions, la vie



de celuy qui l'auoit assassiné.

1628.

Le mesme iour 27. sur les sept à huit heures du soir, l'armée Nauale, celle de terre, & toutes les Batteries, firent vn concert de coups de canon & de mousqueterie, meslé d'vn nombre infini de feux d'artifices, & de cris de viue le Roy; Ce qui dura plus d'vne heure & demie, & ce en celebration de la Natiuité du Roy.

Sep-  
tembre.

Le Ieudy 28. arriva dans la Rochelle vn gentilhomme nommé Champ fleury, venant de l'armée Angloise, avec deux lettres en chiffre, l'vne de Monsieur de Soubise à Madame de Rohan sa mere, & l'autre des Deputez aux Maire & Corps de Ville: Et les asseura qu' auparauant qu'il fust iour couché, ils verroient arriuer la flotte. De vray sur les quatre à cinq heures du soir, vne grande partie d'icelle parut vers le pertuis Bretô, & alla mouïller l'ancre à la grand rade de Saint Martin, & à la Palisse, pour y attendre le reste de l'armée, qui auoit demeuré derriere: Puis le Samedy trente, elle vint à Chef de Baye, ayant esté iointe au matin par vne briguede, comme elle fut au soir par vne autre, qui entra par Anthioche, & ainsi se rejoignit toute.

1628. Cependant ceux du Camp ne demeu-  
 Octo- rerent pas oisifs , mais se mirent en de-  
 bre. uoir de resister puissamment à l'Anglois,  
 & firent toute diligence le iour & la nuit  
 de renforcer de nouveau la Digue & Palis-  
 sade , y enfoncer des Nauires , y dresser  
 des Batteries, y poser des chandeliers &  
 Machines, garnir les Vaisseaux d'hommes  
 & de munitions, & border les Costes de  
 Canallerie & Infanterie. Bref, ils n'obmi-  
 rent rien de ce qui se pouuoit faire en cette  
 occasion.

Le Lundy deuxième d'Octobre , les  
 Rochelois voyans leurs secours à Chef de  
 Baye , enuoyerent par terre le sieur de la  
 Landedu Lac, pour les aduertir de l'estat  
 & extremité où ils estoient reduits , &  
 comme estoit composée la Digue, & les  
 lieux où ils pourroient passer.

Le mesme iour au soir , les Rochelois  
 receurent vne lettre des Deputez qui es-  
 toient en l'armée Angloise de cette teneur.

*Lettre  
 des De-  
 putez  
 aux  
 Roche-  
 lois.*

**M**ESSIEURS, L'armée s'estant  
 escartée sur mer, & n'ayant peu se  
 rassembler, que Samedi au soir, vous auez  
 veu que depuis, le temps n'a pas esté propre  
 pour donner. Assurez-vous qu'on en

prendra la premiere occasion , & que tout 1628.  
le monde est tellement disposé à bien faire Octobre.  
qu'on ne partira point sans vous auoir secourus , sous le bon plaisir de Dieu. C'est

le commandement de sa Majesté , l'intention du General , & la resolution de tous les Chefs , & soldats : Tenez-vous en donc pour tres asseurez. Ce sont

MESSIEURS,

*De la Rade de Chef de Baye,*

Vos, &c.

*ce premier Octobre 1628.*

Le Mardy 3. sur les sept à huit heures du matin , ladite armée Angloise commandée par le Comte de Lindley, mit à la voile, & fit contenance de vouloir donner, veu qu'elle s'aduança iusques entre les deux pointes. Mais s'arrestant là, ce ne furent pendant deux heures, que quelques legeres approches de part & d'autre, sans toutesfois venir aux mains, ni faire autre chose, que tirer force coups de canon, & s'entr'enuoyer des brulots sans aucun effect. Puis apres se retirerent, au grand déplaisir des Rochelois, qui croyoient qu'ils deussent mieux faire, & auoient desia englouti par esperance le rautaillement qu'ils leur apportoit.

Pendant cet ombre d'attaque, les Ro-



1628. chelois tirèrent force coups de canon de  
Octo- leurs Clochers, Tours, & Batteries; de ce  
bre. costé là, dont au soit fut rapporté que l'un  
tiré de la tour Sainct Nicolas auoit tué  
quatre Seigneurs de marque, du costé de  
Coureille. En la Ville aussi fut tué d'un  
coup, venant de la Galere le sieur Gedeon  
Mignonneau.

Le Mercredy 4. l'Armée Angloise re-  
tourna pour la seconde fois, comme si elle  
eust voulu attaquer l'armée du Roy, mais  
non plus que le iour precedent, elle ne fit  
que tirer force coups de canon, & mettre  
le feu en six de ses brulots, qui à cause qu'il  
faisoit calme, & que le vent estoit Nort ne  
firent nul effect, mais seulement allerent  
brusler derriere les pointes de Chef de  
Baye & de Coureille, & iusques au platin  
d'Angoulin. Cela attrista grandement les  
Rochelois, & leur osta quasi toute esperan-  
ce d'estre deliurez par cette armée, la  
voyans si mal commencer.

Le Samedy 7. le sieur Paul Meruault,  
fit fondre dans la Rochelle quatre coule-  
vrines, dont vne manqua, & les trois au-  
tres se trouuerent bonnes.

Le mesme iour le Roy enuoya vn Gen-  
tilhomme en la Ville, pour sçauoir si on  
vouloit

vouloit venir à quelque traité de paix, 1628.  
mais il s'en retourna le lendemain sans <sup>Octo-</sup>  
rien faire, sur la mesme difficulté du passé, bre.  
les Rochelois ne voulans faire vn traité  
particulier.

La nuit du Samedi venant au Diman-  
che 8. l'armée Angloise fit vn signal, ac-  
compagné d'un coup de canon, sur l'arri-  
uée du tieur de la Lande du Lac, à quoy les  
Rochelois respondirent par le contre si-  
gnal, d'un feu au haut de la Tour de la  
Chaisne, & d'un coup de canon.

Le Dimanche 8. entrerent dans la Ro-  
chelle trois soldats nommez Chardaucine,  
la Verdre, & la Paillette, venans de l'ar-  
mée Angloise, avec chacun vne lettre,  
qu'ils deliurerent au Maire de cette teneur.

**M**ESSIEURS, Nous vous  
auons desia donné aduis de nostre  
venue, & de nos fermes resolutions à vous  
secourir; Nous vous faisons cette-cy, pour  
vous en reïterer les assurances, & vous  
dire que combien que les escarmouches de  
Mardy & Mercredy n'ayent pas eu grand  
effet; Vous ne deuez pourtant vous des-  
courager, ains tenir pour tout assuré, que  
moyennant l'aide de Dieu, nous ne parti-

1628. rons point d'icy que vous ne soyez sauuez,  
 O<sup>cto</sup>bre. ou que nous ne soyons tous peris. Nous  
 auons des forces graces à Dieu suffisantes  
 pour nous faire bien esperer, & attendons  
 de sa Bonté, que bien tost nous vous ver-  
 rons deliurez. Si vous nous y pouuez ai-  
 der, nous tenons pour certain que vous ne  
 vous espargnerez pas. Si aussi vous auez  
 quelques aduis à nous donner, touchant la  
 Palissade & la maniere de l'attaquer, es-  
 sayez de nous les faire sçauoir. Cependant  
 nous prions Dieu qu'il vous fortifie. Mon-  
 sieur de Soubise qui a voulu mettre icy son  
 nom vous saluë, & vous prie que cette cy  
 soit, tant pour Madame sa Mere, que pour  
 vous. Ce sont,

MESSIEURS,

*An Bord de*

*Monsieur de*

*Soubise, ce*

*Vendredi SOUBISE.*

*6. Octobre*

*1628.*

*A Messieurs, &c.*

Vos tres-humbles &

tres-obeissans Ser-

uiteurs & Deputez

P. H. VINCENT.

D. BRAGNEAU. I.

DEHINSSE.

I. GOBERT.

Outre cette lettre les porteurs d'icelle  
 dirent merueilles des preparatifs qu'on fai-



soit pour le prochain gros de l'eau, & sur tout qu'il y auoit trois Nauires à Mine, en chacun desquels il y auoit plusieurs milliers de poudre, dont on attendoit grand effet pour rompre la Digue, & ouurir entiere-ment le passage.

1628.  
Oâo-  
bre,

Cela fit que les 10. 11. 12. & 13. quelques particuliers ( preiugeans qu'audit gros de l'eau il entreroit des viures dans la Ville ) firent publique vente de Bled, Biscuit, & toutes sortes de prouisions, & s'en trouua vn entr'autres, qui auoit quarante & tant de boisseaux de froment, dix quintaux de biscuit, douze boisseaux de febves, autant de poix, six boisseaux de vesse, vne balle de Ris, douze quintaux de poisson sec de Virgine, & six barils de Beure. Comme cela fit du bien à beaucoup, il en fit mourir quantité d'autres, à cause que leur estomac debilité par les mauuais alimens, & le peu qu'ils en auoient mangé depuis vn long temps, n'auoit plus de chaleur pour la digestion : de sorte qu'ayans mangé auidement ils defaillirent, ce que j'ay veu en plusieurs.

Le Samedy 14. à la marée du soir l'armée Angloise fit vn signal de feu, sur l'armée d'vn soldat que le Maire auoit en-

1628. uoyé: Surquoy les Rochelois en firent vn  
Octo- autre tout aussi tost, aux Tours de la Chaif-  
bre. ne & de la Lanterne.

La nuit du Samedy venant au Dimanche 15. il entra dans la Rochelle vn soldat, qui rapporte que le Millord Montaigu estoit venu au Camp pour traiter de paix avec le Roy, & qu'apres auoir esté bien receu de Sa Maiesté, & de Monsieur le Cardinal de Richelieu, il s'en estoit retourné en l'armée Angloise. Il dit aussi qu'un coup de canon tiré du Clocher de Saint Barthelemy auoit donné au Fort Louys, tout contre le Roy, qui auoit lors pres de luy ledit Montaigu, & qu'il lesauoit couverts de poussiere; ce qui auoit esté le sujet de ce que sur les trois à quatre heures du soir, on auoit tant tiré de coups de canon dudit Fort sur la ville. Cela obligea à redoubler les Prieres qu'on faisoit tous les iours aux Presches, qu'il pleust à Dieu preseruer Sa Majesté de tout mal.

En ce mesme temps le Maire & son Conseil, voyans que le gros del'eau s'estoit passé, sans que l'armée Angloise eust fait nulle tentatiue; le temps ayant tousiours esté fort calme, & ainsi qu'on ne pouuoit esperer de viures plütoſt qu'à l'au-

tre gros de l'eau, firent assembler le Con-<sup>1628.</sup>  
seil en l'Hostel de Ville, afin de voir com-<sup>Octo-</sup>  
me ils deuroient se gouverner à l'adue-<sup>bre.</sup>  
nir. Entr'autres choses ils arresterent,  
qu'il seroit estably dans toutes les compa-  
gnies de la Ville, des Commissaires pour  
aller faire la visite par les maisons de ce  
qu'il y auoit de bled, où autres prouisions,  
& en laisser en chacune de celles où il en  
seroit trouué, pour quinze iours ou trois  
semaines au plus, & prendre le reste pour  
le distribuer à ceux qui n'en auroient point.  
La recherche faite, il ne se trouua en tout  
que cent cinquante Boisseaux de bled, de  
tous grains, chacun ayant fait de soy mes-  
me dès l'arriuée des Anglois ce qu'alors le  
Conseil vouloit faire, & aidé ses parens &  
amis de ce qu'il auoit de surabondant,  
n'attendans rien moins que de les voir en  
rade vn mois entier, sans rien faire.

Ce peu de bled qui fut trouué fut reser-  
ué pour la nourriture des Soldats, qui avec  
les habitans estoient comme des anatomi-  
es, & peu à peu defailloient. Surquoy  
est notable ce qui arriua à deux Anglois,  
qui sentans qu'ils n'en pouuoient plus, al-  
lerent de compagnie chez vn Menuisier,  
commander chacun leur coffre, pour le



1628. lendemain huiët heures du matin ; l'autre  
Octo- du commencement en faisoit refus , veu  
bre. qu'il croyoit qu'ils se moquassent de luy ;  
Joint que luy mesme attenué de la faim,  
n'auoit pas disoit-il assez de force pour y  
travailler. Neantmoins eux le pressans,  
& le payans par aduance , le gain le luy fit  
entreprendre , & deuant eux commença  
son œuvre , & acheua ces deux cercueils,  
qui vindrēt à point à ceux qui les auoient  
commandez , veu que dés le propre soir,  
l'un mourut , & l'autre le lendemain sur  
les dix à onze heures du matin.

Le Mardy 17. le sieur Arnault , vint à  
la Porte Saint Nicolas pour parlementer,  
& furent nommez pour l'ouyr , les Sieurs  
Viette , Riffault , Journault & Mocquay.  
De plus il retourna le lendemain , & con-  
fera encore longuement avec les mesmes:  
Mais ils ne peurent rien conclure.

La nuit du Mardy venant au Mercredi  
18. Le Maire & son Conseil , firent sortir  
Chardaueine, lequel ils vouloient enuoyer  
vers l'armée Angloise : Mais ainsi qu'il  
vouloit passer les lignes, il receut vn coup  
de mousquet dans l'espaule , qui l'obligea  
de retourner en la Ville.

La nuit du Mercredi venant au Ieudy 19.

le feu fut mis au logis du Maire, qui cou- 1628.  
roit risquer de brusler, n'eut esté que quel- Octo-  
qu'un qui passoit par là, cria au feu. Ce qui bre.  
fit accourir les voisins, qui promptement  
l'esteignirent, n'ayant eu le temps sinon de  
brusler partie des Portes, & de noircir les  
planches de la boutique. On creut que ce-  
la vint du desespoir de quelques habitans,  
qui eussent désiré qu'on se fust rendu.

Aussi la famine se renforçoit horrible &  
espouventable, ne se trouvant plus du  
tout rien. Il y auoit trois mois que le plus  
grand nombre ne sçauoit plus que c'estoit  
de pain, ni des prouisions ordinaires. Les  
Cheuaux, Asnes, Mulets, Chiens, Chats,  
iusques aux Rats & Souris, estoient man-  
gez. Il ne restoit plus ni herbes ni lima-  
çons par les champs, le recours estoit aux  
Cuirs & peaux de Bœufs & de Moutons,  
Cannelle, Casse, Regalice, Colle de Flan-  
dre fricassée, pain de paille fait avec un  
peu de sucre, iris, gelées de peaux de Bœufs  
Moutons, & cornes de Cerf mises en pou-  
dre, Cuir de vieux pourpoints de Buffle,  
Souliers, Bottes, deuanteaux de cuir,  
ceintures, port espées, pochettes, ai-  
guillettes, parchemin, bois pilé, plâtre,  
terre, fiente (ce que j'ay veu de mes yeux)

1628. charognes , & os que les chiens auoient  
Octo- autrefois rongez : & finalement à tout  
bre. ce qui venoit à la fantasie & deuant les  
yeux , qui donnoit plustost la mort, qu'au-  
cun soustien & prolongement de vie, dont  
il ne passoit iour qu'il ne mourust deux à  
trois cens personnes & plus , en telle for-  
te que non seulement les Cimetieres.  
Mais mesmes les Maisons, Ruës , & extré-  
mitez de la Ville , se virent en peu de  
temps remplies de corps morts , sans  
auoir autre sépulture que les lieux où ils  
mouroient : les viuans n'ayans pas la for-  
ce de leur creuser des fosses , pour les met-  
tre dedans: plusieurs mesmes alloient mourir dans le Cœmetiere.

Pendant ces calamitez & miseres , il ne  
laissoit pas d'y auoir quelques vns qui s'e-  
stans reserué des provisions de cachette, les  
vendoient sous main , mais à vn prix ex-  
cessif , à sçauoir le picotin de bled ( qui est  
la huietième partie du boisseau de Ville )  
pour la somme de deux cens liures , vn  
biscuit qui à peine pesoit sept à huiet on-  
ces , iusques à dix & douze escus : vne va-  
che mille liures, avec quelque reserue pour  
le vendeur : vn Mouton trois , quatre , &  
cinq cens liures : Et tout le reste à la  
pro-



proportion : Et encores bien-heureux ce- 1628.  
luy qui par l'entremise de certaines coura- O&O  
tieres pouuoit recouurer quelque chose bre.  
d'eux. Cependant c'est vne chose émer-  
ueillable, que la necessité estant telle, &  
les nombres des mourans si grand, il ne se  
fit point de monopoles en la Ville, ni par  
le menu peuple ni par autres, pour obli-  
ger le Maire & son Conseil de capituler,  
mais tous se laissoient conduire, & mou-  
roient sans plaintes & murmures, & tes-  
moignans estre contens. Quant à ceux de  
dehors c'est aussi merueille, qu'ayans tous  
les iours aduis de ces effroyables necessi-  
tez, & de l'extrême foiblesse où elles  
auoient reduit la place, ils ne firent effort  
pour s'en rendre maistres, estant vray qu'il  
eust esté impossible de resister, n'y ayant  
quasi plus de force en tous, de sorte qu'on  
ne pouuoit remuer le canon, & qu'on de-  
sista de sonner la grosse cloche pour le  
Presche. De plus lors qu'on mettoit les  
compagnies en garde, le matin il s'en  
trouuoit vne moitié de morts, tels mesmes  
rendoient l'esprit au lieu où on les auoit  
mis en sentinelle, & iusques là qu'il c'est  
passé plusieurs nuits sans qu'il y eust per-  
sonne en la pluspart des Corps de Garde.

1628. Ainsi le moindre effort les eust emportez.  
Octo- Mais Dieu les regarda en pitié, & apres-  
bre. toit la matiere au Roy d'exercer sur eux les  
merueilles de sa clemence.

Durant l'horreur de cette faim comme il y eut des exemples de cruauté, il y en eut aussi plusieurs de tres grande charité en la distribution gratuite que firēt diuers de ce qu'ils auoient de surabondant, combien que faisans comme les autres, ils eussent peu s'enrichir. Notamment i'ay eu cognoissance du Sieur Thinault Marchand, & d'un mien oncle nommé le sieur Duprat, qui ayans chez eux vne tres grande quantité de froment, & autre bled, n'en vendirent vntout seul grain, mais le distribuerent à tous ceux qu'ils iugerent en auoir besoin, pour le leur rendre seulement apres que Dieu auroit redonné la paix.

D'ailleurs il y en auoit qui faisoient des charitez secrettes, desquelles personne n'a iamais peu descouvrir les Autheurs. Entre les autres i'ay eu cognoissance d'une qui m'a semblé memorable. Le Sieur de la Goute Aduocat du Roy honoraire, auoit vne sœur vefue d'un Marchand nommé Profsni, qui estoit fort honneste femme, & charitable, de sorte que la famine com-

mençant à estre plus aspre que l'ordinaire, 1628.  
 elle assistoit liberalement les pauvres. Sa belle sœur, femme dudit sieur de la Goutte, qui estoit d'autre humeur, l'en repro-  
 noit, & luy demanda vn iour en colere, que c'est qu'elle feroit quand elle auroit tout donné, à quoy elle respondit: Ma sœur le Seigneur y pouruira. La famine s'estant renforcée, & le siege continuant, cette pauvre vesue qui estoit chargée de quatre enfans, se trouua à l'estroit, & n'au-  
 yant plus absolument nulles prouisions, s'en vint vers sa belle sœur, la prier de la secourir: mais au lieu de le faire, elle la cou-  
 urit de reproches, & luy dit qu'elle auoit bien preueu qu'elle en seroit reduite là, avec toute sa belle esperance, & ses beaux mots, *le Seigneur y pouruira*: Et qu'à la bon-  
 ne heure il y pourueust donc. Cette pauvre femme eut le cœur nauré de ces paroles, & s'en retourna toute confuse à la maison, resoluë de prendre la mort en gré. Estant arriuée chez elle, elle veit ses enfans qui luy vindrent au deuant avec vne grande ioye, & luy dirent qu'il estoit venu vn homme qu'ils n'auoient peu cognoistre, à cause qu'il estoit tard, qui auoit heurté à leur porte, & aussi tost apres, qu'elle luy

Octo-  
bre.



1628. eut esté ouuerte, y auoit ietté vn sac de fro-  
O&to- ment, d'environ vn boisseau, & s'estoit  
bre. retiré promptement, sans leur dire autre  
chose. Cette pauvre femme ne croyant pas  
quasi à ses yeux, sort à l'heure mesme de la  
maison, & le plustost qu'elle peut, en l'est-  
tat de grande foiblesse où elle se trouuoit,  
retourna au logis de sa belle sœur, & luy  
dit d'un ton ferme, désaussi tost qu'elle la  
vit, *Ma sœur le Seigneur y a pourueu*, puis  
s'en retourna, sans luy vouloir tenir nul  
autre propos. Au moyen de ce secours non  
attendu, & venu si à propos, elle fila le  
temps iusques à l'entrée du Roy, & iamais  
n'a sceu à qui elle deuoit ce bien fait.

Le Samedy 21. sur les sept à huit heu-  
res du soir; l'armée du Roy, enuoya qua-  
tre Brulots au trauers de l'Armée Angloi-  
se, ce qui obligea quelques Nauires de  
couper leurs cables, mais les autres s'en  
garentirent, & les detournerent au moyen  
de leurs Dragontins & chaloupes.

Le Lundy 23. à la marée du matin, l'ar-  
mée Angloise mit à la voile, & vint vers la  
Palissade, & derriere la pointe de Coureil-  
le, mais sans faire autre effort, & se con-  
tenta de tirer force coups de canon inuti-  
lement.

La nuit du Mardy venant au Mercredy 1628.  
25. le feu fut derechef mis au logis du Mai-  
re, avec sermens bien secs, coupeaux de bre.  
bois de sap bien imbus de soufre, goul-  
dron, therebentine, & autres choses à  
brusler. Mais on l'apperceut, & fut aus-  
si tost esteint. De plus la mesme nuit  
deux heures avant iour, vingt & cinq à  
trente soldats mirent aussi le feu au Rat-  
teau de la Porte de Coigne, mais ceux qui  
estoient en garde à ladite Porte y accou-  
rurent, & de mesme l'esteignirent incon-  
tinent.

Le 26. vint par terre dans la Rochelle,  
vn gentilhomme venant de l'armée An-  
gloise, qui apporta trois lettres, l'une de  
Mr. de Soubise à Madame de Rohan sa Me-  
re, & les deux autres du sieur Vincent, l'une  
au Maire en particulier, & l'autre à tout  
le Corps de Ville en general. Par icelles  
ils donnoient aduis de tout ce qui se passoit  
en ladite armée Angloise, & sur tout que  
le Milhord Montaigu ayant communiqué  
avec Monsieur le Cardinal de Richelieu  
pour vn traité de paix, estoit allé en poste  
en Angleterre, d'où on l'attendoit au pre-  
mier iour. Cependant qu'il se ménageoit  
vn passeport pour deux d'entr'eux Depu-

1628. tez, à ce qu'ils en allassent communiquer  
O&to- au Camp du Roy, & de là passassent vers  
bre, eux, afin qu'à l'arriuée dudit Montaignu,  
toutes choses fussent disposées à vne bon-  
ne paix: Que le General les ayant char-  
gez de leur donner cet aduis, cependant il  
tesmoignoit estre resolu de faire effort  
côtre la Digue, si le temps estoit fauorable.

Ledit iour sur le soir, ce gentilhomme fut  
renuoyé en l'armée Angloise, avec lettres  
en chiffre, qui exprimoient la derniere ex-  
tremité de la Ville, les coniueroient, si ils  
luy vouloient donner secours, de le faire  
dans la semaine au plus tard, autrement  
qu'ils estoient forcez de se rendre à toutes  
conditions.

Aussi tost apres que ce gentilhomme  
eut esté renuoyé avec sa depesche en l'ar-  
mée Angloise: Le Maire fit assembler le  
Conseil en l'Hostel de Ville, pour aduiser  
à ce qui estoit besoin de faire. Et apres  
auoir bien considéré les choses contenuës  
és susdites lettres, le rapport dudit gentil-  
homme, l'estat miserable auquel ils estoient  
reduits, les grandes & extrêmes necessitez  
qui les pressoient, leur grande foiblesse,  
& telle, qu'ils n'estoient bastans ni capa-  
bles de resister au moindre effort qu'on



leur pourroit donner , & le peu ou point 1628.  
du tout d'apparence d'estre secourus de la- Ocro-  
dite armée Angloise, qui depuis vn mois bre.  
estoit là les bras croisez. Ils arresterent  
de ne se plus attendre au secours vain des  
Anglois, n'y aussi à leur traité, veu qu'ils  
seroient tous morts auant que leur nego-  
tiateur fust de retour. Ainsi ils resolurent  
en fin de recercher la grace & misericorde  
du Roy.

Pour cet effect ils prirent l'occasion d'v-  
ne lettre que le Sieur Arnault auoit escrite  
ce iour là, au Sieur de Fequiere, par le tam-  
bour qui luy apportoit ses viures, qui luy  
representoit la force de la Digue, & le peu  
d'esperance qu'il y auoit au secours des  
Anglois, & qu'il vaudroit mieux vne bon-  
ne paix : & que ceux de la Rochelle en-  
uoyassent vers le Roy qui les receuroit à  
grace. Ledit Sieur ayant communiqué sa  
lettre au Maire, on le pria que respondant  
au Sieur Arnault il luy donnast aduis de  
venir le lendemain matin en la Ville, &  
qu'on en confereroit avec luy.

Ledit Sieur de Fequiere accepta tres  
volontiers cette commission, & escriuit  
sur l'heure mesme.

Ici ie croy deuoir faire part au public, d'vn

1628. narré qui sortit de la maison de Monsieur le  
Octo- Cardinal de Richelieu, vn peu apres la  
bre. Reddition, & qu'on creut auoir esté dres-  
sé par l'vn de ses Secretaires, ou peut estre  
par luy mesme, qui sert fort à esclaircir ce  
qui va suiure des conditions accordées à la  
Rochelle, & monstre la maniere dont elles  
furent arrestées. En voicy la teneur.

Monsieur le Cardinal de Richelieu ayant  
appris par les lettres du Sieur de Fequieres  
au Sieur Arnault son Beaufrere, que c'estoit  
tout à bon, & que la Rochelle demandoit  
des passeports pour venir rechercher la gra-  
ce de S. M. son premier soin fut d'en don-  
ner prompt aduis au Roy, qui en receut  
beaucoup de ioye, & aussi tost voulut faire  
l'honneur audit Sieur Cardinal de se ren-  
dre à la Saufaye, où il fit assembler le Con-  
seil pour deliberer des conditions sous les-  
quelles on receuroit ceste ville, iusques là  
si opiniastre en sa rebellion.

Tous demeurèrent d'accord qu'elle auoit  
merité vn chastiment tres rigoureux, &  
qu'on en fist vn exemple signalé à toutes  
celles du Royáume qui auroient la pensée à  
l'aduenir de s'opposer aux volótez du Roy,  
& faire des reuoltes & remuemens en l'estat.

Mais quand ce fut à determiner, si com-  
me

me le Roy le pouuoit par iustice, il le de-<sup>1628.</sup>  
uoit pour sa plus grande gloire, & par les <sup>Octo-</sup>  
vrayes maximes & raisons d'Estat, les opi-<sup>bre,</sup>  
nions se partagerent en trois differens ad-  
uis. D'un costé il y en eut qui cōclurent à la  
rigoureuse iustice; De l'autre il s'en trouua  
qui insisterent fort à ce que le Roy prist ce-  
ste belle occasion de se signaler par la cle-  
mence. Apres eux il y en eut qui ouurirent  
vn aduis mitoyen, conseillans vn tempera-  
ment des deux, & qu'apres auoir fait punir  
quelques vns des plus mutins, on fist grace  
au reste.

Monsieur le Cardinal recueillant les ad-  
uis des vns & des autres n'opina point  
quant à luy, mais representant le tout au  
Roy afin qu'il en fist la decision, tempera  
neantmoins son discours, en sorte qu'il fit  
paroistre où il enclinoit.

Commençant par ceux qui auoient opi-  
né pour faire de cette Ville vn exemple  
de iustice, il dit que leur aduis sembloit  
tresbien appuyé, & que peut estre n'y en  
auoit-il iamais eu aucune qui s'en fust  
rendue plus digne, veu son opiniaistreté,  
& toute la peine laquelle depuis si long  
temps elle auoit donnée à Sa Maiesté; &  
nulle aussi dont les ruines, posé que le



1628. Roy la fist raser iusques à ses fondemens,  
Ocro-criassent plus haut, pour apprendre aux  
bre. peuples qu'ils doiuent obeyr à leurs Sou-  
uerains, & qu'il n'y a point de rempart as-  
seuré pour la Rebellion.

Quant à ceux qui tenoient pour l'opi-  
nion mitoyenne, il releua aussi leurs rai-  
sons, & dit qu'en de tels rencontres, la pei-  
ne des plus coupables, donnoit de l'effroy  
aux mutins; & le pardon aux autres mar-  
quoit la bonté du Prince, & empeschoit  
qu'en des cas pareils tout vn peuple ne  
s'opiniastrast, comme il est ordinaire à  
ceux qui n'esperent point de grace; De-  
quoy la Rochelle alors mesme estoit vn  
exemple.

Mais quand ce vint à l'aduis de ceux qui  
auoient conclu à la grace entiere, il s'esten-  
dit plus, & insista fort sur leurs raisons.  
Premierement, il representa comme tres  
considerable ce qu'ils auoient posé, que  
peut estre ne se pourroit-il presenter ia-  
mais à aucun Prince yne occasion si illustre  
de se signaler par la Clemence, qui est la  
vertu par laquelle les Roys approchent  
d'auantage de Dieu, de qui ils sont plus les  
images en bien faisant, & donnant la vie,  
que non pas en destruisant, & extermi-

nant. Aureste, que plus la Rochelle estoit <sup>1628.</sup>  
coupable, & auoit donné suiet au Roy de <sup>Oct-</sup>  
tres grande irritation contre elle, plus il <sup>bre.</sup>  
feroit paroistre de vraye magnanimité,  
apres l'auoir surmontée par ses armes in-  
uincibles, & reduite à se soubmettre à luy  
nuëment, de se surmonter soy mesme en  
luy pardonnant. Ce que s'il faisoit, le nom  
celebre de cette Ville porteroit sa gloire  
par tout le monde, & la transmettroit aux  
aages suiuians, cōme du Prince qui se feroit  
monstré du tout incomparable, soit à vain-  
cre, soit à vser moderément de sa victoire.

Il pesa en second lieu les raisons qu'ils  
auoient alleguées, tirées de la Rochelle  
mesme, qui encores qu'elle fut coupable  
au de là de ce qui se pouuoit dire, Neant-  
moins tant de milliers à qui leur faute  
auoit cousté la vie, estoient des victimes  
suffisantes à la iustice de S. M. & interce-  
doient pour les miserables restes qui y pou-  
uoient estre, qui à en iuger par ceux qu'ils  
voyoient tous les iours autour des lignes,  
n'estoient plus que des Anatomies, & des  
fantosmes, & de vrayes images de la mort,  
dont la seule veuë suffiroit pour desarmer  
S. M. de son foudre, posé qu'elle eust eu  
dessein de le lancer dessus eux, & de chan-

1628. ger toute son irritation en pitié.

O&ob-  
bre.

Il adiousta qu'il sembloit bien qu'on d'eust aussi faire consideration de ce qui auoit esté allegué, qu'encores que leur crime fust tres grand & sans excuse, si est-ce qu'il n'auoit pas passé iusques à l'offence, laquelle seule forclost vn peuple de toute esperance de misericorde, à sçauoir lors qu'il a secoué l'autorité du Souuerain, & s'est soubmis à vn autre sceptre. A la verité, que sur la crainte qu'on leur donnoit, que S. M. en voulust à leur Religion, & pour tascher de conseruer leurs priuileges, ils s'estoient laissé tromper aux esprits factieux qui estoient parmy eux, pour adherer aux armes des Anglois. Mais que S. M. sçauoit que la Rochelle n'auoit serui que de pretexte ausdits Anglois, & qu'il y auoit d'autres raisons qui les auoient portez à entreprendre cette guerre. Et d'ailleurs qu'elle estoit parfaitement informée que l'intention de ceux de la Rochelle n'auoit iamais esté de se donner à eux; qu'elle l'auoit sceu par diuers de ses seruiteurs secrets qu'elle auoit en la Ville; qu'elle en auoit eu les aduis assurez par les confidens qu'elle entretenoit en Angleterre, qui auoient escrit constamment, qu'encores



qu'on eust tourné leurs Deputez de tous 1628.  
 les costez , & differé le secours , pour les Oâo-  
 obliger à s'offrir d'eux mesmes, ils auoient bre,  
 tousiours fait la sourde oreille : qu'on en  
 auoit eu la confirmation entiere par le pac-  
 quet , qu'une de leurs Pataches venant  
 d'Angleterre auoit ietté en la mer , lors  
 qu'au passage de la Digue , elle cuida estre  
 prise, veu qu'ayant esté retiré & déchiffré,  
 & le traité fait par leurs Deputez avec le  
 Roy d'Angleterre , & toute leur negotia-  
 tion, s'y estans trouuez, il y paroissoit, que *Voyez*  
 combien qu'on les eust muguettez pour *la page*  
 leur faire passer des conditions au preiudi- 93-  
 ce de la Couronne , ils n'auoient point  
 voulu y entendre , & s'en estoient deffen-  
 dus avec toute l'adresse & la fermeté que  
 l'estat où ils se trouuoient l'auoit peu por-  
 ter. Combien donc qu'ils fussent tres coul-  
 pables, neantmoins ce qu'ils auoient con-  
 serué le Cœur François , sembloit semon-  
 dre la grace du Roy , pour ne les traiter  
 pas comme en seroient dignes ceux qui  
 auroient voulu secoïer le ioug de la Mo-  
 narchie, & tendre les mains à vn autre  
 Maistre.

En troisiéme lieu il fit fort sur les rai-  
 sons d'estat, sur lesquelles les mesmes s'e-

1628. estoient fondez , & qui posé la constitution  
O&to- presente des affaires , requeroient que sa  
bre. Maieité par vn exemple signalé de Cle-  
mence , & vne Capitulation exactement  
entretenuë , fist tomber les armes des  
mains du Duc de Rohan , & des autres  
Villes rebelles , qui toutes auroient l'œil  
sur la Rochelle , pour selon le traitement  
qui luy seroit fait , en tirer la consequence  
pour elles mesmes. Posé donc que S. M.  
y vlast de rigueur , que la moindre bicoque  
soustiendroit le siege , & opiniastreroit la  
resistance iusques à la fin , là où au con-  
traire , le pardon absolu fait à cette-cy les  
disposeroit à recercher la clemence de S.  
M. qui dans peu de temps verroit tout son  
Estat en paix , & pourroit faire suite de ses  
desseins contre l'inuasion de l'Espagnol  
sur ses Alliez.

Il adiousta ce que les mesmes auoient  
aussi allegué , qu'encores que toutes appa-  
rences fissent croire que les Rochelois  
n'en pouuoient plus , neantmoins il n'e-  
stoit pas à croire , qu'ils eussent attendu à  
traitter iusques au dernier morceau , & que  
comme depuis trois mois on s'estoit trom-  
pé en l'opinion qu'ils ne pouuoient plus  
tenir , il se pourroit faire que ceux qui y

auoient le plus de voix, & qui craindroient 1628,  
chacun pour sa teste, prenaudroient pour O&O.  
empescher la Reddition, & faire tenir en- bre.  
core quelque temps. Or que le moindre  
delay estoit d'une grande consequence, à  
cause que les affaires d'Italie pressoient.  
Sur tout qu'il falloit fort considerer qu'on  
auoit au premier iour le Sieur Montaigu,  
qui estoit allé en poste en Angleterre, pour  
auoir l'aduen de son Roy touchât la reddi-  
tion de ceste Ville, laquelle il seroit infini-  
ment plus glorieux à S. M. de receuoir à  
grace par la repentance de ses Sujets, &  
leur volontaire obeissance à ses comman-  
demens, que par l'entremise d'un Prince  
Estranger. Ainsi qu'il importoit fort de  
preuenir ledit Montaigu, afin qu'à son ar-  
riuée il trouuast S. M. triomphante au lieu  
de sa glorieuse conqueste, & qu'on ne fust  
pas obligé sur les cōtestations qu'on pour-  
roit auoir avec luy, touchant les cōditions  
de cette reddition, de s'engager en plus de  
guerre avec l'Angleterre, avec laquelle les  
affaires requeroient qu'on taschast au con-  
traire de faire la paix.

Ce fut en substance ce que Monsieur le  
Cardinal de Richelieu representa à S. M.  
qui declara, que tout bien pesé, elle vouloit



1618. tromper ceux de la Rochelle; & qu'ils be-  
O&o- nissent son entrée en leur Ville, & com-  
bre. manda qu'on leur donnast toute assurance  
pour leur vie, leurs biens, & leur Re-  
ligion, & qu'oubliant toutes leurs fautes;  
il les traiteroit comme les autres Suiets;  
pourueu qu'ils luy fussent fideles à l'adue-  
nir. Mais qu'il entendoit que leurs murail-  
les fautassent, pour leur oster le moyen de  
se rendre vne autrefois miserables, & qu'il  
ne se parlast plus de leurs priuileges, qui  
leur auoient iusques là tant enflé le cœur.

C'est le contenu de la piece susdite, que  
i'ay estimé digne d'estre inserée en ce lieu;  
veu qu'elle sert à esclaircir les Articles qui  
furent en suite accordez à la Rochelle.

Le 27. le Conseil du Maire estant assen-  
blé, ceux qui auoient esté enuoyez vers le  
Sieur de Fequiere, rapporterent qu'il auoit  
tesmoigné iuger necessaire, que pour tirer  
du fruit de son entremise; qu'ils auoiēt de-  
sirée, on luy nommast quelques vns, avec  
lesquels il peust communiquer, auant l'ar-  
riuée de son Beaufrere, qui ne tarderoit  
pas, comme il esperoit; Ce qui ayans esté  
approuué, on deputa vers luy les Sieurs  
Viette, Riffaut, Moquay, & Charles de la  
Coste.

Le mesme iour, sur les dix heures du <sup>1618.</sup> matin, le sieur Arnault se presenta, avec <sup>Octobre.</sup> des passeports pour des Deputez, si on en vouloit enuoyer, & furent choisis les quatre sus nommez, qui allerent avec luy vers Monsieur le Cardinal de Richelieu, qui apres les auoir ouys, leur dit qu'il n'auoit aucune charge du Roy, de traiter avec ses subiets de la Ville de la Rochelle, mais seulement de les ouyr en leurs propositions & demandes. Neantmoins qu'il ne laisseroit pas de s'employer pour eux envers S. M. à leur faire accorder la vie, la Religion, & les biens. Mais que quant à leurs priuileges, & forme de gouuernement S. M. en ordonneroit à sa volonté, non qu'elle voulust mettre des gens de guerre dans la Ville, ni faire de Citadelle, mais plustost en faire raser les fortifications, & que dans le iour, ou le lendemain au plus tard, ils eussent à luy renuoyer les mesmes, où autres, pour en accepter les conditions. Outre qu'il leur fit cette responce de bouche, il la leur donna par escrit, en vn petit billet.

Estans reuenus, le Maire & son Conseil ordonnerent que la cloche de l'Hostel de Ville sonneroit le lendemain 28. à sept

1628  
Octo-  
bre,

heures du matin, afin de se resoudre dessus ces offres. Ainsi s'estans assemblez audit Hostel de Ville, & ayans ouy le rapport desdits Deputez, comme la teneur dudit biller, Il fut arresté de receuoir les meilleures conditions de paix que faire se pourroit: Et pour cét effect furent nommez les Sieurs d'Angoulins & de la Goute, pour avec les susdits Deputez en concerter les Articles.

Les ayans dressez, & fait voir au Cōseil, ils sortirent de la Ville sur les trois à quatre heures du soir, & allerent trouuer Monsieur le Cardinal de Richelieu à la Sauzaye qui les remit au lendemain matin, & les fit bien traiter, & coucher.

Le lendemain matin 29. estans appelez deuant luy, ils le trouuerent avec Mrs. le Gardes des Seaux, le Marechal de Schoenberg & autres Seigneurs du Conseil, & luy presenterent leurs propositions & demandes; Sur lesquelles il leur dit, que la volonté du Roy estoit de leur accorder de sa pure grace, la vie, les biens, & la liberté de cōscience. Mais quant à l'un de leurs Chefs qui portoit qu'ils desiroient traiter generalement pour tous ceux de leur party, qu'il n'en falloit point parler, mais penser



à eux seuls, selon qu'aussi les François qui estoient en l'armée Angloise, traittoient pour eux à part, Surquoy, afin de le leur mieux persuader, il leur fit voir leurs Deputez, sans permettre toutefois qu'ils se parlassent. En fin apres plusieurs contestes & sur tout sur la liberté de l'exercice de la Religion en l'enclos de la Ville : Ils arresterent les Articles de la paix sous les conditions qui s'ensuiuent.

1628.  
Octo-  
bre.

Les Maire, Escheuins, Pairs, Bourgeois, & Habitans de la Ville de la Rochelle, representez par Iean Berné, Escuyer, Sieur Dangoulin; Pierre Viète, Escuyer, Escheuins; Daniel de la Goutte, Iacques Riffaut, Pairs; Elie Mocquay, & Charles de la Coste, Bourgeois, ayans charge & Deputez par le Corps de ladite Ville, recognoissans l'extrême faute qu'ils ont commise, non seulement en resistant aux iustes volontez du Roy, comme ils ont fait depuis long temps, au lieu de s'y soumettre & luy ouvrir les portes de la Ville de la Rochelle, ainsi qu'ils estoient obligez: mais en outre d'auoir adheré aux Estrangers qui ont pris les armes contre cet Estat. Suppliant avec toute humilité Sa Maiesté de leur pardonner le Crime

1628. qu'ils ont commis en se gouuernant de la  
O<sup>cto</sup>- sorte, & receuoir pour satisfaction d'ice-  
bre. luy, l'obeyssance presente qu'ils luy desi-  
rent rendre, luy ouurant les Portes de la  
Ville qu'ils remettront actuellement entre  
ses mains pour en disposer ainsi qu'il luy  
plaira, & leur prescrire telle façon de viure  
qu'il estimera plus à propos pour l'aduenir  
sans autres conditions que celles qu'il plai-  
ra à Sa Majesté leur faire par sa Bonté, la-  
quelle ils implorent avec humilité, la sup-  
pliant de les traiter comme ses Suiets, qui  
veulent à l'aduenir viure & mourir en la  
plus parfaite obeyssance qui ait esté iamais  
rendue à aucun Souuerain.

Le Roy ayant esgard à la repentance de  
ses Suiets, les habitans de sa Ville de la  
Rochelle, & aux protestations de viure à  
l'aduenir comme ils sont obligez par leurs  
naissance. (Ce qu'ils tesmoigneront dès  
demain Lundy trentième d'Octobre, ou-  
urans les Portes de ladite Ville de la Ro-  
chelle à sa Majesté, pour en disposer com-  
me bon luy semblera) a commandé &  
donné charge aux Sieurs de Marillac & du  
Halier Marechaux de Cáp en ses armées de  
leur promettre en son nom, ce qui s'ensuit.

Premierement le pardon de leurs fautes

& rebellions commises depuis ce dernier 1628.  
mouvement, avec toute seureté pour leur Ocio-  
vie, & l'exercice de leur Religion P. R. bre.  
en la Rochelle.

2. Qu'ils seront restablis en tous leurs biens meubles & immeubles de quelque nature qu'ils puissent estre, Nonobstant toutes condamnations, dons, & confiscations, qui en pourroient auoir esté faites, à cause du crime de rebellion, fors & excepté la iouissance & reuenu de leurs terres, les meubles, bois-coupez, & debtes, qui auroient esté actuellement & sans fraude receuës iusqu'à present.

3. Que tous les gens de guerre, Suiets du Roy, qui se trouueront maintenant dans la Ville de la Rochelle, non Bourgeois & habitans de ladite Ville, iouront des graces cy dessus exprimées; & les Chefs, Capitaines & Gentilshommes, sortiront de ladite Ville, l'espée au costé, & les soldats le Baston blanc à la main: & de tous sera fait estat, de leurs noms & surnoms, & feront serment de ne porter iamais les armes contre le Seruice de sa Majesté, sur peine d'estre decheus de la presente grace. Et quant aux Capitaines & soldats Anglois, qui se trouueront en la-



1628. dite Ville, ils seront s'il plaist à sa Majesté  
Octo- conduits par mer en Angleterre, sans qu'il  
bre. leur soit fait aucun desplaisir.

4. Seront lesdits de la Rochelle, tant  
habitans que gens de guerre, deschargez  
de tous actes d'hostilité generalement  
quelconques, Negotiationsés pays estran-  
ges, & de tous autres, sans qu'ils puissent  
estre recherchez, fors pour le regard des  
cas execrables exceptez par les Edits, & de  
ceux qui peuuent concerner la personne  
du Roy.

5. Comme semblablement demeure-  
ront lesdits de la Rochelle deschargez des  
fontes de canon, & fabrications de mon-  
noye, faïssies & prises de deniers, tant  
Royaux, Ecclesiastiques, qu'autres en ladite  
Ville. Ensemble des contributions ordon-  
nées pour l'entretienement des gens de  
guerre, & contrainte decernée contre les  
absens, & mesme par demolition de leurs  
maisons, & de tous autres emplois aux  
choses susdites en ladite Ville,

6. Demeureront pareillement, tous les  
habitans & gens de guerre deschargez de  
tous Jugemens, Sentences, & Arrests,  
qui pourroient auoir esté donnez contre  
eux à l'occasion de leurs rebellions, pen-

dant ces mouuemens.

1628.

Octobre.

7. Que tous Iugemens tant Ciuils que Criminels donnez dans les Conseils tenus extraordinairement en ladite Ville, les Iuges Conseillers & Commissaires qui y auroient assisté, n'en pourront estre recerchez, ny mesme les particuliers, au profit desquels ils auroient esté donnez, pource qui concerne les prises & Butins, & sur le tout sera imposé silence au Procureur General & à ses Substituts.

8. Que les iugemens, amandes, condamnations, suspensions, & interdictions données par les Iuges Presidiaux, tant contre les Maires de ladite Ville, que ceux qui les ont assiste, demeureront nuls, & comme non aduenus. Comme semblablement les procedures faites en suite contre aucuns desdits Iuges demeureront nulles, sans qu'aucun de ceux qui ont esté employez de part & d'autre en puissent estre recerchez.

9. Demeurera aussi le iugement pour la mort de Touruert nul, & ceux qui en sont chargez par ledit iugement n'en pourront estre recerchez.

10. Tout le contenu cy dessus, sera ratifié par le Maire, Escheuins, Pairs, Bour-

1628. Oô-  
bre. geois & habitans de ladite Ville, & ladite  
ratificatiô sera apportée dans aujourd'huy  
deux heures apres midy, en bonne & Au-  
thentique formé. Apres quoy il plaira au  
Roy faire deliurer ausdits Deputez lettres  
de Declaratiô, qui approuuent & ratifient  
ce que dessus.

11. Et lesdites ratifications estans deli-  
vrées les Portes de la Ville seront ouuertes  
& mises en la possession de ceux, qu'il plai-  
ra à sa Maiesté ordonner: Afin qu'en suite,  
il y puisse faire son entrée en personne;  
quand & ainsi qu'il luy plaira. Promettant  
sa Majesté, par sa Bonté faire apporter vn  
tel ordre à l'entrée & logement des gens  
de guerre en ladite Ville, qu'aucun habi-  
tant d'icelle, femmes & enfans n'en rece-  
uront aucun deplaisir, soit en leurs person-  
nes, soit en leurs biens.

Faiât & arresté au Chasteau de la Sausaye  
le 29. Oôob. 1628. Ainsi Signé Louys de  
Marillac, Leâ Berne, Pïerre Viette, Riffault,  
de la Goute, de la Coste, & Mocquay.

Au mesme tēps les Deputez qui estoient  
en l'armée Angloise, firent leur traité à  
part: Apres que celuy de la Ville eut esté  
elôs; Et d'autant que leur mesnagement  
ayant esté secret, & leur arriuée au Camp  
du



du Roy, inopinée à plusieurs. Diuers ont <sup>1628.</sup>  
eu desir d'en sçauoir les particularitez, <sup>Octo-</sup>  
i'ay pris soin de m'en informer, par eux <sup>bre.</sup>  
mesmes, & croy en deuoir faire part au  
public, comme de chose appartenant à  
l'Histoire, Voicy donc mot à mot ce qu'ils  
m'en ont communiqué, extraict du Jour-  
nal du sieur Vincent, l'vn d'eux, dont i'ay  
veu l'original.

Le septième d'Octobre mil six cens  
vingt & huit, vne chalouppe partant de  
l'armée du Roy, & se tenant à my-chemin  
du lieu nommé la Palice, avec vn drapeau  
blanc, demanda à communiquer avec  
les Deputez de la Rochelle, & les Fran-  
çois.

Par la permission du General Anglois,  
le sieur Forin Deputé de Mr. le Duc de Ro-  
han, avec quelques autres, & le Milhord  
Môtaigu, se rendirent à cette chaloupe, où  
ils trouuerent le sieur Treillebois, l'vn des  
Capitaines du Roy, qui fait profession,  
de la Religion avec le sieur de l'Isle, Aide  
Major en la mesme Armée: qui pour tou-  
tes propositions firent ouuerture aux Fran-  
çois, qui estoient en l'armée Angloise de  
se retirer, & rechercher la grace du Roy,  
qui les receuoit à mercy; & trouueroit

1628. bon qu'ils intercedassent vers luy pour la  
Octo- Ville de la Rochelle; Surquoy on rompit,  
bre. seulement Montaigu, se faisant recognoistre pria les susnommez de presenter ses baise-mains à M. le Cardinal de Richelieu.

Le 13. il reuint quatre Anglois, qui auoient esté pris prisonniers par les Vaisseaux du Roy, qui se loüoient du bon traitement qu'on leur auoit fait, & dirent auoir charge de Monsieur le Cardinal de Richelieu, de dire au sieur de Montaigu, qu'il auoit pris ses baise-mains en bonne part, & luy donnoit assurance de tout bon traitement, en cas que luy deuxième allast conserer avec luy : Dequoy il esperoit du bien pour les deux Couronnes.

Le lendemain 14. le Conseil fut assemblé, où furent appelez Monsieur de Soubize, & les Deputez de la Rochelle. Le sieur de Montaigu y proposa, qu'il seroit expedient pour bien recognoistre la Digue, qu'il prist l'occasion de la semonce qui luy auoit esté faite le iour auparauant, d'aller au Camp du Roy, & que menant avec luy vn Ingenieur il en rapporteroit toute nouuelle assurée.

Les Deputez s'escrierent contre cette proposition, representans qu'il n'en pour-

roit arriuer que tout mal, veu que désaussi 1628.  
toft que le moindre bruit, s'espandroit en Oâo-  
l'armée de quelque commencement de bre,  
Traicté, il ne falloit plus esperer que les  
courageux qui estoient desia assez affadis, se  
resolussent à combattre. Quant à ce des-  
sein de recognoistre la Digue, que ceux  
vers lesquels ils iroient, estoient pour le  
moins aussi fins comme eux, qui ne la leur  
laisseroient voir sinon és lieux les plus em-  
barassez, tellement que leur rapport ne  
seruiroit sinon à mettre de l'espouuante.

Nonobstant il fut resolu qu'il feroit le  
voyage, avec vn Ingenieur Allemand, &  
estant parti à l'instât, dés le mesme iour re-  
tournerent : Rapportans que Monsieur le  
Cardinal de Richelieu les auoit bien ac-  
cueillis, & fait des propositions concer-  
nans le bien general de la Chrestienté,  
dont il les auoit chargé de conferer avec  
le General.

Le 15. le mesme Montaigu retourna au  
Camp du Roy. Ce qui mettant en alar-  
me les Deputez, ils allerent au Bord du  
General luy représenter les consequences  
de telles communications. A quoy il leur  
respondit, qu'il ne seroit rien fait à leur  
preiudice.



1628. Le 19. Montaigu retourné avec son In-  
Octo- genieur, rapporta que la Digue estoit du  
bre. tout inforçable, & que Monsieur le Car-  
dinal de Richelieu luy auoit fait des pro-  
positions, au moyen desquelles la Rochel-  
le pouuoit esperer tout raisonnable traite-  
ment, & les deux couronnes vne bonne  
paix entr'elles, dont il sembloit qu'il estoit  
nécessaire qu'il allast en poste en commu-  
niquer au Roy d'Angleterre.

Les Deputez dirent là dessus qu'ils voy-  
oient l'effect dès auparauant proué par  
eux, que la Rochelle n'estoit point en estat  
d'attendre vn voyage d'Angleterre, veu ce  
qu'ils sçauoient de son effroyable necessi-  
té. Qu'au parauant que de dire la Digue in-  
forçable, il eust fallu auoir essayé à la for-  
cer, & sur tout auoir employé l'un des Vais-  
seaux à Mine, qui ayant le double de pou-  
dre que ceux qui furent employez à la sta-  
cade d'Anuers, feroit vne ouuerture suffi-  
sante, quand mesme la Digue seroit forte  
au double. Bref, ils n'obmirent rien de ce  
qu'ils iugerét deuoir estre dit pour tascher  
à rompre ce dessein.

Il fut resolu nonobstant que Montaigu  
prendroit la Poste, promettant d'estre de  
retour dans quinze iours pour le plus tard,

avec promesse faite aux Deputez que si le 1628.  
vent venoit fauorable, on n'espargneroit OÙ-  
nule effort. bre.

Le 21. le General manda le sieur Vincent, & luy dit, qu'il sembloit que Dieu combattist du Ciel, contre le passionné desir qu'il auoit de faire quelque execution genereuse pour secourir la Rochelle : Que depuis son arriuée, il s'estoit escoulé vingt & deux iours, où de calmes opiniastre, ou de vents contraires pour donner à la digue: Que les principaux de son armée, sembloient peu affectionnez à cette entreprise, veu l'opinion qu'ils auoient concertée qu'elle n'estoit executable : Que des Chefs la maladie auoit passé au corps, de sorte qu'il voyoit en toute son armée vn grand refroidissement : Nonobstant qu'il n'espargneroit rien de ce qui pourroit dependre de luy, pour venir à bout de son entreprise. Mais en tout euenement, & posé sur tout que la saison continuast à n'estre fauorable, il iugeoit à propos que la Rochelle fut aduertie du commencement de traité, afin que de sa part elle s'y disposast, & qu'à l'arriuée de Montaigne toutes choses fussent préparées à vn bon accommodement, s'il n'y auoit autre moyen de la secourir.

1628. Le sieur Vincent en communiqua dès  
 Octo- l'instant, avec Monsieur de Soubize, & les  
 bre. autres Deputez, qui tous ensemble conclu-  
 rent qu'en toutes manieres il estoit neces-  
 saire d'en informer ceux de la Rochelle: &  
 se souuenans de l'instance, que leur auoit  
 fait auparauant le sieur de Treillebois,  
 qu'eux deputez s'entremissent vers le Roy  
 pour recercher sa grace, & la moyenner à  
 leurs concitoyens, afin qu'ils la deus-  
 sent à sa Bonté, plustost qu'à vne entre-  
 mise estrangere, ils creurent qu'il seroit  
 bon d'en auoir communication avec luy,  
 & qu'il falloit en rechercher les moyens.  
 C'est ce qu'ils firent sçauoir au General  
 Anglois: Duquel ayans eu l'approbation,  
 ils depescherent vn prisonnier nommé  
 Farnou, appartenant audit sieur Treillebois  
 auquel ils escriuirent cette lettre.

*Lettre  
 des De-  
 putez  
 en l'ar-  
 mée  
 An-  
 gloise  
 au sieur  
 Treille-  
 bois  
 Capi-  
 taine  
 en l'ar-  
 mée du  
 Roy.*

**M**ONSIEUR, Depuis vostre  
 abouchement avec Messieurs Forin  
 & Montaigu, le dernier ayât esté au Camp  
 de sa Maiesté, & eu conference avec Mon-  
 sieur le Cardinal de Richelieu, sur les  
 moyens d'un accommodement entre les  
 deux Couronnes, moyennant lequel, peust  
 estre procuré le bien General des affaires  
 de la Chrestienté, & le soulagement de



nostre pauvre Ville en particulier ; Le desir  
extrême que nous aurions de contribuer  
à vn si bon œuure , tout ce qui peut estre  
du nostre : A fait que nous qui agissons icy  
pour la Rochelle , sommes interuenus vers  
Monsieur le General de cette armée , pour  
le prier de trouuer bon que nous fissions  
supplier tres humblement S. M. de nous  
oëtroyer vn passeport pour en aller com-  
muniquer avec ceux qu'il luy plairoit nous  
commander. C'est ce que nous auons ob-  
tenu de luy. Que si S. M. se trouue pareil-  
lement disposée , & qu'elle ait agreable  
que d'eux d'entre nous allions en son Cāp  
pour cet effect , il y a tout suiet d'esperer  
qu'il en reüssira du fruiët. Il ne reste donc,  
sinon, que nous trouuions le moyen de luy  
faire sçauoir nostre desir , & apprendre ses  
volontez. Or eussions nous creu vous faire  
tort ( puis que vostre affection vous auoit  
porté à nous preuenir par vostre semonce  
pour cela mesme , dequoy maintenant il  
s'agist ? ) si nous eussions employé l'entre-  
mise d'aucun autre. Nous nous adressons  
donc à vous, Afin qu'il vous plaise mesna-  
ger cela , par les moyens que vostre sage  
prudence sçaura bien suggerer. Nous ne  
vous specifions pas les noms de ceux qui

1628.  
Oëtob-  
bre.

1628. *Octobre.* aurôt à faire le voyage, & faudroit les laisser en blanc. Mais sur nostre parole vous pouuez donner la vostre, qu'on les reconnoistra desirieux de la paix, & ayans le cœur vraiment François. Quant à la forme du passeport il est superflu de vous prier qu'elle soit telle, que ceux qui iroient sous la foy d'iceluy, soient en assurance pleine, & ayent leur liberté entiere pour l'aller & pour le retour. De cela & de tout le reste, qui peut concerner cette affaire, nous nous en remettons à vostre bon soin, & attendans vostre responce par le sieur Farnou, duquel nous auons moyenné la liberté, pour là nous apporter, apres vous auoir rendu cette-cy. Nous ne la ferons plus longue, que pour demander à Dieu, qu'il luy plaise calmer ces orages, qui depuis si long temps trauaillent la France nostre chere patrie, & y affermir vne bonne paix, au moyen de laquelle il soit seruy, le Roy nostre Prince obey, & les ennemis de sa Couronne deceus és esperances qu'ils peuuent auoir conceuës. En nostre particulier, nous sommes.

MONSIEUR,

*A la Rade de Chef de Baye*

*ce 22. Octobre 1628.*

Vos, &c.

Ce

Ce prisonnier depesché le vingt & deux 1628.  
avec cette lettre : Le Capitaine Forant Odo-  
amena vn Nauire , d'environ deux cens bre.  
tonneaux bien équipé en guerre , qui  
sans resistance s'estoit laissé prendre à luy :  
où commandoit vn nommé Poyane , de la  
Religion , mais suspect , depuis long temps :  
& où estoit aussi vn gentilhomme nommé  
Beaurepaire. Les ayant presentez au Gene-  
ral , il fut trouué à propos d'arrester Poya-  
ne : & quant à l'autre , s'estant fait enten-  
dre dès le commencement qu'il auoit à  
dire des choses de grande consequence , &  
qui demandoient le secret , on l'ouyt en  
particulier.

Là il declara qu'ayant esté retiré d'Es-  
pagne , où il estoit prisonnier à cause de  
la Religion , on auoit stipulé de luy , qu'il  
rendroit seruice au Roy , en vne occasion ,  
où S. M. trouuoit bon de l'employer :  
qu'ayant tout promis pour sortir du peril ,  
& de la misere où il estoit , on l'auoit asso-  
cié avec Poyane pour venir en l'armée An-  
gloise , sous pretexte d'y vouloir seruir le  
Party , & qu'il auoit ordre à la premiere  
occasiõ de nuict opportune de s'embaras-  
ser avec le vaisseau du General , où celuy  
de Monsieur de Soubize , & se sauuans



1628. quant & eux en vne chaloupe, mettre le  
 O<sup>cto</sup> feudans leurs poudres : & afin de se con-  
 bre. cilier plus de creance, que son ordre por-  
 toit d'offrir son employ, mesme pour por-  
 ter des lettres en la Rochelle. & en rappor-  
 ter responce, dequoy on luy faciliteroit les  
 moyens le laissant aller & venir, sans faire  
 semblant de le voir, iusques à ce qu'il eust  
 fait son coup.

Ayant deduit le tout bien par le menu,  
 il dit pour closture, qu'autre estoit l'inten-  
 tion de ceux qui l'enuoyoient, & autre la  
 sienne ; & que sa premiere obligation  
 estant à sa conscience & à sa Religion, il  
 auoit voulu declarer dès l'entrée ce qu'on  
 auoit stipulé de luy, & le dessein de Poy-  
 ne, afin qu'on eust moyen d'y remedier.  
 D'ailleurs que si ils ingeoient à propos de  
 mesnager à leur aduantage ce qu'on auoit  
 desseigné contr'eux, il estoit prest (tenant  
 la chose sous le silence) d'aller au Camp  
 du Roy, faignant tousiours estre bien in-  
 tentionné, & selon ce projet qu'il peust  
 porter des lettres à la Rochelle, où en rap-  
 porter pour gagner creance, l'executer  
 tout à bõ, & faire scauoir au vray à ceux de  
 la Rochelle, ce qu'ils desireroient de leur  
 mander, & rapporter aussi l'estat de la ville.

Ses propositions ouys, il sembla bien 1628.  
aux Deputez que cet homme parloit avec Octobre.  
ingenuité, mais au fond pourtant qu'il n'y  
auoit pas grand lieu de se fier à vn qui  
ioüoit ainsi le doublé, & que ce pourroit  
estre vne triple & contre trahison. Neant-  
moins tout bien pesé, & les choses redui-  
tes au poinct où elles se trouuoient, ils iu-  
gerent à propos de s'en seruir en tout eue-  
nement, s'y mesnageans en sorte, que quād  
mesme il les fourberoit, & suiuroit les  
mouuemens de ceux qui les premiers l'a-  
uoient employé; Eux Deputez en tirassent  
tousiours le fruiet auquel ils visioient, qui  
estoit de noüer communication entr'eux &  
la Ville, & preparer les choses à l'accom-  
modement proietté.

L'ayans ainsi arresté entr'eux, & en ayās  
communiqué au General, ils luy donnē-  
rent deux lettres, l'vne sans chiffre, laquel-  
le il peult faire voir à Messieurs les Mini-  
stres, & qui estoit accommodée à ce qu'ils  
desiroient qu'ils sceussent, & l'autre en vn  
chiffre tres difficile, & tel que iamais nulle  
de leurs lettres interceptes, dont il y a eu  
nombre, n'a peu estre dechiffrée, par la-  
quelle ils exprimoient au vray le fond de  
leurs intentions, avec charge de la point

1648. monſtrer en Cour, mais la rendre ſeulement au Maire. De plus à cette ſeconde  
Oſto-  
bre. lettre, Monſieur de Soubize en ioignit  
vne à Madame de Rohan ſa Mere de la  
meſme teneur, les voicy toutes trois ſe-  
lon qu'elles luy furent confiées.

*Lettre  
non  
chiffvée  
du ſieur  
Vincent  
à Meſ-  
ſieurs  
de la  
Rochel-  
le.*

**M**ESSIEURS,  
Depuis la venuë du ſieur la Lande  
du Lac, dont nous vous auons aduertis par  
les ſignals conuenus, nous ne vous auons  
depeſché perſône, veu que celle que Char-  
daveine vous à renduë, contenoit tout ce  
que nous vous euſſions ſceu dire. Du depuis  
les calmes opiniaſtres, & les vents contrai-  
res nous ont empesché de rien tenter: mais  
ils n'ont pourtant ralanty la ferme reſolu-  
tion qu'on a de vous ſecourir à quelque  
prix que ce ſoit. Si ce pouuoit eſtre par vn  
traicté, pluſtoſt que par l'eſſuſion du ſang,  
vous & nous aurions ſuiet d'en louer Dieu;  
Or il ſemble qu'il y a quelques inclinations  
reciproques pour cela, & que l'abouche-  
ment de Monſieur de Montaignu avec Mon-  
ſieur le Cardinal, & ſon voyage avec paſſe-  
port vers l'Angleterre, nous promettent  
cet effect. Pour de noſtre part y travailler,  
nous recherchaſmes hier vne voye pour ob-



tenir s'il se peut vn passeport , afin que <sup>1628.</sup>  
deux de nous aillent au Camp de Sa Maje- <sup>Octo-</sup>  
sté. Quesi il nous est accordé, & que nous <sup>bre.</sup>

reconoissions qu'on y marche avec fran-  
chise; nous tascherons d'auoir là permis-  
sion de nous en aller aboucher avec vous,  
pour vous informer de tout , afin que sur  
cela vous preniez vos resolutions. Cepen-  
dant nous ne vous dissimulerons la crainte  
où nous sommes, que de ces pourparlez, on  
ne veille faire vn piege, pour vous surpren-  
dre , & nous endormir. Vostre diligence  
remediera au premier ; & pour ce qui est  
de deçà vous vous pourrez reposer sur no-  
stre soin. D'autant plus qu'il est secondé  
des tres bonnes intentions de Monsieur le  
General. Nous nous remettons du reste à  
ce que vous dira ce Gentilhomme confor-  
mément à ce que dessus. Et sur l'assuran-  
ce qu'il nous a donnée de pouuoir aller &  
retourner, nous esperons qu'il nous rap-  
portera à plein vostre Estat: & sur ce nous  
prions Dieu, qu'il vous donne de conti-  
nuer les miracles de vostre patience, ius-  
ques à ce qu'il luy ait pleu vous deliurer  
tout a fait, ce sont, Messieurs,

*Vos tres humbles & tres obeysans seruiteurs les  
Deputez de vostre part vers le Roy de la*

1628. Grand' Bretagne, & pour tous en l'absence  
O&o- des sieurs Bragueau, Dehinffe, & Gobert,  
bre. qui sont en vn autre bord, & que nous n'auons  
peu aduertir de cette occasion. Ph. Vincent.

Du Bord de Mr. de Soubize ce Lundy ma-  
tin 13. Octobre 1628.

Depuis la presente escrite, s'est donnée  
l'escarmouche que vous auez peu voir. El-  
le n'a cousté la vie à personne de nos gens:  
Mais bien la liberté à plusieurs Capitaines  
pour auoir mal fait, & d'autres ont esté sub-  
stituez pour faire mieux. Ne vous en des-  
couragez donc point, & vous assurez que  
si Dieu plaist on trauaillera avec tout ce  
qui se peut d'affection, & de diligence  
pour vous secourir: & que les deffauts du  
passé, seruiron de leçon pour l'aduenir.

L'autre lettre en chiffre dudit Sieur Vin-  
cent au Maire en particulier estoit telle.

*Autre  
Lettre  
en chif-  
fre du-  
dit Sr.  
Vincet  
au Mai-  
re en  
parti-  
culier.*

**M**onsieur, Outre la generale, ie  
vous fay cette cy, en particulier, à  
laquelle combien quelle ne soit signée que  
de moy, vous ne laisserez s'il vous plaist,  
de donner vne entiere creance, d'autant  
plus que celle que Monsieur de Soubize  
escrit à Madame de Rohan sa Mere, vous

en confirme le contenu. L'une & l'autre 1628.  
sont pour vous tesmoigner nos extrêmes Octo-  
craintes sur le subiet du voyage du Sieur de bre.  
Montaigu en Angleterre ; y ayant toute  
apparence qu'il a conuenu de quelque cho-  
se avec Monsieur le Cardinal à nostre pre-  
judice, & qu'il est allé pour y faire consen-  
tir le Roy de la Grand' Bretagne. Outre ce-  
la, nous nous trouuons en vne autre peine  
qui est plus grande. Sur ce que nous remar-  
quons icy tout visiblement vn notable re-  
froidissement en plusieurs, sur la creance  
qu'ils se veulent imprimer, que la Digue  
est impossible à forcer. A ces deux maux,  
qui sont extrêmes, nous pouruoyons de  
tout nostre pouuoir aux remedes. Quant  
au premier, Monsieur de Soubize a escrit  
puissamment audit Roy, Et moy tres par-  
ticulierement à Monsieur Dauid. Ce qui  
nous fait esperer qu'on n'aduancera rien  
contre nous de ce costé là: loint que sça-  
chant au vray les genereuses inclinations  
de ce Prince, Nous n'estimons pas que  
rien soit capable de le desmouuoir de ce  
qu'il nous a tant promis : sans dire que  
quelque diligence que face ledit M<sup>o</sup>taigu;  
Nous preiugeons bien, que si nous ne vous  
secourons auant son retour, vos extrém-



1628. tez ne sçauroient l'attendre ; Et ainsi qu'il  
O&obre. faut de toute necessité , ou que nous vous  
sauuions promptement, où que vous fussiez  
perdus. Nostre plus grand trauail est , sur  
l'affadissement de ces gens icy , entre les-  
quels il y en a plusieurs , qui pour passer  
leur lascheté, alleguent la crainte de man-  
quer de viures , & aussi les maladies qui  
commencent à se mettre en quelques Vais-  
seaux. Contre cela nous faisons tout de-  
voir de fortifier Monsieur le General, Qui  
quant à luy est tres bien disposé , & nous  
promet tousiours qu'au premier vent que  
Dieu nous donnera fauorable il fera le  
possible pour acheuer cette entreprise:  
Monsieur le Comte de Morton, pareille-  
ment , qui est Vice Admiral, & les Princi-  
paux Chefs nous promettent merueilles,  
& ne se passe heure que nous ne les allions  
solliciter. Sur tout Monsieur de Soubize  
s'y employe avec vne affection, & vne assi-  
duité extraordinaire. Neantmoins luy &  
nous craignons au possible , que ceux des-  
quels depend l'exécution ne secondent pas  
les bonnes intentions de leurs Chefs, &  
font aussi mal qu'ils firent lors de la se-  
conde attaque, & que cependant le temps  
venant à couler, cela ne nous couste vostre  
ruine.

ruine. Ainsi nous auons estimé, qu'il estoit <sup>1628</sup>  
entierement necessaire d'auoir deux cor- <sup>Octo</sup>  
des en nostre arc, & puis que Montaigu <sup>bres</sup>  
auoit ouuert la voye d'un traité, de tenter  
ce qui se pourroit faire de ce costé là. C'est  
pourquoy apres auoir engagé Monsieur le  
General par vne promesse tres solemnelle  
qu'il nous tiendra sa parole pour donner  
quand Dieu nous en presentera l'occasion:  
Nous depeschasmes hier un prisonnier  
vers Monsieur de Treillebois, qu'icy de-  
uant nous auoit semonds de demander au  
Roy, qu'il vous receust en sa grace, & luy  
auons escrit, que si il nous moyennoit un  
passeport, deux de nous irions au Camp,  
pour conferer avec ceux que Sa Majesté  
nous voudroit commander; & contri-  
buer ce qui seroit du nostre à un bon ac-  
commodement. Nous en attendons la  
responce. Que si ce passeport nous est ac-  
cordé, nostre dessein est d'ouyr, tout ce  
qui nous pourra estre proposé, & sans  
rien reietter, ny aussi l'approuuer, faire en  
sorte qu'on nous donne passeport, pour en  
aller conferer avec vous. Voila au vray  
l'estat des affaires. Surquoy ie m'asseure,  
qu'il vous naistra diuerses perplexitez:  
Mais à mon aduis, tout ce que vous pou-

1628. uez faire pour le present est, d'escrire for-  
Octo- tement à Monsieur le General, & luy re-  
bre. presenter qu'elle indignité ce seroit qu'a-  
pres auoir tant languy & veu mourir la  
pluspart de vos Citoyens, en l'attente  
de tant reiterées promesses de Sa Maje-  
sté, luy estant venu pour les executer,  
où s'en retournast sans auoir employé les  
moyens qu'il a pour cela, ou fust le mo-  
yenneur d'un accommodement qui vous  
mist le cousteau à la gorge. Quant à celle  
qu'il vous plaira nous escrire, ie vous sup-  
plie de nous exprimer bien particuliere-  
ment tout vostre estat, & sur tout iusques  
où vous pouuez encore aller, vous asseu-  
rant que nous le mesnagerons avec tout ce  
qui se peut de discretion, & n'obmettrons  
rien de tout ce qui nous sera possible pour  
conduire cette affaire à vne heureuse fin,  
nonobstant les difficultez qui s'y trouuent.  
Dieu vueille estendre sa benediction sur  
tout cela. Il m'est témoin de la douleur que  
ie ressens pour vos miseres, du deuoir que  
i'ay fait pour les preuenir, & que si ma vie  
y pouuoit seruir de remede, ie l'y employe-  
rois tres gayement. Au bout pourtant i'es-  
pere que la Diuine bonté nous regardera  
en pitié, & que i'auray la consolation de



l'aller remercier avec vous, & de vous as- 1628.  
seurer de quelle affection ie suis, Oôto-  
bre.

MONSIEVR,

Au bord de Monsieur  
de Soubize, ce 23.  
Oôtobre 1628.

*Vostre tres humble &  
tres obeyssant seruiteur.*  
PH. VINCENT.

Telle fut aussi la lettre en chiffre de Mr.  
de Soubize à Madame de Rohan sa Mere.

MA MERE,

L'Incluse exprime particuliere- *Lettre*  
mêt, & au vray, tout nostre Estat. Elle vous *chiffre*  
est adressée, afin que l'ayant fait dechiffrer, *de Mr.*  
& la rendant s'il vous plaist en main pro- *de Sou-*  
pre à Monsieur le Maire, vous conferiez *bize à*  
avec luy sur le contenu, & la mesnagiez au- *Mada-*  
tât que l'importâce de la chose le requiert. *me de*  
Au bout tenez s'il vous plaist pour asseuré *Rohan*  
que nous ne laisserons rien d'intenté, &  
que nous esperons, quoy qu'il y ait, que  
Dieu nous fera la grace de vous sauuer. Je  
croy que vous ne doutez point de l'extré-  
me desplaisir que ie reçoÿ des difficultez  
qui nous y ont iusques icy trauersées, & qui  
nous ont engagé en vne si prodigieuse  
lenteur. Mais il faut ployer sous ce que Dieu

1828. ordonne, & le flechir par nos prieres, les-  
 680- quelles ie m'asseure qu'il exaucera, & qu'il  
 bre. me fera la grace de vous aller encore em-  
 brasser, comme estant:

MA MERE,

Vostre tres-humble &  
 tres-obeyssant filz,

SOVBIZE.

**C**E Gentilhomme ainsi depesché, & luy ayans esté données les instructions necessaires, se rendit au Camp du Roy, où on mit en grand balance, s'il iroit à la Rochelle, ou non. Mais en fin le pour l'empotta, & s'y achemina le vingt & six, ou selon qu'il audit promis, il rendit toutes les lettres qui luy auoient esté cōfiées, & en rapporta respōce, le vingt sept en l'armée Angloise, où il demeura apres la reduction de la Ville, & du depuis n'a pas retourné en Frâce, au moins qu'on ait sceu, d'où il semble qu'on peut recueillir la resolution du doute, où auoient tousiours esté les Deputtez, si il les auoit serui fidelement, ou ceux ausquels il s'estoit premierement engagé.

Quel effect ces lettres produisirent lors qu'elles eurent esté réduës, cela appartient à l'histoire du dedans de la Ville, Quoy que ce soit dès le iour mesme ils communiquè-

rent avec le Sieur de Fequieres , qu'ils tenoient prisonnier , pour mesnager le traité de paix , qui puis apres fut conduit à sa perfection , & signé le vingt & neuf suivant.

1628.  
Octobre.

Quant aux Deputez qui estoient en l'armée Angloise ayans veu que la saison favorable apres laquelle ils auoient tant souffriré estoit à la parfin venue , le vent ayant esté propre pour donner , & que les Anglois nonobstant s'estoient contentez de mettre à la voile par semblant , & de tirer des canonnades de loin , ils se confirmèrent de plus en plus en la pensée , qu'il estoit plus que temps de sauuer la Ville, s'il se pouuoit par le moyen d'un traité, & outre le susnommé, duquel ils estoient en défiance , de pescherent deux autres , pour porter les mesmes aduis.

Le 24. Ils receurent passeport sous la foy duquel , deux d'entr'eux à sçauoir les Sieurs Vincent , & Bragneau allerent le lendemain en vne chaloupe à mi chemin de la Palice, conferer avec les Sieurs Treillebois & de l'Isle , auxquels ils parlerent conformément à la lettre escrite au premier, & promirent s'il plaisoit à Sa Maiesté de leur donner passeport, qu'ils feroient le



1628. possible pour disposer leurs Concitoyens à  
O<sup>cto</sup>-recercher sa grace, plustost que d'en venir  
bre. aux extrémitez, mesmes ils leurs dirent en  
l'oreille, que combien que les Anglois ne  
consentissent à vn traitté, sinon par leur  
entremise; Eux n'espargneroient nulle de  
leurs inductions, pour persuader leursdits  
Concitoyens à recourir plustost directe-  
ment à Sa Majesté, preiugeans qu'elle l'au-  
roit plus à gré, que non pas si des Estran-  
gers s'en mesloient.

Le 26. Estant arriué passeport du Camp  
du Roy, pour deux des Deputez, le Gene-  
ral Anglois, & Monlieur de Soubize iuge-  
rent à propos de commettre cet employ  
aux Sieurs Vincent & Gobert, auxquels le  
General donna ce passeport.

Nous auons permis aux Sieurs Vincent  
& Gobert Deputez de la Rochelle, d'aller  
en chalouppe conferer avec les François,  
& en cas qu'on leur ait apporté passeport,  
de se transporter au Camp du Roy de Fran-  
ce. Faiçt à nostre Bord d'Admiral le 26.  
O<sup>cto</sup>bre mil six cens vingt & huiçt.

LINDSEY.

En vertu de ce passeport, les susnommez  
Vincent & Gobert allerent aboucher les  
mesmes, avec lesquels ils auoient delia

communiqué, qui les attendoient au mes- 1628.  
me lieu, & le mesme soir les conduisirent Ocro-  
au Bord de Monsieur de Valencey Admi- bre.  
ral qui les recueillit tresbien, & mesmes  
les traitta fort splendidement.

Le lendemain 27. de grand matin, vn  
Carrosse les vint prendre, & les mena à la  
Saufaye, accompagnez des susdits qui les  
presenterent sur les huit heures du matin  
à Monsieur le Cardinal.

Ils luy dirent d'entrée qu'ayans l'hon-  
neur de se presenter deuant luy, ce n'estoit  
point sans confusion, veu ceux d'avec les-  
quels ils estoient partis: Neantmoins qu'ils  
s'y estoient enhardis sur le tesmoignage  
qu'ils auoient en leur conscience, d'auoir  
conserué des cœurs François, combien  
qu'entre des Estrangers, de mesme que les  
poissons gardoient leur douceur en cet  
Element salé, de dessus lequel ils venoient.  
De vray, & pour en donner tesmoignage,  
que dès aussi tost qu'ils auoient appris qu'il  
y auoit vne ouuerture de traiter les choses  
à l'amiable, plustost que par l'effusion du  
sang, ils auoient recherché les moyens d'en  
aller communiquer avec sa Grandeur, &  
offrir à S. M. leur employ vers leurs Con-  
citoyens, pour les amener à luy dōner con-

1628. tentement, en recognoissant leurs erreurs;  
Oâo- le supplians quant à luy de leur moyenner  
bre. sa grace, & à eux qui auoient l'honneur de  
luy parler, & de prendre confiance, qu'ils y  
chemineroient en toute rondeur, & peut e-  
stre non inutilemēt pour le seruice de S. M.

Il leur respondit, qu'il ne pesoit pas des-  
sus les fautes, soit d'eux, soit de leurs Con-  
citoyens, puis qu'eux mesmes les confes-  
soient, qu'elles estoient grandes: mais que  
la Bonté du Roy l'estoit encore plus, pour  
les leur remettre. A quoy il employeroit  
volontiers son intercession, si de leur part,  
ils se mettoient en leur deuoir, & sur cela  
leur demanda, qu'elle assuree ils auoient  
de ceux de la Rochelle, qui leur fit esperer  
de les y pouoir ramener.

Ils repartirent qu'ils ne leur en auoient  
point encore communiqué: mais que si il  
plaisoit à Sa Majesté, trouuer bon qu'ils  
allassent pour s'en aboucher avec eux, ils  
croyoient leur pouoir desduire des rai-  
sons si pertinentes, qu'ils osoient esperer  
qu'ils en feroient consideration.

Ledit Sieur Cardinal desirant qu'ils luy  
en donnassent quelque lumiere, ils luy di-  
rent, que n'y ayant telle finesse que de mar-  
cher rondement, ils luy parleroient en tou-  
te



te franchise, & à luy sur tout, qui n'estoit 1618:  
pas pour se laisser imposer, & de qui ils Ocho-  
auoient tout à esperer ou à craindre, qu'ils brei.  
luy diroient donc qu'ayans suiui les mou-  
uemens de ceux qui les auoient enuoyez,  
ils n'auoient rien espargné, pour leur mo-  
yenner le secours, le plus grand & le plus  
prompt qui leur auoit esté possible: mais  
qu'en cette sollicitatiõ, ils auoient esprou-  
ué, qu'elle misere c'est de s'attendre à des  
Estrangers, qui ne prennent à cœur l'inte-  
rest de ceux qu'ils engagent, sinon entant  
que le leur s'y rencontre, & souuent leur  
sont peu fideles: Qu'ayãs estudié plus d'un  
an les intentions que les Anglois auoient  
pour eux, ils en reuenoient aussi sçauans  
que le premier iour. De vray qu'ils auoient  
bien eu quantité de bonnes paroles, mais  
quand aux effects, ils les auoient veu tous  
tels, que si ils eussent eu dessein de perdre  
la Rochelle, & qu'infinies circonstances y  
concouroient: qu'ils l'estoient venu enga-  
ger dans leurs armes, sur le poinct de la re-  
colte, & lors qu'on alloit mettre la faucille  
dans la moisson: ce qui estoit le moyen le  
plus prompt de l'amer; qu'ils auoient tiré  
à eux grande quantité de ses prouisions;  
lors qu'ils estoient en Ré. Ce qui sembloit

1618. vn second moyen infallible pour en venir  
O&to- à bout: Qu'ayāstant promis de luy enuoyer  
bre. des bleds dēs qu'ils seroient de retour, ils  
n'en auoient rien voulu faire, combien que  
Eux Deputez les en sollicitassent soir &  
matin, & qu'il leur fust tres aisé: Qu'ayans  
enuoyé vn secours au mois de May dernier  
il n'estoit venu sinon faire monstre, & s'e-  
stoit retiré sans auoir fait la moindre tenta-  
tiue, & sans auoir voulu accorder de leurs  
Vaisseaux aux François, qui s'offroient de  
les passer à leurs risques, & fournir ostages  
pour caution du payement du Corps des  
Vaisseaux. A la verité qu'ils auoient à la  
parfin dressé vne belle armée, & s'estoient  
rendus où on les voyoit, mais qu'ils estoient  
partis si tard qu'ils sembloient auoir eu  
dessein que la Rochelle, dont ils scauoient  
l'incommodité, se rendist auparauāt qu'ils  
y peussent estre, & que depuis leur arriuée,  
il sembloit qu'ils ne fussent venus là, que  
pour faire leurs affaires avec le Roy, en ca-  
pitulans sa reduction. A la verité qu'ils  
auoient de puissans moyens & particulie-  
rement trois Nauires à mine, lesquels ils  
leur protestoient vouloir employer, & s'en  
promettoient vn tout autre effect que ce-  
luy qui parut à lastacade d'Anuers: mais



que tout cela n'estoit que paroles, & qu'en 1628.  
effect eux Deputez voyoient leurs allées <sup>Octo-</sup>  
& venuës par Montaigu, pour traiter, & <sup>bre.</sup>  
auoient sceu par eux mesmes qu'ils l'a-  
uoient depesché en Angleterre, pour y  
auoir l'adueu de leur Roy. Que ramassans  
toutes ces considerations, il leur'estoit ve-  
nu en pensée, que puis qu'il se parloit d'un  
traité, il seroit bien plus agreable au Roy,  
& vaudroit bien mieux à leurs Cōcitoyens  
de receuoir la grace de sa main propre, que  
de celle d'un Prince Estranger, qui leur  
auoit esté si mauuais garant du traité der-  
nier: Qu'à ce subiet donc, ils auoient re-  
cerché, par les voyes que luy Sieur Cardi-  
nal scauoit, les moyens de luy pouuoir par-  
ler; pour obtenir de Sa Majesté par sa fa-  
ueur la liberté de les aller trouuer, & en  
leur ouurant tout leur cœur, tascher ainsi  
qu'ils l'esperoiēt de leur imprimer le mes-  
me mouuement qu'ils auoient, à ce que  
laissans toutes pensées des Anglois, au lieu  
de se laisser mourir sur leurs promesses, ils  
se missent en deuoir de rechercher la grace  
du Roy, où ils trouueroient tout ce que le  
secours des autres les mettoit en danger de  
perdre: ioint que Dieu sembloit batailler  
pour luy des Cieux, luy ayant donné tou-



1628. tes les saisons à souhait, soit pour bastir la  
O<sup>cto</sup>- Digue, soit pour empescher que lesdits  
bre. Anglois y peussent donner.

Ledit Sieur Cardinal s'estant rendu profondement attentif à tout ce discours, loüa la bonne intention qu'ils tesmoignoient: Et dit, qu'ils auoient touché au poinct, en cet aduis de recourir directement à la grace du Roy, qui la leur accorderoit meilleure, & plus seure, que quand vn Prince de dehors s'en seroit meslé: mais au reste il leur demanda qu'elle cautiō ils pourroient donner de seruir Sa Majesté conformément à ce qu'ils disoient.

Ils respondirent qu'ils en fourniroient deux bien asseurées, l'une que le bien de ceux pour lesquels ils agissoient requeroit cela, l'autre qu'estans deux, l'un demeureroit s'il plaisoit au Roy, & cautionneroit de sa teste, sinon le succez de l'employ de son compaignon, au moins sa fidelité.

Ledit Seigneur dit, qu'il esperoit que Sa Majesté se confieroit en eux, & trouueroit bon qu'ils suiussent ce projet par eux desseigné. A cet effect, & que pour leur donner lumiere sur ce qu'ils auroient à traiter, il leur diroit ce qu'il auoit recogneu estre de ses intentions touchant eux. Qu'il

ne leur denoit celer, que les affaires d'Italie <sup>1628.</sup>  
pressoient Sa Majesté, & à tel poinct, que <sup>Octobre.</sup>  
les iours luy estoient des années, & qu'il les  
voudroit acheter chacun de fort grosses  
sommes. Que ceux de la Ville de la Rochelle  
luy auoient fait entendre, qu'ils auoient  
dequoy subsister encore trois bons mois. Si  
ainsi estoit, il leur donneroit la Carte blanche,  
pour y escrire eux mesmes leurs conditions.  
Mais aussi si ils n'auoiēt plus aucun  
moyen de tenir, il n'estoit pas raisonnable  
quel'opiniaistreté endurcie eust les mesmes  
conditions que la soubmission de franche  
volonté. Qu'un prealable donc estoit que  
S.M. enuoyât des Commissaires en la Ville,  
entre lesquels il trouueroit bon qu'eux  
Deputez fussent, pour faire recherche des  
viures, & luy en faire fidelle rapport, reiterant  
que s'ils auoient pour tenir trois mois,  
on leur feroit telle capitulation qu'ils  
desireroient; mais aussi que si c'estoit  
l'extrême necessité, qui les forçast à se rendre,  
il estoit iuste que ce fust à discretion.

Ils repartirent qu'ils le supplioient de ne  
les pas rēdre porteurs à leurs Concitoyens  
de si mauuaises nouuelles, & de considerer  
au reste que l'expedient des Commissaires  
pour la recherche des viures estoit impossi-



1628. ble à executer, veu qu'au temps de necessi-  
Oro- té les particuliers les cachent & les serrent  
bre. comme le thresor de leur vie, ainsi qu'il y  
en pourroit auoir pour trois mois & au de  
là, sans qu'il fut possible d'en faire aparoir:  
comme de fait, lors de la reueuë au mois de  
May, il n'en auoit esté trouué que pour vn  
mois, nonobstant quoy il en auoit coulé  
depuis pres de six. D'ailleurs qu'il faudroit  
tenir conte de tout ce que la Mer amene de  
poisson & de coquillage, de toutes les her-  
bes que la terre pousse, de toutes les peaux,  
soulers, parchemins, & generalement de  
tout ce qui a quelque suc, dont la faim fait  
son aliment, & se rend ingenieuse à l'apre-  
ster: Ores que tout cela ne suffist pas pour  
le soustient de tous pendant lesdits trois  
mois, qu'on reserueroit les viures pour  
ceux qui seroient capables de resister, lais-  
sant les autres en proye à la faim, & ainsi  
que peut estre passeroient-ils au delà, mes-  
me de ce terme. De vray, qu'il n'y auoit  
pas manque de personnes, qui pour se ren-  
dre agreables luy venoient dire qu'ils se  
rendroient du iour au lendemain: mais  
qu'il scauoit que depuis quatre mois on  
l'entretenoit de tels propos dont la vanité  
auoit paru. Aussi qu'il pouuoit trop mieux



iuger qu'elle apparéce il y auoit, qu'ils eussent esté & fussent encores si roides, n'ayant plus de viures, & commissent l'imprudence de se laisser reduire au dernier poinct, auant que de faire leurs conditions, & penser à capituler. Tout cela pesé, qu'eux Deputez le supplioient tres humblement de les rédre porteurs d'une grace de Sa Maiesté, qui fust plus estendue, afin qu'ils eussent meilleur moyen de la faire valoir pour son seruice, & considerer pour la fin, qu'ils auoient à faire à des gens, qui faisoient voir par experience que lors qu'ils ne pourroient viure, ils scauoient tres bien mourir: Surquoy le sieur Vincent qui portoit la parole ne se peut retenir qu'il ne luy eschappast quelques larmes.

Ledit Seigneur respondit que les choses qu'ils luy auoient représentées meritoient d'estre mises en consideration, & que le iour mesme il iroit trouuer Sa Maiesté, & esperoit luy faire trouuer bon qu'ils allassent vers leurs Concitoyens, selon qu'ils l'auoient proposé.

Les Deputez le remerciens, adioustèrent qu'ils esperoient que Sa Maiesté feroit consideration, qu'encore que les fautes de leurs Concitoyens fussent tres grandes, &

1628.  
Octo-  
bre.

1628. qu'ils ne pretendissent point leur chercher  
 O&o- d'excuse, non plus qu'à eux; neantmoins  
 bre. les Fleurs de Lys qui estoient tousiours demeurées entieres dessus leurs portes, & murailles, l'estoient encores plus en leur cœur, & que c'estoit pour les y auoir voulu conseruer, & d'autant qu'ils s'estoient monstrez sourds aux diuerles propositions par lesquelles les Anglois les auoient voulu destacher de la fidelité à ceste Couronne, qu'ils les auoient tant laissé languir, & retardé leurs secours. Il leur respondit d'un visage benin, & qui tesmoignoit approbation de ce qu'ils disoient; *Nous le sçauons, & aussi c'est la seule porte qui vous reste ouuerte pour rentrer en la grâce du Roy vostre Souuerain.*

Estans ainsi partis d'aupres de luy, ils auoient esperance que la permission d'aller en la ville leur seroit donnée. Mais le mesme iour à l'apres midy ils furent surpris de la nouuelle qu'on leur apporta, qu'il estoit arriué au mesme lieu de la Saufaye des Deputez de la Rochelle, pour traiter des conditions de leur Reduction.

Cela leur fit preiuger qu'ayans receu leurs lettres du vingt & troisieme cy dessus transcrites, ils auoient estimé avec eux, qu'il n'y auoit plus rien à attendre des  
 Anglois

Anglois par la force des armes, & pour ce 1628.  
qui estoit de leur traité, qu'ils estoient en- Octobre  
trez és mesmes considerations, lesquelles bre.  
eux Deputez auoient eues, qu'ils le fe-  
roient plus aduantageux & plus seut en re-  
cherchant eux-mesmes la grace de Sa Ma-  
iesté, que si il s'y mesloit rien d'vne inter-  
cession si peu agreable, comme on pou-  
uoit iuger que le seroit celle des Anglois.  
Approuuans donc leur Conseil au fond.  
Seulement ils regretterent que leur ayant  
escriit qu'ils mesnageroient vn passeport  
pour aller vers eux, ils n'en auoient atten-  
du l'effect, & qu'on les eust esté rechercher,  
plustost que de rechercher eux-mesmes;  
ce qui donneroit la presumption d'vne ex-  
tremité dernière.

Comme les Deputez raisonnoient ainsi  
l'un avec l'autre, les autres Deputez de la  
ville estoient avec Montieur le Cardinal,  
& autres de Messieurs les Ministres, trai-  
tant de leurs conditions, & pour les obtē-  
nir meilleures, tascherent de donner ialou-  
sie du secours Anglois. Surquoy il leur fut  
dit, qu'ils s'abusoiēt, & que les Anglois  
ayans perdu toute esperance de rien faire  
pour leur secours, auoient enuoyé leurs  
Deputez propres pour mesnager leur trai-



1628. té particulier, sans parler de la Rochelle.

Octo-  
bre. Veu qu'ils faisoient difficulté de croire que les Deputez fussent là, ils furent mandez & presentez à eux en la Chambre du Conseil, où ils se saluerent & embrasserent, mais sans qu'on leur permist de conferer; Seulement Monsieur le Cardinal, dit: aux nouueaux enuoyez, que leur Ville auoit grande obligatiō à l'extrême affection dont il auoit recogneu que leurs Cōfreres qu'il leur faisoit voir, estoient portez enuers eux iusques à auoir espandu des larmes en conferant touchant leur Estat, & auoient intercedé pour eux avec grand ferueur, & sur cela les obligea de se retirer.

Lors qu'ils furent à part ils iugerent bien que ledit Seigneur Cardinal auoit fait vn traict d'adresses qui n'estoit commun, les faisant entre voir, mais sans les laisser parler: veu que puis apres il les representeroit parlans de l'estat les vns des autres, selon qu'il verroit qu'il luy seroit plus d'uisible. Cependant puis que leurs lettres dernieres auoient esté rendues à ceux de la Ville, par lesquelles ils les aduertissoient comme ils mesnageoient vn passeport pour aller vers eux, ils creurent bien, que le Conseil n'auroit pas manqué d'en aduertir ces Deputez

en les enuoyant: de sorte, que les trouuans <sup>1610</sup>  
là, ils y auroient veu l'effect de leurs lettres <sup>Odo-</sup>  
& compris le suiet de leur venue; en tout <sup>bre.</sup>  
cas y ayant quelques vns de leur suite, qui  
les vindrent voir, ils trouuerent moyen de  
se desrober du sieur de l'Isle, qui sans en fai-  
re le semblant auoit l'œil sur eux, & leur  
dirent qu'ils aduertissent les autres Deput-  
tez qu'ils estoient là quant à Eux, afin d'es-  
sayer à nouer vn traité pour la Ville, & ce  
par l'induction des Anglois propres, qui  
toutesfois leur promettoient de faire tous  
les efforts possibles: neantmoins qu'ils ne  
voyoient pas qu'il y eust lieu de s'attendre  
fort à eux, & à ce suiet d'interrompre le  
traité: Seulement qu'il falloit mesnager ce  
reste de bonne mine qu'ils faisoient pour  
l'obtenir le meilleur qu'il se pourroit.

Ces Deputez de la Ville y estans retour-  
nez le mesme iour, reuindrent le lende-  
main, & conclurent la reduction, sous les  
Articles qu'ils virent bon estre, ou pour  
mieux dire qu'ils peurent obtenir, sans que  
les autres Deputez venus de l'armée An-  
gloise y eussent eu aucune part, ou que  
mesme il leur eust esté lors possible de sça-  
uoir au vray, ce dont on estoit demeuré  
d'accord.

1618.  
Octo-  
bre.

Ayans sceu en general , que leur traité estoit conclu sans qu'il y fut fait aucune mention d'eux, d'autant que le Roy ne l'auoit pas voulu ; ils supplierent ledit Seigneur Cardinal de leur moyenner aussi la grace de Sa Majesté , & aux François qui estoient en l'armée Angloise, & en general à tous ceux que les mouuements auoient poussez ou en Angleterre ou en autre pays: Ce qu'il leur promit, & leur ayant ordonné d'en traiter avec Monsieur de Chasteau neuf: En fin ils obtindrent la Declaration du vingt & neuf d'Octobre. Qui porte, que le Roy leur pardône tout le passé; leur permet de reuenir en ses havres, mesmes avec les prises qu'ils pourroient auoir faites; Veut qu'ils iouyssent de mesmes graces que ses autres Subiets, & ayent libre exercice de leur Religion, les remet en tous leurs biens, sauf les fruiçs perceus, & debtes confisquées & actuellement payées, accorde trois mois à ceux de Ré, & la Rochelle, qui estoient en Angleterre pour retourner & iouyr de la mesme grace.

Les clefs de la Ville ayant esté apportées au Roy le vingt & neuf, & ses troupes y estans entrées le trente, il fut arresté entre lesdits Deputez que le Sieur Gobert iroit



en la Ville, & le Sieur Vincent vers les Anglois, ausquels ayant porté cette mauuaise nouvelle; Le General en tesmoigna beaucoup de desplair, D'autant plus que Montaignu ayant vsé de la diligence qu'il auoit promise, estoit reuenu, & apportoit les ordres necessaires pour le Traité, lequel les Anglois consentoient bien volontiers, mais ils eussent voulu qu'il eust passé par leurs mains.

Montaignu sur tout se faschoit fort, que ses courses eussent esté inutiles, & se prit au Sieur Vincent en plein Conseil, de ce que la Ville s'estoit ainsi renduë, blasmant leur impatience, & les accusant d'auoir mal recogneu la bonne volonté du Roy d'Angleterre.

Le Sieur Vincent luy respondit, qu'il forçoit vn homme outré de douleur à la tirer de son sein, & luy dire pour sa pauvre patrie, laquelle il osoit si iniustement accuser, que luy & ses semblables, par leurs monopoles secrets, l'auoiët reduite au miserable poinct où elle se trouuoit. Qu'il ne parloit pas de sa Serenissime Majesté, de laquelle il sçauoit que les intentions auoient tousiours esté excellemment portées à sauuer cette pauvre Ville: Non plus de Mon-

1628.  
Octo-  
bre.

1628. sieur le General là present, duquel il cau-  
Octo- tionneroit la sincerité & bonne volonté de  
bre. sa propre vie; mais que quant à luy Mont-  
aigu, & autres de la faciende de celuy  
sous la main duquel il auoit esté nourry,  
ils auoient touliours trauerfé les meilleurs  
& plus genereux desseins, & qu'ils l'a-  
uoient fait dès l'Angleterre, par les accro-  
ches qu'ils auoient fait naistre de iour à au-  
tre, pour empescher que le secours ne par-  
tist à temps, qu'ils l'auoient continué de-  
puis que l'armée estoit partie & arriuée,  
ayans espendu d'entrée de mauuais bruits  
de la Digue, qui auoient affady les coura-  
ges, & du depuis ayans opiniastré au Con-  
seil qu'on n'employast pas les Vaisseaux à  
mine, qui estoit le seul moyen de faire ou-  
uerture à la Digue. Queluy en particulier  
auoit tout perdu par les opiniastrés com-  
munications avec l'autre party, combien  
qu'on ne se fust espargné d'en remonstrer  
les consequences, & de faire voir que de-  
puis qu'une armée voit qu'on traite, il n'en  
faut plus rien esperer, chacun aimant  
mieux que la querelle se decide par vne  
compositiō sans peril pour luy, que par vn  
combat, où il peust demeurer. Qu'ayant  
donc ces iustes reproches contre luy, il

auoit mauuaile grace de se rendre denon-  
ciateur contre des gens qu'il auoit perdus.  
Qu'au suiet sur tout , où il les accusoit , il  
estoit notoire à tous qu'ils auoient tesmoi-  
gné des miracles de constance, & s'estoient  
laissé mourir à milliers, pour attendre l'es-  
fect de la parole du Roy leur Maistre , & le  
secours qu'il leur promettoit. Que ce se-  
cours arriué aprestant d'attente , combien  
qu'ils l'eussent veu demeurer inutile du-  
rant vn mois, ou faire de si foibles attaques  
qu'il sembloit se mocquer, si auoient-ils te-  
nu bon , laissans acheuer à la faim ses der-  
niers rauages , & risquans d'ailleurs de se  
laisser enleuer à la premiere attaque : Ce  
qui eust esté indubitable, veu leur foiblesse,  
& leur petit nombre , si on leur en eust fait  
aucune. Que si en fin ils auoient capitulé,  
sçauoit esté lors qu'ils s'estoient veus par  
delà le dernier morceau, & d'ailleurs apres  
auoir sceu que luy Montaignu minutoit leur  
reduction, & l'estoit allé concerter en An-  
gleterre, d'où il leur estoit douteux si il  
pourroit retourner si tost qu'il disoit. S'es-  
tans resolu là dessus ( puis qu'il falloit se  
rendre , & qu'il ne s'agissoit plus que de la  
forme) d'accepter vne capitulation, qui au  
moins leur conseruoit la vie, laquelle deux

1628.  
Octo-  
bre.



1628. iours sans contredit leur eussent ostée;  
 Oco- que luy Vincent, attéstoit le Ciel, & la ter-  
 bre: re, & tous les gens de bien qui estoient pres-  
 sens, s'il n'y auoit pas de l'iniustice & de  
 l'inhumanité à les vouloit ternir de blasme  
 à cette occasion; & leur raur la seule con-  
 solatiō qui leur reste en leur misere, qui est  
 de n'auoir rien espargné des plus extrêmes  
 souffrances, pour talcher à s'en garentir, &  
 d'auoir tesmoigné vne constance, laquelle  
 la posterité tiendra pour prodige.

Le General qui portoit faueur au Sieur  
 Vincent, & recognoissoit la verité de ce  
 qu'il disoit, voyāt que la douleur l'empor-  
 toit, arresta là ce discours, & retint Mont-  
 aigu, qui en grande fougue demandoit re-  
 paration de ces propos; puis congedia la  
 compagnie.

Cela se passa le trente vn Octobre, le  
 mesme iour le Sieur Vincent ayāt conféré  
 avec Montieur de Soubize, & les autres  
 Deputez de la Rochelle qui restoient là;  
 touchant ce que deuoient faire les Fran-  
 çois qui estoient en l'armée; ils iugerent  
 qu'il les falloit assembler, & leur commu-  
 niquer ce qui auoit esté stipulé pour Eux;  
 afin que ceux qui le voudroient se seruif-  
 sent du Benefice de la grace, qui leur auoit  
 esté

esté obtenüe , & en fut parlé au General, 1628.  
qui le trouua bon, & tesmoigna que n'ayāt <sup>Octo.</sup>  
de commandement de S. M. sinon pour <sup>bre.</sup>  
leur bien & soulagement, s'ils estimoient  
le trouuer à retourner en leur maison, il ne  
le vouloit pas empescher. Suiuant cela s'es-  
lant trouuez au Bord du Capitaine Bra-  
gneau, le Sieur Vincent leur declara ce qui  
s'estoit passé & leur fit lecture de la Decla-  
ration du Roy, qu'il auoit obtenüe en leur  
faueur, y adioutant ce qu'il venoit d'ap-  
prendre des mouuemens du General, pour  
ce qui les concernoit, afin que sur cela ils  
prissent party.

Ce fut entr'eux le suiet d'une longue cō-  
testation, les vns inclinans à retourner, &  
les autres disans qu'il n'y auoit pas lieu de se  
fier sur les promesses qui auoient esté faites.

Le sieur Vincent là dessus étant prié de  
leur dire son aduis, leur representa, que po-  
sé les differents sentimens où il les voyoit,  
il iugeoit bien qu'il ne leur pouuoit satis-  
faire à tous. Que de vray ceux qui tesmoi-  
gnoient de la defiance ne manquoient pas  
de raisons bien apparentes : mais qu'à son  
aduis, il y en auoit de plus fortes pour  
s'asseurer, que le traité auoit esté fait par  
l'entremise de Monsieur le Cardinal, qui

1628. estoit fort ialoux de sa parole. Que pour y  
O<sup>cto</sup>- craindre du m<sup>a</sup>quement, il y faudroit voir  
bre. quelque grande vtilité, qui en reuint, or  
qu'il n'y en auoit point du tout, n'y ayant  
plus de Rochelle, qui fust le prix de quel-  
que passedroit fait à vne parole donnée;  
Ceux qui resteroient en ces ruines n'estans  
considerez que comme les autres particu-  
liers de la Religion de quelque Village de  
Brie. Que bien loin de craindre vn mauuais  
traitement, par raison on le deuoit atten-  
dre fauorable, veu que Montauban & les  
autres Villes, tenans encores, la maniere  
dont on vseroit enuers la Rochelle, leur  
seroit vne tablature de ce qu'elles auroient  
à esperer ou à craindre. Quant à luy qui  
leur parloit, qu'ils sçauoient qu'il seroit  
bien accueilly retournant en Angleterre,  
& trouueroit des moyens aduantageux  
pour y subsister; mais qu'il croyoit deuoir  
à la charité vers ses Concitoyens d'aller su-  
bir mesme condition avec eux, & qu'à plus  
forte raison le deuoient-ils eux, ausquels il  
parloit, qui estans retournez en ce Pays  
estrange y seroient reduits à l'aumosne, &  
perdroient leurs biens par deçà: Pour fin  
que chacun estoit libre de faire ce qu'il ad-  
ui seroit: mais qu'autant qu'il luy sembloit,



Ceux qui prendroient la route d'Angle- 1628.  
terre, suiuroient vn mauuais Conseil. Octobre.

La plus grand part donnant lieu à ces raisons resolurent de se seruir du Benefice de la Declaration. Mais le lendemain premier de Nouembre, il y eut bien du changement. Ce qui s'estoit passé au Bord du Capitaine Bragueau, estant venu à la cognoissance des Anglois, aucuns presenterent au General, que s'ils laissoient aller les François, ils s'atfoiblissent d'autant, & n'auroient pas moyen d'executer quelques entreprises qu'ils desseignoient, entre lesquelles il y en auoit vne sur Broüage: Nes'agist-il que de leur retour, qu'ils auroient besoin de leur conduite en toute la plage de Mer, où ils se trouuoient, & iusques en la Manche, veu qu'ils en auoient plus de cognoissance qu'eux: Sur tout qu'il y alloit de l'honneur de leur Roy, qu'estans sous sa Baniere, ils eussent fait vn traité sans luy: Ainsi qu'il ne le deuoit ratifier, mais laisser la chose entiere à sa Majesté.

Le Conseil assemblé là dessus, il fut resolu d'emmener tous les François, & mesmes le sieur Vincent pour rendre conte au Roy de ce qu'il auoit geré au traité.

1628.  
Oâo-  
bre.

Monſieur le General l'ayant mandé à ſon Bord le luy fit entendre. Surquoy il luy reſpondit, que ſi on les retenoit, ils proteſteroient tous de violence : qu'outre la plainte generale de ne les auoir pas ſecourus, & laiſſé perir leur Ville, ils leur feroiēt cette iniuſtice particuliere d'expoſer leurs Biens en proye à ceux qui deſormais, les auoient en leur diſpoſition: Que la Ville de laquelle ils eſtoient, & pour laquelle ils auoient agi n'eſtant plus, manque d'auoir eſté ſecouruë à temps par Sa Majeſté, le traité fait avec elle n'auoit plus de lieu, & que ſans doute il auroit plus à gré qu'ils ſe retiraffent ſans bruit, que de voir deuant ſes yeux de triſtes obiets, qui luy reprocheroient la ruine de leur pauvre patrie, pour s'eſtre laiſſé engager à ſes armes. Quāt à luy en particulier, que s'il n'auoit eſgard qu'à ſoy, il ſçauoit la bien veillance dont le Roy l'honoroit, & quelle luy vaudroit mieux de beaucoup que ce qu'il pouuoit eſperer en vne Ville deſolée, où il preuoyoit bien qu'il auroit fort à ſouffrir, & veu ſes emplois precedents, qu'il ſeroit eſpié, & au moindre ſoupçon en danger de la vie: mais qu'il le prioit de conſiderer les liens qui l'obligeoient à ſes Cōcitoyens, qui l'ayans

chery en leur prosperité, il seroit lasche s'il <sup>1628.</sup>  
les quittoit en leur aduersité. Sur tout que <sup>Octo-</sup>  
estant l'vn des Pasteurs, alors si iamais il se <sup>bre,</sup>  
deuoit oublier pour Eux , & à ce grand  
choc aller faire tout ce qu'il pourroit ( se-  
lon le peu que Dieu auoit mis en luy ) pour  
leur aider à le soustenir. Au bout que tels  
luy auoient donné cet aduis de l'emme-  
ner , qui peut estre , n'y trouueroient pas  
leur conte , veu que si vne fois il auoit  
l'honneur d'estre deuant leur Roy , il l'in-  
formeroit de diuerses particularitez, qui ne  
seroient pas à leur aduantage.

Ledit Sieur General ouyt ce propos avec  
attention , & en ayant communiqué avec  
Monsieur de Soubize , & Monsieur de La-  
ual, fit retraicter ce premier aduis d'emme-  
ner tous les Vaisseaux , & se restreignirent  
à quelques vns, & entre les autres celui du  
Capitaine Bragueau. D'ailleurs aussi ils  
donnerent vne chaloupe au Sieur Vin-  
cent , lequel le General & les Principaux  
Chefs congedierent amiablement , & se  
rendit à la Chaisne au trauers de la Digue,  
le second iour de Nouembre. Quelques vns  
aussi des Vaisseaux François se jetterent çà  
& là és Havres , tandis que les autres fu-  
rent obligez de suiure les Anglois, qui mi-



1628. rent à la voile le Samedi quatrième sur  
Oâo- le soir.

bre. Tels ont esté les commencemens , tels les progrès ; telle l'issuë de l'infructueuse Deputation dudit Sieur Vincent , & des autres ; tel aussi leur mesnagement sur le traité de paix.

L'ay transcrit ce que dessus ainsi que j'ay dit , de dessus le iournal dudit Sieur Vincent , & ay creu que ie le deuois inserer icy.

Pour reioindre le fil de l'Histoire , apres que les Articles pour la Reduction de la Rochelle eurent esté signées de part & d'autre , les Deputez s'en retournerent en la Ville pour les faire approuver. A cest effect le Conseil fut aussi tost assemblée en l'Hostel de Ville , & y furent appelez ceux de la Noblesse , & les Chefs des gens de guerre , avec les Bourgeois & Habitans. Et là les Deputez rendirent conte de tout leur mesnagement , & dirent que tout ce qu'ils auoient peu obtenir estoit contenu és Articles , dont ils firent la lecture. A la verité qu'ils auoient fait le possible pour comprendre Madame de Rohan dedans le traité , mais que Messieurs les Ministres ne l'auoient iamais voulu consentir , & leur auoient dit , que sans qu'ils s'en messassent

Sa Majesté en feroit la consideration con- 1618.  
uenable, puis qu'il la recognoissoit comme Oâto-  
ayant l'honneur d'estre sa parente. Qu'ils bre.  
auoient insisté au dernier point pour y cō-  
prendre le Sieur de la Grosseitiere, mais  
qu'on les auoit rabroüiez, & declaré tout  
net que si ils se roidissoient sur cet article,  
ils s'en pouuoient bien retourner: Et que  
Sa Majesté qui leur faisoit grace, aduiseroit  
à celle qu'elle luy deuoit accorder. Qu'ils  
auoient essayé de meisme de traicter pour  
les Deputez en Angleterre, & les François  
qui estoient és Vaisseaux Anglois, mais  
qu'on leur auoit aussi fermé la Bouche là  
dessus, & tesmoigné que Sa Majesté ne  
trouuoit pas bon, apres leurs fautes, & en  
l'estat où ils estoient, qu'ils fissent nulle  
demande au delà de ce qu'il leur auoit ac-  
cordé de sa pure grace. Qu'ayans donc esté  
forcez de receuoir les cōditions qu'ils leur  
apportoient, il y en auoit vne qui auoit cuidé  
tout rompre, veu que l'exercice de la Reli-  
gion leur estant octroyé, sçauoit esté sans  
specifier qu'il deust estre dans la Ville; Sur-  
quoy ayans demandé esclarcissement, on  
auoit refusé de le leur donner; mais que de  
leur part ils auoient tesmoigné net qu'ils  
ne pouuoient rien cōclure, ni retourner en

1618. la Ville, sans cet Article, & ainsi qu'es'y  
Oâto- estans tenus fermes, ils l'auoient en fin ob-  
bre. tenu.

Après ce conte rendu, on approuua d'vne  
voix toute leur negotiation, seulement  
quelques vns voulurent dire que la peface  
des Articles sembloit rude, sur tout en ce  
terme de crime, qui y estoit inferé: mais  
d'autres repartirent qu'on n'estoit pas au  
poinct d'epiloguer sur des mots, & qu'au  
fond toute resistance par armes, à la volon-  
té du Souuerain passe pour crime dedans  
vn Estat. Au reste pourtât, qu'à peser mes-  
mes les termes de ceste Preface, ils sem-  
bloient emporter quelque adoucissement,  
veu qu'y ayant diuers degrez de crimes: Sa  
Majesté ne leur attribuoit pas le dernier,  
mais auoit reserré le leur, à la faute d'auoir  
*resisté à ses volontez ne luy ayans pas ouuert leurs*  
*Portes. & à celle d'auoir adheré aux Estrangers.*  
Or que ceste resistance estoit moins que d'a-  
uoir comploté pour se soustraire de sa  
Couronne, dequoy diuers passionnez les  
vouloient noircir. Et de mesme qu'auoir  
*adheré aux Estrangers*, ce qui emporte vne  
preuention de leur part, estoit moins que  
les auoir recherchez, pour se donner vo-  
lontairement à eux, dequoy leurs Calom-  
niateurs



niateurs les vouloient diffamer. Ainsi que 1628.  
Sa Majesté es termes dont elle s'estoit ex- Oâo-  
primée, les auoit lauez de ces taches, & leur bre.  
auoit voulu donner suiet de bien esperer  
d'elle, & de se promettre qu'elle les consi-  
dereroit comme ses Subiets, qui encores  
qu'ils eussent failli, au fond pourtant luy  
auoient toujours gardé leur cœur, & ainsi  
leur feroit tout bon traitement. Qu'afin  
donc de s'en rendre dignes, il falloit acce-  
pter de bonne grace & sans plus marchand-  
der, ce qu'il luy plaisoit leur offrir.

Ces sages aduis meurement pesez, tous  
ratifierent vnanimement les Articles tels  
que les Deputez les auoient apportez, &  
adioignirent aux precedens Deputez les  
Sieurs André Trouppet, Prou, Beaupreau,  
Huet, Godeffroy, & Preuost le Ienne, pour  
tous ensemble en aller porter la Ratifica-  
tion au Roy, lequel ils allerent trouuer à la  
Leu sur les deux à trois heures du soir, &  
s'estans mis de genoux deuant luy, le sieur  
de la Goutte, au nom de la Ville & desdits  
Deputez parla ainsi.

**S I R E,**

Ceux qui ont esté lōg temps enfermez  
dans les prisons obscures lors qu'ils vien-

*J'ay  
euë cet-  
te ba-  
rrique*

R r

1628. nent à en sortir, ne peuuent sans s'esblouyr  
 Octo- regarder la lumiere du Soleil. Nous aussi  
 bre, qu'une longue Captiuité à retenus tant de  
 dudit temps reclus dâs l'enclos de nos murailles,  
 Sieur venans maintenant à paroistre deuant les  
 de la yeux de vostre Maiesté, ne pouuons en sup-  
 Goutte porter l'esclat sans esblouyssement, & sans  
 comme quelque horreur de nos fautes passées qui  
 aussi augmente nostre confusion; & toutesfois  
 la Ref- la Bonté de Vostre Majesté, dont nous auôs  
 ponce si souuent esprouué les effects, & que tout  
 qu'y fraichement nous venôs de ressentir, nous  
 fit le donne la hardiesse de nous prosterner à ses  
 Roy. pieds, pour en obtenir le pardô que les fre-  
 quentes recheutes dans nos crimes ne nous  
 promettent pas d'esperer, que par la seule  
 consideration de l'extrême ressentiment,  
 dont nous sommes maintenant touchez, &  
 l'extrême passion de tesmoigner à V. M.  
 qu'elle n'aura point d'oresnauant de Sub-  
 iets plus fideles & plus obeissans que nous.  
 C'est la protestation que vous fait mainte-  
 nant vostre Ville de la Rochelle, en laquel-  
 le le Roy Henry le Grand vostre Pere, (dôt  
 la memoire ne peut iamais perdre l'hon-  
 neur de son amitié & de sa bien veillance)  
 à tousiours trouué vne tres grande affe-  
 ction à son seruice, & laquelle à eu l'hon-

neur de luy seruir autresfois de retraite & 1628.  
de demeure. Elle proteste à Vostre Maie- Oâo-  
sté vne fidelité & obeissance, dont l'exe- bre.  
cution ostant le souuenir de ses mesco-  
gnoissances, & Rebellions, espere que vo-  
stre Bonté apres luy en auoir accordé le  
pardon, nous fera la grace d'en perdre le  
souuenir: Puis que nous voulons viure &  
mourir desormais dans l'obeissance que  
nous recognoissons luy deuoir, & faire ad-  
uouer à Vostre Maieité qu'elle n'aura point  
cy apres de Subiets & Seruiteurs plus fi-  
delles & plus affectionnez à son seruice  
que ceux de la Ville de la Rochelle.

Le Roy respondit en ces mots, Le prie  
Dieu que ce soit de cœur que vous me par-  
lez, & non par la necessité où vous estes re-  
duits. Je sçay bien que vous auez esté touf-  
jours fort malicieux & mutins, & seriez  
dignes que ie vous chastiasse rudement.  
Mais ie veux estre meilleur que vous n'a-  
uez esté mauuais. Je vous pardonne vos Re-  
bellions: Soyez moy à l'aduenir bons &  
fideles Subiets, ie vous seray bon Prince,  
& si vos actions sont conformes aux pro-  
testations que vous me faites, ie vous tien-  
dray ce que ie vous ay promis.

Ils luy firent les excuses de ce que le



1628. Maire n'estoit venu en leur compagnie  
O&obre. pour luy rendre en personne ses tres hum-  
bles Soubmissions & Hommages, disans  
que selon la coustume il estoit demeuré  
dans la Ville pour y recevoir Sa Majesté, &  
faire abattre vn pan de muraille, où des-  
pendre vne Porte selon qu'il plairoit à Sa  
Majesté d'ordonner son entrée. Ce que le  
Roy eut à gré & les renuoya tres contens.

Estans retournez en la Ville dès le mes-  
me soir, ils remirent les Articles scelez du  
grand seau es mains du Maire & Conseil,  
& leur dirent que le Roy les auoit asseurez  
que tout ce qui leur estoit accordé, leur se-  
roit tenu & effectué, & qu'il ne seroit fait  
tort à personne, ny touché à l'honneur des  
femmes & filles, & qu'il seroit obseruer vn  
si bõ ordre parmy les gens de guerre, qu'ils  
en seroient contens. Au reste qu'il com-  
mandoit que dès le matin on fist assembler  
la Noblesse, & les Capitaines, Officiers &  
Soldats, tant François que Anglois, afin  
d'estre prests à huit heures du matin pour  
sortir hors la Ville selon la Capitulation,  
d'autant que sur les neuf heures le Regi-  
ment des Gardes & celuy des Suisses en-  
treroient. De plus qu'il entendoit qu'vn  
chacun eust à porter ses armes en l'Hostel

de Ville.

1628.

On ne manqua pas d'exécuter le tout O<sup>cto</sup>-  
dés le lendemain matin 30. Mais ce fut vn bre.

grand esbahissement aux troupes du Roy, lors qu'on veit toute la Milice Estrangere reduite à soixante & quatorze François, le reste de douze Cōpagnies qui auoient esté formées au commencement du Siege, & Soixante deux Anglois, d'environ cinq à six cens que le Duc de Buckinghant auoit laissées. Ces premiers prirent party où ils voulurent, sans qu'il leur fust mesfait, les autres furent conduits de bonne foy en l'Armée Angloise.

Le mesme iour 30. sur les neuf heures du matin, Monsieur le Duc d'Angoulesme, le Marechal de Schomberg, & le Sieur de Marillac entrerent avec la moitié du Regiment des Gardes & celuy des Suisses, par la Porte de Coigne, de laquelle ils se saifirent, comme de toutes les autres portes, places d'armes, Tours, Rempars, Canons, Magazins, & Munitions: Cantons & Principales ruës, y posans des Corps de Gardes & Sentinelles, & à mesme temps fut fait par toute la Ville (comme il auoit esté fait au Camp) vn proclamat de par le Roy & Monsieur le Duc Despernon Colomnel de

1628. l'Infanterie Françoisse, portant defense aux  
Oâto- gens de guerre, de ne quitter leurs rangs,  
bre. postes, & Corps de Gardes, de n'entrer en  
aucune maison, ni toucher à l'honneur des  
femmes & filles, ni prendre aucune chose  
à peine d'estre pendus & estranglez. Ils se  
faisirent aussi du Fort de Tadon, où furent  
mis deux Regimens pour le garder.

Le mesme iour tous les logemens ayans  
esté faits & marquez dans la Ville, Mon-  
sieur le Cardinal de Richelieu accompagné  
de force Seigneurs & Noblesse y fit, son  
entrée sur les deux heures apres midy, &  
ayant fait porter quantité de Viures & de  
Pains d'amonition, les fit exposer gratui-  
tement, & fit publier par les ruës à son de  
tambour, que chacun qui en auoit besoin  
en vint querir: mesmes il se trouua vne si  
grande pitié & compassion en plusieurs  
Soldats, voyans les Habitans attamez &  
demy morts, qu'ils leur iettoient en pas-  
sant par les ruës, & estans sur les armes,  
leurs pains d'amonition, au lieu que le iour  
auparauant il les eussent voulu esgorger.  
Bref, l'ordre fut si bien estably, qu'il ne se  
commit aucun mal, & ne fut fait le moin-  
dre desplaisir à personne.

A l'entrée dudit Seigneur Cardinal, le



Maire se voulut mettre en deuoir de l'aller <sup>1628.</sup> saluer, mais il ne le voulut permettre, & <sup>Octo-</sup> commanda qu'il congediaſt ceux qui mar- <sup>bre.</sup> choient deuant luy avec des hallebardes, & ceſſaſt de plus faire aucune fonction de Maire.

Le Mardy 31. ledit Seigneur Cardinal fit venir du Camp des Pionniers pour enterrer les Morts, qui eſtoient dans les maiſons, & autres lieux de la Ville.

Le Mercredy premier iour de Nouembre, feſte de Tous les Saints, ſur les deux à trois heures apres midy, le Roy fit ſon entrée dans la Ville par la Porte de Coigne, monté ſur vn beau Cheual, accompagné dudit Sieur Cardinal & de quantité de Seigneurs & Nobleſſe, avec les Gens d'armes & Mouſquettons de ſa Garde, & du reſtant des Compagnies du Regiment des Gardes & celuy des Suiffes. Au dehors de la Porte ſe trouuerent cinquante à ſoixante des Principaux de la Ville, ſuiuant le commandement qui leur en auoit eſté fait par Monſieur le Mareſchal de Schomberg, qui ſe mirent à genoux, comme il paſſoit, crians Viue le Roy, & Miſericorde. Le peuple fit le meſme dans la Ville, tandis que tous les Canons des Forts & Nauires, &

1628. aussi de la Ville se faisoient ouyr. Ladef-  
Octo- cente du Roy fut à l'Eglise de Sainte Mar-  
bre. guerite, où apres auoir ouy Vespres & le  
Sermon du Pere Souffran, il se retira au  
soir à la Leu. Mais estant retourné le lende-  
main il coucha en la Ville.

Il fut remarqué à son entrée que voyant  
les pauvres Habitans, comme des Anato-  
mies, & qui à peine auoient face d'hom-  
mes, il en eut pitié iusques à espandre des  
larmes.

Le Vendredy 3. la Procession fut faite  
dans la Rochelle, le Roy y assistant avec  
toute sa Cour, & les fenestres estans plei-  
nes de peuple, & sur tout de Rochelois;  
desireux de voir Sa Maiesté, duquelayans  
redouté l'entrée ils l'esprouuoient tout au-  
tre qu'ils ne l'auoient craint, & le confide-  
roient comme vn bon Ange qui les estoit  
venu retirer du profond abisme de leur mi-  
sere, & d'entre les bras de la mort.

Le Roy apres son entrée en la Ville, fit  
faire commandement au dernier Maire;  
aux Sieurs Salbert & Palinier Ministres, &  
à dix, tant du Corps de la Ville, que des  
Bourgeois de sortir de la Ville, & s'en ab-  
senter pour le temps de six mois; ce qui se  
fit par vn simple commandement verbal.

Le

Le Samedi, & Dimanche 4. & 5. on <sup>1628.</sup> arrangea en la place du Chasteau tout le Canon de la Ville, & de plus on y fit venir <sup>Noué</sup> celui de tous les Ports & de la Digue & des quartiers du Camp pour de là estre conduits en Broüage & ailleurs. Comme ils furent quelques iours apres.

Ledit iour sur les quatre heures du soir l'armée Angloise, apres auoir demeuré vn mois six iours en rade, & veu de là, la Reduction de la Rochelle en l'obeissance du Roy, mit à la voile pour en aller porter les nouvelles en Angleterre, & emmena avec elle vne grande partie des François.

Le 6. 7. & 8. du mois il se fit vn si grand vent de Suroest, & avec telle violence, que la Digue en plusieurs endroits, & sur tout du costé de Port-neuf, fut escroslée, & les Machines & Chandeliers brisez & ostez de leur lieu, de sorte qu'un Nauire Flamant du port de deux cens tonneaux, qui estoit chargé de viures pour le ravitaillement de la Ville, & estoit demeuré à Chef de Baye, estant poussé par l'impetuosité de la tourmente, vint donner sur les vazes, ayant passé avec bien peu de difficulté par dessus la Digue. Cela estant remarqué, fit cognoistre la protectiõ de Dieu particuliere pour

Sf



1628. les affaires de Sa Majesté, veu que si cela  
Nouë fust arriué huit iours auparauant, la Ville  
bre. eust esté rautailée.

Quelques iours apres, le Roy alla à la  
Porte de Coigne voir sauter vne Mine,  
qu'on auoit faite à la piece destachée de la-  
dite Porte, afin que selon ce qu'elle fe-  
roit, les Murailles de la Ville, tant ancien-  
nes que nouuelles sautassent de mesme,  
veu qu'on en auoit arresté la Demolition.  
Cette mine ne manqua à faire son execu-  
tion.

Le Ieudy 16. Monsieur le Garde des  
Seaux se fit apporter les Registres des Con-  
seils, & fit vne recherche exacte des memo-  
res & instructions donnez aux Deputez,  
que la Ville auoit enuoyez au Roy d'An-  
gleterre, & des Traitez faits avec ledit  
Prince, & y trouua que lescdites instru-  
ctions & Traictez auoient tousiours esté  
avec la reserue de la fidelité qui estoit  
deuë à la Couronne. On dit qu'il fit ceste  
recherche, d'autant qu'on minutoit la De-  
claratiō du Roy, qui puis apres fut publiée,  
& que quelques vns du Conseil opinoient  
qu'en l'introit d'icelle, le Roy alleguast  
pour cause de ses Armes, que la Rochel-  
le, non seulement auoit, appellé les An-

glois, mais s'estoit donnée à eux ; Ce que <sup>1628.</sup> ledit Sieur ne iugeoit à propos, sinon qu'il <sup>Nouë</sup> en constast bien à clair : Or trouuant le <sup>bre,</sup> contraire par toutes les enquestes qu'il en peut faire, & mesme par ces monumens publics, la Declaration n'en toucha rien. Au reste, il donna ordre que tant lesdits Registres, que tous les autres tiltres, & documens de la Ville, fussent portez à Paris, à la Chambre des Comptes, où ils sont de present.

Le Samedy 18. fut publié par les Câtons ordinaires de la Ville la Declaratiô du Roy touchât l'ordre qu'il vouloit qui y fust establi. Par icelle il casse & abolist le Corps de Ville & tous ses Priuileges, comme la dignité de Maire, & ordonne que la Preuosté & Iurisdiction ordinaire de la Ville seroit reünie à la Seneschaussée. Vn Intendant de la Iustice estably. Les cinq Paroisses de la Ville reduites à trois, & à chacun des Curez assigné trois cens liures sur le reuenu de l'Hostel de Ville. Ledit Hostel, ensemble tous autres edifices & lieux communs avec leurs reuenus reünis à son Domaine. Descharge ceux de ladite Ville de tous actes d'hostilité generalement quelconques, Negotiations és Pays Estrangers,

1628. & de tous autres actes, sans qu'ils en puissent estre recherchez, fors pour les cas execrables, exceptez par les Edicts, & ceux qui peuvent concerner la personne du Roy: Côme pareillement les descharge de toutes fontes de canons, fabrication de Monnoye, saisies & prises de deniers, tant Ecclesiastiques, que Royaux; Ensemble des leuées & contributions ordonnées pour l'entretenement des Gens de guerre, & contraintes decernées contre les absens, mesmes par demolition de leurs maisons. Veut que l'exercice de la Religio soit laissée libre aux Habitans qui en font profession, en l'enclos de la Ville, avec deffense neantmoins à tous autres de ladite Religion d'y venir habiter de nouveau, s'ils n'y auoient demeuré auant la descente des Anglois. Que la Ville deuenüe taillable seroit abonie à Quatre mille liures en faueur du Commerce. Que les Fortifications tant anciennes que nouvelles seroient demolies & rasées rez pied rez terre, sauf depuis la Porte de S. Nicolas iusqu'à la Tour de la Lanterne, ioignant la Porte des deux Moulins, qui est le costé de la mer: Et que la Police seroit administrée par deux Conseillers & quatre Bourgeois selon la nominatiō qu'il



enferoit chacun an.

Cét ordre establi, le Roy, avec toute sa Cour, & grand nombre de Seigneurs, & Noblesse, sur les sept à huit heures du matin, monta à cheual pour s'en retourner à Paris, & laissa Monsieur de Vignolles avec quatre Regimens; à sçauoir ceux de Chappes, du Pleffis Praslin, Castelbayard, & la Meilleraye, pour y demeurer iusques à ce que la Demolition des anciennes & nouvelles Fortifications fust paracheuée. Le seiour du Roy à ce second voyage fut de six mois vingt & cinq iours, & tint la Ville assiegée, à conter depuis le quatorzième d'Aoust mil six cens vingt sept, auquel Monsieur le Duc d'Angoulesme vint prendre son logement à Estré, iusqu'au trentième Octobre mil six cens vingt huit, auquel le mesme entra avec Messieurs les Mareschaux de Schomberg & de Marillac, vn an deux mois & saize iours. C'est ainsi qu'à fini le Siege de cette tant celebre Rochelle, qui par l'espace d'environ soixante & dix ans auoit tant exercé la France, & arresté les yeux d'une grande partie de l'Europe.

Nonc  
bre.

F I N.



*Permission d'Imprimer.*

**N**Ous René de Voyer, Cheualier, Seigneur Dargenson, Conseiller ordinaire au Conseil d'Estat du Roy, Intendant de la Iustice, Police & Finances és Prouinces de Poictou, Xaintonge, Angoumois & Aulnis : Apres auoir leu le present liurę intitulé, *Journal des choses plus memorables qui se sont passées au dernier Siege de la Rochelle*, Par Pierre Meruault Rochelois, dans lequel nous n'auons rien trouué qui puisse preiudicier à la Religion Apostolique & Romaine, ni au Gouvernement de l'Estat. Nous auons permis & permettons d'imprimer ledit liure en telles Marges, Lettres, Carracteres & Papier que bon semblera audit Pierre Meruault; en vertu de laquelle Permission, Nous faisons tres expresses deffences à toutes personnes d'apporter aucun empeschement à l'execution de ces presentes, Fait à la Rochelle le 28. Iuillet 1644.

Signé, DE VOYER DARGENSON.

Par Mondit Sieur,

B R Y.

---

Acheué d'Imprimer le 8. iour  
d'Auril 1648.





